

隋文纪

梅鼎祚

文硕阁

wenshuoge.com

目录

关于我们	3
提要	5
隋文纪卷一	6
隋文纪卷二	26
隋文纪卷三	45
隋文纪卷四	57
隋文纪卷五	68
隋文纪卷六	88
隋文纪卷七	103
隋文纪卷八	119

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

【臣】等谨案隋文纪八卷明梅鼎祚编隋氏混一南北凡齐周之故老梁陈之旧臣咸荟粹一朝成文章之总汇而人沿旧习风尚各殊故著作之林不名一格四十余载竟不能自为体裁又世传小说唐代为多而仁寿大业去唐最近遗篇琐语真赝相参不能无所附会故鼎祚所录此集又最糅杂其中如隋遗录开河记迷楼记海山记大业拾遗记皆出依托而王度古镜记尤为迂怪不经搜神异苑之末流睽车夷坚之先路岂可登之总集自秽其书又如甲秀堂帖载炀帝跋曹子建墨迹唐以来收藏赏鉴皆所未闻词防凡庸显出近代而一概阑入未免失于鉴裁至于唐高祖太宗褚亮李靖陈叔达温大雅魏征诸人不系于隋无烦拟议乃以其文作于隋末遂尔兼收而李德林代静帝之诏作于周时颜之推请考乐之奏上于梁代前则文随人编后则人随文列揆以断限厥例安居若文帝复姓令之误采史文李德林之修定五礼诏题为文帝祖君彦移郡县书与袁子干书魏征与郇王庆书皆题为李密孔德昭遗秦王书题为窦建德以及罪蜀王秀文已见一卷复见二卷戴逵皇太子箴已见五卷复见七卷又诸集之通病在所不论矣八卷之末载梁神珣等十二人盖鼎祚文纪以此集为终神珣等时代未详故统附于此合观所录虽抵牾罅漏卷卷有之然上起古初下穷八代旁搜博采荟合成编使唐以前之文章源委相承粲然可考斯实菰苑之大观其功亦不为过掩矣鼎祚尚编有释文纪裒集唐以前禅观之文较明集明续集尤为赅博别着录子部释家类中兹不列焉乾隆四十五年四月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

隋文纪卷一

明 梅鼎祚 编

文帝【姓杨名坚 农华陰人父忠仕西魏有功赐姓普六茹氏入周封隋国公帝袭爵复姓杨为天丞相进封隋王篡周国号隋都长安在位二十四年仁寿四年七月为太子广所弑庙曰高祖】

与源雄书【高祖为丞相尉迟回作乱时雄检校徐州总管家累相州迴潜以书诱之雄卒不顾高祖遗雄书雄遣击迴将毕义绪席毗悉平之】

公妻子在邳城虽言离隔贼徒翦灭聚防非难今日已后不过数旬之别迟能开慰无以累怀徐部大蕃东南襟带密迩吴寇特须安抚借公英畧委以边谋善建功名用副朝委也

与贺娄子干手书【子干为秦州刺史尉迟迴作乱子干与宇文述等击破之高祖大悦与之手书】

逆贼尉迟敢遣蚁众作寇怀州公受命诛讨应机荡涤闻以嗟賛不易可言丈夫富贵之秋正在今日善建功名以副朝望也

复姓令【周大定元年帝时为相国进封隋王】

以前赐姓皆复其旧

前代品爵依旧诏【开皇元年】

自古帝王受终革代建侯锡爵多与运迁朕应篆受图君临海内载怀沿革事有不同然则前帝后王俱在兼济立功立事爵赏仍行苟利于时其致一揆何谓物我之异无计今古之殊其前代品爵悉可依旧

议袞冕服色诏【元年】

宣尼制法云行夏之时乘殷之辂奕叶共遵理无可革然三代所尚众论多端或以为所建之时或以为所感之瑞或当其行色因以從之今虽夏数得天厯代通用汉尚于赤魏尚于黄骊马 牲已弗相踵明不可改建寅歲首常服于黑朕初受天命赤雀来仪兼姬周已还于兹六代三正回复五德相生总以言之并宜火色垂衣已降损益可知尚色虽殊常兼前代其郊丘庙社可依袞冕之仪朝会衣裳宜尽用赤昔丹乌木运姬有大白之旂黄星土德曹乘黑首之马在祀与戎其尚恒异今之戎服皆可尚黄在外常所著者通用杂色祭祀之服须合礼经宜集通儒更可详议

太子庶子摄太常少卿裴正奏

窃见后周制冕加为十二既与前礼数乃不同而色应五行又非典故谨案三代之冠其名各别六等之冕承用区分璫玉五采随班异饰都无迎气变色之文唯月令者起于秦代乃有青旂赤玉白骆黑衣与四时而色变全不言于弁冕五时冕色礼既无文稽于正典难以经证且后魏已来制度咸阙天兴之歲草创缮修所造车服多参胡制故魏收论之称为违古是也周氏因袭将为故事大象承统咸取用之輿輶衣冠甚多迂怪今皇隋革命宪章前代其魏周輶輶不合制者已敕有司尽令除废然衣冠礼器尚且兼行乃有立夏袞衣以赤为质迎秋平冕用白成形既越典章须革其谬谨案续汉书礼仪志云立春之日京都皆着青衣秋夏悉如其色逮于魏晋迎气五郊行礼之人皆同此制考寻故事唯帻从衣色今请冠及冕并用 唯应着帻者任依汉晋

更定新律诏【元年诏尚书左仆射高颍等更定新律奏上颁行】

帝王作法防革不同取适于时故有损益夫绞以制毙斩则殊刑除恶之体于斯已极梟首輶身义无所取不益惩肃之理徒表安忍之怀鞭之为用残剥肤体彻骨侵肌酷均齑切虽云远古之式事乖仁者之刑梟輶及鞭并令去也贵砺带之书不当徒罚广轩冕之荫防及诸亲流役六年改为五载刑徒五歲变从三祀其余以轻代重化死为生条目甚多备于简策宜班诸海内为时轨范杂格严科并宜除削先施法令欲人无犯之心国有常刑诛而不怒之义措而不用庶或非遠万方百辟知吾此怀

建都邑诏【二年六月】

朕只奉上 君临万国属生人之敝处前代之宫常以为作之者劳居之者逸改创之事心未遑也而王公大臣陈谋献策咸云羲农以降至于姬刘有当代而屡迁无革命而不徙曹马之后时见因循乃末代之宴安非往圣之宏义此城从汉雕残日久屡为战场旧经丧乱今之宫室事近权宜又非谋筮徙 瞻星揆日不足建皇王之邑合大众所聚论变通之数具幽显之情同心固请词情深切然则京师百官之府四海归向非朕一人之所独有苟利于物其可违乎且殷之五迁恐人尽死是则以吉凶之土制长短之命谋新去故如农望秋虽暂劬劳其究安宅今区宇宁一阴阳顺序安安以迁勿怀胥怨龙首山川原秀丽卉物滋阜卜食相土宜建都邑定鼎之基永固无穷之业在斯公私府宅规模遠近营构资费随事条奏【代北史并作世死作怨望作与条奏作修葺】

范台玫假湘州刺史诏【三年七月】

行仁蹈义名教所先厉俗敦风宜见褒獎往者山东河表经此妖乱孤城遠守多不自全济阴太守杜猷身陷贼徒命悬寇手郡省事范台玫倾产营防免其戮辱眷言诚节实有可嘉宜超恒赏用明沮劝台玫可大都督假湘州刺史

发使巡省风俗诏【三年】

朕君临区宇深思治术欲使生人从化以德代刑求草莱之善旌闾里之行民间情伪咸欲备闻已诏使人所在賑恤扬鑣分路将遍四海必令为朕耳目如有文武才用未为时知宜以礼发遣朕将銓擢其有志节高妙越等超伦亦仰使人就加旌异令一行一善獎劝于人遠近官司遐迩风俗巨细必纪还日奏闻庶使不出户庭坐知万里

施用新厯诏【四年二月华州刺史张宾与仪同刘晖等议造新厯奏上下诏】

张賓等存心筭数通洽古今每有陈闻多所啓沃毕功表奏具已披览使后月复育不出前晦之宵前月之余罕留后朔之旦減朏就朏悬殊旧准月行表里厥途乃异日交弗食由循阳道验时转筭不越纤豪逖聽前修斯秘未啓有一于此实为精密宜颁天下依法施用

开漕渠诏【四年】

京邑所居五方輻辳重關四塞水陆艰难大河之流波澜东注百川海渎万里交通虽三门之下或有危虑若发自小平陆运至陝还從河水入于渭川兼及上流控引汾晋舟车来去为益殊广而渭川水力大小无常流浅沙深即成阻阂计其途路数百而已动移气序不能徃复泛舟之役人亦劳止朕君临区宇兴利除害公私之弊情实愍之故东发潼關西引渭水因借人力开通漕渠量事计功易可成就已令工匠巡歷渠道观地理之宜审终久之义一得开凿万代无毀可使官及私家方舟巨舫晨昏漕运防泝不停旬日之功堪省亿万诚知时当炎暑动致疲勤然不有暂劳安能永逸宣告人庶知朕意焉

废律官诏【五年先置律博士弟子员有律生舞文陷侍官反坐者帝闻下诏】

人命之重悬在律文判定科条俾令易晓分官命职恒选循吏小大之狱理无疑舛而因袭徃代別置律官报判之人推其为首杀生之柄常委小人刑罚所以未清威福所以妄作为政之失莫大于斯其大理律博士尚书刑部曹明法州县律生并可停废

伐陈诏【八年】

昔有苗不賓唐尧薄伐孙皓僭虐晋武行诛有陈窃据江表逆天暴物朕初受命陈頊尚存思欲教之以道不以龚行为令往来修睦望其迁善时日无几豐恶已闻厚纳叛亡侵犯城戍勾吴闽越肆厥残忍于时王师大举将一车书陈頊反地收兵深怀震惧责躬请约俄而致殒矜其丧祸仍诏班师叔寶承风因求继好载伫克念共敦行李每见珪璋入朝輶轩出使何尝不殷勤晓喻戒以惟新而狼子之心出而弥野威侮五行怠弃三正诛翦骨肉夷灭才良据手掌之地恣溪壑之险劫夺閭阎资产俱竭驱防内外劳役弗已征责女子擅造宫室日增月益止足无期帷薄嫔嬙有逾万数寶衣玉食穷奢极侈淫声乐饮俾书作夜斩直言之客灭无罪之家剖人之肝分人之血欺天造恶祭鬼求恩歌儺衢路酣醉宫闕盛粉黛而执干戈曳罗綺而

呼警蹕跃马振防从旦至昏无所经营驰走不息负甲持仗随逐徒行追而不及即加罪谴自古昏乱罕或能比介士武夫饥寒力役筋髓罄于土木性命俟于沟渠君子潜逃小人得志家家隱杀戮各各任聚斂天灾地孽物怪人妖衣冠钳口道路以目倾心翹足誓告于我日月以冀文奏相寻重以背德违言摇荡疆场巴峡之下海澨已西江北江南为鬼为 死陇穷发掘之酷生居极攘斂之苦抄掠人畜断截樵苏市井不立农事废寢厯阳广陵窥觐相继或谋图城邑或刼剥吏人昼伏夜遊鼠窜狗盜彼则羸兵敝卒来必就擒此则重门设险有劳藩捍天之所覆无非朕臣每關聽覽有怀伤恻有梁之国我南藩也其君入朝潜相招诱不顾朕恩士女深迫胁之悲城府致空虚之叹非直朕居人上怀此无忘既而百辟屡以为言兆庶不堪其请岂容对而不诛忍而不救近日秋始谋欲吊人益部楼船尽令东骛便有神龙数十腾跃江流引伐罪之师向金陵之路船住则龙止船行则龙去四日之内三军皆覩岂非苍旻爱人幽明展事降神先路协贊军威以上天之灵助戡定之力便可出师授律应机诛殄在斯举也永清吴越其将士粮仗水陆资须期防进止一准别敕

平陈后诏【九年四月】

往以吴越之野羣黎涂炭干戈方用积习未宁今率土大同含生遂性太平之法方可流行凡我臣僚澡身浴德开通耳目宜从兹始丧乱已来缅将十载君无君德臣失臣道父有不慈子有不孝兄弟之情或薄夫妇之义或违长幼失序尊卑错乱朕为帝王志存爱养时有臻道不敢宁息内外职位遐迩黎人家家自修人人克念使不轨不法荡然俱尽兵可立威不可不戢刑可助化不可专行禁卫九重之余镇守四方之外戎旅军器皆宜停罢伐路既夷羣方无事武力之子皆可学文人间甲仗悉皆除毁有功之臣降情文艺家门子侄各守一经今海内翕然高山仰止京邑庠序爰及州县生徒受业升进于朝未有灼然明经高第此则教训不笃考课未精明勒所由隆兹儒训官府從宦丘园素士心迹相表寬 为念勿为局促乖我皇猷朕君临区宇于兹九载开直言之路披不讳之心形于顏色劳于兴寢自顷逞艺论功昌言乃众推誠切諫其事甚疎公卿士庶非所望也各啓至誠匡茲不逮见善必进有才必举无或噤嘿退有后言頒告天下咸悉此意

禁请登封诏【九年六月羣臣以平陈咸请封禪不许】

岂可命一将军除一小国遐迩注意便谓太平以薄德而封名山用虚言而干上帝非朕攸闻而今以后言及封禪宜即禁絕

议乐诏【九年】

朕祇承天命清荡万方百王衰敝之后兆庶浇浮之日圣人遗训扫地俱尽制礼作乐今也其时朕情存古乐深思雅道郑卫淫声鱼龙杂戏乐府之内尽以除之今欲更调律吕改张琴瑟且妙术精防非因教习工人代掌止传糟粕不足达神明之德论天地之和区域之间奇才异艺天知神授何代无哉盖晦迹于非时俟昌言于所好宜可搜访速以奏闻庶覩一艺之能共就九成之业

罢神置军府诏【十年五月】

魏末丧乱防县 分役车歲动未遑休息兵士军人权置坊府南征北伐居处无定家无完堵地罕包桑恒为流寓之人竟无乡里之号朕甚愍之凡是军人可悉属州县垦田籍帐一与民同军府统领宜依旧式罢山东河南及北方縁边之地新置军府【一与民同北史作一同编戸】

减租诏【十二年】

既富而教方知防耻宁积于人无藏府库河北河东今年田租三分减一兵减半功调全免

施用新乐诏【十四年四月】

在昔圣人作乐崇德移风易俗于斯为大自晋氏播迁兵戈不息雅乐流散年代已多四方未一无由辨正頼上天鉴临明神降福拯兹涂炭安息苍生天下大同归于治理遗文旧物皆为国有比命所司总令研究正乐雅声详考已讫宜即施用见行者停人间音乐流僻日久弃其旧体竞造繁声浮宕不归遂以成俗宜加禁约务存其本【所司北史作有司详考作详定】

脩三国祀诏【十四年闰十月】

齐梁陈徃皆创业一方绵歴年代既宗祀废絶祭奠无主兴言矜念良以怆然莒国公萧琮及高仁英陈叔寶等宜令以时修其祭祀所须器物有司给之

义仓诏【十五年】

本置义仓止防水旱百姓之徒不思久计轻尔费损于后乏絶又北境诸州异于余处云夏长灵盐兰丰鄯凉甘 等州所有义仓杂种并纳本州若人有旱俭少粮先给杂种及逐年粟

职官决罪诏【十七年】

分职设官共理时务班位高下各有等差若所在官人不相敬惮多自寛縱事难克举诸有殿失虽备科条或据律乃轻论情则重不即决罪无以惩肃其诸司论属官若有愆犯聽于律外斟酌决杖

省庙乐诏【十七年十月】

昔五帝异乐三王殊礼皆随事而有损益因情而立节文仰惟祭享宗庙瞻敬如在罔极之感情深兹日而礼毕升路鼓吹发音还入宫门金石振响斯则哀乐同日心事相违情所不安理实未允宜改兹徃式用 礼教自今以后享庙日不须备鼓吹殿庭勿设乐悬在庙内及诸祭

依旧其王公已下祭私庙日不得作音乐

李穆等世禄诏【十七年】

周历告终羣凶作乱豐起蕃服毒被生人朕受命上 廓清区宇圣灵垂祐文武同心申明公穆郎襄公孝寬广平王雄蒋国公睿楚国公勣齐国公颢越国公素鲁国公庆则新宁公长义宜阳公世积赵国公罗云陇西公询广业公景真昌公振沛国公译项城公子相钜鹿公子干等登庸纳揆之时草昧经纶之日丹诚大节心尽帝图茂绩殊勲力宣王府宜 其门绪与国同休其世子世孙未经州任者宜量才升用庶享荣位世禄无穷

禁大船诏【十八年正月】

吴越之人徃承敝俗所在之处私造大船因相聚结致有侵害其江南诸州人间有船长三丈已上悉括入官

战亡入墓诏【仁寿元年正月】

君子立身虽云百行唯诚与孝最为其首故投主殉节自古称难殒身王事礼加二等而代俗之徒不达大义至于致命戎旅不入兆域亏孝子之意伤人臣之心兴言念此每深愍叹且入庙祭祀并不废阙何止坟莹独在其外自今已后战亡之徒宜入墓域【投主北史作投生代作世】

减省国学胄子诏【元年】

儒学之道训教生人识父子君臣之义知尊卑长幼之序升之于朝任之以职故能賛理时务益风范朕抚临天下思 德教延集学徒崇建庠序开进仕之路伋贤儁之人而国学胄子垂将千数州县诸生咸亦不少徒有名録空度歲时未有德为代范才任国用良由设学之理多而未精今宜简省明加獎勵

修定五礼诏【二年 李德林撰】

礼之为用时义大矣黄琮苍璧降天地之神粢盛牲食展宗庙之敬正父子君臣之序明婚姻丧纪之节故道德仁义非礼不成安上治人莫善于礼自区宇乱离縣歷年代王道衰而变风作防言絶而大义乖与代推移其弊日甚至于四时郊祀之节文五服麻葛之隆杀是非异說踳駁殊涂致使圣教凋讹轻重无准朕祇承天命抚临生人当洗滌之时属干戈之代克定祸乱先运武功删正彝典日不暇给今四海乂安五戎勿用理宜 风训俗导德齐礼綴往圣之旧章兴先王之茂则尚书左仆射越国公杨素尚书右仆射邳国公苏威吏部尚书奇章公牛内史侍郎薛道衡秘书丞许善心内史舍人虞世基著作郎王劼或任居端揆博达古今或器推令望学综经史委以裁缉实允佺议可并修定五礼

丧礼诏【三年】

礼云至亲以菽断盖以四时之变易万物之更始故圣人象之其有三年加隆尔也但家无二尊母为厌降是以父存丧母还服于菽者服之正也岂容菽内而更小祥然三年之丧而有小祥者礼云菽祭礼也菽而除丧道也以是之故虽未再菽而天地一变不可不祭不可不除故有练焉以存丧祭之本然菽丧有练于理未安虽云十一月而练乃无所法象非菽非时岂可除祭而儒者徒拟三年之丧立练禫之节可谓苟存其变而失其本欲渐于夺乃薄于丧致使子则冠练去经黄里緇缘经则布葛在躬羸服未改岂非经衰尚存子情已夺亲疎失伦轻重颠倒乃不顺人情岂圣人之意也故知先圣之礼废于人邪三年之丧尚有不行者至于祥练之节安能不坠者乎礼云父母之丧无贵贱一也而大夫士之丧父母乃贵贱异服然则礼坏乐崩由来渐矣所以晏平仲之斩羸褫其老谓之非礼滕文公之服三年其臣咸所不欲盖由王道既衰诸侯异政将逾越于法度恶礼制之害已乃灭去篇籍自制其宜遂至骨肉之恩轻重从俗无易之道隆杀任情况孔子没而防言隐秦灭学而经籍焚者乎有汉之兴虽求儒雅人皆异说义非一贯又近代乱离唯务兵革其于典礼时所未遑夫礼不从天降不从地出乃人心而已者谓情缘于恩也故恩厚者其礼隆情轻者其礼杀圣人以是称情立文别亲疎贵贱之节自臣子道消上下失序莫大之恩逐情而薄莫重之礼与时而杀此乃服不称丧容不称服非所谓圣人缘恩表情制礼之义也然丧与易也宁在于戚则礼之本也礼有其余未若于哀则情之实也今十一月而练者非礼之本非情之实由是言之父存丧母不宜有练但依礼十三月而祥中月而禫庶以合圣人之意达孝子之心【存北史作在隆杀作降杀莫重之礼作莫重之化】

搜扬贤哲诏【三年】

日往月来唯天所以运序山镇川流唯地所以宣气运序则寒暑无差宣气则云雨有作故能成天地之大德育万物而为功况一人君于四海睹物欲运独见致治不借羣才未之有也是以唐尧钦明命羲和以居岳虞舜叡德升元凯而作相伊尹鼎俎之媵为殷之阿衡吕望渔钓之夫为周之尚父此则鸣鹤在阴其子必和风云之从龙虎贤哲之应圣明君德不回臣道以正故能通天地之和顺阴阳之序岂不由元首而有股肱乎自王道衰人风薄居上莫能公道以御物为下必踵私法以希时上下相防君臣义失义失则政乖政乖则人困盖同德之风难嗣离德之轨易追则任者不休休者不任则众口铄金戮辱之祸不测是以行歌避代辞位灌园卷而可怀黜而无愠放逐江湖之上沈赴河海之流所以自洁而不悔者也至于闾阎秀异之士乡曲博雅之儒言足以佐时行足以励俗遗弃于草野堙灭而无闻岂胜道哉所以览古而叹息者也方今区宇一家烟火万里百姓乂安四夷賓服岂是人功实乃天意朕惟夙夜祗惧将所以上嗣明灵是以小心励已日慎一日以黎元在念忧兆庶未康以庶政为怀虑一物失所虽求傅岩莫见幽人徒想崆峒未闻至道唯恐商歌于长夜抱闕于夷门遠迹盐筑之间屈身僮仆之伍其令州县搜扬贤哲皆取明知今古通识治乱究政教之本达礼乐之源不限多少不得不举限以三旬咸令进路征召将送必须以礼

广平王雄拜司空册书【雄高祖族子为右卫大将军进封广平王寬容得众高祖忌之不欲

其典兵马乃下册书拜司空】

维开皇九年八月朔壬戌皇帝若曰于戏惟尔上柱国左卫大将军宗正卿广平王风度寬位望隆显爰司禁旅縣厯十载入当心腹外任爪牙驱驰轩陛勤劳著绩念旧庸勲礼秩加等公辅之寄民具尔瞻宜竭乃诚副兹名实是用命尔为司空往钦哉光应宠命得不慎欤

禁朝贡东宫诏【冬至百官朝太子勇勇张乐受贺高祖以殊乖礼制下诏】

礼有等差君臣不杂爰自近代圣教渐亏俯仰逐情因循成俗皇太子虽居上嗣义兼臣子而诸方岳牧正冬朝贺任土作贡别上东宫事非典则宜悉停断

废太子勇诏【晋王广欲夺嫡与杨素谋潜太子废之高祖戎服陈兵御武德殿命薛道衡宣废勇之诏下诏诛责其党元旻等】

太子之位实为国本苟非其人不可虚立自古储副或有不才长恶不悛仍令守器皆由情溺宠爱失于至理致使宗社倾亡苍生涂地由此言之天下安危系乎上嗣大业传世岂不重哉皇太子勇地则居长情所钟爱初登大位即建春宫冀德业日新隆兹负荷而性识庸闇仁孝无闻昵近小人委任奸佞前后愆愆难以具纪但百姓者天之百姓朕恭膺天命属当安育虽欲爱子实畏上灵岂敢以不肖之子而乱天下勇及其男女为王公主者并可废为庶人顾惟兆庶事不获已兴言及此良深愧叹

罪元旻等诏

自古以来朝危国乱皆邪臣佞媚凶党扇惑致使祸及宗社毒流兆庶若不标明典宪何以肃清天下左卫大将军五原郡公元旻任掌兵衛委以心膺陪侍左右恩宠隆渥乃包藏奸伏离间君亲崇长厉阶最为魁首太子左庶子唐令则策名储贰位长宫僚谄曲取容音技自进躬执乐器亲教内人賛成骄侈导引非法太子家令邹文腾专行左道偏被亲昵心腹委付钜细關知占问国家希覬灾祸左卫率司马夏侯福内事谄谀外作威势凌侮上下防渎宫闈典膳监元淹谬陈爱憎开示怨隙妄起讪谤潜行离阻进引妖巫营事厌禱前吏部侍郎萧子寶往居省阁旧非宫臣稟性浮躁用怀轻险进画奸谋要射荣利经营间构开造祸端前主玺下士何竦假托 象妄說妖怪志图祸乱心在速发兼制奇器异服皆竦规摹增长骄奢糜费百姓凡此七人为害乃甚并处斩妻妾子孙皆悉没官车骑将军阎毗东郡公崔君绰游骑尉沈福寶瀛州民章仇太翼等四人所为之事皆是悖恶论其状迹罪合极刑但朕情存好生未能尽戮可并特免死各决杖一百身及妻子资财田宅悉可没官副将作大匠高龙又豫追番丁輒配东宫使役营造亭舍进入春坊率更令晋文建通直散骑侍郎判司农少卿事元衡料度之外私自出给虚破丁功擅割园地并处自尽【兵卫北史作禁兵乃甚作斯甚】

罪蜀王秀诏【秀镇蜀奢侈违度又不平太子勇之废晋王广立为太子阴令杨素求其罪而潜之废为庶人高祖下诏】

汝地居臣子情兼家国庸蜀要重委以镇之汝乃干纪乱常怀恶乐祸睥睨二宫伫望灾沴容纳不逞结构异端我有不和汝便觐望我不起便有异心皇太子汝兄也次当建立汝假托妖言乃云不终其位妄称鬼怪又道不得入宫自言骨相非人臣德业堪承重器妄道青城出圣欲以已当之诈称益州龙见托言吉兆重述木易之姓更治成都之宫妄说禾乃之名以当八千之运横生京师妖异以证父兄之灾妄造蜀地征祥以符已身之策汝岂不欲得国家恶也天下乱也辄造白玉之珽又为白羽之箭文物服饰岂似有君鸞集左道符书厌镇汉王于汝亲则弟也乃画其形像书其姓名缚手钉心枷鎖杻械仍云请西岳华山慈父圣母神兵九亿万骑收杨谅魂神闭在华山下勿令散荡我之于汝亲则父也复云请西岳华山慈父圣母赐为开化杨坚夫妻回心欢喜又画我形像缚首撮头仍云请西岳神兵收杨坚魂神如此形状我今不知杨谅杨坚于汝何亲也包藏凶慝图谋不轨逆臣之迹也希父之灾以为身幸贼子之心也怀非分之望肆毒心于兄悖弟之行也嫉妬于弟无恶不为无孔怀之情也违犯制度坏乱之极也多杀不辜豺狼之暴也剥削民庶酷虐之甚也唯求财货市井之业也专事妖邪顽嚚之性也弗克负荷不材之器也凡此十者灭天理逆人伦汝皆为之不祥之甚也欲免祸患长守富贵其可得乎【治北史作修】

下李穆诏【穆仕周为并州总管大左辅尝奉十三环金带于高祖盖天子之服也寻以天命有在密表劝进高祖既受禅乃下诏】

公既旧德且又父党敬惠来旨义无有违便以今月十三日恭膺天命

答李穆乞骸诏【穆拜太师上表乞骸骨高祖诏之】

朕初临防内方借嘉猷养老乞言实怀虚想七十致仕本为常人至若吕尚以期颐佐周张苍以华皓相汉高才命世不拘恒礼迟得此心留情规训公年既耆旧筋力难烦今勒所司敬饬朝集如有大事须共谋谟别遣侍臣就第询访

褒李穆诏

礼制凡品不拘上智法备小人不防君子太师上柱国申国公器宇深风猷遐旷社稷佐命公为称首位极帅臣才为人杰万顷不测百链弥精乃无伯玉之非岂有顔回之貳故以自居寥廓弗闕宪网然王者作教惟旌善人去法道示崇年德自今已后虽有愆罪但非谋逆纵有百死终不推问

报梁睿诏【睿字恃德安定乌氏人仕周位柱国入隋为益州总管还京师谢病于家睿为益州总管以平王谦进上柱国及高祖受禅复上平陈之防帝下诏答之睿乃止】

公英风震动妙筭縱横清荡江南宛然可见循环三复但以欣然公既上才若总戎律一举大定固在不疑但朕初临天下政道未洽恐先穷武事未为尽善昔公孙述隗嚣汉之贼也光武与其通和称为皇帝尉佗之于高祖初犹不臣孙皓之答晋文书尚云白或寻欵服或即灭亡

王者体大义存遵养虽陈国来朝未尽藩节如公大略诚须责罪尚欲且缓其诛宜知此意淮海未灭必兴师旅若命永袭终当相屈想以身许国无足致辞也

诛刘昉诏【昉周末仕小御正与郑译引高祖辅政有佐命之功中被疎遠与梁士彦宇文忻等忿谋反下诏诛之】

朕君临四海慈爱为心加以起自布衣入升皇极公卿之内非亲则友位虽差等情皆旧人护短全长恒思覆育每殷勤戒约言无不尽天之厯数定于杳冥岂虑包藏之心能为国家之害欲使其长守富贵不触刑书故也上柱国郕国公梁士彦上柱国杞国公宇文忻柱国舒国公刘昉等朕受命之初并展勤力酬勲报效荣高禄重待之既厚爱之实隆朝夕宴言备知朕意但心如礮壑志等豺狼不荷朝恩忽谋逆乱士彦爰始幼来恒自诬防称有相者云其应策年过六十必据九五初平尉迥暂临相州已有反心彰于行路朕即遣人代之不声其罪入京之后逆意转深忻昉之徒言相扶助士彦许率僮仆尅期不遠欲于蒲州起事即断河桥捉黎阳之關塞河阳之路刼调布以为牟甲募盗贼而为战士就食之人亦云易集轻忽朝廷嗤笑官人自谓一朝奋发无人当者其第二子刚每常苦谏第三子叔谐固深劝獎朕既闻知犹恐枉濫乃授晋部之任欲验蒲州之情士彦得以欣然云是天賛忻及昉等皆贺时来忻往定邺城自矜不已位极人臣犹恨赏薄云我欲反何虑不成怒色忿言所在流布朕深念其功不计其礼任以武侯授以领军寄之爪牙委之心腹忻密为异计树党宫闈多奏亲友入参宿卫朕推心待物言必依许为而弗止心迹渐彰仍解禁兵令其改悔而志规不逞愈结于怀乃与士彦情意偏厚要请神明誓不负约俱营贼逆逢则交谋委彦河东自许關右蒲津之事即望从征两军结东西之旅一举合连横之势然后北破晋阳还图宗社昉入佐相府便为非法三度事发二度其妇自论常云姓是卯金刀名是一万日刘氏应王为万日天子朕训之导之示其利害每加以寬宥望其修改口请自新志存如旧亦与士彦情好深重逆节奸心尽探肝鬲尝共士彦论太白所犯问东井之间思秦地之乱访轩辕之里愿宫掖之灾唯待蒲坂事兴欲在关内应接残贼之防千端万绪惟忻及昉名位并高宁肯北面曲躬臣于士彦乃是各怀不逊图成乱阶一得扰攘之基方逞吞并之事人之奸诈一至于此虽国有常刑罪在不赦朕载思艸创咸着厥诚情用愍然未忍极法士彦忻昉身为谋首叔谐賛成父意义实难容并已处尽士彦忻昉兄弟叔侄特恕其命有官者除名士彦小男女忻母妻女及小男并放士彦叔谐妻妾及资财田宅忻昉妻妾及资财田宅悉没官士彦昉儿年十五以上遠配上仪同薛摩儿是士彦交旧上柱国府户曹防军事裴石达是士彦府僚反状逆心巨细皆委薛摩儿闻语仍相应和俱不申陈宜从大辟问即承引颇是恕心可除名免死朕握图当纂六载于斯政事徒勤淳化未洽兴言軫念良深叹愤【亲北史作交从征作从征讨】

郑译除名诏【译亦以被疎坐告厌蛊又与母别居为宪司所劾下诏除名】

译嘉谋良策寂尔无闻鬻狱卖官沸腾盈耳若留之于世在人为不道之臣戮之于朝入地为不孝之鬼有累幽显无以置之宜赐以孝经令其熟读

劳豆卢勣诏【勣为利州总管王谦之乱出奇兵击之高祖遣劳】

勳器识优长气调英逵总驭藩部风化已行巴蜀称兵奄来围逼入守出战大摧凶丑贞节雄规厥功甚茂可使持节上柱国赐一子爵中山县公

豆卢勳加邑封诏

上柱国楚国公勳蜀人寇乱之日称兵犯顺固守金汤隱如敌国嘉猷大节其劳已多可食始州临津县邑千户

诛郢国公王谊诏【谊前代旧臣高祖甚加礼敬后以失意怨望赐死】

谊有周之世早豫人伦朕共游庠序遂相亲好然性怀险薄巫覡盈门鬼言怪语称神道圣朕受命之初深存诚约口云改悔心实不悛乃說四天王神道谊应受命书有谊防天有谊星桃鹿二川岐州之下歲在辰巳兴帝王之业密令卜问伺殿省之灾又说其身是明王信用左道所在诳误自言相表当王不疑此而赦之将或为乱禁暴除恶宜伏国刑

与元谐敕【吐骨浑寇凉州谐为行军元帅击之上敕谐俘斩万计其名王公侯皆来降诏加赏典】

公受朝寄总兵西下本欲自宁疆境保全黎庶非是贪无用之地害荒服之民王者之师意在仁义浑贼若至界首者公宜晓示以德临之以教谁敢不服也

元谐加赏诏

褒善畴庸有闻前载谐识用明达神情警悟文规武畧誉流朝野申威拓土功成疆場深谋大节实简朕心加礼延代宜隆赏典可柱国别封一子县公

赐元孝矩玺书【孝矩拜寿州总管帝赐玺书】

杨越氛祲侵軼边鄙争桑兴役不识大猷以公志存遠略今故镇边服怀柔以礼称朕意焉

与元孝矩书【孝矩为寿州总管时陈将任蛮奴等屡寇江北复以孝矩领行军总管屯兵江上后数载以年老不堪军旅表乞骸骨转泾州刺史高祖下书歲余卒官】

知执谦防请归初服防膺寶命实賴元功方欲委裘寄以分陝何容便请高蹈独为君子者乎若以边境务烦即宜徙节泾郡养德卧治也

征张羨书【羨仕周雍州刺史仪同三司入为司成中大夫典国史以年老致仕及高祖受禅钦其德望以书征之与同坐宴语赐以几杖 羨载张奭传乃奭父也尺牘竟作征奭书误】

朕初临四海思存政术旧齿名贤实怀勤伫仪同昔在周室德业有闻虽云致仕犹克壮年即宜入朝用副虚想

诏答宇文庆【庆字神庆河南洛阳人周上大将军加柱国入隋历凉州总管征还庆开皇初拜武卫将军进上柱国除凉州总管征还初上潜龙时尝从容与庆言及天下事未几上言皆验及此庆恐上遗忘欲见旧防恩顾具录前言上表奏之诏答】

朕之与公本来亲密怀抱委曲无所不尽话言岁久尚能记忆今览表奏方悟昔谈何谓此言遂成实录古人之先知祸福明可信也朕言之验自是偶然公乃不忘弥表诚节深感至意嘉尚无已

诏苏威【威字无畏京兆武功人历光禄大夫封房公隋亡入唐卒于家高祖受禅征威拜太子少保俄兼纳言民部尚书威上表陈让诏曰】

舟大者任重马骏者远驰以公有兼人之才无辞多务也

敕苏威

【威为尚书右仆射以母忧去职柴毁骨立上敕之】

公德行高人情寄殊重大孝之道盖同俯就必须抑割为国惜身朕之于公为君为父宜依朕旨以礼自存敕李德林【德林自隋有天下每赞平陈之计开皇八年车驾幸同州德林以疾不徙敕书追之书后御笔注云云及陈平授柱国郡公】

伐陈事意宜自随也

下源雄伐陈册书

于戏唯尔上大将军朔方公雄识悟明允风陈果毅往牧徐方时逢寇逆建旃马邑安抚北蕃嘉谋绝外境之虞挺剑息韦韝之望沙漠以北俱荷恩威吕梁之间防不怀惠但江淮蕞尔有陈僭逆今将董率戎旅清彼东南是用命尔为行军总管往钦哉

下王长述书【长述京兆霸城人周上大将军入隋进位柱国以行军总管道卒开皇初长述为行军总管进位柱国献平陈之计脩营战舰为上流之师上善其能频加赏劳乃下书】

每览高防深相嘉猷命将之日当以公为元帅也

下史祥诏【史祥见后】

【祥拜骠骑将军伐陈从宜阳公王世积以舟师出九江道先锋与陈人合战破之进拔江州上闻而大悦乃下诏】

朕以陈叔寶世为僭逆挺虐生民故命诸军救彼涂炭小寇狼狽顾恃江湖之险遂敢泛舟楫拟抗王师公亲率所部应机奋击沈溺俘获厥功甚茂又闻师旅进取江州行军总管襄邑公贺若弼既获京口新义公韩擒虎寻剋姑熟骠骑既渡江岸所在横行晋王兵马即入建业清荡吴越旦夕非遠骠骑高才壮志是朕所知善为经略以取大赏使富贵功名永垂竹帛也

下晋王广诏

【隋大举伐陈晋王为行军元帅以韩擒虎为先锋宵济袭采石进平金陵执陈后主是时贺若弼为行军总管亦战胜从北掖门入高祖闻而大悦乃下诏晋王又优诏擒虎若弼】

此二公者深谋大略东南逋寇朕本委之静地恤民悉如朕意九州不一已数百年以名臣之功成太平之业天下盛事何用过此闻以欣然实深庆快

优诏韩擒虎贺若弼【擒虎字子通河南东垣人仕周利州刺史若弼字辅伯河阳洛阳人仕周寿州刺史入隋并位上柱国若弼为炀帝所诛】

申国威于万里宣朝化于一隅使东南之民俱出汤火数百年寇旬日廓清专是公之功也高名塞于宇宙盛业光于天壤逖聽前古罕闻其匹班师凯入诚知非遠相思之甚寸陰若歲

诏高颀【颀字昭 一名敏渤海蓆人歷尚书左仆射上柱国炀帝初坐谤讞诛晋王广大举伐陈以颀为元帅长史三军谄稟皆取断于颀及陈平加授上柱国进爵齐国公人有言颀反者高祖命斩之颀又逊位诏曰】

公识鉴通遠器畧优深出参戎律廓清淮海入司禁旅实委心腹自朕受命常与机衡竭诚陈力心迹俱尽此则天降良辅翊贊朕躬幸无词费也

下宇文述诏【述为行军总管伐陈陈主既擒而萧瓛萧岩据东吴之地拥兵拒守述讨之高祖下诏述水陆兼进击瓛大败之岩等请降吴防悉平】

公鸿勲大业名高望重奉国之诚久所知悉金陵之寇既已清荡而吴防之地东路为遥萧岩萧瓛并在其处公率将戎旅抚慰彼方振扬国威宣布朝化以公明畧乘胜而往风行电扫自当稽服若使干戈不用黎庶获安方副朕怀公之力也

遗韦洸书【洸伐陈平拜江州总管畧定九江击豫章大破之高梁女子洸氏率众迎洸遂进图岭南上遗洸书洸至广州岭表皆定拜广州总管】

公鴻勲大業名高望重率將戎旅撫慰彼方風行電掃咸應稽服若使干戈不用兆庶獲安方副朕懷是公之力

詔韋冲【冲拜石州刺史母忧去職俄起南寧州總管持節撫慰復遣柱國王長述以兵繼进冲上表固让高祖詔冲暨南寧渠帥饒震及西饒首領皆詣府參謁下詔褒揚之】

西南夷裔屢有生梗每相殘賊朕甚愍之已命戎徒清撫邊服以開府器干堪濟識畧英遠軍旅事重故以相任知在艱疚日月未多金革奪情盖有通式宜自抑割即膺往旨

勞李安詔書【安為楊素司馬仍領行軍總管率蜀兵順流東下大破陳師詔勞之】

陳賊之意自言水戰為長險隘之間彌謂官軍所憚開府親將所部夜動舟師摧破賊徒生擒虜眾益官軍之氣破賊人之胆副朕所委聞以欣然

追錄李安兄弟詔【高祖嘗言及作相時事因愍安兄弟滅親奉國乃下詔】

先王立教以義斷恩割親愛之情盡事君之道用能 獎大節體此至公往者周歷既窮天命將及朕登庸惟始王業初基承此澆季寔繁奸宄上大將軍寧州刺史趙郡公李安其叔璋潛結藩枝扇惑猶子包藏不逞禍機將發安與弟開府儀同三司衛州刺史黃台县男慙深知逆順披露丹心凶謀既彰罪人斯得朕每念誠節嘉之無已懋庸冊賞宜不逾時但以事涉其親猶有疑惑欲使安等名教之方自處有地朕常為思審遂致淹年今更詳按聖典求諸往事父子天性誠孝猶不并立况復叔侄恩輕情禮本有差降忘私奉國深得正理下楊素討賊詔【素平陳封郢國公時江南人多聚眾為亂以素為行軍總管討吳越諸賊大破之上以素久勞詔令入朝素以余黨未平又自請行乃下詔】

朕忧勞百姓日旰忘食一物失所情深納隍江外狂狡妄構妖逆虽經殄除民未安堵猶有賊首凶魁逃亡山洞恐其聚結重扰蒼生內史令上柱國越國公素識達古今經謀長遠比曾推轂旧着威名宜任以大兵總為元帥宣布朝風振揚威武擒剪叛亡慰勞黎庶軍民事務一以委之

褒楊素詔【獻皇后崩山陵制度多出於素上善之下詔封其子并賜田宅】

君為元首臣則股肱共治萬姓義同一體上柱國尚書左仆射仁壽宮大監越國公素志度恢機鑒明遠懷佐時之畧包經國之才王業初基霸圖肇建策名委質受脤出師擒剪凶魁克平虢鄭頻承廟筭揚旂江表每稟戎律長驅塞陰南指而吳越肅清北臨而獫狫摧服自居端揆參贊機衡當朝正色直言無隱論文則詞藻縱橫語武則權奇間出既文且武惟朕所命任使之處夙夜無怠獻皇后奄離六宮遠日云及瑩兆安厝委素經營然葬事依禮唯卜泉石至如吉凶不由于此素義存奉上情深體國欲使幽明俱防寶祚無窮以為陰陽之書聖人所作禍福之理特須審慎乃徧歷川原親自占擇纖介不善即更尋求志圖元吉孜孜不已心力備

尽人灵协賛遂得神皋福壤营建山陵论素此心事极诚孝岂与夫平戎定寇比其公业非唯廊庙之器实是社稷之臣若不加褒赏何以申兹劝励可别封一子义康郡公邑万户子子孙孙承袭不絶余如故【治北史作理塞阴作塞垣经营作经纪】

敕杨素【素贵宠日隆朝廷靡然畏附上渐疎忌之因出敕】

仆射国之宰辅不可躬亲细务但三五日一度向省评论大事

褒达奚长儒诏【开皇二年突厥沙鉢略可汗等南寇秦陇以长儒为行军总管拒之杀掳万计于是解去高祖下诏】

突厥猖狂辄犯边塞不逞之众弥亘山原而长儒受任北鄙式遏寇贼所部之内少将百倍以昼通宵四面抗敌凡十有四战所向必摧凶徒就戮过半不反锋刃之余亡魂窜迹自非英威奋发奉国情深抚御有方士卒用命岂能以少破众若斯之伟言念勲庸宜隆名器可上柱国余勲回授一子其战亡将士皆赠官三转子孙袭之

拜贺娄子干上大将军册书【子干镇凉州突厥寇兰州拒击大破之册授为上大将军】

于戏敬聴朕命唯尔器量闲明志情强果任经武将勤绩有闻往歲凶丑未宁屡经疆场拓土静乱殊有厥劳是用崇兹赏典加此车服往钦哉祇承荣册可不慎欵下贺娄子干书【子干拜云州刺史甚为虏所惮后数年突厥雍虞间遣使请降并献羊马诏以子干为行军总管应按之还拜云州总管以所献马百匹羊千口赐之乃下诏】

自公守北门风尘不警突厥所献还以赐公

罪史万歳诏【万歳屡立战绩拜河州刺史为行军总管备胡开皇末大破突厥达头可汗于大斤山杨素潜而寝其功及入见极言为朝廷所抑忤上令左右防杀之既悔追之不及因下诏天下寃之】

柱国太平公万歳拔擢委任每总戎机徃以南军逆乱令其出讨而昆州刺史爨翫包藏逆心为民兴患朕备有成敕令将入朝万歳乃多受金银违敕令住致爨翫寻为反逆更劳师旅方始平定所司检校罪合极刑舍过念功恕其性命年月未久即复本官近复总戎进讨蕃裔突厥达头可汗领其凶众欲相拒抗既见军威便既奔退兵不血刃贼徒瓦解如此称捷国家盛事朕欲成其勲庸复加褒赏而万歳定和通簿之日乃怀奸诈妄称逆面交兵不以实陈怀反覆之方弄国家之法若竭诚立节心无虚罔者乃为良将至如万歳怀诈要功便是国贼朝宪难亏不可再舍

赐尉义臣姓杨诏【义臣父尉崇与尉迟迥同族周末镇恒州尉迥作乱崇自囚请罪开皇初封秦兴县公义臣袭爵复下诏赐姓杨】

朕受命之初羣凶未定明识之士有足可怀尉义臣与尉迥本同骨肉既狂悖作乱邺城其父崇时在常山典司兵甲与迥邻接又是至亲知逆顺之理识天人之意即陈丹欸虑染恶徒自执有司请归相府及北夷内侵横戈制敌轻生重义马革言旋操表存亾事贯幽显虽高官大赏延及于世未足表松筠之志彰节义之门义臣可赐姓杨氏赐钱三万贯酒三十斛米麦各百斛编之属籍为皇太孙

降田德懋玺书【德懋以父仁恭功封平原郡公授太子千牛备身丁父艰哀毁骨立庐于墓侧负土成坟上闻而嘉之遣使就吊复降玺书并赐缣二百匹米百石】

皇帝问田德懋知在穷疾哀毁过礼倚庐墓所负土成坟朕孝理天下思 名教复与汝通家情义素重有闻孝感嘉叹兼深春日暄和气力何似宜自抑割以礼自存也

祭薛濬册书【濬以母艰哀毁卒】

皇帝咨故考功侍郎薛濬于戏惟尔操履贞和器业详敏允膺列宿勤饬克彰及遭私艰奄从毁灭嘉尔诚孝感于朕怀奠酌有加抑惟朝典故遣使人指申徃命魂而有灵歆兹荣渥呜呼哀哉

赐梁彦光诏【彦光为岐州刺史有惠政开皇二年上幸岐州乃下诏】

赏以劝善义兼训物彦光操履平直识用凝逵布政岐下威惠在人防慎之誉闻于天下三载之后自当迁陟恐其匱乏且宜旌善可赐粟五百斛物三百段御伞一枚庶使有感朕心日增其美四海之内凡曰官人慕高山而仰止闻清风而自励

授房恭懿海州刺史诏

德州司马房恭懿出宰百里毗賛二藩善政能官标映伦伍班条按部寔允金属委以方岳声实俱美可使持节海州诸军事海州刺史

授公孙景茂伊州刺史诏【景茂为息州刺史德化大行上幸洛阳景茂谒见时年七十赐物三百段复诏授官】

景茂修身絜已耆宿不亏作牧化人声绩显著年终考校独为称首宜升戎秩兼进藩条可上仪同三司伊州刺史

褒王伽诏【伽为齐州行军防军被州使送流囚李防等例并枷锁传送伽令脱去与期某日当至京师至期一无离叛上惊异召见并召流人赐宴而赦之乃下诏擢雍令】

凡在有生含灵稟性咸知好恶并识是非若临以至诚明加劝导则俗必徙化人皆迁善徃以

海内乱离德教废絶官人无慈爱之心兆庶怀奸诈之意所以狱讼不息浇薄难治朕受命上天安养万姓思遵圣法以德化人朝夕孜孜意在于此而伽深识朕意诚心宣导参等感悟自赴宪司明是率土之人非为难教良是官人不加晓示致令陷罪无由自新若使官尽王伽之俦人皆李参之辈刑厝不用其何逮哉【劝北史作训遵作导】

报赵绰诏【帝常发怒六月棒杀人大理少卿赵绰固争曰李夏之月天地成长庶类不可以此时诛杀帝报遂杀之】

六月虽曰生长此时必有雷霆天道既于炎阳之时震其威怒则天而行有何不可【杜氏通典】

追赠独孤信诏【信献皇后父仕周大司马为宇文护所害】

褒德累行往代通规追逮慎终前王盛典故柱国信风宇高旷独秀生民叡哲居宗清猷映世宏谋长防道着于弼谐纬义经仁事深于拯济方当宣风廊庙亮采台阶而运属艰危功高弗赏睠言令范事切于心今景运初开椒闱肃建载怀涂山之义无忘褒纪之典可赠太师上柱国冀定等十州刺史赵国公邑万户

赠萧琮玺书【初梁元帝时岳阳王詵称臣西魏周太祖以詵为梁主攻元帝灭之是为后梁子韩嗣入隋高祖纳岵女为晋王广妃又欲以其子场尚兰陵公主及子宗嗣上赐玺书又赐梁大臣玺书诚勉之】

负荷堂构其事甚重虽穷忧劳常须自力辑谐内外亲任才良聿遵世业是所望也彼之疆守咫尺陈人水潦之时特宜警备陈氏比日虽复朝聘相寻疆场之间犹未清肃唯当持我必不可干勿得轻人而不设备朕与梁国积世相知重以亲姻情义弥厚江陵之地朝寄非轻为国为民深宜抑割恒加饘粥以礼自存

降谯国夫人洗氏敕书【洗氏高凉太守寔之妻能行军用师梁陈间抚循部众及归隋番禺人王仲宣反其孙暄与逆党陈佛智善故迟留不进洗氏执暄系狱遣孙盎击斩佛智岭表遂定册拜谯国夫人仍开幕府置官属因降敕书】

朕抚育苍生情均父母欲使率土清浄兆庶安乐而王仲宣等辄相聚结扰乱彼民所以遣往诛剪为百姓除害夫人情在奉国深识正理遂令孙盎斩获佛智竟破羣贼甚有大功今赐夫人物五千段暄不进诚合罪责以夫人立此诚效故特原免夫人宜训导子孙敦崇礼教遵奉朝化以副朕心

矜免陆让诏【让本冯孽子为番州刺史坐赃罪死冯氏上表求哀情辞甚切上愍然下诏】

冯氏以嫡母之德足为世范慈爱之道义感人神特宜矜免用獎风俗让可减死除名为民

又赐冯氏诏

冯氏体备仁慈夙闲礼度孽让非其所生往犯宪章宜从极法躬自诣阙为之请命匍匐顿颡朕哀其义特免死辜使天下妇人皆如冯者岂不闺门雍睦风俗和平朕每嘉叹不能已宜标扬优赏用章有德可赐物五百段

赐高丽王玺书【高祖受禅汤遣使诣阙朝贡不絶及平陈汤大惧治兵积谷为守拒之防上赐玺书汤得书惶恐将奉表陈谢病卒】

朕受天命爱育率土委王海隅宣扬朝化欲使圆首方足各遂其心王每遣使人岁常朝贡虽称藩附诚节未尽王既人臣须同朕德而乃驱逼鞅鞅固禁契丹诸藩顿颡为我臣妾忿善人之慕义何毒害之情深乎太府工人其数不少王必须之自可闻奏昔年潜行财货利动小人私将弩手逃窜下国岂非修理兵器意欲不臧恐有外闻故为盗窃时命使者抚慰王藩本欲问彼人情教彼政术王乃坐之空馆严加防守使其闭目塞耳永无闻见有何阴恶弗欲人知禁制官司畏其访察又数遣马骑杀害边人屡聘奸谋动作邪说心在不寘朕于苍生悉如赤子赐王土宇授王官爵深恩殊泽彰著遐迩王专怀不信恒自猜疑常遣使人密覘消息纯臣之义岂若是也盖当由朕训导不明王之愆违一已宽恕今日以后必须改革守藩臣之节奉朝正之典自化尔藩勿忤他国则长享富贵实称朕心彼之一方虽地狭人少然普天之下皆为朕臣今若黜王不可虚置终须更选官属就彼安抚王若洒心易行率由宪章即是朕之良臣何劳别遣才彦也昔帝王作法仁信为先有善必赏有恶必罚四海之内具闻朕防王若无罪朕或加兵自余藩国谓朕何也王必虚心纳朕此意慎勿疑惑更怀异图往者陈叔宝代在江阴残害人庶惊动我烽 抄掠我边境朕前后诚敕经历十年彼则恃长江之外聚一隅之众悖狂骄傲不从朕言故命将出师除彼凶逆来往不盈旬月兵骑不过数千历代逋寇一朝清荡遐迩义安人神胥悦闻王叹恨独致悲伤黜陟幽明有司是职罪王不为陈灭赏王不为陈存乐祸好乱何为尔也王谓辽水之广何如长江高丽之人多少陈国朕若不存含育责王前愆命一将军何待多力慤慤晓示许王自新耳宜得朕怀自求多福

报百济国王余昌诏【平陈之岁遣使表贺高祖下诏】

百济王既闻平陈遽令奉表往复至难若逢风浪便致伤损百济王心迹淳至朕已委知相去虽远事同言面何必数遣使来相体悉自今以后不须年别入贡朕亦不遣使往王宜知之

又诏【属兴辽东之役昌遣使奉表请为军导高祖下诏】

往岁为高丽不供职贡无人臣礼故命将讨之高元君臣恐惧畏服归罪朕已赦之不可致伐

北伐突厥诏【突厥沙钵略可汗为北夷归附及高祖受禅待之甚薄遂大怨悉众四十万人寇武威天水诸郡上震怒下诏以河间王 豆卢绩等出塞击败之】

往者魏道衰敝祸难相寻周齐抗衡分割诸夏突厥之虏俱通二国周人东虑恐齐好之深齐氏西虞惧周交之厚谓虏意轻重国逐安危非徒并有大敌之忧思减一边之防竭生民之力供其来往倾府库之财弃于沙漠华夏之地实为劳扰犹复刳剥烽戍杀害吏民无歲月而不有也恶积祸盈非止今日朕受天明命子育万方愍臣下之劳除既往之弊以为厚敛兆庶多惠豺狼未尝感恩资而为贼违天地之意非帝王之道节之以礼不为虚费省徭薄赋国用有余因入贼之物加赐将士息道路之民务于耕织清边制胜成防在心凶丑愚闇未知深防将大定之日比战国之时乘昔世之骄结今时之恨近者尽其巢窟俱犯北边朕分置军旅所在邀截望其深入一举灭之而远镇偏师逢而摧翦未及南上遽已奔北应 染羯过半不归且彼渠帅其数凡五昆季争长父叔相猜外示弥缝内乖心腹世行暴虐家法残忍东夷诸国尽挟私讎西戎羣长皆有宿怨突厥之北契丹之徒切齿磨牙常伺其便达头前攻酒泉其后于阗波斯挹怛三国一时即叛沙鉢略近趋周槃其部内薄孤束纥罗寻亦翻动往年利稽察大为高丽靺鞨所破娑毗设又为纥支可汗所杀与其为邻皆愿诛剿部落之下尽异纯民千种万类仇敌怨偶泣血拊心衔悲积恨圓首方足皆人类也有一于此更切朕怀彼地咎征祲作年将一纪乃兽为人语人作神言云其国亡讫而不见每冬雷震触地火生种类资给惟借水草去歲四时竟无雨雪川枯蝗暴卉木烧尽饥疫死亾人畜相半旧居之所赤地无依迁徙漠南偷存晷刻斯盖上天所忿驱就齐斧幽明合契今也其时故选将治兵赢粮聚甲义士奋发壮夫肆愤愿取名王之首思挾单于之背云归雾集不可数也东极沧海西尽流沙縱百胜之兵横万里之众亘朔野之追蹶望天崖而一扫此则王恢所说其犹射痛何敌能当何远不服但皇王旧迹北止幽都荒遐之表文軌所弃得其地不可以居得其民不忍皆杀无劳兵革远规溟海诸将今行义兼含育有降者纳有违者死异域殊方被其拥抑放聽复旧广辟边境严治关塞使其不敢南望永服威刑卧鼓息烽暂劳终逸制御夷狄义在斯乎何用侍子之朝宁劳渭桥之拜普告海内知朕意焉【因北史作回在路作道路便作后所作地赤地作赤土治兵作练兵服作克】

遗诏【仁寿四年】

嗟乎自昔晋室播迁天下丧乱四海不一以至周齐战争相寻年将三百故割疆土者非一所称帝王者非一人书軌不同生人涂炭上天降鉴爰命于朕用登大位岂關人力故得拨乱反正偃武修文天下大同声教遠被此又是天意欲宁区夏所以昧旦临朝不敢逸豫一日万机留心亲览晦明寒暑不憚劬劳匪曰朕躬盖为百姓故也王公卿士每日阙庭刺史以下三时朝集何尝不罄竭心府誠敕殷勤义乃君臣情兼父子庶籍百寮智力万国欢心欲令率土之人永得安乐不谓遘疾弥留至于大渐此乃人生常分何足言及但四海百姓衣食不丰教化政刑犹未尽善兴言念此唯以留恨朕今年逾六十不复称夭但筋力精神一时劳竭如此之事本非为身止欲安养百姓所以致此人生子孙谁不爱念既为天下事须割情勇及秀等并怀悖恶既知无臣子之心所以废黜古人有言知臣莫若于君知子莫若于父若令勇秀得志共治家国必当戮辱徧于公卿酷毒流于人庶今恶子孙已为百姓黜屏好子孙足堪负荷大业此虽朕家事理不容隱前对文武侍卫具已论述皇太子广地居上嗣仁孝着闻以其行业堪成朕志但令内外羣官同心戮力以此共治天下朕虽瞑目何所复恨但国家事大不可限以常礼既葬公除行之自昔今宜遵用不劳改定凶礼所须才令周事务从节俭不得劳人诸

州总管刺史以下宜各率其职不须奔赴自古哲王因人作法前帝后帝防革随时律令格式
或有不便于事者宜依前敕修改务当政要呜呼敬之哉无坠朕命【爰北史作受三时作歲
时令作念治作安】

仁寿元年祠南郊板文

维仁寿元年歲次作噩嗣天子臣讳敢昭告于昊天上帝璇玑运行大明南至臣防上天恩造
羣黎之福抚临率土安养兆人顾惟虚薄德化未畅夙夜忧惧不敢荒怠天地灵祇降锡休瑞
镜发区宇昭彰耳目爰始登极防授 图迁都定鼎醴泉出地平陈之歲龙引舟师省俗巡方
展礼东岳盲者得视瘡者得言复有璧人忽然能步自开皇已来日近北极行于上道晷度延
长天啓太平兽见一角改元仁寿杨树生松石鱼彰合符之征玉 显永昌之庆山图石瑞前
后继出皆载臣姓名褒纪国祚经典诸纬爰及玉 文字义理递相符防宫城之内及在山谷
石变为玉不可胜数桃区一岭尽是琉璃黄银出于神山碧玉生于瑞巘多杨山响三称国兴
连云山声万年临国野鵝降天仍注池沼神鹿入苑频赐引导驺虞见质游麟在野鹿角生于
杨树龙湫出于荆谷庆云发彩寿星垂耀宫殿楼阁咸出灵芝山泽川原多生寶物威香散馥
零露凝甘敦煌乌山黑石变白 禄岩岭石华遠照 狐 豹白兔白狼赤雀苍乌野蚕天豆
嘉禾合穗珍木连理神瑞休征洪恩景福降赐无疆不可具纪此皆昊天上帝爰降明灵矜愍
苍生宁静海内故锡兹嘉庆咸使安乐岂臣防诚所能上感防心奉谢敬荐玉帛牺齐粢盛庶
品燔祀于昊天上帝皇考太祖武元皇帝配神作主

隋文纪卷二

明 梅鼎祚 编

炀帝【名广小字阿 文帝第二子封晋王立为皇太子弑父自立在位十四年宇文化及弑之】遗陈尚书江总等书【开皇八年伐陈晋王广为行军元帅 英华作檄】

南北虽殊风云在望载懷虚迟寤寐为劳献歲犹寒比当清豫匡贊乎国良亦慇懃寡人忝膺朝寄董律专征防涉山川今次江际公等文儒自立器用适时冠盖二世齿德兼重孔老殊教名墨异家金匱珠韬银编玉策莫不腾于舌杪散在笔端防古成败之机近代安危之迹照同悬镜明若观火无待指南自应神寤犹恐思之未审差以毫厘聊烦翰墨略申梗槩自穹昊生民树之司牧羲轩以降书契可纪咸一姓承立四海无两帝汉道云季三方鼎立时惟板荡世匪休明当涂起而蜀亡典午兴而吳灭永嘉丧乱紫宸旷主刘石苻姚之俦伪夏僭燕之丑妄尘大宝事乖图策魏室乘时兆基朔野经始嵩洛未暇江湖有周受命敌非齐氏务在兼并不遑外略蕞尔吳越自相君长窃拟王者之仪妄谈天子之气偷安假息绵歷世祀我大隋之肇开宝祚光有神州皇帝感曜魄之灵应太防之座千年啓圣万代一时深仁至德宁济羣品越海穷河东渐西被旄头之属歷代之霸作我臣民匍匐服裳惟彼江表独隔皇风夫物极则反否终斯泰郭璞有云年终三百天下大同兹实 运已定于前圣主膺期而出欲以区区之陈国违上天之冥数其不可存者一也大必包小天地之常规明能通暗日月之常理论道德以唐陶而征有苗语众寡举海内而当羣小在长江舟楫之用矜其积习而山川共有我据上游鼓棹之能吳楚不异高舫巨舫东西万里扼喉抚背水陆干途彼之兵士不过十万首尾分布所在危急加以屯戍边方淹积歳序风雨以为栉沐虬虱生于甲冑望我寛仁思倒戈防通在戎行更成敌国守以时月则鱼烂土崩接以锋刃则鸟惊鹿走理在必然不假枚卜此不可存者二也丰侯好酒实丧厥邦梁伯役民溃其宗社彼之伪主覆车是袭日夜沉湎曾无节度繕造宫室莫知穷已竭四民之产荒纵其心斂百姓之哀以为已乐宝衣玉食填积后宫短褐麤饘不充编户一芥之善蔑尔无闻五子之歌宛然悉备虽欲勿丧其可得乎此不可存者三也伪主忌能护短酷法淫刑骨鯁之臣尽见疎斥諫诤之士皆被屠害遐迩结舌衣冠解体人妖鬼怪触类呈灾稚齿耆年咸知残灭此不可存者四也以此小邦摄于大国边烽夜动照彼都城戍鼓晨严震其宫殿累基十二方此未危悬缕千钧比斯非切而莫知忧恐更自骄矜曾无事大之心专行犯上之志侵軼我边鄙招纳我叛亡国家爰自受命每从含养敦以邻睦申其聘好冀能守彼宗祊静其疆域而长恶益甚纵毒弥深吳防雄俊之人湘东耿介之士乞师请命盈庭满阙帝乃悯然矜彼黎献授钺推轂吊民伐罪已有别诏惟废伪主之身自余士庶普从肆眚向所陈說咸是格言非曰游谈共相欺误且刘叔纳譙周之计而获存孙皓用薛莹之词而致福此二于者终有良臣之誉皆无陷君之讥何则所耻者小所存者大若宪章往彦聿遵前轨则伪主享封侯之业祖祢延血食之期江东士民实受其赐公等身保荣贵名垂竹帛岂不美欤若胶柱不移守迷不变率其蚁众敢拒王师军有常刑悔无及矣祸成俄顷宜早图之使人今还迟有委曲言不尽意岂复多云杨广白【开皇平陈记刘叔疑误蚁众一作蚁聚】

遗史祥书

【炀帝初为晋王祥从击突厥于灵武破之迁右衛将军屯 化备胡时帝在东宫遗祥书】

将军摠戎塞表沙磧清尘秣马休兵犹事校猎足使李广慙勇魏尚媿能冠彼二贤独在吾于昔余濫举推轂治兵振皇灵于塞外驱勦敌乎大漠于时同行军旅契濶戎旃望龙城而冲冠盼狼居而发愤将军英图不世猛气无前但物不遂心僊俛从事每一思此我劳如何将军宿心素志早同胶漆久而敬之方成鱼水近者陪随銮驾言旋上京本即述职南蕃宣条下国不悟皇鉴曲发备位少阳战战兢兢如临冰谷至如建节边境征伐四方褰帷作牧绥抚百姓上稟成规下尽臣节是所愿也是所甘心仰慕前修庶得自效谬其入守神器元良万国身轻负重何以克堪所望故人匡其不逮比监国多暇养疾闲宫厌北阁之端居罢南皮之驰射博望之苑既乏名贤飞盖之园理乖终宴亲朋遠矣琴书寂然想望吾贤疾如疾首

史祥答太子书【祥字世休朔方人仕周太子车右中士隋燕郡太守】

行人戾止奉所赐况恩纪绸缪形于文墨不悟飞雪增冰之地忽载三阳毳幙韦韝之乡俄闻九奏精駭思越莫知啓处祥少不学军旅长遇升平幸以先人绪余备职宿衛惧弩蹇无致远之用朽薄非折冲之材岂欲追踪古人语其优劣曩者王师薄伐天人受脤絕漠扬旌威震海外当此之时猛将如云谋夫如雨至如祥者列于卒伍预闻指踪之规得免逗遛之责循涯揣分实为幸甚爰以情喻雷陈事方刘葛信圣人之屈己非庸人之拟议何则川泽之大污潦攸归松柏之高芑萝斯托防心眷眷孟侯所知也仰惟体元良之德焕重离之晖三善克修万邦以正斯固道高周诵契叶商皓岂在管蠡所能窥测伏承监国多暇养德怡神咀嚼六经逍遥百氏追西园之爱客眷南皮之出游畴昔之恩无忘造次祥自忝式遏载罹寒暑身在边隅情驰魏阙每至清风夕起朗月孤照想鸣葭之啓路思脱乘于后车塞表京华山川悠遠瞻望浮云伏增 结【并隋书 岂欲英华作当断受脤作援桴如云英华作如神至若作至如循涯作循省非庸人之拟议作非庸夫之可测芑萝作葛萝载罹作载离夕作夜乘作驾】

请定清庙歌辞奏【高祖初命李元操卢思道等列清庙歌辞十二曲以代周歌仁寿元年炀帝为皇太子从飡太庙闻而非之乃上言于是制诏奇章公牛 等创制雅乐】

清庙歌辞文多浮丽不足以述宣功德请更议定

秦孝王谏

维开皇二十年六月二十日丁丑上柱国秦孝王薨于仁寿宫呜呼哀哉八元八凯济济虞则周南召南赫赫周国于穆孝王绍彼明德天实丧予殲我刚克呜呼哀哉如何上灵降此灾否国丧宗臣家亡千里呜呼哀哉爰初不豫冕旒视疾乃至大渐停銮驻蹕亲临属纊俯欢彻瑟哀动皇情痛深慈膝一辞明世千秋长冪长冪如何绵绵终古仲秋卜宅将归泉户梁山之阳永宁后土呜呼哀哉追悼无及永分古今神灵虽翳徽声靡替谏王德音貽千百世乃作谏曰

皇隋啓运应天顺民保兹七百静彼四邻利建宗子藩屏懿亲孝王惟允俾侯于秦爰自圣章天性诚愿色养烝烝孝立名建恭近于礼耻辱斯遠嘉之弗忘惧而无怨孝悌之至通于神明温温居德肃肃厉精恭敬表志退让为情韡此棠棣敦斯鹄鸩仲称令弟叔曰仁兄猗欤我弟好学无替九流日修三余卒歲琴台夜开书帷昼闭聪敏若神雄辯无滞妙矣声律明哉龟筮象风角于焉及睿允文允武多才多艺惟善惟乐为仁为惠天挺出羣英图命世钦若孝王容止堂堂振鹭将集凤雏斯翔人之领袖国之辉光辉光伊何肃肃翼翼义以处身仁以经国明烛繁符财成渊塞靖恭尔位好是正直令闻令望无反无侧皇枝良干日富英声宣风作伯盘古维城东京旧都河南殷博惟我哲王行台惟冀飞轡崑函蹇帐伊洛德被汝坟仁行巩亳西秦右地实赖英雄实惟王化乃即龟防患和布泽易俗移风亶亶孝王仁而能断德敷大国有符公旦移镇樊征述职江汉地接防讎棱威靖难文德昭遠懷劳伐叛暂辍外藩入侍天轩典兹戎衛仍居纳言宝劔横曜丰貂尤温周衛清切敷奏便繁献替惟允禁旅斯敦伪陈不恭轶我炎鄙王赫斯振将清江浹图斯元帅难全其备唯我孝王膺兹无愧恭行天讨受脤建旗申威鄂渚鞠旅江湄军容赳赳逋丑襍云陈不布高城靡持泥首衔璧请命于台兵不血刃野无横尸善战不阵我弟于兹金陵戡定饮至京师广陵淮海一都之防牧彼顽民作相于外时雨随车棠陰逐盖惟晋太原寄隆望大表里山河要冲襟带东自维扬回旌转旆善政廉平于斯为最强敌畏威氓黎荷赖烽火戎马俱清边界寒暑失御庸衛弗开言旋京邸去彼丛台扈驾仁寿抚席岩隈连绵药餌歲去年来秀而不实祸极生灾天胡不吊木壞山頽呜呼哀哉至尊废朝而悼伤皇后辍膳而摧痛甚秦国之永辞剧梁武之长送昆弟哀哀而日嗟僚友嗷嗷而悲恻呜呼哀哉叹日月之不居何卜遠之诂促旌旄飘飖而从风笳管酸嘶而响谷服马顾而不能行挽夫悲而不成曲霜霰落兮山谷寒木叶下兮丘垄残风飈飈而吟树泉幽咽而悲湍离羣之兽絕迹孤飞之鸟悲酸背离宫而东转歷山邸而北度去甲第之楼台即荒田之丘墓昔时鸣銮而戒涂今日灵輶而啓路临朝謁之平衢永絕兹之一步倘若神而有灵几悲伤而留顾呜呼哀哉弃永日之昭昭袭长夜之悠悠苦 扃而无晓悲黄泉而永幽湮盛年于万古阻壮志于千秋呜呼哀哉恻反哭于秋季悲复归于故地尹形游而不迁何魂煢之空志呜呼哀哉酒罇浮尘兮独满琴弦含风兮自断防夜久其何期焉知歲月之长短孝王与我体密情亲孔懷之笃有逾常伦昊天何酷哀哉哲人奈何吾弟先我长沦烦冤痛毒悲恨何陈呜呼哀哉痛母弟之同胞弃共被之寒郊岂止三荆之变色非唯四鸟之分巢遽一朝而云逝曷何去而何止形未舍目言犹在耳彼苍者天子何甚矣嬛嬛友于哀哀吾子痛当奈何痛当何已想髣髴而弗见犹盘桓而伫立空抚膺而莫追抑饮泪而何及呜呼哀哉嗟地久而天长终沦没兮幽方徒春华而秋落不复见我弟兮孝王何谢安之蔬食岂子路之丧亡独端忧而无告徒梗塞而追伤悲莫悲兮长别痛莫痛兮终絕因凄怆以写情恻人琴而永诀呜呼哀哉【神灵虽翳一作神虽虚翳王化一作匪他襍一作累累维扬一作扬越永日一作白日嬛嬛一作惓惓无告一作谁告】

序曹子建帖【甲秀堂法帖】

陈思王魏宗室子也世传文章典丽而不言其书仁寿二年族孙伟持以遗余余观夫字画沈快而词防华致想像其风仪玩阅不已因书以冠于標首

营建东京诏【仁寿四年七月即位十一月诏】

乾道变化陰阳所以消息防创不同生灵所以顺叙若使天意不变施化何以成四时人事不易为政何以厘万姓易不云乎通其变使民不倦变则通通则久有德则可久有功则可大朕又闻之安安而能迁民用丕变是故姬邑两周如武王之意殷人五徙成汤后之业若不因人顺天功业见乎变爱人治国者可不谓然欤雒邑自古之都王畿之内天地之所合陰阳之所和控以三河固以四塞水陆通贡赋等故汉祖曰吾行天下多矣唯见雒阳自古皇王何尝不留意所不都者盖有由焉或以九州未一或以困其府库作雒之制所以未暇也我有隋之始便欲创兹懷雒日复一日越暨于今念兹在兹兴言感哽朕肃膺宝历纂临万邦遵而不失心奉先志今者汉王谅悖逆毒被山东遂使州县或沦非所由關河悬遠兵不赴急加以并州移户复在河南周迁殷人意在于此况复南服遐遠东夏殷大因机顺动今也其时羣司百辟金谐厥议但成周墟堦弗堪葺宇今可于伊雒营建东京便即设官分职以为民极也夫宫室之制本以便生上栋下宇足避风露高台广厦岂曰适形故传云俭德之共侈恶之大宣尼有云与其不逊也宁俭岂谓瑶台琼室方为宫殿者乎土堦采椽而非帝王者乎是知非天下以奉一人乃一人以主天下也民惟国本本固邦宁百姓足孰与不足今所营构务从节俭无令雕墙峻宇复起于当今欲使卑宫菲食将貽于后世有司明为条格称朕意焉【厘北史作吏爱人作爱民】

立萧皇后诏【大业元年】

朕祇承丕绪宪章在昔爰建长秋用承飨荐妃萧氏夙稟成训妇道克修宜正位轩闈式柔教可立为皇后

遣使巡省诏【元年正月】

昔者哲王之治天下也其在爱民乎既富而教家给人足故能风淳俗厚遠至迓安治定功成率由斯道朕嗣膺宝历抚育黎献夙夜战兢若临川谷虽则聿遵先绪弗敢失坠永言政术多有缺然况以四海之遠兆民之众未获亲临问其疾苦每虑幽仄莫举冤屈不申一物失所乃伤和气万户有罪责在朕躬所以寤寐增叹而夕惕载懷者也今既布政惟始宜存寬大可分遣使人巡省方俗宣扬风化荐防淹滞申达幽枉孝悌力田给以优复鰥寡孤独不能自存者量加賑济义夫节妇旌表门闾高年之老加其版授并依别条赐以粟帛笃疾之徒给侍丁者虽有侍养之名曾无调贍之实明加检校使得存养若有名行显著操履修洁及学业才能一艺可取咸宜访采将身入朝所在州县以礼发遣其有蠹政害人不便于时者使还之日具录奏闻【风淳俗厚北史作风教淳厚嗣膺作恭嗣乃伤作用伤】

求谏言诏【元年三月】

听采輿颂谋及庶民故能审政刑之得失是知昧旦思治欲使幽枉必达彝伦有章而牧宰任称朝委苟为徼幸以求考课虚立殿最不存治实纲纪于是弗理冤屈所以莫申關河重阻无

由自达朕故建立东京躬亲存问今将巡歷淮海观省风俗眷求说言徒繁词翰而乡校之内
阙尔无闻恇然夕惕用忘兴寢其民下有知州县官人政治苛刻侵害百姓背公徇私不利于
民者宜听诣朝堂封奏庶乎四聪以达天下无冤【庶民北史作黎庶政治作政理】

兴学诏【元年闰七月】

君民建国教学为先移风易俗必自兹始而言絕义乖多歷年代进德修业其道寢防汉采坑
焚之余不絕如线晋承版荡之运扫地将尽自时厥后军国多虞虽复黉宇时建示同爰礼函
文或陈殆为虚器遂使纁青拖紫非以学优制锦操刀类多墻面上陵下替纲维靡立雅缺道
消实由于此朕纂承洪绪思 大训将欲尊师重道用阐厥繇讲信修睦敦獎名教方今宇宙
平一十步之内必有芳草四海之中岂无奇秀诸在家及见入学者若有笃志好古耽悦典坟
学行优敏堪膺时务所在采访具以名闻即当随其器能擢以不次若研精经术未愿进仕者
可依其艺业深浅门防高卑虽未升朝并量准给禄庶夫恂恂善诱不日成器济济盈朝何遠
之有其国子等学亦宜申明旧制教习生徒具为课试之法以尽砥礪之道【宇宙北史作区
宇奇秀作孝秀耽悦典坟作耽典悦礼】

修高庙乐诏【元年】

古先哲王经国成务莫不因人心而制礼则天明而作乐昔汉氏诸庙别所乐亦不同至于光
武之后始立共堂之制魏文承运初营庙寢太祖一室独为别宫自兹之后兵车交争制作规
模日不暇给伏惟高祖文皇帝功侔造物道济生灵享荐宜殊乐舞须别今若月祭时飨既与
诸祖共庭至于舞功独于一室交违礼意未合人情其详议以闻

崇祀先哲诏【二年五月】

旌表先哲式存飨祀所以优礼贤能显彰遗爱朕永鉴前修尚想名德何尝不兴叹九原属懷
千载其自古已来贤人君子有能树声立德佐世匡时博利殊功有益于人者并宜营立祠宇
以时致祭坟塋之处不得侵践有司量为条式称朕意焉【存北史作在】

给帝王陵户诏【二年十二月】

前代帝王因时创业君民建国体尊南面而厯运推移年世永久丘垄残毁樵牧相趋莹兆堙
芜封树莫辨兴言沦灭有愴于懷自古已来帝王陵墓可给随近十户蠲其杂役以供守视【
世北史作代】

革前制罪坐诏【开皇旧制豐門子弟不得居宿衛近侍先是萧岩以叛诛崔君绰坐连庶人
勇家口籍没岩以中宫故君绰緣女入宫爱幸帝乃下诏革前制】

罪不及嗣既 至孝之道恩由义断以劝事君之节故羊鲋从戮弥见叔向之诚季布立勲无

预丁公之祸用能树声往代贻范将来朕虚己为政思遵旧典推心待物每从寛政六位成象美厥含一眚掩德甚非谓也诸犯罪被戮之门期以下亲仍令合仕听预宿衛近侍之官

巡省诏【三年三月】

古者帝王观风问俗皆所以忧勤兆庶安集遐荒自蕃夷内附未遑亲抚山东经乱须加存防今欲安集河北巡省赵魏所司依式

十科举人诏【三年三月】

天下之重非独治所安帝王之功岂一士之略自古明君哲后立政经邦何尝不选贤与能收采幽滞周称多士汉号得人常想前风载懷钦伋朕负宸夙兴冕旒待旦引领岩谷寘以周行冀与羣才共康庶绩而彙茅寂寞投竿罕至岂美璞韬采未值良工介石在懷确乎难防永鉴前哲恍然兴叹凡厥在位譬诸股肱若济巨川义同舟楫岂得保兹宠录晦尔所知优游卒歲甚非谓也祁大夫之举善良史以为至公臧文仲之蔽贤尼父讥其窃位求诸往古非无褒贬宜思进善用匡寡薄夫孝弟有闻人伦之本德行敦厚立身之基或节义可称或操履清絜所以激贪厉俗有益风化强毅正直执宪不挠学业优敏文才美秀并为廊庙之用实乃瑚璉之资才堪将略则拔之以御侮膂力骁壮则任之以牙爰及一艺可取亦宜采录若众善毕举与时无弃以此求治庶几非遠文武有职事者五品以上宜依令十科举人有一于此不必求备朕当待以不次随才升擢其见任九品已上官者不在举送之限【治北史作理膂力作力有】

崇建文帝寢庙诏【三年六月】

聿追孝飡德莫至焉崇建寢庙理之大者然则质文异代损益殊时学灭坑焚经典散逸宪章湮坠庙堂制度师說不同所以世数多少莫能是正连室异宫亦无准定朕获奉祖宗钦承景业永惟严配思隆大典于是询谋在位博访儒术咸以为高祖文皇帝受天明命奄有区夏拯羣飞于四海革凋敝于百王恤狱缓刑生灵皆遂其性轻徭薄赋比屋各安其业恢夷宇宙混壹车书东渐西被无思不服南征北怨俱荷来苏驾羲乘风歴代所弗至雕题凿齿声教所罕及莫不厥角闕塞顿颡阙庭译靡絶时书无虚月韬戈偃武天下晏如嘉瑞休徵表里禔福猗欤伟欤无得而名者也朕又闻之德厚者流光治辨者礼縟是以周之文武汉之高光其典章特立諡号斯重岂非緣情称述即崇显之义乎高祖文皇帝宜别建庙宇以彰巍巍之德仍遵月祭用表蒸蒸之懷有司以时创造务合典制又名位既殊礼亦异等天子七庙事着前经诸侯二昭义有差降故其以多为贵王者之礼今可依用贻厥后昆【恢夷作芟夷偃武作偃伯治作理故其作故知】

为突厥啓民可汗造屋诏【四年四月】

突厥意利珍豆啓民可汗率领部落保附闕塞遵奉朝化思改戎俗频入谒覲屡有陈请以毡

墙毳幕事穷荒陋上栋下宇愿同比屋诚心恳切朕之所重宜于万寿戍置城造屋其帟帟牀褥已上随事量给务从优厚称朕意焉

孔子后为绍圣侯诏【四年十月】

先师尼父圣德在躬诞发天纵之姿宪章文武之道命世膺期蕴兹素王而颍山之叹忽逾于千祀盛德之美不存于百代永惟懿范宜有优崇可立孔子后为绍圣侯有司求其苗裔録以申上【存北史作在】

立周汉魏晋后诏【四年十月】

昔周王下车首封唐虞之 汉帝承厯亦命殷周之后皆所以褒立先代宪章在昔朕嗣膺景业傍求雅训有一 益钦若令典以为周兼夏殷文质大备汉有天下车书混一魏晋防袭风流未远并宜立后以存继絶之义有司可求其胄绪列闻

处置耆老诏【五年十月】

优德尚齿载之典训尊事乞言义彰胶序鬻熊为师取非筋力方叔元老克壮其猷朕永言稽古用求至治是以厯眉黄髮更令收叙务简秩优无亏药膳庶等卧治仁其 益今歳耆老附集者可于近郡处置年七十以上疾患沉滞不堪居职即给赐帛送还本郡其官至七品以上者量给廩以终厥身【取非北史作无取治并作理膳作饵】

勲封诏【六年二月】

夫帝圖草创王业艰难咸仗股肱叶同心德用能拯厥颓运克膺大宝然后畴庸茂赏开国承家誓以山河传之不朽近代丧乱四海未一茅土妄假名实相乖歷兹永久莫能惩革皇运之初百度伊始犹循旧贯未暇改作今天下交泰文轨攸同宜率遵先典永垂大训自今已后唯有功勲乃得赐封仍令子孙承袭【仗北史作依拯作救丧乱作凋丧】

巡抚涿郡诏【七年二月】

武有七德先之以安民政有六本兴之以教义高丽高元亏失藩礼将欲问罪辽左恢宣胜略虽懷伐国仍事省方今往涿郡巡抚民俗其河北诸郡及山西山东年九十已上者版授太守入十者授县令

伐高丽诏【八年正月】

天地大德降繁霜于秋令圣哲至仁着甲兵于刑典故知造化之有肃杀义在无私帝王之用干戈盖非获已阪泉丹浦莫匪龚行取乱覆昏咸由顺动况乎甘野誓师夏开承大禹之业商

郊问罪周发成文王之志永监前载当属朕躬粤我有隋诞膺灵命叅三才而建极一六合而为家提封所渐细防盘桃之外声教爰暨紫舌黄枝之域遠至迹安罔不和防功成治定于是乎在而高丽小丑迷昏不恭崇聚勃碣之间荐食辽獫之境虽复汉魏诛戮巢窟暂倾乱离多阻种落还集萃川藪于徃代播实繁以迄今睠彼华壤翦为夷类歷年永久恶稔既盈天道祸淫亡徵已兆乱常败德非可胜圖掩慝懷奸唯日不足移告之严未尝面受朝覲之礼莫肯躬亲诱纳亡叛不知纪极充斥边垂亟劳烽 關柝以之不静生人为之废业在昔薄伐已漏天网既缓前禽之戮未即后服之诛曾不懷恩翻为长恶乃兼契丹之党防刘海戍习韎韐之服侵軼辽西又青丘之表咸修职贡碧海之濱同稟正朔遂复敝壤琛賫遏絕往来虐及弗辜诚而遇祸輶轩奉使爰暨海东旌节所次途经藩境而拥塞道路拒絶王人无事君之心岂为臣之礼此而可忍孰不可容且法令苛酷赋敛烦重强巨豪族咸执国钧朋党比周以之成俗贿货如市冤枉莫申重以仍歲灾凶比屋饥饉兵戈不息徭役无期力竭转输身填沟壑百姓愁苦爰谁适从境内哀惶不胜其 回首面内各懷性命之圖黄发稚齿咸兴酷毒之叹省俗观风爰届幽朔吊人问罪无俟再驾于是亲总六师用申九伐拯厥阡危协从天意殄兹逋秽克嗣先谟今宜授律啓行分麾届路掩渤海而雷震歷夫余以电扫比戈按甲誓旅而后行三令五申必胜而后战左第一军可镂方道第二军可长岑道第三军可海冥道第四军可盖马道第五军可建安道第六军可南苏道第七军可辽东道第八军可 菟道第九军可扶余道第十军可朝鲜道第十一军可沃沮道第十二军可乐浪道右第一军可黏蟬道第二军可含资道第三军可浑弥道第四军可临屯道第五军可 城道第六军可提奚道第七军可踏顿道第八军可肃慎道第九军可碣石道第十军可东 道第十一军可带方道第十二军可襄平道凡此众军先奉庙畧骆驿引途总集平壤莫非如豺如貔之勇百战百胜之雄顾眄则山岳倾頽叱咤则风云腾鬱心德攸同爪牙斯在朕躬驭元戎为其节度涉辽而东循海之右解倒悬于遐裔问疾苦于遗黎其外轻賫游阙随机赴响卷甲衔枚出其不意又沧海道军舟舳千里高颿电逝巨舰云飞横防沮江迺造平壤岛屿之望斯絕坎井之路已穷其余被发左衽之人控 待发防卢彭濮之旅不谋同辞杖顺临逆人百其勇以此众战势等摧枯然则王者之师义存止杀圣人之教必也胜残天罚有罪本在元恶人之多僻胁从罔治若高元泥首辕门自归司寇即宜解防焚櫜 之以恩其余臣人归朝奉顺咸加慰抚各安生业随才任用无隔夷夏营垒所次务在整肃刍菑有禁秋毫勿犯布以恩宥喻以祸福若其同恶相济抗拒官军国有常刑俾无遗类明加晓示称朕意焉【开北史作啓前载作载籍罔不作防弗治定作理定倾作扰翻为作翻其敎作寇回首内面作回面内向歷作及心德作腹心奉顺作奉化官军作官府】

賑恤行从诏【八年二月】

朕观风燕裔问罪辽濱文武协力爪牙思奋莫不执銳勤王舍家从役罕蓄仓廩之资兼损播植之务朕所以夕惕愀然虑其匱乏虽复素饱之众情在忘私悦使之人宜从其厚诸行从一品以下饮飞募人以上家口郡县存问若有粮食乏少皆宜賑给或虽有田畴贫弱不能自耕种可于多丁富室劝课相助使夫居者有敛积之丰行役无顾后之虑

授勲官诏【八年九月】

军国异容文武殊用匡危拯难则霸德攸兴化人成俗则王道斯贵时方拨乱屠贩可以登朝世属隆平经术然后升仕丰都爰肇儒服无预于周行建武之朝功臣不参于吏职自三方未一四海交争不遑文教唯尚武功设官分职罕以材授班朝治人乃由勲叙莫非拔足行阵出自勇夫敦学之道既所不习政事之方故亦无取是非暗于在已威福专于下吏贪冒货贿不知纪极蠹政害民实由于此自今已后诸授勲官者并不得回授文武职事庶遵彼更张取类于调瑟求诸名制不伤于美锦若吏部辄拟用者御史即宜纠弹

改博陵郡诏【九年十月】

博陵昔为定州地居冲要先皇歷试所基王化斯遠故以道冠幽风义高姚邑朕巡抚氓庶爰届兹邦瞻望郊防緬懷敬止思所以宣播德泽覃被下人崇纪显号式光令绪可改博陵为高阳郡赦境内死罪已下给复一年【德北史作庆】

收葬辽海战亡诏【十年二月】

竭力王役致身戎事咸由徇义莫匪勤诚委命草泽弃骸原野兴言念之每懷愍惻往年出军问罪将届辽瀕庙筭胜畧具有进止而凉愔凶罔识成败高颀愎很本无智谋临三军犹儿戏视人命如草芥不遵成规坐貽挠退遂令死亡者众不及埋藏今宜遣使人分道收葬设祭于辽西郡立道場一所恩加泉壤庶弭穷魂之冤泽及枯骨用 仁者之惠【泽北史作芥弃作暴】

再伐高丽诏【十年二月】

黄帝二十五战成汤二十七征方乃德施诸侯令行天下卢芳小盗汉祖尚且亲戎隗嚣余焄光武犹自登陇岂不欲除暴止戈劳而后逸者哉朕纂承宝业君临天下日月所照风雨所沾孰非我臣独隔声教蕞尔高丽僻居荒表鸱张狼噬侮慢不恭抄窃我边陲侵軼我城镇是以去歲出军问罪辽碣殪长蛇于 菟戮封豕于襄平扶余众军风驰电逝追奔逐北径逾淇水沧海舟楫冲贼腹心焚其城郭污其宫室高元伏鍤泥首送款军门寻请入朝归罪司寇朕以许其改过乃诏班师而长恶靡悛宴安鸩毒此而可忍孰不可容便可分命六师百道俱进朕当亲执武节临御诸军秣马九都观兵辽水顺天诛于海外救穷民于倒悬征伐以正之明德以诛之止除元恶余无所问若有识存亡之分悟安危之机翻然北首自求多福必其同恶相济抗拒王师若火燎原刑兹无赦有司便宜宣布咸使知闻

令人城居诏【十一年二月】

设险守国着自前经重门御暴事彰往策所以宅土宁邦禁邪固本而近代战争居人散逸田畴无伍郛郭不修遂使游惰实繁寇攘未息今天下平一海内晏如宜令人悉城居田随近给使强弱相容力役兼济穿窬无所厝其奸宄藿符不得聚其逋逃有司具为事条务令得所

勅齐王暕【炀帝元德太子薨当立齐王以柳謩之为长史大业三年帝法服临轩备仪衛命齐王立于西朝堂遣吏部尚书牛 宣勅又勅謩之 此或口勅】

我昔阶緣恩宠啓封晋阳出藩之初始年十二先帝立我于西朝堂乃令高颎虞庆则元旻等从内送王子相于我于时誡我曰以汝幼冲未更世事今令子相作辅于汝事无大小皆可委之无得昵近小人疎遠子相若从我言者有益于社稷成立汝名行如不用此言唯国及身败无日矣吾受勅之后奉以周旋不敢失坠防子相之力吾无今日矣若与謩之从事一如子相也

又勅柳謩之

今以卿作辅于齐善思匡救之理副朕所望若齐王德业修备富贵自当钟卿一门若有不善罪亦相及追封豆卢毓诏【汉王谅镇并州毓以妃父为王府主簿炀帝即位徵谅入朝谅遂作乱令毓留守毓与司马皇甫诞等据城拒谅事败并见害诏封正义县公子愿师嗣大业初复下诏诞亦诏封焉】

褒显名节有国通规加等饰终抑推令典毓深识大义不顾姻亲出于万死首建奇策去逆归顺殉义亡身追加荣命宜优恒礼可赠大将军正义县公赐帛二千疋諡曰愍

又诏

故大将军正义愍公毓临节能固捐生殉国成为令典没世不忘象贤无坠德隆必祀改封雍丘愍侯复以愿师承袭

追封皇甫诞诏

褒显名节有国通规加等饰终抑惟令典并州总管司马皇甫诞性理淹通志懷审正効官贊务声绩克宣值狂悖構祸凶威孔炽确殉丹诚不从妖逆虽幽繫冠手而雅志弥厉遂潜兴义徒据城抗拒众寡不敌奄致非命可赠柱国封 义公諡曰明

赠刘方诏【方仁寿末授驩州总管经畧林邑大业元年进兵破其国都道遇患卒炀帝下诏】

方肃承庙畧恭行天讨饮冰遡迈视险若夷摧锋直指出其不意鲸鲵尽殄巢穴咸倾役不再劳肃清海外致身王事诚绩可嘉可赠上柱国卢国公

劳杨素手诏【素字处道 农华陰人仕周徐州总管入隋封越国公尚书令司徒汉王谅反以素为并州道行军总管平之炀帝遣素弟修武公约賁手诏劳素素上表陈谢】

我有隋之御天下也于今二十有四年虽复外夷侵叛而内难不作修文偃武四海晏然朕以不天衔恤在疚号天叩地无所逮及朕本以藩王谬膺储两复以庸虚纂承洪业天下者先王之天下也所以战战兢兢弗敢失坠况复神器之重生民之大哉贼谅包藏祸心自幼而长羊质兽心假托名誉不奉国讳先圖叛逆违君父之命成莫大之罪诬惑良善委任奸回称兵内侮毒流百姓私假署置擅相谋戮小加大少陵长民怨神怒众叛亲离为恶不同同归于乱朕寡兄弟犹未忍及言是故开闔门而待寇戢干戈而不发朕闻之天生蒸民为之置君仰惟先防每以子民为念朕岂得枕伏苫庐颠而不救也大义灭亲春秋高义周旦以诛二叔汉啓乃戮七藩义在兹乎事不获已是以授公戎律问罪大原且逆子贼臣何代不有岂意今者近出家国所叹荼毒甫尔便及此事由朕不能和兄弟不能安苍生德泽未 兵戈先动贼乱者止一人涂炭者乃众庶非唯寅畏天威亦乃孤负付嘱薄德厚耻愧乎天下公乃先朝功臣勲庸克茂至如皇基草创百物惟始便匹马归朝诚识兼至汴部郑州风卷秋箚荆南塞北若火燎原早建殊勲夙着诚节及献替朝端具瞻惟允爰弼朕躬以济时难昔周勃霍光何以加也贼乃窃据蒲州關梁防絶公以少击众指期平殄高壁据险抗拒官军公以深谋出不意雾廓云除水消瓦解长驱北迈直趋巢窟晋阳之南蚁徒数万谅不量力欲犹举斧公以棱威外讨发愤于内忘身殉义亲当矢石兵刃暂交鱼溃鸟散僵尸蔽野积甲若山谅遂守穷城以拒鉞钺公董率骁勇四面攻围使其欲战不敢求走无路智力俱尽面防军门斩将褰旗伐叛柔服元恶既除东夏清晏嘉庸茂绩于是乎在昔武安平赵淮陰定齐岂若公遠而不劳速而克捷者也朕殷忧谅闇不得亲御六军未能问道于上庠遂使劬劳于行阵言念于此无忘寢食公乃建累世之元勲执一心之确志古人有言曰疾风知劲草世乱有诚臣公得之矣方乃铭之常鼎岂止书勲竹帛哉功绩克谐哽叹无已稍冷公如宜军旅务殷殊当劳虑故遣公弟指宣往懷迷塞不次

杨素陈谢表

臣自惟虚薄志不及遠州郡之职敢惮劬劳卿相之荣无阶覬望然时逢昌运王业惟始虽涓流赴海诚心屡竭轻尘积岳功力盖防徒以南阳里闾丰沛子弟高位重爵荣显一时遂复入处朝端出总戎律受文武之任预帷幄之谋岂臣才能实由恩泽欲报之德义极昊天伏惟陛下照重离之明养继天之德收臣于疎遠照臣以光辉南服降枉道之书春官奉肃成之防然草木无识尚荣枯 时况臣有心实自効无路昼夜回徨寢食慙惕常惧朝露奄至虚负圣慈贼谅包藏祸心有自来矣因幸国哀便肆凶逆兴兵晋代摇荡山东陛下拔臣于凡流授臣以戎律防心旅之寄稟平乱之规萧王赤心人皆以死汉皇大度天下争归妖寇廓清岂臣之力曲防使臣弟约賫诏书问劳高防峻笔有若天临洪恩大泽便同海运悲欣慙惧五情振越虽百殒防軀无以一报

为杨素立墓碑诏

夫铭功彝器纪德丰碑所以垂名迹于不朽树风声于没世故楚景武公素茂绩元勲劬劳王室竭尽诚节叶賛朕躬故以道迈三杰功参十乱未臻遐寿遽戢清徽春秋递代方绵歲祀式播雕篆用圖勲德可立碑宰隧以彰盛美

降史祥手诏【汉王谅为并州总管以太子勇废陰有异圖高祖崩遂发兵反祥为行军总管击破之进位上大将军转太仆卿帝赐祥诗祥上表辞谢帝降手诏】

昔歲劳公问罪河朔贼尔日塞两關之路据仓阻河百姓胁从人亦众矣公竭诚奋勇一举尅定诗不云乎丧乱既平既安且宁非英才大畧其孰能与于此邪故聊示所懷亦何谢也【尅定北史作而克】

褒樊子盖诏【子盖为武威太守以善政闻入朝引之内殿特防褒美乃下诏】

设官之道必在用贤安人之术莫如善政龚汲振德化于前张杜垂清风于后共治天下实资良守子盖干局通敏操履清洁自剖符四服爱惠为先抚道有方寬猛得所处脂膏不润其质酌贪泉岂渝其性故能治绩克彰课防之首凡厥在位莫匪王臣若能人思奉职各展其効朕将冕旒垂拱何忧不治哉

进樊子盖右光禄大夫诏【车驾西巡又下诏】

导德齐礼寔惟共治惩恶劝善用明黜陟朕亲巡河右观省人风所歷郡县访采治绩罕遵法度多蹈刑网而金紫光禄大夫武威太守樊子盖执操清洁处湟不渝立身雅正临人以简威惠兼举寬猛相资故能畏而爱之不严斯治实字人之盛绩有国之良安宜加褒显以 獎勵可右光禄大夫太守如故赐缣千匹粟麦二千斛

报樊子盖诏【大业六年帝避暑陇川宫又欲幸河西子盖倾望銮輿愿巡郡境帝下诏】

卿夙懷恭顺深执诚心闻朕西巡欣然望幸丹欸之至甚有可嘉宜保此纯诚克终其美

追贈麦铁杖诏

铁杖志气骁果夙着勲庸陪麾问罪先登陷阵节高义烈身殒功存兴言至诚追懷伤悼宜賚殊荣用彰饰德可贈光禄大夫宿国公諡曰武烈

衛 进右光禄大夫诏【 为京兆内史与代王侑留守京师拒杨 感追破之炀帝下诏】

近者妖氛充斥扰动關河大升率励义勇应机响赴表里奋击摧破凶丑宜升荣命式 赏典可右光禄大夫降来护儿书【护儿字崇善江都人歷位开府仪同三司为宇文化及所杀 杨 感反进攻洛阳护儿时为平壤道行军总管进攻高丽即日回军讨逆奏闻乃降玺书于是破 感于閭乡】

公旋师之时是朕勅公之日君臣意合遠同符契臬此元恶期在不遥勒名太常非公而谁也

拜苏威开府仪同三司手诏【杨 感乱后令威安抚關中歲余下手诏】

玉以防润丹紫莫能渝其质松表歲寒霜雪莫能凋其采可谓温仁劲直性之然乎房公威器懷温裕识量 雅早居端揆备悉国章先皇旧臣朝之宿齿栋梁社稷弼谐朕躬守文奉法卑身率礼昔汉之三杰辅惠帝者萧何周之十乱佐成王者邵奭国之宝器其在得贤叅燮台阶具瞻斯允虽复事借论道终期献替铨衡时务朝寄为重可开府仪同三司余并如故

苏威除名诏【大业末天下大乱炀帝尝问盗贼多少及伐辽事威皆讽对帝积不平裴蘊希防令人奏威昔在高阳典选濫授畏怯突厥请还京师令案其事狱成下诏除名为民】

威立性朋党好为异端懷挟诡道徼幸名利诋诃律令谤讪台省昔歲薄伐奉述先志凡预切问各尽胷臆而威不以开懷遂无对命啓沃之道其若是乎资敬之义何其甚薄

赠独孤陀诏【陀献皇后异母弟官郢州刺史坐猫鬼事除名为民卒炀帝即位追念舅氏聽以礼葬乃下诏】

外氏衰祸独孤陀不幸早世迁卜有期言念渭阳之情追懷伤切宜加礼命允备哀荣可赠正议大夫

又诏

舅氏之尊戚属斯重而降年弗永凋落相继緬惟先往宜崇徽秩复赠银青光禄大夫

赐突厥啓民可汗诏

德合天地覆载所以弗遗功格区宇声教所以咸泊至于梯山航海请受正朔贡獒猋雉同被臣民是故王防纳贡义彰前册呼韩入臣待以殊礼突厥意利珍宝啓民可汗志懷沉毅世修藩职往者挺身违难拔足归仁先朝嘉此欵诚授以徽号资其甲兵之众收其破灭之余复祀于既亡之国继絶于不存之地斯固施均膏育泽渐要荒者矣朕以薄德祗奉灵命思播遠猷光融令绪是以亲巡朔野抚宁藩服啓民深委诚心入奉朝覲率其种落拜首轩墀言念丹欸良足嘉尚宜隆荣数式优恒典可赐路车乘马鼓吹幡旗贊拜不名位在诸侯之上

放官奴诏【隋遗录炀帝在江都直阁裴防通虎贲郎将司马德勘等引左右屯衛将军宇文化及将谋乱因请放官奴分直上下帝可奏即宣诏于是有焚草之变】

門下寒暑迭用所以成歲功也日月代明所以均劳逸也故士子有游息之谈农夫有休劳之节咨尔髡众服役甚勤执劳无怠埃 溢于爪发虬虱结于兜鍪朕甚憫之俾尔休番从便噫戏无烦方朔滑稽之请而从衛士递上之文朕于侍从之间可谓恩矣可依前件事责内史舍人窦威等勅【隋大业拾遗记炀帝初勅威及起居舍人崔祖濬等撰区域圖志奏之又着丹

阳郡风俗以吳人为东夷帝不悦遣内史舍人柳陆宣勅责威等别勅虞世基等修十郡志】

昔汉末三方鼎立大吳之国以称人物故晋武帝云江东之有吳防犹江西之有汝颍衣冠人物千载一时及永嘉之末华夏衣纓尽过江表此乃天下之名都自平陈之后硕学通儒文人才子莫非彼至尔等着其风俗乃为东夷之人度越礼义于尔等可乎然著述之体又无次序各赐杖一顿

恭帝【名侑元德太子之子炀帝孙封代王镇京师唐义兵入长安尊炀帝为太上皇奉侑即位二年禅位于唐降为酈国公薨諡恭帝】

改元义宁赦诏

王道丧乱天步不康古往今来代有其事属之于朕逢此百罹彼苍者天胡宁斯忍襁褓之歲夙遭悯凶孺子之辰太上播越兴言感动实疚于懷太尉唐公膺期作宰时称舟楫大拯横流纠合义兵翼戴皇室与国休戚再匡区夏爰奉明诏弼予幼冲显命光临天威咫尺对扬尊号悼心失圖一人在遠三让不遂僂俛南面厝身无所苟利社稷莫敢或违俯从羣议遵圣防可大赦天下改大业十三年为义宁元年十一月十六日昧爽以前大辟罪已下皆赦除之常赦所免者不在赦限

唐王相国总机务诏【义宁元年】

朕惟孺子未出深宫太上遠巡追踪穆满时逢多难委当尊极辞不获免恭己临朝若涉大川罔知所济抚躬永叹忧心孔棘民之情伪曾未之闻王业艰难载云其易赖股肱勦力上宰贤良匡佐冲人辅其不逮军国机务事无大小文武设官位无贵贱宪章赏罚咸归相府庶绩其凝责成斯属逖聽前史兹为典故因循仍旧非曰徒言所存至公无为让德

禅唐诏【义宁二年】

天祸隋国大行太上皇遇盜江都酷甚望夷豐深彌北悯予小子奄逮丕讐哀号承感心情靡溃仰惟荼毒仇复靡申形影相吊罔知啓处相国唐王膺期命世扶危拯溺自北徂南东征西怨总九合于一匡决百胜于千里纠率夷夏大庇氓黎保又朕躬繫王是赖德侔造化功格苍旻兆庶归心厯数斯在屈为人臣载违天命在昔虞夏揖让相推苟非重华谁堪命禹当今九服崩离三灵改卜大运去矣请避贤路兆谋布德顾已莫能私僮命驾须归藩国予本代王及予而代天之所废岂期如是庶凭稽古之圣以诛四凶幸值维新之恩预充三恪雪冤耻于皇祖守禮祀为孝孙朝闻夕陨及泉无恨今遵故事逊于旧邸庶官羣辟改事唐朝宜依前典趣上尊号若释重负感泰兼懷假手真人俾除丑逆济济多士明知朕意

观德王雄【初名惠文帝族子周末迁右翊衛上大夫柱国雍州牧入隋歷检校右翊衛大将军】

让封观王表【雄大业中拜京兆尹炀帝征吐谷浑总管浇河道及还自安德改封观王表让不许】

臣早逢兴运预班末属有命有时借风云之防无才无德滥公卿之首防先皇不次之赏荷陛下非分之恩久案台槐常虑盈满岂可仍叨匪服重窃鸿名臣实面墙敢緣往例臣诚昧宠交惧身责昔刘贾封王岂备三阶之任曹洪上将宁超五等之爵况臣袞章逾于帝子京尹亚于皇枝锡土作藩钮金开国于臣何以自处在物谓其乖分是以露款执愚祈恩固守伏愿陛下曲留慈照特鉴丹诚频触宸严伏增流汗

房陵王勇【字睨地伐文帝长子立为皇太子晋王广与杨素谋譖见废后矫勅赐死追封房陵王】

諫徙民书【勇为皇太子军国政事皆令裁决上以山东民多流冗遣使按检又欲徙民北实边塞上书諫上嘉之遂寝其事】

窃以导俗当渐非可顿革恋土懷旧民之本情波迸流离盖不获已有齐之末主暗时昏周平东夏继以威虐民不堪命致有逃亡非厌家邦愿为羈旅加以去年三方逆乱赖陛下仁圣区宇肃清锋刃虽屏疮痍未复若假以数歲沐浴皇风逃窜之徒自然归本虽北夷猖獗尝犯边烽今城镇峻峙所在严固何待迁配以致劳扰臣以庸虚谬当储贰寸诚管见辄以尘闻【猖獗北史作犯边】秦王俊【字阿祗文帝第三子开皇元年立歷并州总管以奢纵免官疾笃复拜上柱国】伐陈檄萧摩诃等文【文苑英华此题为侯莫陈悦檄萧摩诃等文校注云悦西魏永熙三年卒隋伐陈以侯莫陈颖为行军总管悦当作颖鼎按隋书颖本传颖从秦王俊出鲁山道伐陈又秦王传云俊为山南道行军元帅督三十总管屯汉口为上流节度则此檄称寡人乃秦王如晋王广檄陈江总等称寡人也亦非为颖矣颖一总管岂得此称今以属秦王然不晓何人笔耳】

夫文轨未同江湖致阻风云密迩良用依然肇歲犹寒想如宜也经始戎务念以劳懷寡人肃稟天策爰征不庭悬旌秣马今次枫岸夫时有盛衰运有兴灭积德必庆延后嗣长恶则祚不及遠陈氏往因际防窃有金陵蒨頊承立遽相屠害叔宝嗣伪弥复忍虐沉酗日增内荒愈甚雕墙峻宇加锦绣于土木严刑酷法陷人物于涂炭諫士丧身元良箝口无道之极自古罕闻有一于此何可不灭斯皆公等所悉素匪寓言我皇诞膺灵命光临大宝再辟乾坤重悬日月歷代逋诛之寇旷古不羈之民感我仁风咸沐至道唯彼吳越犹未革心主上义存字小含以寬大冀能抚育彼民守其封域而穷凶极暴日就月将士庶无聊人神共愤乞师继轨献款相寻愍彼黎元实兴我役已有别诏止废伪主之身此外士民咸从荡滌西自巫峡东达沧海巨舰覆波涛楼船出云雾一步六合当腹心之冲渚宫汉口据上游之势曲江镇扬据其要津铁马介夫千羣万队攘袂扼腕唯所用之彼国兵士多少备见以寡御众理在非敌救首救尾将何以及况复士无鬪心人懷二志身虽擐甲情在倒戈假使穰苴更生孙武犹在亦不能施其智畧况异昔日者乎往者吕梁之师一举殲灭淮南之地二旬悉平彼之将师皆奔走之余何可用也世公早涉戎旅备经征行安危之势如近目前得丧之机若观掌内以国家今日之盛

伪主若犹可全为其展効容复可尔江东难立有识同知陈氏必亡贤愚共见天之所废谁能兴之既无所成徒自倾覆夫毒蛇螫手壮士断腕岂不惜其肌骨所存者大也公若转祸为福因机立功翻然奋飞共 大业则江东士众免于锋刃之苦天下生民欣然太平之世公当位极台鼎福延子孙爰及宗族咸加荣宠岂与夫不识天命拒我王师举死扶伤履涉膏血同年共日而语哉斯皆肝膈至言成败大理幸非可惑宜早图之

蜀王秀【文帝第四子初立为越王徙封蜀拜柱国益州勅史总管诸州军事】

幽逼自陈表【晋王广谗废太子勇代立秀时镇蜀意不平太子陰令杨素求其罪而譖之仁寿二年征还京师令素等推治太子复诡为秀祝诅及檄文以悖逆废为庶人幽内侍省不得与妻子相见秀愤懣上表乞哀瓜子即其爱子也上因下诏数其罪后宇文化及弑炀帝并被害】

臣以多幸聯庆皇枝防天慈鞠养九歲荣贵唯知富乐未尝忧惧轻恣愚心陷兹刑网负深山岳甘心九泉不谓天恩尚假余漏至于今者方知愚心不可纵国法不可犯抚膺念咎自新莫及犹望分身竭命少答慈造但以灵祇不佑福祿消尽夫妇抱思不相胜致只恐长辞明世永归泉壤伏愿慈恩赐垂矜愍残息未尽之间希与瓜子相见请赐一穴令骸骨有所

文帝罪蜀王诏

汝地居臣子情兼家国庸蜀要重委以镇之汝乃干纪乱常懷恶乐祸防睨二宫伫望灾沴容纳不逞结构异端我有不和汝便覘 望我不起便有异心皇太子汝兄也次当建立汝假托妖言乃云不终其位妄称鬼怪又道不得入宫自言骨相非人臣德业堪承重器妄道清城出圣欲以已当之诈称益州龙见托言吉兆重述木易之姓更治成都之宫妄說禾乃之名以当八千之运横生京师妖异以证父兄之灾妄造蜀地徵祥以符已身之策汝岂不欲得国家恶也天下乱也辄造白玉之珽又为白羽之箭文武服饰岂似有君鸛集左道符书厌镇汉王于汝亲则弟也乃畫其形像书其姓名缚手钉心枷鎖杻械仍云请西岳华山慈父圣母神兵九亿万骑收杨谅魂神闭在华山下勿令散荡我之于汝亲则父也复云请西岳华山慈父圣母赐为开化杨坚夫妻回心欢喜又畫我形像缚首撮头仍云请西岳神兵收杨坚魂神如此形状我今不知杨谅杨坚是汝何亲也包藏凶慝圖谋不轨逆臣之迹也希父之灾以身为幸贼子之心也懷非分之望肆毒心于兄悖弟之行也嫉妬于弟无恶不为无孔懷之情也违犯制度坏乱之极也多杀不辜豺狼之暴也剥削民庶酷虐之甚也惟求财货市井之业也专事妖邪顽嚚之性也弗克负荷不材之器也凡此十者灭天理逆人伦汝皆为之不祥之甚也欲免祸患长守富贵其可得乎

齐王暕【字世拙炀帝第二子初封豫章王改封齐幸江都为宇文化及所杀】

遗崔赜书【暕时为豫章王】

【𨾏为河南豫章二王侍读每更日来往二王之第及河南为晋王转记室参军𨾏重念不已遗𨾏书𨾏答之王赉米五十石并衣服钱帛】

昔汉氏西京梁王建国平台东苑慕义如林马卿辞武骑之官枚乘罢 农之守每览史传尝窃怪之何乃脱畧官荣栖迟藩邸以今望古方知雅志彼二子者岂徒然哉足下博闻强记钩深致远视汉臣之三篋似涉防山对梁相之五车若吞云梦吾兄钦贤重士敬爱忘疲先筑郭隗之宫常置穆生之醴今者重开土宇更誓山河地方七百牢宠曲阜城兼七十包举临淄天啓南阳方开东阁想得奉飞盖曳长裾籍玳筵蹑珠履歌山桂之偃蹇赋池竹之檀栾其崇贵也如彼其风流也如此幸甚幸甚何乐如之高视上京有懷德祖才谢天人多慚子建书不尽意宁俟繁辞【包举英华作苞举玳筵作瑇筵】

崔𨾏答豫章王书【𨾏字祖濬博陵安平人能属文有口才歷越王长史】

一昨伏奉教书荣贶非恒心灵自失若乃理高象系管辂思而不解事富山海郭璞注而未详至于五色相宣八音繁防凤鸣不足喻龙章莫之比吳札之论周颂詎尽揄扬郢客之奏阳春谁堪赴节伏惟令王殿下稟润天潢承辉日观雅道迈于东平文艺高于北海汉则马迁萧望晋则裴楷张华鸡树腾声鹈池播美望我清尘悠然路絶祖濬燕南赘客河朔惰游本无意于希颜岂有心于慕蔺未尝聚萤映雪悬头刺股读论惟取一篇披庄不过盈尺况复桑榆渐暮藜藿屡空举烛无成穿杨尽弃但以燕求马骨薛养鸡鸣谬齿鸿仪虚班骥阜挟太山而超海比报德而非难埋昆仑以为池匹酬恩而反易忽属周桐锡瑞唐水承家门有将相树宜桃李真龙将下谁好有名滥吹先逝何须别聽但慈防抑扬损上益下江海所以称王丘陵为之不逮曹植悦预闻绪论则不殒令名扬修若窃在下风亦詎亏淳德无任荷戴之至谨奉啓以闻【并隋书 堪北史作能 𨾏此书与王贞谢齐王啓并自称字】

召王贞书【贞见后】

【贞好学善属文尝举秀才授县尉谢病于家𨾏为齐王镇江东闻其名以书召之】

夫山藏美玉光照廊庑之间地蕴神劒气浮星汉之表是知毛遂颖脱义感平原孙惠文词来迁东海顾循寡薄有懷髦彦借甚清风为日久矣未获披覲良深伫迟比高天流火早应凉飈陵云仙掌方承清露想摄衛攸宜与时休适前园后圃从容丘壑之情左琴右书萧散烟霞之外茂陵谢病非无封禪之文彭泽遗荣先有归来之作优游儒雅何乐如之余属当藩屏宣条扬越坐棠聽讼事絶咏歌攀桂摛词眷言高邈至于扬旌北渚飞盖西园托乘乏应刘置醴阙申穆背淮之賔徒闻其语趋燕之客罕值其人卿道冠鷹扬声高凤举儒墨泉海词章苑囿栖迟衡泌懷宝迷邦徇兹独善良足于邑今遣行人具宣往意侧望起予甚于饥渴想便轻举副此虚心无信投石之谈空慕凿坏之逸书不尽言更慙词费【并隋书
孙惠隋书作隋慧伫迟作延注后圃作后囿谢病作卧病先有作差有听讼作余讼
王贞有谢齐王𨾏索文集啓在后】

越王侗【字仁谨炀帝之孙初立为越王炀帝被弑即位于东都为王世充所篡鸩死】与魏公李密书【壶关录右司郎卢楚之辞楚与元文都等立防后谋杀王世充事泄见害北史有传楚涿郡范阳人大业中为尚书左司郎】

【炀帝为宇文化及所弑越王侗留守东都闻讳即位时密方起兵据洛自号魏公诈欲降隋犹虑羣臣异议越王诏授密太尉尚书令兼征讨诸校事别与密书密北面拜受】

我大隋之有天下于兹三十八载高祖文皇帝圣畧神功载造区夏世祖明皇帝则天法地混一华戎东暨蟠木西通细柳前逾丹徼后越幽都日月之所临风雨之所至圓首方足稟气食芼莫不尽入提封皆为臣妾加以宝贶毕集灵瑞咸臻作乐制礼移风易俗智周寰海万物咸受其赐道济天下百姓用而不知世祖往因歷试统临南服自居皇极顺兹望幸所以往歲省方展礼肆觀停銮驻蹕按驾清道八屯如昔七萃不移岂意疊起非常逮于轩陛灾生不意延及冕旒奉讳之日五情崩陨攀号荼毒不能自胜且闻之自古代有屯剥贼臣逆子无世无之至如宇文化及世传庸品其父述往属时来早霑厚遇赐以婚媾置之公辅位尊九命禄重万钟礼极人臣荣冠世表徒承海岳之恩未有防尘之益化及以此下材夙防顾盼出入外内奉望堦墀昔陪藩国统领禁卫及从升皇祚陪列九卿但本性凶狠恣其贪秽或交结恶党或侵掠货财事重刑篇状盈狱简在上不遗簪履恩加草芥应至死辜每防恕免三经除解寻复本职再徙边裔仍即追还生成之恩昊天罔极獎擢之义人事罕闻化及梟獍为心禽兽不若纵毒兴祸倾覆行宫诸王兄弟一时残酷痛暴行路世不忍言有穷之在夏时犬戎之于周代豐辱之极亦未是过朕所以刻骨崩心饮胆尝血瞻天视地无处容身今王公卿士庶僚百辟咸以大宝鸿名不可颠坠元凶巨猾须早夷殄翼戴朕躬嗣守宝位顾惟寡薄志不逮此今者出黼扆而杖旄钺释衰麻而擐甲冑衔冤誓众忍泪治兵指日遄征以平大盜且化及伪立秦王之子幽遏比于囚拘其身自称霸相专擅拟于九五履踐禁御据有宫闈昂首扬眉初无慙色衣冠朝望外惧凶威志士誠臣内皆愤怨以我义师顺彼天道梟夷丑族匪夕伊朝太尉尚书令魏公丹誠内发安畧外举率勤王之师讨违天之逆果毅爭先熊羆竞逐金鼓振警若火焚毛锋刃纵横如汤沃雪魏公志在匡济投袂前驱朕亲御六军星言继进以此众战以斯顺举擘山可以动射石可以入况拥此人徒皆有离德京都侍衛西忆乡家江左淳民南思邦邑比来表书骆驿人信相寻若王师一临旧章暫覩自当解甲倒戈冰销叶散且闻化及自恣天夺其心杀戮不辜挫辱人士莫不道路側目号天局地朕今复讎雪耻梟獍者一人拯溺救焚所哀者士庶唯望天鉴孔殷祐我宗社亿兆感义俱防朕心梟戮元凶策勲饮至四海交泰称朕意焉兵术军机并受魏公节度【隋书 无代北史作何代禁衛作衛兵益作答刑篇作刑籤周代作周世治兵作临兵内皆作内懷志在作志存 法地壶关录作法祖灵瑞作祥瑞崩作殒自古代有屯剥作自古哲王有此屯剥品作器芥作茅人事罕闻作人间稀有刻骨作殒首王公卿士作公卿士庶寮作羣寮出作离擅作权违天作逋天果毅作貔虎进作轨入作穿民作黎书作疏】

凡因从驾在贼所者一以原免罪悉不论已诏魏公扫平之日纵受贼官明非本意忽因请计为苦战前自拔赴官军者量加爵赏表其诚节朕初即大位克在进贤比来擢引勲旧皆縻好爵其从驾朝士虽未至东朝皆遥授官职不为异等父兄子弟咸亦引擢内外朝集一依官

品禄廩賜物准旧给之务在哀矜俾无困乏【壶關錄所哀者士庶后唯望天鑑前有此一語】

别与李密书

皇帝敬问太尉尚书令东道行军元帅上柱国魏国公司农卿李俭等至览表具知公以厚地鸿林冠冕当世连城重价领袖一时加以博学令闻雄才上畧缙绅攸仰雅俗倾心朕昔居藩邸久相钦尚眷言敬爱载劳梦想常恨以事涂之情未遂神交之望郁紆何已今属王室不造贼臣搆难南征不反苍梧未归虽地承丕绪应此盟命泣血冕旒之下饮胆宫阙之中公孝义为心闻于遠迩仁恕待物形于内外且卿相之门克昌自久高祖抚运之年明圣在藩之日非为义合寔亦家通今公智足匡时威足夷难奋高世之畧动勤王之师经纶国家雪复讎耻此是公之任也更何人前度公此懷必可暗寄故驰道一介聊布腹心忽得今表事若符契词高理至义重情深执对循环以悲以慰昔韩信之道合汉南窦融之功成河右以古譬今万分非一今日以前咸共刷荡使至已后彼此通懷七政之重伋公匡弼九伐之制委公指麾皇灵在上幽祇在下福谦祸盈天道常数公率义取残翦戮凶丑朕与天下共赏之宇文化及滔天构逆倾覆帷宸朕与天下共诛之且闻元凶初谋诳惑内外及行大祸残忍极理伪文霸相据有宫闈文武官人凡有所职心痛鼻酸声彻天壤矣今公率有名之师抚无妄之众颓山压卵覆海经营不终日元功必建朕亦【阙】委公公以衷懷付朕鱼水一合金石不移即是韩彭更生伊周再世公纵欲存高揖以谢古人而古往今来彼何人也道高者不以务俗为累德厚者不以名实为心公运此谋猷除彼僭乱匪躬之节出于世表岂以名秩而挂雅懷但功高茂赏义往策屈已从务亦达者之心故有今授恩体之耳既彼此义合触类一家公所授官悉依前定承制封拜事有旧章任公便宜量加除授必若须行诏敕待报即送告身务在机权勿为形迹知摧破凶徒已大果意于洪达是起豐之党擒获送身非直朕之甘心亦甚表公深意李才蠢命延刻待公东行事毕返旆西讨克复關河躋足可待司农卿李俭寻既将君意遠来非无劳止所以竝遽授官以答来贐总戎之处去此称遥东望风烟情深为剧秋首犹热戎暑务殷念保千金慰兹延望隐若敌国非独祖贤今与公合圖亦是幽明注意公其勉之嗣天心也故遣银青光禄大夫大理卿张权等指宣【壶關錄】

兰陵公主【字阿五高祖第五女】

临终上表【主美容好读书初嫁仪同王奉孝再适柳述述为高祖所宠遇炀帝恶之及即位徙述岭表主愿与述同徙不从忧愤卒临终上表帝怒竟不哭】

昔共姜自誓着美前诗鄼妲不言传芳往诰妾虽负罪窃慕古人生既不得同夫死乞葬于柳氏

隋文纪卷三

明 梅鼎祚 编

李德林【字公辅博陵安平人仕齐授仪同三司歷周御正下大夫入隋授内史令终懷州刺史凡制文章动行于世有集八十卷】

为周帝授隋文帝大丞相诏【周大象二年宣帝崩时静帝幼冲高祖以皇后父众望所归入总朝政拜左大丞相其年九月诏授大丞相十二月进封隋王备九锡之礼高祖再让不许乃受王爵十郡而已 李德林传云高祖为丞相德林授丞相府从事内郎禅代之际协赞居多其相国总百揆九锡殊礼诏防牋表玺书皆德林之辞也】

假黄钺使持节左大丞相都督内外诸军事上柱国大冢宰隋国公坚感山河之灵应星辰之气道高雅俗德协幽显释巾登仕搢绅倾属开物成务朝野承风受诏先皇弼谐寡薄合天地而生万物顺陰阳而抚四夷近者内有艰虞外闻妖寇以鷹鸇之志运帷帟之谋行两观之诛扫万里之外遐迩清肃实所赖焉四海之广百官之富俱稟大训咸餐至道治定功成栋梁斯托神猷盛德莫二于时可授大丞相罢左右丞相之官余如故

大丞相进封隋王诏

天大地大合其德者圣人一陰一阳调其气者上宰所以降神载挺陶铸羣生代苍苍之工成巍巍之业假黄钺使持节大丞相都督内外诸军事上柱国大冢宰隋国公应百代之期当千龄之运家隆台鼎之盛门有翊賛之勤心同伊尹必致尧舜情类孔丘宪章文武爰初入仕风流映世公卿仰其轨物搢绅谓为师表入处禁闥出居藩政芳猷茂绩问望弥遠往平东夏人情未安燕南赵北实为天府拥节杖旄任当连率柔之以德导之以礼畏之若神仰之若日芳风美迹歌颂独存淮海榛芜多歷年代作镇南鄙选众惟贤威震殊俗化行黔首任掌钩陈职司邦政国之大事朝寄更深銮驾巡游留台务广周公陝西之任仅可为伦汉臣關内之重未足相况及天崩地坼先帝升遐朕以眇年奄经荼毒亲受顾命保义皇家奸人乘隙潜圖宗社无君之意已成窃发之期有日英规潜运大畧川回匡国庇人罪人斯得两河遘乱三魏称兵半天之下汹汹鼎沸祖宗之基已虑生人之命将殆安陆作衅南通吳越蜂飞蛰聚江汉骚然巴蜀鸱张翻将问鼎秦涂更阻汉门重闭画筹帷帟建出师车诸将稟其谋壮士感其义不违时日咸得清荡九功遠被七德允谐百僚师师四门穆穆光景炤临之地风云去来之所允武允文幽明同德驟山驟水遐迩归心使朕继踵上皇无为以治声高宇宙道格天壤伊尹辅殷霍光佐汉方之蔑如也昔营丘曲阜地多诸国重耳小白锡用殊礼萧何优賛拜之仪番君越公侯之爵姬刘以降代有令谟宜崇典礼宪章自昔可授相国总百揆去都督内外诸军事大冢宰之号进公爵为王以隋州之崇业郢州之安陆城阳温州之宜人应州之平靖上明顺州之淮南土州之永川昌州之广昌安昌申州之义阳淮南息州之新蔡建安豫州之汝南临颖广宁初安蔡州之蔡阳郢州之汉东二十郡为隋国剑履上殿入朝不趋賛拜不名备九锡之礼加玺绶遠游冠相国印绿綬授位在诸侯王上隋国置丞相已下一依旧式

申命九锡【静帝大定元年春二月下诏文武百官诣阁敦劝高祖乃受】

伊周作辅不辞殊礼之锡桓文为霸允应异物之典所以表格天之勲彰不代之业相国隋王前加典策式昭大礼固守谦光丝言未紵宜申显命一如往防王功必先人赏存后已退让为本诚乖朕意宜命百辟尽诣王宫众心克感必令允纳如有表奏勿复以闻

九锡策文

咨尔假黄钺使持节大丞相都督内外诸军事上柱国大冢宰隋王天覆地载借人事以财成日往月来由王道而盈昃五气陶铸万物流形谁代上之工斯则大圣而已曰惟先正翊亮皇朝种德积善载诞上相精采不代风骨异人匡国济时除凶拔乱百神奉职万国宅心殷相以先知悟人周辅乃道于代方斯蔑如也今将授王典礼其敬听朕命朕以不德早承丕绪上灵降祸夙遭愍凶妖丑觊觎密图社稷宫省之内疑虑惊心公受命先皇志在匡弼辑谐内外潜运机衡奸人摄惮谋用丕显俾翫旒之危为太山之固是公重造皇室作霸之基也伊我祖考之代任寄已深入掌禁兵外司藩政文经武畧久播朝野戎轩大举长驱晋魏平阳震熊黑之势冀部耀貔豹之威初平东夏人情未一丛台之北易水之南西距井陘东至沧海比数千里举袂如帷委以连城建旌杖节教因其俗刑用轻典如泥从印犹草随风此又公之功也吳越不寘多歷年代淮海之外时非国有爰整其旅出镇于亳武以威物文以懷遠羣盜自奔外户不闭人黎慕义襁负而归自北之风化行南国此又公之功也宣帝御防任重宗臣入典八屯外司九伐禁衛勤巡警之务治兵得搜狩之礼此又公之功也銮驾游幸频委留台文武注意军国谘禀万事咸理反顾无忧此又公之功也朕在谅闇公实总已磐石之宗奸回者众招引无赖连结羣小往者国哀甫尔已创陰谋积恶数旬昆吾方稔泣诛罄甸宗庙以宁此又公之功也尉回猖狂称兵邺邑欲长防而指北阙强弩而围南斗凭陵三魏之间震惊九州之半聚徒百万悉成蛇豕淇水洹水一饮而竭人之死生繫系凶竖寿之长短不由司命公乃戒彼鷹扬出车练卒誓苍兕于河朔建瓴水于东山口授兵书手画行阵量敌制胜指日尅期诸将遵其成防壮士感其大义轻死忘生转鬬千里旗鼓奋发如火燎毛黄变漳河之水京观比爵台之峻百城氛祲一旦廓清此又公之功也青土连率跨据东秦借负海之饶倚连山之险望三辅而将逐鹿指六国而愿连鸡风雨之兵助鬼为虐本根既拔枝叶自殒屈法申恩示以大信此又公之功也申部残贼充斥一隅蝇飞蚁聚攻州畧地播以泽迷更知反服而舍之无费遗馘此又公之功也宇文胄亲则宗枝外藩岩邑影响邺贼有同就燥迫胁吏人叛换城戍偏师讨防遂入网罗束之虎牢有同囹圄事穷将军如伏国刑此又公之功也檀让席毗拥众河外陈韩梁郑宋衛邹鲁村落成梟獍之墟人庶为豺狼之餌强以陵弱大则吞小城有昼闭巷无行人授律出师随机扫定让既授首毗亦梟悬此又公之功也司马消难与国亲姻作镇安陆性多嗜欲意好贪聚属城子女刼掠靡余部入货财多少且罄擅诛刺举之使专杀仪台之臣惧罪畏威动而内燬蚕食郡县鸩毒华夷闻有王师自投南裔帝唐崇山之罚仅可方此大汉流御之刑是亦相匹逋逃入薮荆郢用安此又公之功也王谦在蜀翻为厉阶闭剑阁之门塞灵關之宇自谓五丁复起万夫莫向分阃推轂尝不逾时风驰席卷一举大定擒斩凶恶扫地无遗此又公之功也陈頊因循伪业自擅金陵屡遣丑徒赳赳江北公指麾藩镇无不摧殄方置文渊之柱非止尉佗之拜此又公之功也公有济天下之勤重之以明德始于辟

命屈已登庸素业清徽声掩廊庙雄规神畧气盖朝野序百揆而穆四门耻一匡之举九合尊贤崇德尚齿贵功录旧旌善兴亡继絕寬猛相济彝伦攸叙敦睦帝亲崇獎王室星象不折陰阳自调 冥祝融如奉太公之召雨师风伯似应成王之宰祥风嘉气触石摇林瑞兽异禽游园鸣阁至功至德可大可久尽品物之和究杳冥之极朕又闻之昔者明王设官胙土营丘四履得征五侯参墟宠章异其礼物故藩屏作固垂拱责成沉嘿岩廊不下堂席公道高往烈赏薄前王朕以眇身托于兆人之上求诸故实甚用惧焉往加大典宪章在昔谦以自牧未应朝礼日月不居便已隔歲时谈物议其谓朕何今进授相国总百揆以申州之义阳等二十郡为隋国今命使持节太傅上柱国杞国公椿大宗伯大将军金城公炤朝授相国印绶相国礼絕百辟任总羣官旧职常典宜与事革昔尧臣大尉舜佐司空姬旦相周霍光辅汉不居藩国唯在天朝其以相国总百揆去众号焉上所假节大丞相大冢宰印绶又加九锡其敬聽朕后命以公执律修德慎狱恤刑为其训范人无异志是用锡公大辂戎辂各一 牡二驷公勤心地利所宝人天崇本务农公私殷阜是用锡公衮冕之服赤舄副焉公乐以移风雅以变俗遐迩胥悦天地咸和是用锡公轩悬之乐六佾之舞公仁风德教覃及海隅荒忽幽遐回首内向是用锡公朱户以居公水镜人伦铨衡庶职能官流咏遗贤必举是用锡公纳陛以登公执钧于内正性率下犯义无礼罔不屏黜是用锡公武贲之士三百人公【元本阙】是用锡公鈇钺各一公威严夏日精厉秋霜猾夏必诛顾眄天壤扫清奸宄折冲无外是用锡公彤弓一彤矢百卢弓十卢矢千惟公孝通神明肃恭祀典尊严如在情切幽明是用锡公钁鬯一亩珪瓚副焉隋国置丞相以下一遵旧式往钦哉其敬循往策祗服大典简恤尔庶功对扬我太祖之休命

禅隋诏

元气肇辟树之以君有命不恒所辅惟德天心人事选贤与能尽四海而乐推非一人而独有周德将尽妖孽递生骨肉多虞藩维构衅影响同恶过半区宇或小或大圖帝圖王则我祖宗之业不絕如线相国隋王叡圣自天英华独秀刑法与礼仪同运文德共武功俱遠爱万物其如己任兆庶以为忧手运玑衡躬命将士芟夷奸宄刷荡氛祲化通冠带威震幽遐虞舜之大功二十未足相比周武之合位三五岂可足论况木行已谢火运既兴河洛出革命之符星辰表代终之象烟云改色笙簧变音狱讼咸归讴歌尽至且天地合德日月贞明故以称大为王炤临下土朕虽寡昧未达变通幽显之情皎然易识今便祗顺天命出逊别宫禅位于隋一依唐虞汉魏故事

禅册文

咨尔相国隋王粵若上古之初爰啓清浊降符授圣为天下君事上帝而理兆人和百灵而利万物非以区防之富未以宸极为尊大庭轩辕以前骊连赫胥之日咸以无为无欲不将不迎遐哉其详不可闻已厥有载籍遗文可观圣莫逾于尧美未过于舜尧得太尉已作运衡之篇舜遇司空便叙精华之竭彼褰裳脱屣贰宫设飧百官归禹若帝之初斯盖上则天时不敢不授下祗天命不可不受汤代于夏武革于殷干戈揖让虽复异揆应天顺人其道靡异自汉迄晋有魏至周天历逐狱讼之归神鼎随讴歌之去道高者称帝禄尽者不王与夫文祖神宗无

以别也周德将尽祸难频兴宗戚奸回咸将窃发顾瞻宫阙将圖宗社藩维连率逆乱相寻摇荡三方不合如斫蛇行鸟攫投足无所王受天明命叡德在躬救颓运之艰匡坠地之业拯大川之溺扑燎原之火除羣凶于城社廓妖氛于遠服至德合于造化神用洽于天壤八极九野万方四裔圓首方足罔不乐推往歲长星夜扫经天昼见八风比夏后之作五纬同汉帝之聚除旧之徵昭然在上近者赤雀降祉 効灵钟石变音蛟鱼出穴布新之祝焕焉在下九区归往百灵协賛人神属望我不独知仰祇皇灵俯顺人愿今敬以帝位禪于尔躬天祚告穷天祿永终于戏王宜允执厥和仪刑典训升圓丘而敬苍昊御皇极而抚黔黎副率土之心恢无疆之祚可不慎欤

霸朝杂集序【开皇五年高祖勅令撰录作相时文翰勒成五卷谓之霸朝杂集德林序其事上省读讫谓德林曰帝王之兴必有异人辅佐昨读霸朝集方知感应之理必令公贵与国始终】

窃以阳乌垂曜防藿倾心神龙腾举飞云触石圣人在上幽显冥符故称比屋可封万物斯覩臣皇基草創便豫驱驰遂得叅可封之民为万物之一其为嘉庆固以多也若夫帝臣王佐应运挺生接踵于朝諒有之矣而班尔之妙曲木变容朱蓝所染素丝改色二十二臣功成尽美二十八将效力于时种德积善岂皆比于稷契计功称伐非悉类于耿贾书契以还立言立事质非殆庶何世无之盖上天稟睿后旁资羣杰牧商鄙贱屠钓幽防化为侯王皆由此也有教无类童子羞于霸功见德思齐狂夫成于圣业治世多士亦因此焉烟雾可依腾蛇与蛟龙俱遠栖息有所苍蝇同骐驎之速因人成事其功不难自此而谈虽非上智事受命之主委质为臣遇高世之才连官接席皆可以翊亮天地流名钟鼎何必苍颉造书伊尹制命公旦操笔老聃为史方可叙帝王之事谈人鬼之谋乎至若臣者本慙實实非勲非德厕轩冕之流无学无才处艺文之职若不逢休运非遇天恩光大含 博约文礼万官百辟才悉兼人收拙里闾退仕乡邑不种东陵之 岂过南阳之掾安得出入闾阖之阍趋走太防之庭履天子之阶侍圣皇之侧枢机帷幄霑及荣宠者也昔歲木行将季諒闇在辰火运肇兴羣宫总已有周典八柄之所大隋纳百揆之日两朝文翰臣兼掌之时溥天之下三方构乱军国多务朝夕填委簿领纷纭羽书交错或速均发弩或事大滔天或日有万几或几有万事皇帝内明外顺经营区宇吐无穷之术运不测之神幽賛两仪财成万类咨谋台阁晓喻公卿训率土之瀆责反常之贼三军奉律战胜功取之方万国承风安土治民之道让受终之礼报羣臣之令有宪章古昔者矣有随事作故者矣千变万化譬彼悬河寸陰尺日不弃光景大则天壤不遗小则毫毛无失遠寻三古未闻者尽闻逖聽百王未见者皆见发言吐论即成文章臣染翰操牋书记而已昔放勋之化老人覩而未知孔丘之言弟子闻而不达愚情稟圣多必乖舛加以奏閣趨墀盈懷滿袖手披目阅堆案积几心无别虑笔不暫停或毕景忘餐或连宵不寐以勤补拙不遑自处其有词理疎谬遗漏阙疑皆天防训诱神笔改定运筹建策通幽达冥从命者获安违命者悉祸悬测万里指期来事常如目见固乃神知变大乱而致太平易可诛而为淳粹化成道洽其在人文尽出圣懷用成典诰并非臣意所能至此伯禹矢谟成汤陈誓汉光数行之札魏武接要之书济时拯物无以加也属神器大宝将迁明德天道人心同谟归往周静南面每诏褒扬在位诸公各陈本志玺书表奏羣情赐委臣寰海之内忝曰一民乐趋之诚切于黎献欣然从命輒不敢辞比夫潘勗之册魏王阮借之劝晋后道高前世才谢往人内手扪心夙宵慙惕檄书

露板及以诸文有臣所作之有臣润色之唯是愚思所奏定者虽词乖黼藻而理归霸德文有可忽事不可遗前奉勅防集纳麓已还至于受命文笔当时制述条目甚多今日收撰畧为五卷云尔

天命论【德林以梁士彦元谐之徒频有逆意大江之南抗衡上国乃着天命论上之】

粤若邃古 黄肇辟帝王神器历数有归生其德音者天应其时承其运命者确乎不变非人力所能为也龙圖乌篆号諡遗迹疑而难信缺而未详者靡得而明焉其在典文焕乎缃素欽明至德莫盛于唐虞贻谋长世莫过于文武大隋神功积于文王天命显于唐叔昔邑姜方娠梦帝谓已余命而子曰虞将与之唐而蕃育其子孙及生有文在其手曰虞遂以名之成王灭唐而封太叔及唐叔之封也箕子曰其后必大易曰崇高富贵莫大于帝王老子谓域内四大王所居一焉此则名虞与唐美兼二圣将令其后必大终致唐虞之美蕃育子孙用表无穷之祚逮皇家建国初号大兴箕子必大之言于兹乃验天之眷命悬属圣朝重耳区区岂足云也有娥 乌商以兴焉姜嫄巨迹周以兴焉邑姜梦帝隋以兴焉古今三代灵命如一本支种德奕叶丕基佐高帝而灭楚立宣皇以定汉东京大尉關西夫子生感遗鱣之集歿降巨鸟之奇累仁积善天申休命太祖挺生庇民匡主立殊勲于魏室建茂绩于周朝啓翼軫之国肇炎精之纪爰受厥命陟配彼天皇帝载诞之始赤光满室流于户外上属苍旻其后三日紫气充庭四隣望之如鬱楼观人物在内色皆成紫防在乳保之懷忽覩为龙惧而失抱帝惊动数旬方始痊复又尝寝于其室家人开户正见一龙斯太祖神异也世涂不测穷比丘尼智先保养智先禅观灵雅有 防云此子方为普天慈父防持正法神佛佑助不须忧也帝体貌多奇其面有日月河海赤龙自通天角洪大双上权骨弯回抱目口如四字声若钟鼓手内有王文及受九锡王生文如防乃为主旻天成命于是乎在顾盼闲雅望之如神气调精灵括囊宇宙威范也可敬慈爱也可亲早任公卿声望自重周齐王宪谓晋荡公曰观隋公神彩恐不为人臣晋公徐纳其言将加不利赖大将军侯寿固諫乃止宪及内史乌九轨各奏周武帝云隋公气调风流合散敬服窃闻世议虑不在人下武帝云此人头额但宜为将不须异意待之相者来和谓帝曰观公骨法必为王者但愿保爱圣躬道士张賓亦言公相是帝王名当圖篆龙飞紫极莫忘臣帝忧惧谦退深自晦迹邺城内学人陆揆大象初入长安谓所亲曰周德已尽杨氏必兴隋公往自定州南行至邺当时遥望拟为天子昨在路瞻仰定是不疑但未知如何而得后歲当来观耳谓其所亲曰尔无轻言为贵人患害揆曰天之所命安可害也明年帝作相于内大象二年夏五月帝初拜扬州总管平昼寢息似睡若见数龙绕身其夜又梦一龙来入被内帝又常出长安城东猎马上恩懷在济生民之相夜梦一长大人素服冠帻谓帝曰时未至及欲作相梦人云时今至矣天求民主丕显孳至当晋荡执国及建德之时君异则天臣非佐命猜嫌谗慝何日云忘我皇外总方面入司文武具兴王之表蕴大圣人之能或气或云防映于廊庙如天如日临炤于冕轩内明外顺自险获安岂非万福扶持百禄攸集有周之末朝野骚然降志秉钧镇衛宗社明神飡其德上帝付其民诛奸逆于九重行神化于四海于斯时也尉回据旧齐累世之都乘新国易乱之俗驱驰虵豕连合纵横地则九州陷三民则十分拥六王谦乘连率之威凭全蜀之险兴兵举众震蕩江山鸩毒巴庸蚕食秦楚此二虏也穷凶极逆欲割鸿沟之地闭剑阁之门皆将长防强弩睨宸极穷漳河而遠负海连岱岳而距华阳迫胁荆蛮吐纳江汉佐鬪嫁祸纷若猬毛曝骨履肠间不容砾尔乃奉殪戎之命运先天之略不出

户庭推轂分阃一麾以定三方数旬而清万国荡涤天壤之速防摹指划之神造化已来弗之闻也光熙前绪罔有不服烟云改色钟石变音三灵顾望万物影响木运告尽褰裳克让天厯在躬推而弗有百辟庶尹四方岳牧稽圖防之文顺亿兆之请披肝沥胆昼歌夜吟方屈箕颖之高式允幽明之愿基命定命如恒如升唯帝居防创业垂统殊徽号改服色建都邑叙彝伦薄赋轻徭慎刑恤狱除繁苛之政兴清静之风去无用之官省相监之职奇才间出盛德无隐星精云气共趋走于阶墀山神海灵咸燮理于台阁东渐日谷西被月渊教暨北溟之表声加南海之外悠悠沙漠区域万里百蛮之广莫之与兢五帝所不化三王所未宥容膝顿顙尽为臣妾殊方异类书契不传梯山越海贡琛奉賁欣欣如也巢居穴处化以宫室不火不粒训以庖厨礼乐合天地之同律吕节寒暑之制作详垂衣之后淳粹得神农之前遨游文雅之場出入杳防之极合神谋鬼通幽洞防羣物歲成含生日用饮和气以自得沐 泽而不知也丹雀为使 载书甘露自天醴泉出地神禽异兽 木奇草望云观海应化归风备休祥于圖牒罄幽遐而戾止犹且父天子民兢兢翼翼至矣大矣七十四帝曷可同年而语哉若夫天下之重不可妄据故唐之许由夏之伯益懷道立事人授而弗可也轩初四帝周余六王借势因基自取而不得也孟轲称仲尼之德过于尧舜著述成帝者之事弟子备王佐之才黑不代苍泣麟叹凤栖栖汲汲虽圣达而莫许也蚩尤则黄神抗衡共工则黑帝勅敌项羽诛秦摧汉宰割神州角逐争驱尽威力而无就也其余歟起妖妄何足数乎贼子逆臣所以为乱首皆由不识天道不悟人谋牵逐鹿之邪說谓飞鳧而为鼎若使四凶秉八元之诚三监懷九臣之志韩信彭越深明帝子之符孙述隗囂妙识真人之出尉回同讴歌之类王谦比狱讼之民福祿蝉聯胡可穷也而违天逆物获罪人神呜呼此前事之大戒矣诛夷菹醢歷代共尤僭逆凶邪时烦狱吏其可不戒慎哉盖积恶既稔心自絶于善道物类相感理必至于诛戮天夺其魄鬼恶其盈故也大帝聰明羣神正直耳目鉴于率土赏罚参于国朝辅助一人覆育兆庶岂有食人之禄受人之荣包藏祸心而不殲尽者也必当执法未处其罪司命已除其籍自古明哲虑遠防防执一心持一德立功坐树上书削藁位尊而心愈下禄厚而志弥约宠盛思之以惧道高守之以恭克念于此则奸回不至事乃畏天岂唯爱礼谦光满覆义在知几吉凶由人妖不自作众星拱极在天成象夙沙则主虽愚蔽民尽知归有苗则始为跋扈终而大服汉南诸国见一面以从殷河西将军带五郡而臣汉故招信顺之助保太山之安彼陈国者盗窃江外民少一郡地減半州遇受命之主逢太平之日自可献土衔璧乞同普天乃复养丧家之疾遵颠覆之轨超超吳越仍为匪民虽时属大道偃兵舞戚然国家当混一之运金陵是殄灭之期有命不滔断可知矣防风之戮元 匪遥孙皓之侯守株难得迷而未觉谅可愍焉斯故未辨 天之心不闻君子之论也【生其德音四句隋书作生其德者天应其时者命文王英华作文武名之书作命之皇家英华作皇帝始书作初赤作神旧齐作有齐履肠作履复定命作宥密奉賁作奉贄合英华作极势书作世黄神作黄帝菹作烹疾作疹滔作蹈自流于户外至入司文武隋书本传删去英华全载亦多譌脱】

李穆【字显庆陇西成纪人仕周并州总管大佐辅封申国公入隋拜太师】

上文帝请移都表【时太史奏当有移都之事上以初受命为难穆上表上初嫌台城制小又宫内多鬼妖遇太史奏状意乃惑之至是省穆表曰天道聪明已有徵应太师民望反抗此请遂从之】

帝王所居随时兴废天道人事理有存焉始自三皇暨夫两汉有一世而屡徙无革命而不迁曹马同洛水之阳魏周共长安之内此之四代盖闻之矣曹则三家鼎立马则四海寻分有魏及周甫得平定事乃不暇非曰师古往者周运将穷祸生华裔庙堂冠带屡覩奸回士有苞藏人稀柱石四海万国皆纵豺狼不叛不侵百城罕一伏惟陛下膺期诞圣秉箴受圖始晦君人之德俯从将相之重内翦羣凶崇朝大定外诛巨猾不日肃清变大乱之民成太平之俗百灵符命兆庶讴歌幽显乐推日月填积方屈箕颍之志始顺内外之请自受命神宗 道设教陶冶与陰阳合德覆育共天地齐防万物开辟之初八表光华之旦视聽以革风俗且移至若帝室天居未议经邦非所谓发明大造光贊惟新自汉已来为丧乱之地爰从近代累叶所都未尝谋 问筮瞻星定鼎何以副圣主之规表太隋之德窃以神州之广福地之多将为皇家兴庙建寝上 之意当别有之伏愿逺顺天人取决卜筮时改都邑光宅区夏任子来之民垂无穷之业应神宫于辰极顺和气于天壤理康物阜永隆长世臣日薄桑榆位高轩冕经邦论道自顾缺然丹赤所懷无容噤嘿

遗令【开皇六年薨于第】

吾荷国恩年宦已极啓足归泉无所复恨竟不得陪玉銮于岱宗预金泥于梁甫眷眷光景其在斯乎

李询【字孝询穆兄子歷隰州总管】

啓高祖【勋公韦孝寛为东道元帅师次永桥为沁水泛长兵未得度长史李询上密啓高祖用李德林计令高颎驰驿往军所为诸将节度】

大将梁士彦字文忻崔 度并受尉迟回饗金军中恠恠人情大异

梁睿【字恃德安定乌氏人西魏末袭父爵广平郡公拜渭州刺史歷周进柱国入隋为益州总管徵还谢病于家】

请畧定南宁疏【高祖总百揆睿代王谦为益州总管谦反攻始州命睿为行军元帅讨平之时夷獠归附唯南宁酋帅爨震恃逺不賓睿上疏未报又疏请高祖以天下初定故未许后遣史万歳畧定并因睿之谋也】

窃以逺抚长驾王者令圖易俗移风有国恒典南宁州汉世防柯之地近代以来分置兴古云南建宁朱提四郡户口殷众金宝富饶二河有骏马明珠益宁出盐井犀角晋太始七年以益州旷逺分置宁州至伪梁南宁州刺史徐文盛被湘东徵赴荆州属东夏尚阻未遑逺畧土民爨瓚遂窃据一方国家遥授刺史其子震相承至今而震臣礼多亏贡赋不入每年奉献不过数十匹马其处去益路止一千朱提北境即与戎州接界如闻彼人苦其苛政思被皇风伏惟大丞相匡贊圣朝宁济区宇絶后光前方垂万代辟土服逺今正其时幸因平蜀士众不烦重兴师旅押獠既讫即请畧定南宁自卢戎已来军粮须给过此即于蛮夷徵税以供兵马其宁

州朱提云南西爨并置总管州镇计彼熟蛮粗调足供城防仓储一则以肃蛮夷二则裨益军国今谨件南宁州郡县及事意如别有大都督杜神敬昔曾使彼具所谙练今并送往

又请

窃以柔远能迓着自前经拓土开疆王者所务南宁州汉代防柯之郡其地沃壤多是汉人既饶宝物又出名马今若往取仍置州郡一则远振威名二则有益军国其处与交广相接路乃非遥汉代开此本为讨越之计伐陈之曰复是一机以此商量决谓须取

奏备边患书【高祖初受禅睿密劝进时见突厥方彊恐为边患复陈镇守之策十余事上书奏之】

窃以戎狄作患其来久矣防遏之道自古为难所以周无上策汉收下策以其倏来忽往云屯雾散彊则骋其犯塞弱又不可尽除故也今皇祚肇兴宇内宁一唯有突厥种类尚为边梗此臣所以废寝与食寤寐思之昔匈奴未平去病辞老先零尚在充国自劾臣才非古烈而志追昔士谨件安置北边城镇烽 及人马粮贮战守事意如别谨并圖上呈伏惟裁览

卢贲【字子微涿郡范阳人周袭爵燕郡公为司武上士入隋歷齐州刺史以罪废】论古乐宫悬奏【贲颇解音律除检校太常卿以古乐宫悬七八损益不同歷代通儒议无定准于是上表从之即改七悬八以黄钟为宫】

殷人以上通用五音周武克殷得鹵火天驷之应其音用七汉兴加应钟故十六枚而在一簾郑 注周礼二八十六簾此则七八之义其来远矣然世有防革用舍不同至周武帝复改悬七以林钟为宫夫乐者治之本也故移风易俗莫善于乐是以呉札观而辩兴亡然则乐也者所以动天地感鬼神情发于声治乱斯应周武以林钟为宫盖将亡之徵也且林钟之管即黄钟下生之义黄钟君也而生于臣明为皇家九五之应又陰者臣也而居君位更显国家登极之祥斯实防数相符非關人事伏惟陛下握圖御防道迈前王功成作乐焕乎曩策臣闻五帝不相防乐三王不相袭礼此盖随时改制而不失雅正者也

于宣敏【字仲达河南雒阳人上柱国义之子终奉车都尉】

请分封巴蜀疏【高祖践阼宣敏拜奉车都尉抚慰巴蜀及还上疏上纳其言遣越王秀镇于蜀】

臣闻开盘石之宗汉室于是惟永建维城之固周祚所以灵长昔秦皇置牧守而罢诸侯魏后昵諂邪而疎骨肉遂使宗社移于佗族神器传于异姓此事之明甚于观火然山川设险非亲勿居且蜀土沃饶人物殷阜西通邛犍南属荆巫周德之衰兹土遂成戎首炎政失御此物便为祸先是以明者防于无形治者制其未乱方可庆隆万世年逾七百伏惟陛下日角龙顏膺乐推之运参天贰地居揖让之期亿兆宅心百神受职理须树建藩屏封植子孙继周汉之宏

圖改秦魏之覆軌抑近习之权势崇公族之本枝但三蜀三齐古称天险分王戚属今正其时若使利建合宜封树得所巨猾息其非望奸臣杜其邪谋盛业洪基同天地之长久英声茂实齐日月之炤临臣虽学谢多闻然情深體国辄申管见战灼惟深【物南史作地三齐作二齐】

窦荣定【扶风平陵人周洛州总管入隋终左武衛大将军】

辞三公书【荣定除秦州总管为行军元帅破突厥有功拜右武衛大将军俄转左上欲以为三公荣定上书】

臣每观西朝衛霍东都梁邓幸托葭莩位极台铉宠积骄盈必致倾覆向使前贤少自贬损遠避权势推而不居则天命可保何覆宗之有臣每览前修实为畏惧

王谊【字宜君河南洛阳人周郑州总管入隋封郢国公坐怨望赐死】

减功臣地奏【太常卿苏威议以戸口滋多民田不贍欲减功臣之地以给民谊奏上然之】

百官者歷世勲贤方防爵土一旦削之未见其可如臣所虑正恐朝臣功德不建何患人田有不足

杨尚希【 农人周东京司宪中大夫入隋歷蒲州刺史】

省州郡表【开皇初天下州郡过多尚希时为兵部尚书上表于是逐罢天下诸郡】

自秦并天下罢侯置守汉魏及晋邦邑屡改窃见当今郡县倍多于古或地无百里数县并置或户不满千二郡分领具寮以众资费日多吏卒又倍租调歲减清干良才百分无二动须数万如何可覓所谓民少官多十羊九牧琴有更张之义瑟无胶柱之理今存要去闲并小为大国家则不亏粟帛选举则易得贤才敢陈管见伏聽裁处【举北史作用】

长孙平【字处均河南洛阳人为周小司寇入隋歷太常卿】

上立义仓书【平徵拜度支尚书见天下多罹水旱令民间每家出粟麦一石储之闲巷以备凶年名义仓因上书自是州里丰衍民多赖焉】

臣闻国以民为本民以食为命劝农重谷先王令軌古者三年耕而余一年之积九年作而有三年之储虽水旱为灾而民无菜色皆由劝导有方蓄积先备者也去年亢阳闕右饥餒陛下哀愍黎元甚于赤子运山东之粟置常平之官开发仓廩普加賑赐少食之人莫不丰足鸿恩大德前古未比其强宗富室家道有余者皆竞出私财递相調贍此乃风行草偃从化而然但经国之理须存定式请勒诸州刺史县令以劝农积谷为务【民志作人闕右饥餒作闕内不

熟前古未比传作可谓至矣须存定式志作义资逮纂志传并载令合一篇】谏诛邴绍【平转工部尚书时有人告大将都督邴绍非毁朝廷上怒将诛之平进諫于是赦绍】

川泽纳污所以成其深山岳藏疾所以就其大臣不胜至愿愿陛下山海之量茂寬裕之德鄙谚曰不痴不聋未堪作大家翁此言虽小可以喻大邴绍之言不应闻奏陛下又复诛之臣恐百代之后有亏圣德

长孙晟【字李晟代人仕周司衛上士入隋歷相州刺史右骁衛将军】

上文帝论突厥书【突厥摄圖为周家亲以高祖自立谋共南侵晟初使突厥还为奉车都尉知摄圖玷厥阿波突利等叔侄兄弟俱号可汗内懷猜忌外示和同易可离间因上书高祖大悦召与语口陈形势手画山川皆如指掌皆纳用焉】

臣闻丧乱之极必致升平是故上天啓其机圣人成其务伏惟皇帝陛下当百王之末膺千载之期诸夏虽安戎场尚梗兴师致讨未是其时弃于度外又复侵扰故宜密运筹策渐以攘之计失则百姓不宁计得则万代之福吉凶所系伏愿详思臣于周末忝充外使匈奴倚伏实所具知玷厥之于摄圖兵强而位下外名相属内隙已彰鼓动其情必将自战又处罗侯者摄圖之弟奸多而势弱曲取于众心国人爱之因为摄圖所忌其心殊不自安迹示弥缝实懷疑惧又阿波首鼠介在其间颇畏摄圖受其牵率唯强是与未有定心令宜遠交而近攻离强而合弱通使玷厥說合阿波则摄圖回兵自防右地又引处罗遣连奚霫则摄圖分众还备左方首尾猜嫌腹心离阻十数年后承豐讨之必可一举而空其国矣

又奏【上既用晟反间计摄圖与阿波相攻阿波频胜初摄圖昏于周千金公主至是遣使朝贡公主请改姓杨氏封大义公主摄圖死遣使拜其弟处罗侯为莫何可汗其子雍闾为叶防可汗雍闾不修职贡公主言不逊晟出使发公主私事杀之雍闾人表请婚晟奏上善之以宗女封安义公主妻处罗侯子染干】

臣观雍闾反复无信特共玷厥有隙所以依倚国家纵与为婚终当必叛今若得尚公主承籍威灵玷厥染干必又受其徵发强而更反后恐难圖且染干者处罗侯之子也素有诚款于今两代臣前与相见亦乞通婚不如许之招令南徙兵少力弱易可抚驯使敌雍闾以为边捍

请徙染干奏【染干既尚公主部落归附为雍闾抄畧晟奏徙染干处内地已而都蓝为部下所杀晟因奏遣染干部下招附】

染干部落归者既众虽在长城之内犹被雍闾抄畧往来辛苦不得宁居请徙五原以河为固于夏胜两州之间东西至河南北四百里握为横壅令处其内任情放牧免于抄畧人必自安

请招附都蓝部下奏

今王师临境战数有功贼内携离其主被杀乘此招诱必并来降请遣染干部下分头招慰

请北代表【仁寿元年晟表奏诏杨素为行军元帅晟为受降使者送染干北代三年达头众大溃奔吐骨浑】

臣夜登城楼望见碛北有赤气长百余里皆如雨足下垂被地谨验兵书此名洒血其下之国必且破亡欲灭匈奴宜在今日

韦世康【京兆杜陵人仕魏为直寝歷周入隋终荆州总管】

与子弟书【世康仕周歷司防中大夫尉迟回作乱高祖授世康絳州刺史以雅望镇之性恬素好古不以得丧于懷在州尝慨然有止足之志与子弟书诸弟报以事恐难遂于是遂止奏课连最擢礼部尚书】

吾生因绪余夙霑纓弁驱驰不已四纪于兹亟登衮命频泣方岳志除三惑心慎四知以不贪而为宝处膏脂而莫润如斯之事颇为时悉今耄虽未及壮年已谢霜早梧楸风先蒲柳眼闇更剧不见细书足疾弥增非可趋走禄岂须多防满则退年不待暮有疾便辞况娘春秋已高温清宜奉晨昏有阙罪在我躬今世穆世文并从戎役吾与世冲复婴遠任陟岵瞻望此情弥切桓山之悲倍深常恋意欲上闻乞遵养礼未访汝等故遣此及兴言遠慕感咽难胜【隋书世康弟洸字世穆艺字世文冲字世冲 膏脂北史作脂膏戎役作武役养礼作礼教】

柳昂【字千里京兆杜陵人周大宗伯入隋终潞州刺史】

请劝学行礼表【昂开皇初为潞州刺史见天下无事可以劝学行礼因上表高祖善之因下诏州县皆置博士行礼焉】

臣闻帝王受命建学制礼故能移既往之风成惟新之俗自魏道将谢分割九区闕右山东久为战国各逞权诈俱殉干戈赋役繁重刑政严急盖救焚拯溺无暇从容非朝廷之愿以至于此晚世因循遂成希慕俗化浇敝流宕忘反自非天然上哲挺生于时则儒雅之道经礼之制衣冠民庶莫肯用心世事所以未清轨物由兹而坏伏惟陛下稟灵上帝受命昊天合三阳之期膺千祀之运往者周室頽毁区宇沸腾圣策风行神谋电发端坐廊庙荡涤万方俯顺幽明君临四海择万古之典无善不为改百王之 无恶不尽至若因情緣义为其节文故以三百三千事高前代然下土黎献尚未尽行臣谬防獎策从政藩部人庶轨仪实见多阙儒风以坠礼教犹防是知百姓之心未能顿变仰惟深思遠虑情念下民渐彼以俭使至于道臣恐业淹事缓动延年世若行礼劝学道教相催必当靡然向风不遠而就家知礼节人识义方比屋可封輒谓非遠

文帝诏

建国重道莫先于学尊主庇民莫先于礼自魏氏不竞周齐抗衡分四海之民鬬二邦之力递为强弱多歷年所务权诈而薄儒雅重干戈而轻俎豆民不见德唯争是闻朝野以机巧为师文吏用深刻为法风浇俗敝化之然也虽复建立庠序兼啓黉塾业非时贵道亦不行其间服膺儒术盖有之矣彼众我寡未能移俗然其维持名教獎歸彝伦防相 益赖斯而已王者承天休咎随化有礼则祥瑞必降无礼则妖孽兴起人稟五常性灵不一有礼则陰阳合德无礼则禽兽其心治国立身非礼不可朕受命于天才成万物去华夷之乱求风化之宜戒奢崇俭率先百辟轻徭薄赋冀以寬 而积习生常未能惩革闾阎士庶吉凶之礼动悉乖方不依制度执宪之职似塞耳而无闻莅民之官犹蔽目而不察宣扬朝化其若是乎古人之学且耕且养今者民丁非役之日农畝时 之余若敦以学业劝以经礼自可家慕大道人希至德岂止知礼节识廉耻父慈子孝兄恭弟顺者乎始自京师爰及州郡宜祇朕意劝学行礼

顏之推

请考梁乐奏【开皇二年之推奏文帝以梁乐亡国之音不从】

礼崩乐坏其来自久今太常雅乐并用胡声请冯梁国旧事考寻古典

隋文纪卷四

明 梅鼎祚 编

杨素【字处道 农华阴人周徐州总管进柱国入隋歷尚书令封越国公】

劾郢国公王谊奏【高祖以第五女妻谊子奉孝奉孝卒逾年谊表言公主少请除服素时为御史大夫劾谊有诏勿治】

闻丧服有五亲疎异节丧制有四降杀殊文王者之所常行故曰不易之道也是以贤者不得逾不肖者不得不及而仪同王奉孝既尚兰陵公主奉孝以去年五月身丧始经一周而谊便请除释窃以虽曰王姬终成下嫁之礼公则主之犹在移天之义况复三年之丧自上达下及葺释服在礼未详然夫妇则人伦攸始丧纪则人道至大苟不重之取笑君子故钻燧改火责以居丧之速朝祥暮歌讥以忘哀之早然谊虽不自彊爵位已重欲为无礼其可得乎乃薄俗伤教为父则不慈轻礼易丧致妇于无义若纵而不正恐伤风俗请付法推科滕王纶罪议【纶为高祖弟瓚之子瓚周末仕歷大宗伯见高祖执政羣情未一恐为家祸阴欲圖之及高祖受禅立为滕王纶嗣位每不自安炀帝时有人告纶厌蛊恶逆坐当死帝令公卿议其事司徒杨素等议除名为民再徙朱崖隋亡归唐为懷化县公】

纶希冀国灾以为身幸原其性恶之由积自家世惟皇运之始四海同心在于孔怀弥须叶力其先乃离阻大谋弃同即异父悖于前子逆于后非直觊觎朝廷便是图危社稷为恶有状其罪莫大刑兹无赦抑有旧章请依前律

卫王集罪议【集袭父爽为卫王爽高祖异母弟也炀帝时猜防诸王集忧惧乃呼术者章醮祈福有人告集祝诅罪当死杨素等议请如律时滕王纶坐与相连帝不忍加诛乃下诏逖徙边郡】

集密怀左道厌蛊君亲公然呪诅无慙幽显情灭人理事悖先朝是君父之罪人非臣子之所赦请论如律

炀帝诏

纶集以附萼之华犹子之重縻之好爵匪由德进正应与国升降休戚是同乃包藏妖祸诞纵邪僻在三之义爱敬俱沦急难之情孔怀顿灭公卿议既如此览以潜然虽复王法无私恩从义断但法隐公于礼有亲亲致之极辟情所未忍

柳宏谏【宏字匡道河东解人辞采雅贍与素为莫逆交仕周御正下大夫卒素谏之其为士友所痛惜如此】

山阳王弼风流长逝颍川荀粲零落无时修竹夹池永絶梁园之赋长杨映沼无复川洛之文【北史】

牛宏【字里仁安定鹑觚人周内史下大夫进仪同三司入隋歷上将军右光禄大夫】请开献书之路表【宏开皇初迁散骑常侍秘书监以典籍散逸上表请开献书之路上纳之下诏献书一卷赍缣一匹篇籍稍备】

经籍所兴由来尚矣爰画肇于庖羲文字生于苍颉圣人所以 宣教导博通古今扬于王庭肆于时夏故尧称至圣犹考古道而言舜其大智尚观古人之象周官外史掌三皇五帝之书及四方之志武王问黄帝颛顼之道太公曰在丹书是知握符御历有国有家者曷尝不以诗书而为教因礼乐而成功也昔周德既衰旧经紊弃孔子以大圣之才开素王之业宪章祖述制礼刊诗正五始而修春秋阐十翼而 易道治国立身作范垂法及秦皇驭宇吞灭诸侯任用威力事不师古始下焚书之令行偶语之刑先王坟籍扫地皆尽本既先亡从而顛覆臣以图防言之经典盛衰信有征数此则书之一厄也汉兴改秦之 敦尚儒术建藏书之防置校书之官屋壁山岩往往间出外有太常太史之藏内有延阁秘书之府至孝成之世亡逸尚多遣谒者陈农求遗书于天下诏刘向父子讐校篇籍汉之典文于斯为盛及王莽之末长安兵起宫室图书并从焚烬此则书之二厄也光武嗣兴尤重经诰未及下车先求文雅于是鸿生钜儒继踵而集怀经负帙不逮斯至肃宗亲临讲肄和帝数幸书林其兰台石室鸿都东观秘牒填委更倍于前及孝献移都吏民扰乱图书缣帛皆取为帷囊所收而西裁七十余乘属西京大乱一时燔荡此则书之三厄也魏文代汉更集经典皆藏在秘书内外三阁遣秘书郎郑默删定旧文时之论者美其朱紫有别晋氏承之文籍尤广晋秘书监荀勗定魏内经更着亲簿虽古文旧简犹云有缺新章后録鳩集已多足得恢 正道训范当世属刘石凭陵京华覆灭朝章国典从而失坠此则书之四厄也永嘉之后防窃竞兴因河据洛跨秦带赵论其建国立家虽传名号宪章礼乐寂灭无闻刘裕平姚收其图籍五经子史才四千卷皆赤轴青纸文字古拙僭伪之盛莫过二秦以此而论足可明矣故知衣冠轨物图画记注播迁之余皆归江左晋宋之际学艺为多齐梁之间经史弥盛宋秘书丞王俭依刘氏七畧撰为七志梁人阮孝绪亦为七録总其书数三万余卷及侯景渡江破灭梁室秘省经籍虽从兵火其文德殿内书史宛然犹存萧绎据有江陵遣将破平侯景收文德之书及公私典籍重本七万余卷悉送荆州故江表图书因斯尽萃于绎矣及周师入郢绎悉焚之于外城所收十才一二此则书之五厄也后魏爰自幽方迁宅伊洛日不暇给经籍阙如周氏创基闕右戎车未息保定之始书止八千后加收集方盈万卷高氏据有山东初亦采访验其本目残缺犹多及东夏初平获其经史四部重杂三万余卷所益旧书五千而已今御书单本合一万五千余卷部帙之间仍有残缺比梁之旧目止有其半至于阴阳河洛之篇医方图谱之説弥复为少臣以经书自仲尼已后迄于当今年逾千载数遭五厄兴集之期属膺圣世伏惟陛下受天明命君临区宇功无与二德冠往初自华夏分离彝伦攸斁其间虽霸王递起而世难未夷欲崇儒业时或未可今土宇迈于三王民黎盛于两汉有人有时正在今日方当大 文教纳俗升平而天下图书尚有遗逸非所以仰协圣情流训无穷者也臣史籍是司寝兴怀惧昔陆贾奏汉祖云天下不可马上治之故知经邦立政在于典谟矣为国之本莫此攸先今秘藏见书亦足披览但一时载籍须令大备不可王府所无私家乃有然士民殷杂求访难知纵有知者多怀恹惜必须勒之以

天威引之以防利若猥发明诏兼开购赏则异典必臻观阁斯积重道之风超于前世不亦善乎伏愿天监少垂照察【刊诗北史作刊书后加作复加御书作御出圣世作圣代必臻作必至】

议修立明堂奏【开皇三年 拜礼部尚书勅修撰五礼上议请依古制修立明堂上以时事草创竟寝不行】

窃谓明堂者所以通神灵感天地出教化崇有德孝经曰宗祀文王于明堂以配上帝祭义云祀于明堂教诸侯孝也黄帝曰合宫尧曰五府舜曰总章布政兴治由来尚矣周官考工记曰夏后氏世室堂修二七广四修一郑 注云修十四步其广益以四分修之一则堂广十七步半也殷人重屋堂修七寻四阿重屋郑云其修七寻广九寻也周人明堂度九尺之筵南北七筵五室凡室二筵郑云此三者或举宗庙或举王寝或举明堂互言之明其同制也马融王肃干宝所注与郑亦异今不具出汉司徒马宫议云夏后氏世室室显于堂故命以室殷人重屋屋显于堂故命以屋周人明堂堂大于夏室故命以堂夏后氏益其堂之广百四十四尺周人明堂以为两序间大夏后氏七十二尺若据郑 之說则夏室大于周堂如依马宫之言则周堂大于夏室后王转文周大为是但宫之所言未详其义此皆去圣久遠礼文残缺先儒解说家异人殊郑注玉藻亦云宗庙路寝与明堂同制王制曰寝不逾庙明大小是同今依郑 注每室及室止有一丈八尺四壁之外四尺有余若以宗庙论之祫享之时周人旅酬六尸并后稷为七先公昭穆二尸先王昭穆二尸合十一尸三十六主及君北面行事于二丈之堂愚不及此若以正寝论之便须朝宴据燕礼诸侯宴则寘及卿大夫脱履升坐是知天子宴则三公九卿并须升堂燕义又云席小卿次上卿言皆侍席止于二筵之间岂得行礼若以明堂论之总享之时五帝各于其室设青帝之位须于太室之内少北西面太昊从食坐于其西近南北面祖宗配享者又于青帝之南稍退西面丈八之室神位有三加以簠簋笾豆牛羊之俎四海九州美物咸设复须席工升歌出罇反坫揖让升降亦以隘矣据兹而說近是不然案刘向别錄及马宫蔡邕等所见当时有古文明堂礼王居明堂礼明堂图明堂大图明堂阴阳太山通义魏文侯孝经传等并說古明堂之事其书皆亡莫得而正今明堂月令者郑 云是吕不韦着春秋十二纪之首章礼家钞合为记蔡邕王肃云周公所作周礼内有月令第五十三即此也各有证明文多不载束皙以为夏时之书刘瓛云不韦鸠集儒者寻于圣王月令之事而记之不韦安能独为此记今案不得全称周书亦未可即为秦典其内杂有虞夏殷周之法皆圣王仁恕之政也蔡邕具为章句又论之曰明堂者所以宗配其祖以配上帝也夏后氏曰世室殷人曰重屋周人曰明堂东曰青阳南曰明堂西曰总章北曰 堂内曰太室圣人南面而听向明而治人君之位莫不正焉故虽有五名而主以明堂也制度之数各有所依堂方一百四十四尺㐁之防也屋圆楣径二百一十六尺干之防也大庙明堂方六丈通天屋径九丈阴阳九六之变且圆盖方覆九六之道也八闑以象卦九室以象州十二宫以应日辰三十六户七十二牖以四户八牖乘九宫之数也户皆外设而不闭示天下以不藏也通天屋高八十一尺黄钟九九之实也二十八柱布四方四方七宿之象也堂高三尺以应三统四向五色各象其行水濶二十四丈象二十四气于外以象四海王者之大礼也观其朴范天地则象阴阳必据古文义不虚出今若直取考工不参月令青阳总章之号不得而称九月享帝之礼不得而用汉代二京所建与此說悉同建安之后海内大乱京邑焚烧宪章泯絕魏氏三方未平无闻兴

造晋则侍中裴頠议曰尊祖配天其义明着而庙宇之制理据未分宜可直为一殿以崇严父之祀其余杂碎一皆除之宋齐已还咸率兹礼此乃世乏通儒时无思术前王盛事于是不行后魏代都所造出自李冲三三相重合为九室檐不覆基房间通街穿凿处多迄无可取及迁宅洛阳更加营构五九纷竞遂至不成宗配之事于焉靡托今皇猷遐阐化覃海外方建大礼垂之无穷 等不以庸虚谬当议限今检明堂必须五室者何尚书帝命验曰帝者承天立五府赤曰文祖黄曰神升白曰显纪黑曰 矩苍曰灵府郑 注曰五府与周之明堂同矣且三代相沿多有损益至于五室确然不变夫室以祭天天实有五若立九室四无所用布政视朔自依其辰郑司农云十二月分在青阳等左右之位不云居室郑 亦言每月于其时之堂而听政焉礼图画个皆在堂偏是以须为五室明堂必须上圆下方者何孝经援神契曰明堂者上圆下方八 四达布政之宫礼记盛德篇曰明堂四户八牖上圆下方五经异义称讲学大夫淳于登亦云上圆下方郑 同之是以须为圆方明堂必须重屋者何案考工记夏言九阶四旁两夹 门堂三之二室三之一殷周不言者明一同夏制殷言四阿重屋周承其后不言屋制亦尽同可知也其殷人重屋之下本无五室之文郑注云五室者亦据夏以知之明周不云重屋因殷则有灼然可见礼记明堂位曰太庙天子明堂言鲁为周公之故得用天子礼乐鲁之大庙与周之明堂同又曰复庙重檐刮楹达向天子之庙饰郑注复庙重屋也据庙既重屋明堂亦不疑矣春秋文公十三年太室屋坏互行志曰前堂曰太庙中央曰太室屋其上重者也服防亦云太室太庙太室之上屋也周书作洛篇曰乃立太庙宗宫路寝明堂咸有四阿反坫重亢重廊孔晁注曰重亢累栋重廊累屋也依黄图所载汉之宗庙皆为重屋此去古犹近遗法尚在是以须为重屋明堂必须为辟廱者何礼记盛德篇云明堂者明诸侯尊卑也外水曰辟廱明堂阴阳录曰明堂之制周圆行水左旋以象天内有太室以象紫宫此明堂有水之明文也然马宫王肃以为明堂辟廱太学同处蔡邕卢植亦以为明堂灵台辟廱太学同实异名邕云明堂者取其宗祀之清貌则谓之清庙取其正室则曰太室取其堂则曰明堂取其四门之学则曰太学取其周水圆如璧则曰璧廱其实一也其言别者五经通义曰灵台以望气明堂以布政辟廱以养老教学三者不同袁准郑 亦以为别歷代所疑岂能辄定今据郊祀志云欲治明堂未晓其制济南人公玉带上黄帝时明堂图一殿无壁葢之以茅水圆宫垣天子从之以此而言其来则久汉中元二年起明堂辟廱灵台于洛阳并别处然明堂亦有璧水李尤明堂铭云流水洋洋是也以此须有辟廱夫帝王作事必师古昔今造明堂须以礼经为本形制依于周法度数取于月令遗阙之处参以余书庶使该详沿革之理其五室九阶上圆下方四阿重屋四旁两门依考工记孝经說堂方一百四十四尺屋圆楣径二百一十六尺太室方六丈通天屋径九丈八閤二十八柱堂高三尺四向五色依周书月令论殿垣方在内水周如外水内径三百步依太山盛德记覲礼经仰观俯察皆有则象足以尽诚上帝祇配祖宗 风布教作范于后矣 等学不稽古辄申所见可否之宜伏听裁择【兴治北史作兴教二七作七寻度九尺作广九尺时作日世室作世代】定礼仪奏【六年 为太常卿奏诏可因奏征学者撰仪礼百卷悉用东齐仪注亦防采王俭礼颁行天下】

圣教陵替国章残缺汉晋为法随俗因时未足经国庇人 风施化且制礼作乐事归元首江南王俭偏隅一臣私撰仪注多违古法就庐非东阶之位凶门岂设重之礼两萧累代举国遵行后魏及齐风牛本隔殊不寻究遥相师祖故山东之人浸以成俗西魏已降师旅弗遑寘嘉之礼尽未详定今休明启运宪章伊始请据前经革兹俗

请修辑雅乐奏【开皇九年平陈获宋齐旧乐置清商署求陈太乐令蔡子元等居其职 奏高祖下制晋王广又表请乃许 因郑译之旧请依古五声六律旋相为宫高祖忆何妥言但许作黄钟一宫而已 及秘书丞姚察通直散骑常侍许善心仪同三司刘臻通直郎虞世基更共议奏上并从之至十四年而乐定】

臣闻周有六代之乐至韶舞而已秦始皇改周舞曰五行汉高帝改韶舞曰文始以示不相袭也又造武德自表其功故高帝庙奏武德文始五行之舞又作昭容礼容增演其意昭容生于武德盖犹古之韶也礼容生于文始矫秦之五行也文帝又作四时之舞故孝景帝立追述先功采武德舞作昭德舞被之管弦荐于太宗之庙孝宣采昭德舞为盛德舞更造新歌荐于武帝之庙据此而言递相因袭纵有改作并宗于韶至明帝时东平献王采文德舞为大武之舞荐于光武之庙汉末大乱乐章沦缺魏武平荆州获杜防以为军谋祭酒使创雅乐时散骑侍郎邓静善咏雅歌乐师尹胡能习宗祀之曲舞师冯肃晓知先代诸舞总练研精复于古乐自防始也文帝黄初改昭容之乐为昭业乐武德之舞为武颂舞文始之舞为大韶舞五行之舞为大武舞明帝初公卿奏上太祖武皇帝乐曰武始之舞高祖文皇帝乐曰咸熙之舞又制乐舞名曰章斌之舞有事于天地宗庙及临朝大飨并用之晋武帝泰始二年遣傅 等造行礼乃上寿食举歌诗张华表曰按汉魏所用虽诗章辞异兴废随时至其韵逗曲折并系于旧一皆因袭不敢有所改也九年荀勖典乐使郭夏宋识造王德大豫之舞改魏昭武舞曰宣武舞羽籥舞曰宣文舞江左之初典章堙紊贺循为太常卿始有登歌之乐大宁末阮孚等又增益之咸和间鸠集遗逸邳没胡后乐人颇复南度东晋因之以具钟律太元间破苻永固又获乐工杨蜀等闲练旧乐于是金石始备寻其设悬音调并与江左是同慕容垂破慕容永于长子尽获苻氏旧乐垂息为魏所败其钟律令李佛等将大乐细伎奔慕容德于邺德迁都广固子超嗣立其母先没姚兴超以太乐伎一百二十人诣兴赎母及宋武帝入关悉收南度永初元年改正德舞曰前舞大武舞曰后舞文帝元嘉九年太乐令钟宗之更调金石至十四年典书令奚纵复改定之又有凯容宣业之舞齐代因而用之萧子显齐书志曰宋孝建初朝议以凯容舞为韶舞宣业舞为武德舞据韶为言宣业即是古之大武非武德也故志有前舞凯容歌辞后舞凯容歌辞者矣至于梁初犹用凯容宣业之舞后改为大壮大观焉今人犹唤大观为前舞故知乐名虽随代而改声韵曲折理应常同前克荆州得梁家雅曲今平蒋州又得陈氏正乐史传相承以为合古且观其曲体用声有次请修辑之以备雅乐其后魏洛阳之曲据魏史云太武平赫连昌所得更无明证后周所用者皆是新造杂有边裔之声皆不可用者也

文帝制

制礼作乐圣人之事也功成化洽方可议之今宇内初平正化未洽遽有变革我则未暇

议律吕还相为宫奏【九年诏改定雅乐 上议上曰不须作旋相为宫且作黄钟一均也】

谨案礼五声六律十二管还相为宫周礼奏黄钟歌大吕奏太簇歌应钟皆是旋相为宫之义蔡邕明堂月令章句曰孟春月则太簇为宫姑洗为商防廋为角南吕为征应钟为羽大吕为变宫夷则为变征他月仿此故先王之作律吕也所以辩天地四方阴阳之声杨子云曰声生

于律律生于辰故律吕配五行通八风歷十二辰行十二月循环转运义无停止譬如立春木王火相立夏火王土相季夏土王金相立秋金王水相立冬水王木相还相为宫者谓当其王月名之为宫今若十一月不以黄钟为宫十二月不以太簇为宫便是春木不王夏土不相岂不阴阳失度天地不通哉刘歆钟律书云春宫秋律百卉必雕秋宫春律万物必荣夏宫冬律雨雹必降冬宫夏律雷必发声以斯而论诚为不易且律十二今直为黄钟一均唯用七律以外五律竟复何施恐失圣人制作本意故须依礼作还相为宫之法

又六十律不可行论【 又议文帝善之诏与姚察等正定雅乐】

谨案续汉书律历志元帝遣韦 成问京房于乐府房对受学故小黄令焦延寿六十律相生之法以上生下皆三生二以下生上皆三生四阳下生阴阴上生阳终于中吕而十二律毕矣中吕上生执始执始下生去灭上下相生终于南吕六十律毕矣十二律之变至于六十犹八卦之变至于六十四也冬至之声以黄钟为宫大簇为商姑洗为角林钟为征南吕为羽应钟为变宫防廋为变征此声气之元五音之正也故各统一日其余以次运行宫日者各自为宫而商征以类从焉房又曰竹声不可以度调故作准以定数准之状如瑟长一大而十三弦隐间九尺以应黄钟之律九寸中央一弦下画分寸以为六十律清浊之节执始之类皆房自造房云受法于焦延寿未知延寿所承也至元和年待诏侯钟殷彤上言官无晓六十律以准调音者故待诏严嵩具以准法教其子宣愿召宣补学官主调乐器大史丞 试宣十二律其中其四不中其六不知何律宣遂罢自此律家莫能为准施弦嘉平年东观召典律者太子舍人张光问准意光等不知归阅旧藏乃得其器形制如房书犹不能定其弦缓急故史官能辨清浊者遂绝其可以相传者唯太 常数及 气而已据此而论京房之法汉世已不能行沈约宋志曰详案古典及今音家六十律无施于乐礼云十二管还相为宫不言六十封禅书云大帝使素女鼓五十弦瑟而悲破为二十五弦假令六十律为乐得成亦所不用取大乐必易大礼必简之意也【准北史作準】

又议

案周官云大司乐掌成均之法郑众注云均调也乐师主调其音三礼义宗称周官奏黄钟者用黄钟为调歌大吕者用大吕为调奏者谓堂下四悬歌者谓堂上所歌但一祭之间皆用二调是知据宫称调其义一也明六律六吕迭相为宫各自为调今见行之乐用黄钟之宫乃以林钟为调与古典有违晋内书监荀勗依典记以五声十二律还相为宫之法制十二笛黄钟之笛正声应黄钟下征应林钟以姑洗为清角大吕之笛正声应大吕下征应夷则以外诸均例皆如是然今所用林钟是勗下征之调不取其正先用其下于理未通故须改之

同姚察许善心何妥虞世基等议定新乐宫调奏

后周之时以四声降神虽采周礼而年代深逖其法久绝不可依用谨案司乐凡乐园钟为宫黄钟为角太簇为征姑洗为羽舞云门以祭天函钟为宫太簇为角姑洗为征南吕为羽舞咸池以祭地黄钟为宫大吕为角大簇为征圜钟为羽舞韶以祀宗庙马融曰圜钟应钟也贾逵

郑 曰圜钟夹钟也郑 又云此乐无商声祭尚柔刚故不用也干宝云不言商商为臣王者自谓故置其实而去其名若曰有天地人物无德以主之谦以自牧也先儒解释既莫知适从然此四声非直无商又律管乖次以其为乐无克谐之理今古事异不可得而行也按东观书马防传太子丞鲍邲等上作乐事下防防奏言建初二年七月邲上言天子食饮必顺于四时五味而有食举之乐所以顺天地养神明求福应也今官雅乐独有黄钟而食举乐但有太簇皆不应月律恐伤气类可作十二月均各应其月气公卿朝会得闻月律乃能感天和气宜应诏下太常评焉太常上言作乐器直钱百四十六万奏寝今明诏复下臣防以为可须上天之明时因歲首之嘉月发大簇之律奏雅颂之音以迎和气其条贯甚具遂独施行起于十月为迎气之乐矣又顺帝纪云阳嘉二年冬十月庚午以春秋为辟雍 太学随月律十月作应钟三月作姑洗元和以来音戾不调修复黄钟作乐器如旧典据此而言汉乐宫悬有黄钟均食举太簇均止有二均不旋相为宫亦以明矣计从元和至阳嘉二年才五十歲用而复止验黄帝听鳳以制律吕尚书曰予欲闻六律五声周礼有分乐而祭此圣人制作以合天地阴阳之和自然之理乃云音戾不调斯言诬之甚也今梁陈雅曲并用宫声按礼五声十二律还相为宫卢植云十二月三管流转用事当用事者为宫宫君也郑 曰五声宫商角征羽其阳管为律阴管为吕布十二辰更相为宫始自黄钟终于南吕凡六十也皇侃疏还相为宫者十一月以黄钟为宫十二月以大吕为宫正月以大簇为宫余月放此凡十二管各备五声合六十声五声成一调故十二调此即释郑义之明文无用商角征羽为别调之法矣乐稽耀嘉曰东方春其声角乐当宫于夹钟余方各以其中律为宫若有商角之理不得云宫于夹钟也又云五音非宫不调五味非甘不和又动声仪宫唱而商和是谓善本太平之乐也周礼奏黄钟歌大吕以祀天神郑 以黄钟之钟大吕之声为均均调也故崔灵恩云六乐十二调亦不独论商角征羽也又云凡六乐者皆文之以五声播之以八音故知每曲皆须五声八音错综而能成也御防子云师文鼓琴命宫而总四声则庆云浮景凤翔唯韩诗云闻其宫声使人温厚而寬大闻其商声使人方廉而好义及古有清角清征之流此则当声为曲今以五引为五声迎气所用者是也余曲悉用宫声不劳商角征羽何以得知荀勗论三调为均首者得正声之名明知雅乐悉在宫调已外征羽角自为谣俗之音耳且西凉 兹杂伎等曲数既多故得 于众调调各别曲至如雅乐少须以宫为本歷十二均而作不可分配余调更成杂乱也【杜氏通典又采隋志叙事之文按周官至之序也一段作 等详议误】

定新乐成奏【十四年乐定秘书监牛 及姚察许善心虞世基刘臻等共奏于是并撰乐府歌辞三十首诏并施用见行者皆停之】

臣闻黄桴土鼓由来斯尚雷出地奋着自易经遂古帝王经邦驭物揖让而临天下者礼乐之谓也秦焚经典乐书亡缺爰至汉兴始加鳩采祖述增广缉成朝宪魏晋相承更加讨论沿革之宜备于故实永嘉之后九服崩离燕石苻姚递据华土此其戎乎何必伊川之上吾其左袵无复防管之功前言往式于斯而尽金陵建社朝士南奔帝则皇规粲然更备与内原隔絕三百年于兹矣伏惟明圣膺期会昌在运今南征所获梁陈乐人及晋宋旗章宛然俱至曩代所不服者今悉服之前朝所未得者今悉得之化洽功成于是乎在臣等伏奉明诏详定雅乐博访知音旁求儒彦研校是非定其去就取为一代正乐具在本司

高颀【字昭 一名敏渤海蓼人仕周位柱国入隋歷尚书左仆射爵齐国公忤炀帝见诛】
诸州计户征税奏【开皇八年五月颀奏从之】

诸州无课调处及课州管户数少者官人禄力乘前已来恒出随近之州但判官本为牧人役力理出所部请于所管户内计户征税

谏收散乐奏【炀帝初颀拜太常时诏收周齐故乐人及天下散乐颀奏谏不悦后坐谤讪诛】

此乐久废今若征之恐无识之徒弃本逐末递相教习【并隋书】

蘇威【字无畏京兆武功人綽子仕周开府入隋歷纳言封房公开府仪同三司】

荐柳庄奏【庄为给事黄门侍郎纳言苏威奏荐】

江南人有学业者多不习世务习世务者又无学业能兼之者不过柳庄【北史】

宇文庆【字神庆河南洛阳人周上大将军入隋位上柱国凉州总管】

奏文帝表【庆周末仕上柱国凉州总管上为丞相时与庆言及天下事未防上言皆验及受禅恐上遗忘具録前言为表奏之上省表大悦诏报】

臣闻智侔造化二仪无以隐其灵明同日月万象不能藏其状先天弗违实圣人之体道未萌见兆谅达节之神机伏惟陛下特挺生知狗齐诞御怀五岳其犹轻吞八荒而不梗蕴妙见于曾襟运奇谟于掌握臣以防贱早逢天睠不以庸下亲蒙推赤所奉成规纖毫弗舛寻惟圣虑妙出蓍 验一人之庆有征实天子之言无戲臣亲闻见实荣实喜

文帝诏报

朕之与公本来亲密怀抱委曲无所不尽话言歲久尚能记忆今览表奏方悟昔谈何谓此言遂成实録古人之先知祸福明可信也朕言之验自是偶然公乃不忘弥表诚节深感至意嘉尚无已

贺娄子干【字万壽本代人徙關右仕周秦州刺史入隋歷营州总管】

论处陇西书【高祖以陇西频被吐骨浑防掠子干为行军总管勅勒民为堡营田积谷子干上书从之】

比者凶寇侵扰荡灭之期匪朝伊夕伏愿圣虑勿以为怀今臣在此观机而作不得准诏行事

且陇西河右土旷民稀边境未宁不可广为田种比见屯田之所获少费多虚役人功卒逢踐暴屯田疎遠者请皆废省但陇右之民以畜牧为事若更屯聚弥不获安只可严谨斥 岂容集人聚畜请要路之所加其防守但使鎮戍连接烽 相望民虽散居必谓无虑

高劼【字敬德勃海蓆人齐清河王岳子爲侍中尚书右仆射齐亡归国周终隋洮州刺史】上取陈五防表【开皇七年劼为光州刺史上表高祖答以优诏】

臣闻夷凶翦暴王者之懋功取乱侮亡往贤之雅诒是以苗民逆命爰兴两阶之舞有扈不賔终召六师之伐皆所以宁一防内匡济羣生者也自昔晋氏失驭天网絶维羣凶于焉猬起三方因而鼎立陈氏乘其际运拔起细防蒨頊纵其长蛇窃据吴防叔宝肆其昏虐毒被金陵数年已来荒悖滋甚牝鸡司旦昵近奸回尚方役徒积骸千数疆场防守长戍三年或防行暴露沈湎王侯之宅或奔驰骏骑顛坠康衢之首有功不赏无辜获戮烽燧日警未以为虞耽淫靡嫚不知纪极天厌乱德妖实人兴或空里时有犬声或行路共传鬼怪或剖人肝以祠天狗或自舍身以厌妖讹民神怨愤灾异荐发天时人事昭然可知臣以庸才猥蒙朝寄频歷藩任与其邻接密迩仇讐知其动静天讨有罪此即其时若戎车雷动戈船电迈臣虽弩怯请效鷹犬

崔仲方【字不齐博陵安平人仕周少内史入隋歷转太常卿终信都太守】

论取陈防书【仲方时为号州刺史及伐陈以仲方为行军总管下陈江州以拜上开府】

臣谨案晋太康元年歲在庚子晋武平吴至今开皇六年歲次丙午合三百七载春秋宝干图云王者三百年一蠲法今三百之期可谓备矣陈氏草窃起于丙子至今丙午又子午为冲阴阳之忌昔史赵有言曰陈顓頊之族为水故歲在鹑火以灭又云周武王克商封胡公满于陈至鲁昭公九年陈灾裨灶曰歲五及鹑火而后陈亡楚克之楚祝融之后也为火正故复灭陈陈承舜后舜承顓頊虽太歲左行歲星右转鹑火之歲陈族再亡戊午之年妨虞运尽语迹虽殊考事无别皇朝五运相承感火德而王国号为隋与楚同分楚是火正午为鹑火未为鹑首申为实沈酉为大梁既当周秦晋赵之分若当此分发兵将得歲之助以今量古陈灭不疑臣谓午未申酉并是数极盖闻天时不如地利地利不如人和况主圣臣良兵强国富动植回心人神叶契陈既主昏于上民譟于下险无百二之固众非九国之师夏癸殷辛尚不能立独此岛夷而稽天讨伏度朝廷自有宏谟但刍蕘所见冀申蜚燭今唯须武昌已下蕲和滁方吴海等州更帖精兵密营渡计益信襄荆基郢等州速造舟楫多张形势为水战之具蜀汉二江是其上流水路冲要必争之所贼虽于流头荆门延洲公安巴陵隐矶夏首蕲口益城置船然终聚汉口峡口以水战大决若贼必以上流有军令精兵赴援者下流诸将即须择便横渡如拥众自卫上江水军鼓行以前虽恃九江五湖之险非德无以为固徒有三吴百越之兵无恩不能自立

皇甫绩【字功明安定朝那人仕周内史中大夫大将军入隋歷信州总管】

遗顾子元书【陈平拜绩为蕪州刺史高智慧等作乱江南州民顾子元发兵应之因以攻绩

相持八旬子元素感绩恩于冬至日遣使奉牛酒绩遗子元书子元顿首陈谢杨素兵至合击破之】

皇帝握符受篆合极通灵受揖讓于唐虞弃干戈于汤武东逾蟠木方朔所未穷西尽流沙张騫所不至 漠黄龙之外交臂来王葱岭榆關之表屈膝请吏曩者伪陈独阻声教江东士民困于荼毒皇天辅仁假手朝廷聊申薄伐应时瓦解金陵百姓死而复生吴会臣民白骨还肉唯当怀音感德行歌擊壤岂宜自同吠主翻成反噬卿非吾民何须酒礼吾是隋将何容外交易子析骸未能相告况是足食足兵高城深壑坐待强援绰有余力何劳踵轻敝之俗作虚伪之辞欲阻诚臣之心徒惑骁雄之志以此见期必不可得卿宜善思活路晓谕黎元能早改迷失道非遠

令狐熙【字长熙炖煌人周司勳吏部中大夫终隋桂州总管】

请解任表【熙拜桂州总管十七州诸军事在职数年上表不许】

臣忝寄岭表四载于兹犬马之年六十有一才轻任重愧惧兼深常愿收拙避贤稍免官谤然所管遐旷绥抚尤难虽未能顿革夷风颇亦渐识皇化但臣夙患消渴比更增甚筋力精神转就衰迈昔在壮齿犹不如人况今年疾俱侵岂可犹当重寄请解所任

于仲文【字次武建平公义之兄子仕周授仪同开府入隋歷右翊卫大将军】

狱中上文帝书【仲文以战功位大将军领河南道行军总管拒尉迟迥诸将大破之河南悉平拜柱国属高祖受禪其叔父太尉翼坐事下狱仲文亦为吏所簿于狱中上书上并翼释之】

臣闻春生夏长天地平分之功子孝臣诚人伦不易之道曩者尉迥逆乱所在影从臣任处關河地居冲要嘗胆枕戈誓以必死迥时购臣位大将军邑万户臣不顾妻子不爱身命冒白刃潰重围三男一女相继沦没披露肝胆驰赴阙庭蒙陛下授臣以高官委臣以兵革于时河南凶寇狼顾鸱张臣以羸兵八千扫除氛防摧刘寬于梁郡破檀让于蓼隄平曹州复东郡安城武定永昌解亳州围殄徐州贼席毗十万之众一战士崩河南蚁聚之徒应时戡定当羣凶问鼎之际黎元乏主之辰臣第二叔翼先在幽州总驭燕赵南邻羣寇北捍旄头内外安抚得免罪戾臣第五叔智建旗黑水与王谦为邻式遏蛮貊鎮綏蜀道臣兄顓作牧淮南坐制勅敌乘机勦定传首京师王谦窃据二江叛涣三蜀臣第三叔义受脤庙庭龚行天讨自外父叔兄弟皆当文武重寄或衔命危难之间或侍卫钩陈之侧合门诚款冀有可明伏愿垂泣辜之恩降云雨之施追草昧之始録涓滴之功则寒灰更然枯骨生肉不胜区区之至谨冒死以闻【黎元北史作生灵捍作扫江作州讨作罚】

李行之【字义通陇西人仕齐周歷冬官府司寺下大夫入隋开皇初除下澧郡太守不行】自撰墓志铭【行之疾不迎医口授墓志】

陇西李行之以某年某月终于某所年将六纪官歷四朝道叶希夷事忘可否虽硕德高风有
倾先構而立身行已无愧夙心以为气变则生化曰死盖生者物之用死者人之终有何忧
喜于其间哉乃为铭曰人生若寄视死如归茫茫大夜何是何非【北史序传】

隋文纪卷五

明 梅鼎祚 编

卢思道【字子行范阳人齐黄门侍郎入周歷掌教上士终隋散骑侍郎才学兼着然不持操行有集三十卷】

卢记室诔

齐天统二年秋七月司徒记室参军事永安乡男范阳卢询祖卒先民有言惟德可久抑又闻之惟名为壽尔之无禄没而不朽乃援弱翰告哀良友遂作诔曰皇虚眇邈师绪蝉聯大儒汉世名公魏年司徒蔼蔼抚翼冲天尚书疊疊亦称象贤若人擢秀絕后光前发荣随浦韞耀春田爰在弱龄孤根迴立内无怙恃外寡朋执执行有余力艺无不习善价斯待香名允集下学上达鑽幽洞防九流百氏异轡同归文成钟律韵响珠玑丽词泉涌壮思云飞雄州擢第言割其楚我实褻然观国而举自兹不调多歷年所游泳儒 从容嘿语纳于大麓崇建府朝八紘所掩车乘翹翹我有明德乃应嘉招超自幕下来仪鳳条应徐并轍潘顾齐鑣声华簪带誉动朋寮逖矣江阴承风请朔庄生喻指季子观乐立朝所寄俊才优学悬河自口灵珠在握乃参军事仍賛中铉大冲所縻德施攸践同推丽则俱谢虫篆何才之高何位之鲜天下士也宜享多福豹变其文鸿渐于陆神之听之于何不淑营魄遂往音仪在目呜呼哀哉昔余与子分重契深譬诸投漆如彼断金余慕大隐子惟陆沈等趋宫阁并綴衣簪春台共践秋水偕临还马齐轡出盖连阴良书浊酒永嘯长吟美言俱賛阙行同箴娱乐未防嶮阻相寻忻既无极忧亦难任云何不吊亡我知音百年已矣万物伤心呜呼哀哉京伯君山并嗟湮灭荀粲王壽同悲夭折兰菊无坠钟鼓不絕之子云亡何愧前烈灵衣袭几奠酒盈杯故庭飞箴虚帐凝埃仆流离而涕泗驂顾慕以迟回出南阳之旧道掩北邙之夜台赵卿之铭已勒滕公之陇未开临象设而不同詎幽魂之可来呜呼哀哉【擢一作挺】

在齐为百官贺甘露表

窃以河荣洛变授祉于勲华 玉素鳞降灵于汤武其间防禽弱草改状移形夜宿朝云星光动色皆以炤临下土发挥帝载千祀一致隔代同符伏惟陛下上总天维傍握河纪持钦翼之小心纂升平之大业万灵翹首应三台以西巡两仪贞观乘六气而东指云卿既出还闻百辟之歌河清可俟实得万人之叹而上 乃顾神物荐委飞甘洒润玉散珠连昔魏明仙掌竟无灵液汉武金盘空望云表岂若神浆可挹流珠九户之前天酒自零凝炤三阶之下斯实旷代祥符前王罕遇休矣美矣皇哉唐哉臣等并邀昌运俱沐 造骤闻秘祉亟覩 甄振鳞抚翼空驰鱼鸟之心瘞玉编金方待云亭之后

孤鸿赋序【思道周末除掌教上士高祖为丞相思道迁武阳太守非其好也为孤鸿赋以寄其情其序曰】

余志学之歲自乡里游京师便见识知音歷受羣公之眷年登弱冠甫就朝列谈者过误遂窃虚名通人杨令君邢特进已下皆分庭致礼倒屣相接翦拂吹嘘长其光价而才本弩拙性实疎懶势利货殖淡然不营虽笼绊朝市且三十载而独往之心未始去怀抱也摄生舛和有少气疾分符坐啸作守东原洪河之湄沃野弥望器务既屏鱼鸟为邻有离羣之鸿为罗者所获野人驯养贡之于余置诸池庭朝夕赏翫既用销忧兼以轻疾大易称鸿渐于陆羽仪盛也杨子曰鸿飞 騫翥高也淮南云东归碣石违溽暑也平子赋曰南寓衡阳避祁寒也若其雅步清音遠心高韵鵷鸾以降罕见其俦而铩翮墙阴偶影独立喑喑粃粃鸡鹜为伍不亦伤乎余五十之年忽焉已至永言身事慨然多绪乃为之赋聊以自慰云【寓南史作翔】

劳生论【思道开皇初以母老表请解职自恃才地多所陵轍由是官涂沦滞既又着劳生论指切当时其词曰】

庄子曰大块劳我以生诚哉斯言也余年五十羸老云至迫惟畴昔勤矣厥生乃着兹论因言时云尔罢郡屏居有客造余者少选之顷盱衡而言曰生者天地之大德人者有生之最灵所以作配两仪称贵羣品妍蚩愚智之辨天悬壤隔行已立身之异入海登山今吾子生于右地九叶卿族天授俊才万夫所仰学综流畧慕孔门之游夏辞穷丽则拟汉日之卿云行藏有节进退以礼不諂不骄无愠无怵偃仰贵贱之间从容语默之际何其裕也下走所欣羨焉余莞尔而笑曰未之思乎何所言之过也子其清耳请为左右陈之夫人之生也皆未若无生在余之生劳亦勤止纨绮之年伏膺教义规行矩步从善而登巾冠之后濯纓受署繯鑣仁义笼绊朝市失翹陆之本性丧江湖之遠情沦此风波溺于倒蹶忧劳总至事非一绪何则地胄高华既致嫌于管库才识美茂亦受嫉于愚庸笃学强记聳瞽于焉侧目清言河防木讷所以疚心岂徒盍惜春浆鸱恹腐鼠相江都而永叹傳长沙而不归固亦鲁值臧仓楚逢靳尚赵壹为之哀歌张升于是恸哭有齐之季不遇休明申脰就鞅屏迹无地段珪张让金贝是视贾谧郭淮腥臊可履淫刑以逞祸近池鱼耳听恶来之讒足践龙逢之血周氏末叶仍值辟王敛笏升阶汗流浹背莒客之踵躋焦原匹兹非险齐人之手执马尾方此未危苦乃羊肠句注之道据鞍振防武落鸡田之外栒风沐雨三旬九食不敢称 此之为役盖其小小者耳今泰运肇开四门以穆冕旒司契于上防龙佐命于下岐伯善卷耻徇幽忧卞随务光悔从木石余年在秋方已迫知命情礼宜退不获晏安一叶从风无损邓林之攢植双鳬退飞不亏渤澥之游泳耕田凿井晚息晨兴 南山之朝云攀北堂之明月汜胜九谷之书观其节制崔寔四人之令奉以周旋晨荷蓑笠白屋黄冠之伍夕谈谷稼霑体涂足之伦浊酒盈罇高歌满席恍兮惚兮天地一指此野人之乐也子或以是美余乎客曰吾子之事既闻之矣他人有心又请论其梗槩余荅曰云飞泥沈卑高异等圆行方止动息殊致是以摩霄运海轻罽罗于薮泽五衢四炤忽斤斧于山林余晚值昌辰遂其弱尚观人事之陨获覩时路之遭危 冬修夜静言长想可以累叹悼心流涕酸鼻人之百年脆促已甚奔驹流电不可为辞顾慕周章数纪之内穷通荣辱事无足道而有识者鲜无识者多褊隘凡近轻险躁薄居家则人面兽心不孝不义出门则諂谀谗佞无愧无耻退身知足忘伯阳之炯戒陈力就列弃周任之格言悠悠遠古斯患已积迄于近代此蠹尤深范卿防让之风搢绅不嗣夏书昏墊之罪报政所安朝露未稀小车盈董石之巷夕阳且落皂盖填阎窻之里皆如脂如韦俯倭匍匐嗽恶求媚防痔自亲美言諂笑助其愉乐泣佞哀恤其丧纪近通防酒遠贡文蛇艷姬美女委如脱屣金铄玉华弃同遗迹及邓通

失路一簪之贿无余梁冀就诛五侯之贵将起向之求官买职晚谒晨趋刺促望尘之旧游伊优上堂之夜客始则亡魂褫魄若牛兄之遇兽心战色沮似叶公之见龙俄而抵掌扬眉高视阔步结侣弃廉公之第携手哭圣卿之门华毂生尘来如激矢雀罗暂设去等绝弦饴蜜非甘山川未阻千变万化鬼出神入为此者皆衣冠士族或有艺能不耻不仁不畏不义靡愧友朋莫慙妻子外呈厚貌内蕴百心繇是则纁青佩紫牧州典郡冠帻劫人厚自封殖妍歌妙舞列鼎撞钟耳倦丝桐口饫珍防虽素论以为非而时宰之不末俗蚩蚩如此之敝余则违时薄宦屏息穷居甚耻驱驰深畏干没心若死灰不营势利家无儋石不费囊钱偶影聯官将数十载弩拙致笑轻生所以告劳也真人御宇斲雕为朴人知荣辱时反邕熙风力上宰内敷文教方邵重臣外扬武节被之大道洽以淳风举必以才爵无滥授稟斯首鼠不预衣簪阿党比周扫地俱尽轻薄之俦灭影窜迹砾石变成瑜瑾莠莠化为芝兰曩之扇俗搅时骇耳矚目今悉不闻不见莫余敢侮易曰圣人作而万物覩斯之谓乎

北齐兴亡论

或问主人曰往者魏人失御六合云扰河朔關右剪为二国永熙西遁天平北巡两朝先主分陝而霸龙战虎争多歷歲祀既而水运值竭天禄永终齐室比迹于唐虞周人踵武于汉魏齐有五常周易四王并才逾二纪相继而灭若其元首膺期股肱命世立极补天之业铭常镂鼎之功至于暴君南面孽臣作辅民怨神怒国殄祀绝易世之由虽传之耆旧载于史防通人雅防其详可得闻乎主人应之曰吾少仕齐朝晚归周室因而学业歷兹永久雅好博古虽欲拟议近世治乱粤可略陈在魏正光牝鸡司旦尔朱荣乘衅内燹滔天泯夏余烬跋扈挺祸王城海内生民若崩厥角齐高祖神武皇帝天纵英明之畧神挺雄武之才龙摠豹变投袂而起四明昆弟大会韩陵类蚩尤风雨之兵若新都犀象之陈彼曲我直天实賛之日未移晷大殲丑族然后拔立宗枝入纂皇统羣后成务天下晏如但芒刺成灾震逼为梗居郑流彘去而不入迁鼎旧邨国命维新朝章国宪灿然毕举渭南失律似乌林之丧师洛北先鸣同官渡之凯入虽天命有归而尽于北面方之魏武具体而防文襄嗣业始逾弱冠坏杰之气足称负荷賓礼时秀驱驾羣雄内外肃清朝无秕政侯景背恩弃义狼顾汝颖萧衍失信幸灾蚁聚彭汴于是谋臣运防猛士推锋涡阳之役凶渠匹马南逝寒山之战吴卒只轮不反王思政入据长安淹歷歲时神旗暫临如风扫箨三秦勅敌闭關自守五湖之长革音请命魏孝静以天厯有在鼎祚将遗大礼备物率由旧典允恭克讓推而弗居祸生非虑匕首窃发尔其夷防剪暴刚断英峙天崩地折堂構阙如嗣子幼冲未堪多难文宣虽云外弟少乏令名人望所归便见推奉于时政有彝伦朝多俊乂爪牙皆韩白之伍心腹尽良平之俦外静方隅内康庶绩主之不才四海弗之觉也洎乎受终文祖燎天改物兵强地广国富刑清发号施令必师古始信赏必罚如有四时年谷屡登灾害不作敌人窜迹郊境无虞天保受命迄于五祀黄初泰始不能遠尚爰及中年诞纵昏德以万乘之贵为长夜之饮散发视朝肉袒听政手行剗剔躬运矛鋌宠狎佞谀亲爱凡鄙出入市廛游走衢路太保高隆之佐命元功庙廊上宰仆射高德政龙潜賓友帷幄重臣卫尉卿杜弼硕学伟才拔萃出类光禄大夫元景风流儒雅师范縉绅或赤族见诛或丹颈为戮并直言窃叹毙于谗口自余名士良臣非罪遭命淫刑以逞不可殫言刘曹以还逮于僭伪受命称帝未有若斯之惨者也赖有尚书令 农杨遵彦魏太傅津之子也含章秀出希世伟人风鉴俊朗体局贞固学无不纵才靡不通裴乐谢其清言应刘媿其藻丽温良恭俭

讓怨惠和高行异才近古无二有齐建国便预经纶军国政事一人而已诘旦坐朝谘请填湊千端万绪令议如流剖断部领选举人物满室盈庭永无凝滯虚襟泛爱礼贤好士闻人之善若已有之智调有余尤善当世譖言屡入时寄无改每乘輿四巡恒守京邑凡有善政皆遵彦之为是以主昏于上国治于下朝野贵贱至于今称之俄而文宣不豫于麴蘖储君继体才歷数旬近习预权小人并进杨公虑有危机引身移疾幼主若丧股肱固相敦勉干明之始难起戚藩变成倏忽殒于殿省诗云人之云亡邦国殄悴君子是以知齐祚之不昌也孝昭地乃密亲位居元辅有姬公之戚无父子之亲亦由主弱时艰虑深家国当阳正位事出权道身长八尺腰带十围沈深谨厚实有君人之望时甲卒强盛财力殷阜乃睠西顾恒有吞噬之心兼以天保之后惩其淫纵不迹声色不事晏游孝于太后笃于昆季慎惜名器爱养黎元后庭嫔嬙皆是藩邸之旧数不盈十竟无私宠特解吏事尤好礼容但政苛碎暗于听受降年不永葦歲而崩大渐维防黜其元子武成母弟之亲入主宗祏而少稟凶德不孝不仁龙攢在嫔泪不承脸太后之丧亦不哀哭才及公除便衣絳裘纵侈荒淫不知纪极甘酒嗜音夜以继昼有和士开者素出和氏之庶孽其面目亦似突厥轻薄凡猥为衣冠所弃武成在田之日引为防将闻好弹胡琵琶亦解歌舞一面之后便大相爱悦恒在卧内同食共寝淫秽之事无所不为天保之世文宣知其如此顿鞭二百徙配长城后遇赦得还武成为右丞相久别得还恩盼愈厚信宿之间赐赏巨万及践大位亲顾弥隆爰自黄门渐至端右尽景娱侍略不休停就令暫出便追骑相寻士开作威作福略无顾惮恩宠势望熏灼朝野恣性贪淫人伦少例心如谿壑行均犬豕甲第当衢侔拟公室富商大贾朝夕盈门朝士无赖者亦竞相谄媚或送婢妾或进子女筐篚苞苴烟聚波属士开葬母倾朝追送谄谀尤甚者至悲不自胜浇薄邪佞爱逾弟兄名贤素士略不交言其所荐延奏无不遂荣枯进退定于俄顷于时下陵上替奔竞成习士无贵贱风节顿尽赵彦深阿谀顺防俛首怀禄元文遥器能先见不敢措言此外羣官靡衣媮食齐室大坏其源始于此河清之末长彗为灾太史奏言须有攘救武成便自称太上传位后主胡长粲以从舅之亲冯子琮以姨夫之戚俱受寄托并当枢要或性识庸近或意怀险薄皆不学无术智能浅短及天统末年武成即世和士开一相处内自拟伊周太尉録尚书事赵郡王叡明德茂亲聪爽俊悟藩王之内时望隆重以士开凶丑宜加屏黜入践青蒲说言规谏而少主聪察不类成昭母后才明异于马邓士开礼于疎行长粲为其谋主遂使密戚贤王绞缢以戮虽遐迩胥怨愚智同愤而依托城社未如之何数载之间肆其秽行与冯子琮夫妇鬻狱卖官三家府藏贿货山积凶愚子弟并处高资更相货易择而后授司徒琅琊王俨年甫十四兼领宪司愤其所为切齿忿咤执送南台异其身首子琮以搆扇两端一时依法二凶俱勦朝野晏清京师市里舞蹈成羣梁董之庆不足斯比琅琊心实去恶迹乃陵上不容于时俄而赐尽自兹已后政道弥昏高阿那以牧圉之勤重其佞媚韩长鸾以鞬继之能悦其趋走又有女奴陆氏出自掖庭凶智狡筭举世无足以保母之恩特见尊宠六宫谓之世师人主以为内相舞弄王法掩塞天听庆赏刑威出于婢口顽嚚弟侄布于列位帝戚皇支不能及也陆子骆提婆者出于皂本 本是鞮工愚暗庸短仅辩菽麦与韩高之徒共持国柄宣淫肆暴甚于和氏穷极富贵转日回天愚薄之伦折枝防痔轻者进货赂重者绪婚媼朝廷混然无复廉耻清贞守道更被嗤怪汉世张赵不能喻其万一晋朝贾郭未足比其錙铢斛律明月属镂之锡冤动天地崔季舒龙逢之戮痛切幽明加以内防年少阉官之属亲狎宠私盈满宫禁干预政事剽剥生民黔首呼嗟以日为歲其反道违常速亡趋灭事非一绪不可胜陈后主自生宫闈长于尼媪不接端士不见正人朝夕谄谀罕闻调护之客便烦左右莫匪刀锯之余飞鷹走狗荡其心虑丽

色淫声乱其耳目论功德者云羲轩无以尚述钦明者称尧舜不能逾才智之士弃而不任假有名级备员而已宪章纲纪荡然无余鱼烂土崩以俟勃寇周武大捷平阳乘虚深入将有降心士无鬪志前世耿贾之雄俛眉顿颡先朝貔虎之銳敛气重足举晋阳如拾芥攻邺宫犹振槁万里百城交臂屈膝南極江淮北尽砂塞西界函谷东至沧溟府帑粟帛之饶兵革士民之众齐之所畜尽为周有不亦哀哉

后周兴亡论

周太祖文皇帝幼而机警智数过人属魏末多故召募關陇值二将相屠三军未一见推为主遂握兵符俄而魏武西巡奉迎车驾挟天子以令诸侯万世所一时也抚养荒余鳩聚兵甲同心之旅不满万人齐神武以大兵数十万将清灞浚雷动云移萃于渭曲太祖以数千敝卒振旅而还遂基王业窳泰以劲兵深入一战丧元高敖曹以銳气先登临阵受首兵革歲动败鲜胜多高氏虽怙其众力莫敢先至邙山之举我师败绩收合亡散退守有余及萧氏将亡边服震扰荆郢内附庸蜀来王器械完整货财充实带甲百万骁将如林晏驾之辰国与齐人相埒矣闵帝以嫡嗣承基应天纳禅弱龄厌世未及称皇徒以庶长见立纂我鸿绪从容文雅亦守文之良主焉二帝景命不融高祖始登大位于时大冢宰晋公宇文护太祖之犹子也负图作宰亲受顾命国柄朝权顿去王室高祖高拱深视弥歷歲年谈议儒 无所關预祭则寡人晋公之不忘也但自下裁物其主不堪累世权强一朝折首其余党与咸见夷戮恶禽梟物扫地无余尔乃弃奢淫去浮伪施一德布公道屏重内之饕躬大布之衣始自六宫被于九服令行禁止内外肃然以释氏立教本贵清静近世以来糜费财力下诏削除之亦前王所未行也值齐季失德取乱侮亡亲御戎轩再举而灭军令肃然秋毫莫犯数旬而定不戮一人未及下车革其 政山东士女欣戴如归但天性严忍果于杀戮血流盈前无废饮噉行幸四方尤好田猎从禽于外非夜不还飞走之类值无免者识者以此少之虽有武功未遑文德彝章礼教盖阙如也练甲治兵将扫沙漠遠图不遂暴疾升遐宣帝初在东宫已多罪失高祖每加严训不能修改嗣位之初饰情自励逾年已后变态转兴耽酒好色常居内寝角抵逸游不舍昼夜分命使人征求子女积之后宫以千万数此石虎之淫风也宠姬四人并立为皇后车服节文与内主无别此刘聪之乱政也少在储宫颇览经籍临朝对众亦有精神但稟猜狂特好诡异衣冠形色皆与旧制不同文武侍臣屏弃遐裔内外门阁皆别令宦者看守出入去来并錄其数殿省以目相视然朋淫于家无所简择乃至长乐亦有丑声大象之末忽焉惨虐鞭挺朝士动至数百背及胸腹一时下手楚毒之理不可忍见祖宗庙号讳不得称变易官名回转姓族车乘轮辐并有贵贱之殊妇女庄防亦有上下之异后庭嫔妾房有数人自旦至夕恒令危坐相对有不如法便即捶楚内外命妇朔望朝谒皆令为丈夫拜伏以示肃恭自号为天不复称朕此外小事异同不可胜纪狂惑妖僻开辟未之有也客曰齐武成荒悻庸暗怨结人神厥嗣不昌理则然矣周祖聪明神武冠世雄奇因愚子以至顛覆岂人事乎抑天道也蒙有感焉请闻其說主人曰寒暑晦明二仪之不同也贤愚治乱五胜之相形也是以酒池肉林乃周王之締构坑儒灭学亦汉后之驱除齐自天保受终迄于武平丧国孝昭之外竟无令主河清以后国基渐坠昏主慢游于上黎民怨讟于下逮于末叶君弱臣愚外崩内溃周人取之犹坂上之走丸也周武任数举情果敢雄断拥三秦之銳属攻昧之秋削平天下易同俯拾未及三祀宫车挽驾嗣子披猖肆其防慝真人革命宗庙为墟此盖天所以启大隋非不幸也【兵革一作兵

车】为隋檄陈文【英华卢思道为北齐檄陈文注云此檄述吴明彻及司马消难事以史考之明彻吕梁之败在周宣政元年先一年周已灭齐后二年消难方奔陈又明年周禅隋开皇元年伐陈英华既题作北齐又文有我大齐之语未详其误两齐字疑皆为隋鼎案此檄称项者乃陈宣帝也攷陈书宣帝大建十年有明彻吕梁之败十二年八月】

【有消难之奔以十四年正月薨则此应十三年事而宣纪此年并不载北齐见攻且檄云齐之方季实多凉德江淮之间暫为项有此正指北齐也檄当张齐豈自言方季凉德邪攷陈宣帝之歲为壬寅次年癸卯隋文帝篡周为开皇元年是年九月陈将周罗防陷胡墅萧摩诃攻江北隋以长孙览等为行军元帅伐陈故此檄有受终革命之语则其时也长孙览传开皇二年有事江南徵览为行军元帅出壽阳水陆俱进防陈宣帝卒监军高颀以礼不伐丧而还固相合第元年二年小异耳史传年月错互多此类】

告三江之表伪署君臣将帅州郡邑落士民等盖闻上 垂象列宿拱辰极之中厚载成形百谷指沧溟之大是以三五以降哲王明后遠覃声教大輝威灵日月之所照临俱荷亭育舟车之所通泊咸附象鞮我大隋积德累功开物成务光宅寰海覆幬蒸民虞夏受终顾有慙德汤武革命未云尽善沧波已东九译请吏玉门之右万里无尘诸华冠带之俗肆勤南畝衣服引弓之渠顿颡北阙内外禔福区宇慨然皇上垂拱岩廊司契而已惟夫太伯之后实号勾吴少康之裔是为于越江界湫湄如掌之陋涂泥所集瘴疠自兴自昔皇王列壤班瑞春秋之义爵不过子在晋永嘉运北数极司马睿众无一旅播越江濱刘萧已还多歷世祀魏氏奄一神州置之度外且西吞巴蜀北据淮淝善人君子可以为国陈霸先下愚小丑品极輿 属扬部沦胥之日幸梁人殲败之秋骋其奸回妄自尊大等蚩触之战争似防鮒之跳跃昙项昏顽贼忍不义不慈剿厥犹子窃其伪位蜂蛭非毒谿壑易满事甚楚围之纓理切吴光之劔国小地狭虐用其民坑戮侔于屠伯芟夷过于薙氏加以沈迷麴蘖酣酗终朝浇灌取尽夜以继昼货贿公行政刑不立疎弃良士狎近小人守宰蚕渔子弟荒暴头防箕斂杼轴其空灾异相仍稻蟹不熟江左黎献戴目而视齐之季世实多凉德江淮之间暫为项有便谓三眷易求百年可致违卜愆諫黷武穷兵吴明彻程文秀之徒并早经行阵粗有风力彼朝上下系以存立吕梁之役贯盈恶稔曾未交绥云卷雾彻组练塞垣舳舻噎水顾盼之顷只轮不归及周宣驭厯将一淮海荆舒之民奢侈为怨聊命偏裨拯其荼毒长江以北若火焚毛是则杨越之地为陈孤立卒敝壤蹙邦羸政塞乘奔无讐讐兹非险坐薪待燃方此为泰司马消难切荷特私任居连率猜狂使酒窃地外犇昙项背恩弃德是信是使引盗纳奸无媿无畏天夺其魄凭犯不悛縁边诸城犬羊荐食圣主以轩开万国属尽九州一隅不庭宜置天讨爰诏六军分阃受钺西征秦陇之銳北引燕代之英五校雄儿超乘俱起三河猛士援距争奋虎夫万队豹骑千羣并骨勇肉飞风骧雾合憬彼江黄之众遏矣彭濮之民巨舰高舳顺流东指江都壽春之域扼喉抚背之兵飞龙赤马絕水南越汉后昆明未足方其训旅魏王 武不能比其 师以江湖之泥短衣祝发轻舳利舸便习者多陈上迷天意下凭地险所以举尾支山怒臂当辙今荆門銳卒致命前驱淮南义师贾勇竞入扬舲振 兔走鸟飞然则彼之所长我亦兼有我利涉大川匪旦伊夕江郢运艚吴会裔旅东西遏絕通致无由伪朝军旅或陈诚欵密使相寻蕞尔危邦表里携二兼弱攻昧今也其时扛鼎蒙轮之卒事均驱兕三礼四义之将俛视韩白正正之旗百道俱进并云移雷动大防金陵牙旗暗山原金鼓沸天地呼吸则江汉回流叱咤则衡嶷可拔运

岱山而压春卯引渤海而濯秋萤当不足等其销灭譬其齧粉猥以不武谬总戎律上稟庙堂之谋下资素饱之气使张悌之魂先游北斗吕嘉之级远至新乡漂橹溺殒孱然已至乱麻积莽可为寒心伪主若天诱其诚去危转祸审青盖之欲归知蒋山之应渡衔璧舆衬拜手辕门则上比吴蜀之君不失公侯之宠陈之伯辟卿士编户黔庶有能深识逆顺因事立功亦当服冕乘轩纁青佩紫疏爵酬庸待以不次王者之师全救为本万姓毫厘靡所侵轶勉求多福无待噬脐檄之所到咸共申省【轍一作辕卒一作士暗一作映游一作逝】

祭灤湖文

维开皇元年十二月朔甲子具位姓名遣某官以清酌庶羞之馈敬祭灤湖之灵曰泱泱澄湖南服之纪斜通海甸旁带江汜深过百仞润逾九里彭蠡莫俦具区非拟扬越不庭多歷年紀王师薄伐六军戾止戒期止日马首欲东常阴作沴零雨其蒙水气朝合天云夜同申之苦雾继以严风涂泥已甚轨躅不通有稽天罰用沮元戎唯夫百神受职水灵为大皇王御宇率土无外当使日月贞明天地交泰雨师止其淋漓云将卷其蔚荟东渡戈船南耸雕旆收尉佗之黄屋纳孙皓之青蓋然后革车旋轸戎卒凯歌楚俘雾集冀马星罗无德不报有酒如河神之听之斯言匪蹉

为高仆射与司马消难书

【消难字道融河内温人妻齐神武女拜驸马都尉光禄卿出为北豫州刺史文宣末归周歷防州总管隋文帝辅政消难举兵应尉迟迥复归于陈为车骑将军及陈平免死卒于家按此书乃隋高颎伐陈时也颎为尚书左仆射】

名白一成云雨再歷炎凉引领南望劳眷无已歲暮寒重想比胜宜羈泊水乡无乃勤悴公居齐室家实元勳后入周朝爵穷上等富贵荣名时无与二西征南逝盖不获已且圣主敬于恩旧情期欵到背冰之始曲宪申恩公之妻孥一无所问行李往来想宜知悉陈氏背盟负约事非一绪所以爰诏大将军龚行天罰灵旗电扫师次江阳延首金陵但增翹注昔庞萌重获汉主宥其深辜魏洽再归曹王弃其大 惜其才也今古如一醉饱之过愿不自疑兼齐氏王姬宛然在室诸子陆陆如何易忘门生故吏遍于京辅旧友密亲击钟鼎食万里飘然音尘不嗣眷言及此伊何可怀今元戎启行易为去就承眷有素敢布腹心若使双舫浮渡三叛获俘函首长安悔无及也【英华】

諫除大理奏【思道为散骑侍郎奏内史侍郎事于时议置六卿将除大理思道奏】

省有驾部寺留大仆省有刑部寺除大理斯则重畜产而贱刑名诚为未可

薛道衡【字 卿河东汾阴人齐中书侍郎歷周授仪同入隋拜司 大夫炀帝忌其才赐死集五十卷】

使陈奏【道衡除中书舍人兼散骑常侍聘陈高祖曰朕且含养置之度外勿以言辞相折识朕意焉】

江东蕞尔一隅僭擅遂久实由永嘉已后华夏分崩刘石苻姚慕容赫连之辈妄窃名号寻亦灭亡魏氏自北徂南未遑逮畧周齐两立务在兼并所以江表逋诛积有年祀陛下圣德天挺光膺宝祚比隆三代平一九州岂容使区区之陈久在天网之外臣今奉使请责以称藩

祭江文

维开皇元年行军元帅晋王谨以太牢之奠敬祭南渚大江之神仰惟灵性包平智德擅灵长上膺东井下纪南国引双流而分九派长四渎而约百川自晋永嘉干灵落纲蕞尔吴越僭伪相承陈贼叔宝世济其凶士庶为其涂炭人神所以怨愤忝司九伐清彼一方分命将士乘流南渡仰凭灵祐咸蒙利涉今申命苍兕躬总精锐直趋金陵行登石首庶蛟螭窜于洲渚帷盖静于波涛江表克平海内清泰谨申礼荐惟神尚享

祭淮文

元帅晋王谨以清淅制币太牢之奠敬祭于东渚大淮之灵盖圣德应期神功宰物上齐七政下括四海自晋人丧道彝伦攸斁天隔内外地毁东南三吴成危乱之邦百越为逋逃之薮皇帝肇开鼎业光有神器图出 龙镜悬金玉忧劳庶绩无忘寤寐言念苍生情深矜养河源海外莫不来庭 顿呼韩崑时拜诵伪陈蕞尔尚阻声教妖贼叔宝僭窃遗绪毒流江左冤结人神上軫皇情义申吊伐猥蒙朝寄抚宁淮甸仰惟导源桐栢长迈蓬莱漂四渎而引百川擅五材而含七德庶凭流恶之灵克成除暴之举使水陆旌旗所向无前吴会君长束手归服谨申荐醴惟神尚飨

高祖文皇帝颂【道衡转播州刺史表求致仕炀帝欲以秘书监待之及上高祖颂不悦谓蘓威曰道衡致美先朝此鱼藻之义也拜司 大夫竟坐议新法赐死】

太始太素荒茫造化之初天皇地皇杳防书契之外其道絕其迹遠言谈所不诣耳目所不追至于入穴登巢鶉居 饮不殊于羽族取类于毛羣亦何贵于人灵何用于心识羲轩已降爰暨唐虞则乾象而施法度观人文而化天下然后帝王之位可重圣哲之道为尊夏后殷周之国禹汤文武之主功济生民声流雅颂然陵替于三五慙德于干戈秦居闰位任刑名为政本汉执陵图杂霸道而为业当涂兴而三方峙典午末而四海乱九州封域窟穴鲸鲵之羣五都遗黎蹴踏戎马之足虽 行定嵩洛木运据崑函未正沧海之流诟息昆山之燎叶千龄之旦暮当万叶之一朝者其在大隋乎粤若高祖文皇帝诞圣降灵则赤光照室韬神晦迹则紫气腾天龙顏日角之奇玉理珠衡之异着在图篆彰乎仪表而帝系灵长神基崇峻类邠岐之累德异丰沛之勃起俯膺歷试纳揆賓门位长六卿望高百辟犹重华之为大尉若文命之任司空苍歷将尽率土糜沸玉弩惊天金铉照野奸雄挺祸据河朔而连海岱猾长纵恶杜白马而塞成皋庸蜀逆命凭铜梁之险郾黄背诞引金陵之寇三川已震九鼎将飞高祖龙跃鳳翔濡

足授手应赤伏之符受 狐之篆命百下百胜之将动九天九地之师平共工而殄蚩尤翦猃
𪊑而戮菑齿不烦二十八将无假五十二征曾未逾时妖逆咸殄廓氛雾于区宇出黎元于涂
炭天柱倾而还正地维絶而更纽殊方稽颡识牛马之内向乐师伏地惧钟石之变声万姓所
以乐推三灵于是改卜坛场已备犹 五让之心亿兆难违方从四海之请光临宝祚展礼郊
丘舞六代而降天神陈四圭而飨上帝乾坤交泰品物咸亨酌前王之令典改易徽号因庶萌
之子来移创都邑天文上当朱鸟地理下据黑龙正位辨方揆景于日月内宫外座取法于辰
象悬政教于魏阙朝羣后于明堂除旧布新移风易俗天街之表地脉之外獯豷孔炽其来自
久横行十万樊噲于是失辞提步五千李陵所以陷没周齐两盛竞结旄头娉狄后于漠北未
足息其侵扰倾珍藏于山东不能止其贪暴炎灵启祚圣皇驭防运天防于帷展播神威于沙
朔柳室襁裘之长皆为臣 瀚海蹕林之地尽充沙苑三吴百越九江五湖地分南北天隔内
外谈黄旗紫盖之气恃龙蟠兽据之险恒有僭伪之君妄窃帝王之号时经五代年移三百爰
降皇情永怀大道愍彼黎献独为匪人今上利建在唐则哲居代地凭宸极天纵神武受脤出
车一举平定于是八荒无外九服大同四海为家万里为宅乃休牛散马偃武修文自华夏乱
离縣积年代人造战争之具家习浇伪之风圣人之遗训莫存先王之旧典咸坠爰命秩宗刊
定五礼申勅太子改正六乐玉帛罇俎之仪节文乃备金石匏革之奏雅俗始分而留心政术
垂神听览早朝晏罢废寝忘飡忧百姓之未安惧一物之失所行先王之道夜思待旦革百王
之弊朝不及夕见一善事喜彰于容防闻一愆犯叹深于在予薄赋轻徭务农重谷仓廩有红
腐之积黎萌无阻饥之虑天性 慈圣心惻隐恩加禽兽胎卵于是获全仁霑草木牛羊所以
勿践至于宪章重典刑名大辟申法而屈情决断于俄倾故能彝伦攸叙上下齐肃左右絶谄
諛之路缙绅无势力之门小心翼翼敬事于天地终日干干诚慎于亢极陶黎萌于德化致风
俗于太康公卿庶尹遐迩岳牧金以天平地成千载之嘉会登封降禪百王之盛典宜其金泥
玉检展礼介丘飞声腾实常为称首天子为而不恃成而不居冲防凝邈固辞弗许而虽休勿
休上德不德更乃洁诚岱岳逊谢愆咎方知六十四卦谦防之道为尊七十二君告成之义为
小巍巍荡荡无得以称焉而深诚至德感远于穹壤和气薰风充溢于宇宙二仪降福百灵荐
祉日月星象风云草树之祥山川玉石鳞介羽毛之瑞歲见月彰不可胜纪至于振古所未有
图籍所不载目所不见耳所未闻古语称圣人作万物覩神灵滋百宝用此其効矣既而游心
姑射脱屣之志已深铸鼎荆山升天之驾遂远凡在黎献共惟帝臣慕深考妣哀纒弓剑涂山
幽峻无复玉帛之礼长林寂寞空见衣冠之游若乃降精燁怒飞名帝篆开运握图创业垂统
圣德也拨乱反正济国宁人六合八紘同文共范神功也 酒陶匏云和孤竹禋祀上帝尊极
配天大孝也偃旆戢戈正礼裁乐纳民受域驱俗福林至政也张四维而临万防侔三皇而并
五帝岂直锱铢周汉么麼魏晋而已虽五行之舞每陈于清庙九德之歌无絶于乐府而 功
畅洽不局于形器懿业远大岂尽于揄扬臣轻生多幸命偶兴运趋事紫宸驱驰丹陛一辞天
阙奄隔鼎湖空有攀龙之心徒怀蓐蚁之意庶凭毫翰敢希贊述昔堙海之禽不增于大地泣
河之士非益于洪流尽其心之所存忘其力之所及辄緣斯义不觉斐然乃作颂曰悠哉邃古
邈矣季世四海九州万王千帝三代之后其道逾替爰逮金行不胜其 戎狄猾夏羣凶纵慝
窃号淫名十有余国怙威逞暴悖礼乱德五岳尘飞三象雾塞 精启历发迹幽方并吞寇伪
独擅雄强载祀二百比祚前王江湖尚阻区域未康勾吴闽越河朔渭涘九县瓜分三方鼎峙
狙诈不息干戈竞起东夏虽平乱离瘼矣五运叶期千年肇旦赫矣高祖人灵攸赞圣德回生
神谋独断瘳恶彰善夷凶静难宗伯撰仪太史练日孤竹之管云和之瑟展礼上 飞烟太一

珪璧朝防山川望秩占揆星景移建邦畿下凭赤壤上叶紫防布政衢室悬法象魏帝宅天府固本崇威匈奴瀚海龙荒狼望种落陆梁时犯亭障皇威遠慑帝德遐暢稽顙归诚称臣内向吴越提封斗牛星象积有年代自称君长大风未缴长鲸漏网授钺天人豁然清荡戴日戴斗太平太蒙礼教周被书轨大同复禹之迹成舜之功礼以安上乐以移风忧劳庶绩矜育黔首三面解罗万方引咎纳民轨物驱时仁壽神化隆平生灵熙阜防心恭己奉天事地協气横流休征绍至坛场望幸云亭虚位推而不居圣道弥粹齐迹姬文登发嗣圣道类汉光传庄宝命知来藏往 览幽镜鼎业灵长洪基隆盛崆峒问道汾射宵然御辯遐逝乘云上仙哀纒率土痛感穹 流泽万叶用教百年尚想觀图永惟圣则道洽幽显仁霑动植爰象不陈乾坤将息防臣作颂用申罔极

考敬肃状【肃河东蒲坂人仕隋有吏绩大业中迁颖川郡贊务朝东都炀帝令道衡为天下郡官之状称肃曰】

心如鐵石老而弥笃

辛德源【字孝基陇西狄道人仕齐歷中书舍人周宣纳上士入隋久不调终蜀王諮议防军集二十卷】

汉姜肱赞

姜肱澹雅昆季遗荣同衾協好比德齐声战胜而悦嘉遯以贞孤舟直迈卷迹沧溟

东晋庾统三人赞

运遭屯凶三孤丞立离禽婴鸣邂逅同集式谷既熟和响具翕肇彼遠岐泯焉齐入

朱明张臣尉赞

诗咏张仲今也朱明輶财敦友衣不表形寡妻屏秽棠棣增荣臣尉邈然丑类感诚

杜台卿【字少山博陵曲阳人弼之子仕齐歷中书黄门侍郎周平齐归乡里入隋拜著作郎集十五卷】

淮赋序【按此序称追而赋之则齐平后或入隋所追赋也台卿本传在隋书】

古人登高有作临水必观焉吟咏比赋可得而言矣诗周南云汉之广矣不可泳思江之永矣不可方思 风云泾以渭浊湜湜其沚卫风云河水洋洋北流活活小雅云滔滔江汉南国之纪大雅云丰水东注惟禹之绩周颂云漪与漆沮潜有多鱼有鱣有鲔鰪鰈鲤鲁颂云思乐泮水薄采其芹此皆水赋滥觞之源也后汉班彪有览海赋魏文帝有沧海赋王粲有游海赋

晋成公绥有大海赋潘岳有沧海赋木 虚孙绰并有海赋杨泉有五湖赋郭璞有江赋唯淮未有赋者魏文帝虽有浮淮赋止陈将卒赫怒至于兼包化产略无所载齐天统初以教府词曹出除广州长史经淮阳赴鎮频经利涉壮其淮沸浩荡且注巨海南通曲江水怪神物于何不有遂撰闻见追而赋之

戴逵【逵有与释慧命书载广 明集见后盖周隋间人】

皇太子箴【艺文云隋戴逵】

无谓父子无间江充掘蛊无谓兄弟无携倡优起舞

王孝籍【平原人】

奏记吏部尚书牛

【孝籍好学博览开皇中召入秘书助王劭修国史在省数年不免输税孝籍不得志奏记于亦知其有学业而竟不调后归乡里以教授为业终于家】

窃以毒螫防肤则申旦不寐饥寒切体亦卒歲无聊何则痛苦难以安贫穷易为感况怀抱之内冰火铄脂膏腠理之间风霜侵骨髓安可齧舌絨唇吞声饮气恶呻吟之响忍酸辛之酷哉伏惟明尚书公动哀矜之色开寬裕之怀咳唾足以活涸鳞吹嘘可用蜚穷羽芬椒兰之气暖布帛之词许小人之请闻大君之德虽复山川绵遠鬼神在兹信而有征言无不履犹恐拯溺迟于援手救跌缓于持足待越人之舟楫求鲁匠之云梯则必悬于乔树之枝没于深泉之底夫以一介贫人七年直省课役不免庆赏不霑卖贡禹之田供释之之费有弱子之累乏强兄之产加以慈母在堂光阴迟暮寒暑违阙關山超遠鬻臂为期前途逾邈倚闥之望朝夕倾对谢相如之病无官可以免发梅福之狂非仙所能避愁疾甚乎厉鬼人生异夫金石营魂且散恐筮予无征赍恨入 则虚緣恩顾此乃王稽所以致言应侯为之不乐也潜须发之内居眉睫之间子野未曾闻离朱所不见久沦东观留滞南史终无荐引永同埋殡三世不移虽由寂寞十年不调实乏知己夫不世出者圣明之君也不万一者诚贤之臣也以夫不世出而逢不万一小人所以为明尚书幸也坐人物之源运銓衡之柄反被狐白不好緇衣此小人为明尚书不取也昔荆玉未剖刖卞和之足百里未用碎禽息之首居得言之地有能用之资憎耳目之明无手足之蹙憚而不为孰知其其解夫官或不称其能士或未申其屈一夫窃议语流天下劳不见图安能无望病未及死狂还克念汗穷愁之简属离忧之辞托志于前修通心于来哲使千載之下哀其不遇追咎执事有玷清尘则不肖之軀死生为累小人之罪方且未刊愿少加矜愍留心无忽【北史跌隋书作经乔作稿底下有矣字慈作老倾对作已勤须作髻玷作防同刊北史作刑误从书矜书作怜】魏澹【字彦深钜鹿下曲阳人齐中书舍人歷周纳言中士入隋为著作郎有集二十卷】魏史义例【高祖以魏收所撰书褒贬失实平绘为中兴书事不伦序诏澹别成魏史澹自道武下及恭帝为十二纪七十八传别为史论及例一卷并目錄合九十二卷澹之义例与魏收多所不同所着魏书甚简要大矫收绘之失上览而

善之】

其一曰臣闻天子者继天立极终始絶名故谷梁传曰太上不名曲礼曰天子不言出诸侯不生名诸侯尚不生名况天子乎若为太子必须书名良由子者对父生称父前子名礼之意也是以桓公六年九月丁卯子同生传曰举以太子之礼杜预注云桓公子庄公也十二公唯子同是嫡夫人之长子备用太子之礼故史书之于防即位之日尊成君而不名春秋之义圣人之防防也至如马迁周之太子并皆言名汉之储两俱没其讳以尊汉卑周臣子之意也窃谓虽立此理恐非其义何者春秋礼记太子必书名天王不言出此仲尼之褒贬皇王之称谓非当时与异代遂为优劣也班固范曄陈壽王隐沈约参差不同尊卑失序至于魏收讳储君之名书天子之字过又甚焉今所撰史讳皇帝名书太子字欲以尊君卑臣依春秋之义也其二曰五帝之圣三代之英积德累功乃文乃武贤圣相承莫过周室名器不及后稷追諡止于三王此即前代之茂实后人之 镜也魏氏平文以前部落之君长耳太祖逡追二十八帝并极高崇高遣尧舜宪章越周公典礼但道武出自结绳未师典故当须南董直笔裁而正之反更饰非言是观过所谓决渤海之水复去隄防襄陵之灾未可免也但力防天女所诞灵异絶世尊为始祖得礼之宜平文昭成雄据塞表英风渐盛图南之业基自此始长孙斤之乱也兵交御坐太子授命昭成获免道武此时后緡方娠宗庙复存社稷有主大功大孝实在献明此之三世称諡可也自兹以外未之敢闻其三曰臣以为南巢桀亡牧野纣灭斩以黄钺悬首白旗幽王死于骊山厉王出奔于彘未尝隐讳直笔书之欲以劝善惩恶贻戒将来者也而太武献文并皆非命前史立纪不异天年言论之间颇露首尾杀主害君莫知名姓逆臣贼子何所惧哉君子之过如日月之食圆首方足孰不瞻仰况复兵交御坐矢及王屋而可隐没者乎今所撰史分明直书不敢回避且隐桓之死闵昭杀逐丘明据实叙于经下况复悬隔异代而致依违哉其四曰周道陵迟不胜其敝楚子亲问九鼎吴人来征百牢无君之心实彰行路夫子刊经皆书曰卒自晋德不竟宇宙分崩或帝或王各自署置当其生日聘使往来略如敌国及其终也书之曰死便同庶人存没顿殊能无怀愧今所撰史诸国凡处华夏之地者皆书曰卒同之吴楚其五曰壶遂发问马迁荅之义已尽矣后之述者仍未领悟董仲舒司马迁之意本云尚书者隆平之典春秋者拨乱之法兴衰理异制作亦殊治定则直叙钦明世乱则辞兼显晦分路命家不相依放故云周道废春秋作焉尧舜盛尚书载之是也汉兴以来改正朔易服色臣力诵圣德仍不能尽余所谓述故事而君比之春秋谬哉然则纪传之体出自尚书不学春秋明矣而范 云春秋者文既总畧好失事形今之拟作所以为短纪传者史班之所变也网罗一代事义周悉适之后学此焉为优故继而述观 此言岂直非圣人之无法又失马迁之意防孙盛自谓钻仰具体而放之魏收云鲁史既修达者贻则子长自拘纪传不存师表盖泉源所由地非企及虽复逊辞畏圣亦未思纪传所由来也

又

司马迁创立纪传以来述者非一人无善恶皆为立论计在身行迹具在正书事既无奇不足惩劝再述乍同铭颂重叙唯觉繁文案丘明亚圣之才发扬圣防言君子曰者无非甚泰其间寻常直书而已今所撰史窃有慕焉可为劝戒者论其得失其无损益者所不论也敬奉议【澹聘于陈陈人使潘徽接对澹反命为启于陈主云敬奉 慈曲垂钱送徽以伏奉为重敬奉

为轻却而不奏澹立议徽复难之遂改焉】

曲礼注曰礼主于敬诗曰维桑与梓必恭敬止孝经曰宗庙致敬又云不敬其亲谓之悖礼孔子敬天之怒成汤圣敬日跻宗庙极重上天极高父极尊君极贵四者咸同一敬五经未有异文不知以敬为轻竟何所据潘徽【字伯彦吴人陈新蔡王国侍郎入隋歷京兆郡博士坐交杨 感出为西海郡威定主簿】难魏澹议【徽时为陈客馆令】

向所论敬字本不全以为轻但施用处殊义成通别礼主于敬此是通言犹如男子冠而字之注云成人敬其名也春秋有冀缺夫妻亦云相敬既于子则有敬名之义在夫亦有敬妻之說此可复并谓极重乎至若敬谢诸公固非尊地公子敬爱止施賓友敬问敬报弥见雷同敬听敬酬何關贵隔当知敬之为义虽是不轻但敬之于语则有时混漫今云敬奉所以成疑聊举一隅未为深据

韵纂序【徽初归隋为州博士秦孝王俊召为学士令撰集字书名为训纂徽为序】

文字之来尚矣初则羲皇出震观象纬以法天次则史颉佐轩察蹄迹而取地于是八卦爰始爻文斯作绳用既息坟籍生焉至如龙防授河 威出洛緑绋白检述勋华之运金绳玉字表殷夏之符銜甲示于姬坛吐卷征于孔室莫不理包逵迹会幽明仰協神功俯照人事其制作也如彼其祥瑞也如此故能宣流万代正名百物为生民之耳目作后王之模范颂美形容垂芬篆素暨大隋之受命也追纵三五并曜参辰外振武功内修文德飞英声而勒嵩岱彰大定而铭钟鼎春千秋羽盛礼乐于胶庠省俗观风采歌谣于唐卫我秦王殿下降灵霄极稟秀天机质润珪璋文兼黼黻楚诗早习颇属怀于言志沛易先通每留神于索隐尊儒好古三雍之对已適博物多能百家之工弥洽遨游必名教渔猎唯图史加以降情引汲择善刍防筑馆招贤攀枝伫异剖连城于井里赍束帛于丘园薄技无遗片言便赏所以人加脂粉物竞琢磨俱报稻粱各施鸣吠于时歲次鹑火月躔夷则驂驾务隙灵光意静前临竹沼却倚桂岩泉石莹仁智之心烟霞发文彩之致賔僚雾集教义风靡乃讨论羣艺商略众书以为小学之家尤多舛杂虽复周礼汉律务在贯通而巧說邪辞递生同异且文讹篆 音谬楚夏三苍急就之流防存章句說文字林之属唯别体形至于寻声推韵良为疑混酌古防今未臻功要末有李登声类吕静韵集始判清浊才分宫羽而全无引据过伤浅局诗赋所须卒难为用遂躬紆睿防標摘是非撮举宏纲裁断篇部总防旧辙创立新意声别相从即随注释详之诂训证以经史备包骚雅博牵子集汗简云毕题为韵纂凡三十卷勒成一家方可藏彼名山副诸石室见羣玉之为浅鄙悬金之不定爰命末学制其都序徽业述已寡思理弥殫心若死灰文慙生气徒以犬马识养飞走怀仁敢执顛沛之辞遂操狂简之笔而齐鲁富经学楚郑多良士西河之彦幸不诟于索居东里之才请能加于润色

江都集礼序【晋王广复引徽为扬州博士令与诸儒撰江都集礼一部徽为序】

礼之为用至矣大与天地同节明与日月齐照源开三本体合四端巢居穴处之前即萌其理文鸟迹以后稍显其事虽情存简易意非玉帛而夏造殷因可得知也至如秩宗三礼之职

司徒五礼之官邦国以和人神惟敬道德仁义非此莫成进退俯仰去兹安适若玺印涂犹防止水岂直譬彼耕耨均斯粉泽而已哉自世属坑焚时移汉魏叔孙通之硕解高堂隆之博识专门者雾集制作者风驰节文颇备枝条互起皇帝负展垂旒辨方正位纂勋华之厯象缀文武之宪章车书之所防通触境斯应云雨之所霑润无思不韪东探石簣之符西蠹羽陵之防鸣銮太室偃伯灵台乐备五常礼兼八代上柱国太尉扬州总管晋王握珪璋之宝履神明之德隆化赞杰藏用显仁地居周邵业冠河楚允文允武多才多艺戎衣而笼闕塞朝服而扫江湖收杞梓之才辟康庄之馆加以佃渔六学网罗百氏继稷下之絶轨 泗上之沦风蹟无隐而不探事有难而必综至于采标緑错华垂丹篆刑名长短儒墨是非书圃翰林之域理窟谈丛之内谒者所求之余侍医所校之逸莫不澄泾辨渭拾珠弃蚌以为质文递改损益不同明堂曲台之记南宫东观之説郑王徐贺之答崔譙何庾之论简牒虽盈菁华盖鲜乃以宣条暇日听颂余晨娱情窥宝之乡凝相观涛之岸总括油素躬披绡縠芟芜刈楚振领提纲去其繁杂撮其指要勒成一家名曰江都集礼凡十二帙一百二十卷取方月数用比星周军国之义存焉人伦之纪备矣昔者 蒙令后睢涣名藩诚复出警入蹕拟乘輿之制度建羈载旂用天子之礼乐求诸述作未闻兹典方可韬之顿水副彼名山见刻石之非工嗤悬金之已陋是知沛王通论不独擅于前修宁朔新书更追慙于往册徽幸栖仁岳忝遊圣海谬承恩獎敢叙该博之致云

柳防【字顾言河东人仕后梁吏部尚书入隋为晋王諮议防军厯秘书监以才学为炀帝所亲狎有集十卷】

议增房内乐钟磬奏【防大业初为书秘监炀帝以礼乐事总付防等增多开皇乐器又增房内乐益其钟磬制可】

房内乐者主为王后弦歌讽诵而事君子故以房室为名燕礼乡饮酒礼亦取而用也故云用之乡人焉用之邦国焉文王之风由近及远乡乐以感人须存雅正既不设钟鼓义无四悬何以取正于妇道也磬师职云燕乐之钟磬郑 曰燕乐房内乐也所谓阴声金石备矣以此而论房内之乐非独弦歌必有钟磬也内宰职云正后服位诏其礼乐之仪郑 云荐撤之礼当与乐相应荐撤之言虽施祭祀其入出賓客理亦宜同请以歌钟歌磬各设二虞土革丝竹并副之并升歌下管总名房内之乐女奴肄习朝燕用之

虞世基【字茂世防稽余姚人仕陈尚书左丞入隋为内史侍郎防掌朝政唯诺取容宇文化及弑逆见害】

讲武赋序【陈主尝于幕府山校猎令世基于坐作讲武赋奏之赐马一匹】

夫翫居常者未可论匡济之功应变通者然后见帝王之畧何则化有文质进让殊风世或浇淳解张累务虽复顺纪合符之后望云就日之君且修战于版泉亦治兵于丹浦是知文德武功盖因时而并用经邦创制固与俗而推移所以树鸿名垂大训拱揖百灵包举六合其唯圣人乎鶉火之歲皇上御宇之四年也万物交泰九有乂安俗跻仁壽民资日用然而足食足兵

犹载怀于履薄可久可大尚懔乎于御朽至如昆吾遠賁肃育竒踪史不絕书府无虚月贝胄雍弧之用犀渠阙巩之殷铸名剑于尚方积雕戈于武库熊黑百万貔豹千羣利尽五材威加四海爰于农隙有事春搜舍爵防勲观使臣之以礼沮劝赏罚乃示民以知禁盛矣哉信百王之不易千载之一时也昔上林从幸相如于是颂德长杨校猎子云退而为赋虽则体物緣情不同年而语矣英声茂实盖可得而言焉

袞冕奏【墨勅曰可承以单衣】

后周故事升日月于旌旗乃阙三辰而章无十二但有山龙华虫作绘宗彝藻火粉米黼黻乃与三公不异开皇中就里欲生分别故衣重宗彝裳重黼黻合重二物以就九章为十二等但每一物上下重行袞服用九鷩服用七今重此三物乃非典故且周氏执谦不敢负于日月所以缀此三象唯施太常天王袞衣章乃从九但天子譬日德在照临辰为帝位月主正后负此三物合德齐明自古有之理应无惑周执谦道殊未可依重用宗彝又乖法服今准尚书予欲观古人之服日月星辰山龙华虫作绘宗彝藻火粉米黼黻絺绣具依此于左右膊上为日月各一当后领下而为星辰又山龙九物各重行十二又近代故实依尚书大传山龙纯青华虫纯黄作绘宗彝纯黑藻纯白火纯赤以此相间而为五采郑 议已自非之云五采相错非一色也今并用织成于绣五色错文准孔安国衣质以 加山龙华虫火宗彝等并织成为五物裳质以纁加藻粉米黼黻之四衣裳通数此为九章兼上三辰而备十二也衣标领上各帖升龙汉晋以来率皆如此既是先王法服不可乖于夏制征而用之理将为允

元德太子哀册文【炀帝长子昭立为皇太子谦冲仁爱以疾薨诏内史侍郎虞世基为哀册文 文苑英华作虞世南文误】

维大业二年七月癸丑朔二十三日乙亥皇太子薨于行宫粤三年五月庚辰朔六日将迁座于庄陵礼也蜃綈宵载鹤闕晓辟肃文物以具陈俨賓从其如昔皇帝悼离方之就晦嗟震宫之亏象顾守器以长怀临登俊而兴想先遠戒日占谋允从庭彝彻祖阶圯收重抗铭旌以啓路动徐输于振容揆行度名累德彰謚爰诏史册式遵典志俾濬哲之徽猷播长久乎天地其辞曰宸基峻极帝绪防昌体元袭圣仪耀重光气秀春陆神华少阳居周軼诵处汉韬庄有纵生知诞膺惟睿性道觴日防深绮歲降迹大成俯情多艺树亲建国命懿作藩威防先路烏奕渠门庸服有纪分器惟尊风高楚殿雅盛梁园睿后膺储天人叶顺本茂条遠基崇体峻改王参墟奄有唐晋在贵能谦居冲益慎封畿千里闾阖九重神州王化禁旅军容瞻言偃草高视折冲帷宸清秘亲贤允属泛景鳳澜飞华螭玉挥翰泉涌敷言藻縟式是便烦思谋启沃共惟积德丰衍繁祉粤自天孙光升元子綠车逮事翠纓奉祀肃穆满容仪形让齿礼乐交畅爱敬兼资优游养德恭已承仪南山聘隐东序尊师有粹神仪深穆其度显显观德温温审谕炯戒齐箴留连主赋入监出抚日就月将冲情玉裕令问金相宜綏景福永作元良神理 漠天道难究仁不必壽善或愆祐遽瑶山之頽坏忽桂宫之毁构痛结幽明悲纏宇宙恻皇情之深悯摧具僚其如疚呜呼哀哉回环气朔荏苒居诸沾零露于瑶圃下申霜于玉除夜漏尽兮空阶曙晓月悬兮帷殿虚呜呼哀哉将宁甫窆长违望苑渡渭浹于造舟遵长平之修坂望鹤驾而不追顾龙楼而日遠呜呼哀哉永隔存没长分古今去荣华于人世即潜 之幽深霏夕烟而

稍起惨落景而将沈听哀挽之凄楚杂灌木之悲吟纷徒御而流袂歔纓弁以霑衿呜呼哀哉九地黄泉千年白日虽金石之能久终天壤乎长毕敢图芳于篆素永飞声而腾实【文苑英华五月作二月徐轮作轩輶度作授耀作国烦作蕃养作道仪作凝申霜作严霜楼作骖霏作罗】

隋左屯卫大将军左光禄大夫姚恭公墓志铭【并序 虞世基撰欧阳询正书】

【缺】 讳辩字思辩武威人也导清源于妣汭肇崇構于轩丘世【缺】 斯【缺】 五世祖为晋所灭子孙播越居于武威曾祖赞抚军【缺】 军将军武威太守并以硕量伟才佐时匡国父宝散骑常侍【缺】 山川降神象纬幼而风韵开爽志节通亮弓殚百步之奇剑【缺】 气驰名遂以材官入选周保定四年起家宗侍下士天和二年【缺】 亏胜羣帅见囚公频进奇谋竟弗能用乃以舟师先济朝廷【缺】 统营校公抚养士卒劝课农桑莫不以家实食廩人知礼节【缺】 赏五年从周武帝平定晋州摧殄高壁十二月进屠并州既【缺】 公独为后距转战不衰皇輿获安公之力也频蒙优赏以累【缺】 六年从定相州以前后功授大都督封安养县开国子邑四【缺】 检校武侯兵事又命公隋上柱国【缺】 拔崇于武陟合战又于野马【缺】 相济实繁有徒公建旆遄征掇弓言迈推锋接战充着奇功大象【缺】 户开皇元年授上开府仪同三司进爵为公增邑为一千户【缺】 所届即事戎车公诚勇奋发义同阃外屡出奇兵频摧丑虏【缺】 天府凡厥赏赐散之士卒二年匈奴复入凉州诏以公为行军【缺】 前后冲击昼夜攻围校尉之井既枯将军之泉又竭空有思梅之【缺】 以亡为存防勲命赏理在不次五年授右武侯骠骑将军霍去病【缺】 蔑如也六年授云州道水军总管戈船掩渚巨舰浮川河湟肃【缺】 匪曰崇墉基峙耸堞相望边柝弗惊控 遠逝其年授使持节河【缺】 化若神明十年检校叠州总管河州刺史行叠州刺史事公才畧【缺】 政教安民和众于是乎在十二年转授左武侯将军寻为凉州【缺】 边烽寝侯毳幕旃裘望风敛迹十六年使持节灵州总管诸军事【缺】 俗易风移政成朞月十八年授原州道行军总管九年授环州道【缺】 总管公屡总戎律特精边事每秋风起塞胡骑扬尘折冲之狂非公【缺】 二年授左武侯大将军进爵蔡阳郡开国公食邑一千五百户大启【缺】 皇丘钦明御篆睿圣纂图特荷天眷恩遇隆重密勿禁卫知无不为【缺】 威等同进位大将军左武侯大将军如故三年以母忧去官其年有【缺】 自天防于毁灭僊俛王事杖而后起四年以官方草创授金紫光禄大夫【缺】 光禄大夫如故车驾北巡诸蕃朝朔以旧典纠察整肃军容乃令公【缺】 旌门洞张内外肃然事严细柳吐谷浑大保五期尼乐周等率众归附【缺】 銮蹕西幸底定浑国乃以公为郁卑道将军旗鼓所振莫不催殄俘【缺】 右光禄大夫左屯卫大将军如故乃献凯庙庭礼崇备物六军之长【缺】 车驾南巡江都以公京师留守职居爪牙任惟心膂出处崇重朝野荣之大业七年三月遘疾十九日薨于京兆郡春秋六十有六惟公体量宏达【缺】 兴义造次弗违虚已推贤始终同致加以雄图恢廓奇略 遠气有余勇莫之与抗善于御抚得士卒之心长于政术致廉平之美自入统禁旅出【缺】 所夙夜匪懈简在帝心至于敬友穆亲轻财贵义家稟诚孝奉以周旋训不与善遽此归全知与不知莫不流涕粤以其年十月癸丑朔二十一日【缺】 有诏故左屯卫

大将军右光禄大夫姚思辩性理和谨秉心恭慎歷任【缺】式表哀荣可贈左光禄大夫又蒙賜物八百段粟麦一千石謚曰恭公【缺】

祀【缺】长澜若水遠馥薰风时贤

既及世德斯隆勤王成务启羈垂功炳灵不已【缺】 炤落鴈穷能通援尽妙蹶张选勇期门待诏职分七萃官聯五营【缺】 陪卫出拥高旌汜水兵略常山阵势卓犖明谋沈深节制功有必取筭无遗计【缺】 恩宠显赫身名执恭履顺守满持盈方陪纪岳遽掩佳城游魂不归逝川【缺】 春秋递代徽猷永遠【金薤琳琅跋云志称辩精于边事屡立大功盖老将也其官至大将军而死謚恭公爵亦尊矣而隋史不为立传向非率更之书后世不复知有辩此古人墟墓之文所以必托之名笔岂无意耶】

虞绰【字士裕防稽余姚人仕陈太学博士永阳王记室入隋引为学士歷授建节尉坐与杨感交徙且未至长安亡捕诛】

大鸟铭【绰累迁著作佐郎与族人世南等常居禁中以文翰待诏从征辽东炀帝舍临海顿见大鸟诏绰为铭命有司勒于海上】

维大业八年歲在壬申夏四月丙子皇帝底定辽碣班师振旅龙驾南辕鸾旗西迈行宫次于柳城县之临海顿焉山川明秀实仙都也旌门外设欵跨重阜帐殿周施降望大壑息清蹕下轻輿警百灵绥万福踐素砂步碧沚同轩皇之襄野迈汉宗于河上想汾射以开襟望蓬瀛而载伫窅然齐肃藐属殊庭兼以圣德遐宣息别风与淮雨休符潜感表重润于夷波璧日晒光卿云舒采六合开朗十洲澄镜少选之间儵焉灵感忽有祥禽皎同鹤鹭出自霄汉翻然双下高逾一文长乃盈寻靡霜晖于羽翮激丹华于觜距鸾翔鳳跄鹄起鸿鵠或蹶或啄载飞载止徘徊驯扰咫尺乘輿不借挥琴非因拊石乐我君德是用来仪斯固类仙人之骐驎冠羽族之宗长西王青鸟东海赤鴈岂可同年而语哉窃以铭基华岳事乖灵异纪迹邹山义非尽美犹方册不泯遗文可观况盛德成功若斯懿铄怀真味道如此感通不镌名山安用铭异臣拜稽首敢勒铭云来蕪兴怨帝自东征言复禹绩乃御轩营六师薄伐三韩肃清龚行天罚赫赫明明文德上畅灵武外薄车徒不扰苛慝靡作凯歌载路成功允铄反旆还轩遵林并壑停輿海澨驻驂巘岵宵想遐凝藐属千里金台银闕云浮岳峙有感斯应灵禽效祉飞来清汉俱集华泉好音玉响皓质冰鲜狎仁驯德习习翩翩絕迹无泯于万斯年

许善心【字务本高阳北新城人仕陈通直散骑常侍聘于隋陈亡入隋歷礼部侍郎转给事郎授通议大夫字文化及弑逆江都不屈被害】

神雀颂【善心授虞部侍郎开皇十六年有神雀飞于含章闕高祖賜防百官善心于座请纸笔制神雀颂賜物二百段】

臣闻观象则天乾元合其德观法审地域大表其尊雨施云行四时所以生杀川流岳立万物

于是裁成出震乘离之君纪鳳司鳳之后玉锤玉斗而降金版金籙以传并陶冶性灵含煦动植眇 珠于赤水寂明镜乎虚堂莫不景福氤氲嘉祝麤集驰声南董越响云韶粤我皇帝之君临闾大方抗太极负鳳邸据龙图不言行焉摄提建指不肃清焉喉铃启闭括地复夏截海翦商就望體其尊登减昌其会縣区浹宇遐至还安騰实飞声直暢傍施无体之礼威仪布政之宫无声之乐綴兆总章之观上庠养老躬问百年下土字民心为百姓月栖日浴热坂寒门吹鳞没羽之荒赤蛇青马之裔投戈请吏削衽承风岂止呼韩北场頽勒狼居之岫熄慎南境近表不耐之城故使天弗爱道地宁吝宝川岳展畏幽明効灵狎素游頽团膏漱醴半景青赤孳歷亏盈足足怀仁般般扰义祥祐之来若此升降之化如彼而登封盛典云亭伫白检之仪致治成功柴燎靡 珪之告虽奉常定礼武骑草文天子抑而未行推而不有允恭克让其在斯乎七十二君信蔑如也故神禽显贲 应特昭白爵主鐵豸之奇赤爵衔丹书之贵班固神爵之颂履武戴文曹植嘉爵之篇栖庭集牖未若于飞武帐来贺文防刷采清蒲将翱赤 玉几朝御取翫轩楯之间金门旦开兼留翠翟之鉴终古旷世末或前闻福召宜征得之兹日歲次上章律谐大吕 枵会节 英统时至尊未明求衣晨兴于含章之殿爰有瑞爵翱翔而下载行载止当辰宁而徐前来集来仪承轩墀而顾步夫瑞者符也明主之休征雀者爵也圣人之大宝谨案考异邮云轩辕有黄爵赤头立日傍占云土精之应又礼稽命征云祭祀合其宜则黄爵集昔汉集泰畤之殿魏下文昌之宫一见雍丘之祠三入平东之府并旁观回矚事陋人防奚足称矣抑又闻之不刳胎剖卵则鸾鳳驯鸣不漉浸焚原则螭龙盘蜿是知陛下止杀故飞走宅心皇慈好生而浮潜育德臣面奉纶綍垂示休祥预承嘉宴不胜藻跃李防僻处西土陆机少长东隅防臣慙于往贤逢时盛乎曩代辄竭庸琐敢献颂云太素式肇大德资生功不器道要无名质文鼎革沿习因成祥图瑞史赫赫明明天保大定于铄我君武义乃武文教惟文横塞宇宙旁凝射汾轩物重造姚风再薰焕发王防昭彰帝道御地七神飞天五老山祇吐秘河灵孕宝黑羽升坛青鳞伏皂丹乌流火白雉从风栖阿德劭鸣岐祚隆未如神爵近贺王宫五灵何有百福攸同孔图献赤荀文表白节节奇音行行瑞迹化玉黼展衔环陞防上天之命明神所格经应在旃伊臣预焉永缉韦素方流管弦颂歌不足蹈舞无宣臣拜稽首亿万斯年七庙议【大业元年炀帝入营立七庙诏有司详定善心为礼部侍郎摄太常少卿与博士褚亮等议诏可未及创制】

谨案礼记天子七庙三昭三穆与太祖之庙而七郑 注曰此周制也七者太祖及文王武王之祧与亲庙四也殷则六庙契及汤与二昭二穆也夏则五庙无太祖禹与二昭二穆而已又据王者禘其祖之所自出而立四庙案郑 义天子唯立四亲庙并始祖而为五周以文武为受命之祖特立二祧是为七庙王肃注礼记尊者尊统上卑者尊统下故天子七庙诸侯五庙其有殊功异德非太祖而不毁不在七庙之数案王肃以为天子七庙是通百代之言又据王制之文天子七庙诸侯五庙大夫三庙降二为差是则天子立四亲庙又立高祖之父高祖之祖并太祖而为七周有文武姜嫄合为十庙汉诸帝之庙各立无迭毁之义至元帝时贡禹匡衡之徒始建其礼以高帝为太祖而立四亲庙是为五庙唯刘歆以为天子七庙诸侯五庙降杀以两之义七者其正法可常数也宗不在数内有功德则宗之不可预毁为数也是以班固称考论诸儒之议刘歆博而笃矣光武即位建高庙于雒阳乃立南顿君以上四庙就祖宗而为七至魏初高堂隆为郑学议立亲庙四太祖武帝犹在四亲之内乃虚置太祖及二祧以待后代至景初间乃依王肃更立五世六世祖就四亲而为六庙晋武受禅博议宗祀自文帝

以上六世祖征西府君而宣帝亦序于昭穆未升太祖故祭止六也江左中兴贺循知礼至于寝庙之仪皆依魏晋旧事宋武帝初受晋命为王依诸侯立亲庙四即位之后增祠五世祖相国掾府君六世祖右北平府君止于六庙逮身歿主升从昭穆循太祖之位也降及齐梁守而弗革加崇迭毁礼无违旧臣等又案姬周自太祖已下皆别立庙至于禘祫俱合食于太祖是以炎汉之初诸庙各立岁时尝享亦随处而祭所用庙乐皆象功德而歌舞焉至光武乃总立一堂而羣主异室斯则新承寇乱欲从约省自此以来因循不变伏惟高祖文皇帝睿哲 览神武应期受命开基垂统圣嗣当文明之运定祖宗之礼且损益不同沿袭异趣时王所制可以垂法自歷代以来杂用王郑二义若寻其指归校以优劣康成止论周代非谓经通子雍总贯皇王事兼长远今请依据古典崇建七庙受命之祖宜别立庙祧百代之后为不毁之法至于銮驾亲奉申孝享于高庙有司行事竭诚敬于羣王俾夫规模可则严祀易遵表有功而彰明德大复古而贵能变臣又案周人立庙亦无处置之文据冢人处职而言之先王居中以昭穆为左右阮忱撰礼图亦从此议汉京诸庙既远又不序禘祫今若依周制理有未安杂用汉仪事难全采谨详立别图附之议末

皇后属车奏駁【皇后属车三十六乘初宇文恺阎毗奏定请减乘輿之半善心奏駁制可】

谨案周礼后备六服并设五辂采章之数并与王同属车之制不应独异又宋孝建时议定与辇天子属车十有二乘至大明元年九月有司奏皇后副车未有定式诏下礼官议正其数博士王燮之议郑 云后象王立六宫亦正寝一而燕寝五推其所立每与王同谓十二乘通闕为允宋帝从之遂为后式今请依乘輿不须差降

皇太子服衮冕对【牛 奏皇太子冬正大朝请服衮冕帝问给事郎许善心曰太子朝谒着远游冠有何典故善心对帝曰善竟用开皇旧式 案此似非面对因録】

晋令皇太子给五时朝服远游冠至宋泰始六年更议仪注仪曹郎丘仲起议案周礼公自衮冕已下至卿士大夫之 冕皆其朝聘之服也伏寻古之公侯尚得服衮以入朝见况皇太子储副之尊谓宜式遵盛典服衮朝贺兼左丞陆澄议服冕以朝实着经典自秦除六冕之制后汉始备古章魏晋以来非祀宗庙不欲令臣下服于衮冕位为公者必加侍官故太子入朝因亦不着但承天作副礼絶羣后宜遵前王之令典革近代之陋制皇太子朝请服冕自宋以下始定此仪至梁简文之为太子嫌于上逼遂冠远游下及于陈皆依此法后周之时亦言服衮入朝至于开皇复遵魏晋故事臣谓衮冕之服章玉虽差一日而观颇欲相类臣子之道义无上逼故晋武帝太始三年诏太宰安平王孚着侍内之服四年又赐赵燕乐安王等散骑常侍之服自斯以后台鼎贵臣并加貂珥武弁故皇太子遂着远游谦不逼尊于理为允【隋书】

宇文述役兵议【左卫大将军宇文述每旦借本部兵数十人以供私役摄御史大夫梁毗奏劾之上方以心腹委述法官乃推言役不满日先千余兵皆称被役经二十余日后更云初不被役上付议虚实皆议为虚善心议不当免炀帝可免罪之奏】

述于仗卫之所抽兵私役虽不满日阙于宿卫与常役斫部情状乃殊又兵多下番散还本府

分道追至不谋同辞今殆一月方始翻覆奸状分明此何可舍

梁史叙论【初善心父陈卫尉卿亨撰梁史未就而歿善心修续成书其序传末述制作之意】

谨案太素将萌洪荒初判干仪资始辰象所以正时《书》载厚生品物于焉播气参三才而育德肖二统而降灵有人民焉树之君长有贵贱矣为其宗极保上天之睠命膺下土之乐推莫不执太方振长防感召风云驱驰英俊干戈揖让取之也殊功鼎玉 符成之也一致革命剏制竹素之道稍彰纪事记言笔墨之官渐着炎农以往存其名而漏其迹黄轩以来晦其文而显其用登丘纳麓具训诰及典谟贯昴入房传夏正与殷祀泊辩方正位论时训功南北左右兼四名之别棹机乘车擅一家之称国恶虽讳君举必书故贼子乱臣天下大惧元 明镜昭然可察及三郊递袭五胜相沿俱称百谷之王并以四海自任重光累德何世无哉逮有梁之兴君临天下江左建国莫斯为盛受命在于一君继统传乎四主克昌四十八载余祚五十六年武皇帝出自诸生爰升宝历拯百王之 救万姓之危反壤季之末流登上皇之独道朝多君子野无遗贤礼乐必备宪章咸举 深慈于不杀济大忍于无刑荡荡巍巍可为称首属阴戎入颍氏羯侵洛沸腾塹黠三季所未闻扫地滔天一元之巨厄廊庙有序翦成狐兔之场珪帛有仪碎夫虎狼之手福善积而身祸仁义在而国亡岂天道欤岂人事欤尝别论之在序论之卷先君昔在前代早怀述作凡撰齐书为五十卷梁书纪传随事勒成及阙而未就者目录注为一百八卷梁室交丧坟籍销尽冢壁皆残不準无所盗帷囊同毁陈农何以求秦儒既坑先王之道将坠汉臣徒请口授之文亦絶所撰之书一时亡散有陈初建诏为史官补阙拾遗心识口诵依旧目录更加修撰且成百卷已有六帙五十八卷上秘阁讫善心早婴荼蓼弗荷薪构太建之末频抗表闻至德之初蒙授史任方愿油素采访门庭记录俯励弱才仰成先志而单宗少强近虚室类原颜退屏无所交游栖迟不求进益假班嗣之书徒闻其语给王隐之笔未见其人加以庸琐凉能孤陋末学忝职郎署兼撰陈史致此书延时未即成续祔明二年以台郎入聘值本邑沦覆他乡播迁行人失时将命不复望都亭而长恻迁别馆而悬壶家中旧书在后焚荡今止有六十八卷在又并缺落失次自入京已来随见补葺畧成七十卷四帝纪八卷后妃一卷三太子录一卷为一帙十卷宗室王侯列传一帙十卷具臣列传二帙二十卷外戚传一卷孝德传一卷诚臣传一卷文苑传二卷儒林传二卷逸民传一卷数术传一卷藩臣传一卷合一帙十卷止足传一卷列女传一卷权幸传一卷羯贼传二卷逆臣传二卷叛臣传二卷叙传论述一卷合一帙十卷凡称史臣者皆先君所言下称名案者竝善心补阙别为叙论一篇托于叙传之末【仁义在北史作仁义存油素作缁素焚荡作荡尽六十八卷在作六十八卷获存已来作以求】

隋文纪卷六

明 梅鼎祚 编

何妥【字栖鳳西城人家郾县周太学博士入隋授国子博士歷国子祭酒有集十卷】受禅设坛议【周大定元年静帝禅位于隋司录虞庆则白请设坛于东第博士何妥议就南郊从之】

受禅登坛以告天也故魏受汉禅设坛于繁昌为在行旅郊坛乃阙至如汉高在泛光武在鄱尽非京邑所筑坛自晋宋揖让皆在都下莫不并就南郊更无别筑之义又后魏即位登朱雀观周帝初立受朝于路门虽自我作古皆非祖也今即府为坛恐招后诮

諫文帝八事书【高祖受禅妥除国子博士加通直散骑常侍上八事以諫时讷言苏威权兼数司妥尝奏以不可信任初威隱武功故妥言自负傅崱渭水之气以此激上威大衔之更相诋诌】

其一事曰臣闻知人则哲惟帝难之孔子曰举直错诸枉则民服举枉错诸直则民不服由此言之政之治乱必慎所举故进贤受上赏蔽贤防显戮察今之举人良异于此无论諂直莫择贤愚心欲崇高则起家喉舌之任意湏抑屈必白首郎署之官人之不服实由于此臣闻爵人于朝与士共之刑人于市与众弃之伏见留心狱讼爱人如子每应决狱无不询访羣公刑之不滥君之明也刑既如此爵亦宜然若有懋功简在帝心者便可擢用自斯以降若选重官必湏参以众议勿信一人之举则上不偏私上无怨望其二事曰孔子云是察阿党则罪无掩蔽又曰君子周而不比小人比而不周所谓比者即阿党也谓心之所爱既已光华荣显犹加提挈心之所恶既已沈滞屈辱薄言必怒提挈既成必相掩蔽则欺上之心生矣屈辱既加则有怨恨谤讟之言出矣伏愿广加逖访勿使朋党路开威恩自任有国之患莫大于此其三事曰臣闻舜举十六族所谓八元八恺也计其贤明理优今日犹复择才授任不相侵滥故得四门雍穆庶绩咸熙今官员极多用人甚少有一人身上乃兼数职为是国无人也为是不善也今万乘大国髦彦不少纵有明哲无由自达东方朔言曰尊之则为将卑之则为虏斯言信矣今当官之人不度德量力既无吕望傅説之能自负傅崱渭水之气不虑忧深责重唯畏总领不多安斯宠任轻彼权轴好致颠蹶实此之由易曰鼎折足覆公餗其形渥凶言不胜其任也臣闻穷力举重不能为用伏愿更任贤良分才参掌使各行有余力则庶事康哉其四事曰臣闻礼云析言破律乱名改作执左道以乱政者杀孔子曰仍旧贯何必改作伏见比年以来改作者多矣至如范威漏刻十载不成赵翊尺称七年方决公孙济迂诞医方费逾巨万徐道庆廻互子午靡耗饮食常明破律多歷岁时王渥乱名曾无纪极张山居未知星位前已蹂借太常曹魏祖不识北辰今复犢舛太史莫不用其短见便自夸毗邀射名誉厚相诬罔请今日以后有如此者若其言不驗必加重罚庶令有所畏忌不敢轻奏狂简【隋书云其余文多不载治乱北史作安危逖访作访察行有余力作各行其力】

考定钟律表【上令妥考定钟律妥上表别勅太常取妥节度作清平瑟三调声又作八佾鞞

铎巾拂四舞后苏威子防在太常参议钟律防独不同】

臣闻明则有礼乐幽则有鬼神然则动天地感鬼神莫近于礼乐又云乐至则无怨礼至则不争揖让而治天下者礼乐之谓也臣闻乐有二一曰奸声二曰正声夫奸声感人而逆气应之顺气成象故乐行而伦清耳目聪明血气和平移风易俗天下皆宁孔子曰放郑声远佞人故郑卫宋赵之声出内则发疾外则伤人是以官乱则荒其君骄商乱则陂其官壤角乱则忧其人怨征乱则哀其事勤羽乱则危其财匱五者皆乱则国亡无日矣魏文侯问子夏曰吾端冕而听古乐则欲寐听郑卫之音而不知倦何也子夏对曰夫古乐者始奏以文复乱以武修身及家平均天下郑卫之音者奸声以乱溺而不止獗杂子女不知父子今君所问者乐也所爱者音也夫乐之与音相近而不同为人君者谨审其好恶案圣人之作乐也非止苟悦耳目而已矣欲使在宗庙之内君臣同听之则莫不和敬在乡里之内长幼同听之则莫不和顺在闺门之内父子同听之则莫不和亲此先王立乐之方也故知声而不知音者禽兽是也知音而不知乐者众庶是也故黄钟大吕 歌干戚僮子皆能舞之能知乐者其唯君子不知声者不可与言音不知音者不可与言乐知乐则几于道矣纣为无道太师抱乐器以奔周晋君德薄师旷固惜清征上古之时未有音乐鼓腹击壤乐在其间易曰先王作乐崇德殷荐之上帝以配祖考至于黄帝作咸池颡顓作六茎帝尝作五英尧作大章舜作大韶禹作大夏汤作大濩武王作大武从夏以来年代久远唯有名字其声不可得闻自殷至周备于诗颂故自圣贤已下多习乐者至如伏羲减瑟文王足琴仲尼击磬子路鼓瑟汉高击筑元帝吹箫汉高祖之初叔孙通因奏乐人制宗庙之乐迎神于庙门奏嘉至之乐犹古降神之乐也皇帝入庙门奏永至之乐以为行步之节犹古采荠肆夏也干豆上荐奏登歌之乐犹古清庙之歌也登歌再终奏休成之乐美神飨也皇帝就东厢坐定奏永安之乐美礼成也其休成永至二曲叔孙通所制也汉高祖庙奏武德文始五行之舞当春秋时陈公子完奔齐陈是舜后故齐有韶乐孔子在齐闻韶三月不知肉味是也秦始皇灭齐得齐韶乐汉高祖灭秦韶传于汉高祖改名文始以示不相袭也五行舞者本周大武乐也始皇改曰五行及于孝文复作四时之舞以示天下安和四时顺也孝景采武德舞以为昭德孝宣又采昭德以为盛德虽变其名大抵皆因秦旧事至于魏晋皆用古乐魏之三祖并制乐辞自永嘉播越五都倾荡乐声南渡是以大备江东宋齐以来至于梁代所行乐事犹皆传古三雍四始实称大盛及侯景篡逆乐师分散其四舞三调悉度伪齐齐氏虽知传受得曲而不用之于宗庙朝廷也臣少好音律留意管 年虽耆老颇皆记忆及东土剋定乐人悉返访其逗遛果云是梁人所教今三教四舞并皆有手虽不能精熟亦颇具雅声若令教习传授庶得流传古乐然后取其会归撮其指要因循损益更制嘉名歌盛德于当今传雅正于来叶岂不美欤谨具录三调四舞曲名又制歌辞如别其有曲声流宕不可以陈于殿廷者亦悉附之于后【始皇北史作高祖】

苏防【字伯尼威之子少有盛名仕鸿胪少卿】

駁郑译七调议【开皇初柱国郑译请更正乐诏牛 何妥等议久不定复诏求知音之士参议译谓考寻乐府钟石律吕皆有宫商角征羽变宫变征之名因周武帝时 兹人苏只婆所传推演其声五均之外更立七均合成十二以应十二律律有七音音立一调旋转相交作书宣示朝廷防亦称明乐驳译七调为非译答之众从译议防又与译议欲累黍立分正定律吕

而妥雅为高祖所信耻已宿儒不逮译等欲阻壞其事乃立议非十二律旋相为宫又非其七调之议后竟用黄钟一宫不假余律】

韩诗外传所载乐声感人及月令所载五音所中并皆有五不言变宫变征又春秋左氏所云七音六律以奉五声准此而言每宫应立五调不闻更加变宫变征二调为七调七调之作所出未详

郑译【字正义荥阳开封人仕周内史上大夫封沛国公入隋进上柱国有学识兼知钟律】答七调駁

周有七音之律汉书律历志天地人及四时谓之七始黄钟为天始林钟为地始太簇为人始是为三始姑洗为春蕤宾为夏南吕为秋应钟为冬是为四时四时三始是以为七今若不以二变为调曲则是冬夏声阙四时不备是故每宫湏立七调

又与苏防议

案今乐府黄钟乃以林钟为调首失君臣之义清乐黄钟宫以小吕为变征乖相生之道今请雅乐黄钟宫以黄钟为调首清乐去小吕还用蕤宾为变征

何妥非十二律旋相为宫议

经文虽道旋相为宫恐是直言其理亦不通随月用调是以古来不取若依郑 及司马彪瀋用六十律方得和韵今译唯取黄钟之正宫兼得七始之妙义非止金石谐韵亦乃簠簋不繁可以享百神可以合万舞矣

又非七调之议

近代书记所载纓乐鼓琴吹笛之人多云三调三调之声其来久矣请存三调而已

毛爽【喜之弟仕陈山阳太守归隋】

律谱略【开皇九年平陈后诏爽及陈故太史令蔡子元等依古律吕制管实葭灰以 节气应有早晚乃遣爽等草定其法爽因稽诸故实着于篇名曰律谱其律大业末于江都沦防】

臣爽按黄帝遣伶伦氏取竹于嶰谷聽凤阿阁之下始造十二律焉乃致天地气应是则数之始也阳管为律阴管为吕其气以 四时其数以纪万物云 首作数盖律之本也夫一十百千万亿兆者引而申焉厯度量衡出其中矣故有虞氏用律和声邹衍改之以定五始正朔服色亦由斯而别也夏正则人殷正则地周正则天孔子曰吾得夏时焉谓得气数之要矣汉初兴也而张苍定律乃推五胜之法以为水德寔因战国官失其守后秦灭学其道浸微苍补綴

之未获详究及孝武创制乃置協律之官用李延年以为都尉颇解新声变曲未达音律之源故其服色不得而定也至于元帝自晓音律郎官京房亦达其妙因使韦 成等杂试问房房自叙云学焦延壽用六十律相生之法以上生下皆三生二以下生上皆三生四阳下生阴阴上生阳乃还相为宫之正法也于后刘歆典领条奏着其始末理渐研精班氏汉志尽歆所出也司马彪志并房所出也至于后汉尺度稍长魏氏杜防亦制律吕以之 气灰悉不飞晋光禄大夫荀勗得古铜管校夔所制长古四分方知不调事由其误乃依周礼更造古尺用之定管声韵始调左晋之后渐又讹谬至梁武帝时犹有汲冢玉律宋苍梧时钻为横吹然其长短厚薄大体具存臣先人栖诚学筭于祖暅问律于何承天沈研三纪颇达其妙后为太常丞典司乐职乃取玉管及宋太史尺并以闻奏诏付大匠依樣制管自斯以后律又飞灰侯景之乱臣兄喜于太乐得之后陈宣帝诣荆州为质俄遇梁元帝败喜没于周适欲上闻陈武帝立遂又以十二管衍为六十律私候气序并有征应至太建时喜为吏部尚书欲以闻奏会宣帝崩后主嗣立出喜为永嘉内史遂留家内贍诸子孙陈亡之际竟并遗失今正十二管在太乐者阳下生阴始于黄钟阴上生阳终于中吕而一岁之气毕于此矣中吕上生执始执始下生去灭终于南事六十律 毕于此矣仲冬之月律中黄钟黄钟者首于冬至阳之始也应天之数而长九寸十一月气至则黄钟之律应所以宣养六气缉和九德也自此之后并用京房律準长短宫征次日而用凡十二律各有所摄引而申之至于六十亦由八卦衍而重之以为六十四也相生者相变始黄钟之管下生林钟以阳生阴故变也相摄者相通如中吕之管摄于物应以母权子故相变者异时而各应相通者同月而继应应有早晚者非正律气乃子律相感寄母中应也

刘孝孙

駁张寔厯法【初高祖辅政道士张寔自云洞晓星相盛言禅代之征及受禅擢华州刺史使与仪同刘暉等议造新厯下诏施用孝孙与冀州秀才刘焯并称其学无师法刻食不中所駁六条于时寔方有宠暉附防之迁为太史令共短孝孙焯后寔死何妥言孝孙于高祖授大都督先是张胄 以筭术直太史与孝孙共短寔厯开皇十四年上叅问日食事杨素等奏言胄 孝孙多駭俄孝孙卒又荐胄 因言日长影短之事十七年厯成奏之暉与司厯刘宜援据古史駁胄 迭相駁难会通事舍人顏懋楚上书高祖欲神其事下诏暉等并除名】

其一云何承天不知分闰之有失而用十九年之七闰其二云寔等不解宿度之差改而冬至之日守常度其三云连珠合璧七曜湏同乃以五星别元其四云寔等唯知日气余分恰尽而为立元之法不知日月不合不成朔旦冬至其五云寔等但守立元定法不湏明有进退其六云寔等唯识转加大余二十九以为朔不解取日月合防准以为定此六事微妙厯数大纲圣贤之通术而暉未晓此寔管窥之谓也若乃駭影定气何氏所优寔等推测去之弥遠合朔顺天何氏所劣寔等依据循彼迷踪盖是失其菁华得其糠粃也

又

魏明帝时有尚书郎杨伟修景初厯乃上表立义駁难前非云加时后天食不在朔然观杨伟

之意故以食朔为真未能详之而制其法至宋元嘉中何承天着历其上表云月行不定或有迟疾合朔月食不在朔望亦非历之意也然承天本意欲立合朔之术遭皮延宗饰非致难故事不得行至后魏献帝时有龙宜弟复修延兴之历又上表云日食不在朔而习之不废据春秋书食乃天之验朔也此三人者前代善历皆有其意未正其书但历数所重唯在朔气朔为朝会之首气为生长之端朔有告飨之文气有郊迎之典故孔子命历而定朔旦冬至以为将来之范

杨素等奏

太史凡奏日食二十有五唯一晦三朔依尅而食尚不得其时又不知所起他皆无验胄 所尅前后妙衷时起分数合如符契孝孙所尅验亦过半

刘暉等駁张胄

命历序僖公五年天正壬子朔旦日至左氏传僖公五年正月辛亥朔日南至张寘历天正壬子朔冬至合命历序差传一日张胄 历天正壬子朔合命历序差传一日三日甲寅冬至差命历序二日差传三日成公十二年命历序天正辛卯朔旦日至张寘历天正辛卯朔冬至合命历序张胄 历天正辛卯朔合命历序二日壬辰冬至差命历序一日昭公二十年春秋左氏传二月己丑朔日南至準命历序庚寅朔旦日至张寘历天正庚寅朔冬至并合命历序差传一日张胄 历天正庚寅朔合命历序差传一日二日辛卯冬至差命历序一日差传二日宜案命历序及春秋左氏传并闰余尽之岁皆湏朔旦冬至若依命历序勘春秋三十七食合处至多若依左传合者至少是以知传为错今张胄 信情置闰命历序及传气朔并差又宋元嘉冬至影有七张寘历合者五差者二亦在前一日张胄 历合者三差者四在后一日元嘉十二年十一月甲寅朔十五日戊辰冬至日影长张寘历合戊辰冬至张胄 历己巳冬至差后一日十三年十一月己酉朔二十六日甲戌冬至日影长张寘历癸酉冬至差前一日张胄 历合甲戌冬至十五年十一月丁卯朔十八日甲申冬至日影长二历并合甲申冬至十六年十一月辛酉朔二十九日己丑冬至日影长张寘历合己丑冬至张胄 历庚寅冬至差后一日十七年十一月乙酉朔十日甲午冬至日影长张寘历合甲午冬至张胄 历乙未冬至差后一日十八年十一月己卯朔二十一日己亥冬至日影长张寘历合己亥冬至张胄 历庚子冬至差后一日十九年十一月癸卯朔三日乙巳冬至日影长张寘历甲辰冬至差前一日张胄 历合乙巳冬至又周从天和元年丙戌至开皇十五年乙卯合得冬夏至日影一十四张寘历合得者十差者四三差前一日一差后一日张胄 历合者五差者九八差后一日一差前一日天和二年十一月戊戌朔三日庚子冬至日影长张寘合庚子冬至张胄 历辛丑冬至差后一日三年十一月壬辰朔十四日乙巳冬至日影长张寘历合乙巳冬至张胄 历丙午冬至差后一日建德元年十一月己亥朔二十九日丁卯冬至日影长张寘历丙寅冬至差前一日张胄 历合丁卯冬至二年五月丙寅朔三日戊辰夏至日影短张寘历己巳夏至差后一日张胄 历庚午夏至差后二日三年十一月戊午朔二十日丁丑冬至日影长张寘历合丁丑冬至张胄 历戊寅冬至差后一日六年十一月庚午朔二十三日壬辰冬至日影长张寘历合壬辰冬至张胄 历癸巳冬至差后一日宣政元年十一月甲午朔五日戊戌

冬至日影长两历并合戊戌冬至开皇四年十一月己未朔十一日己巳冬至日影长张寔历合己巳冬至张胄 历庚午冬至差后一日五年十一月甲寅朔二十二日乙亥冬至日影长张寔历甲戌冬至差前一日张胄 历合庚辰冬至七年五月乙亥朔九日癸未夏至日影短张寔历壬午夏至差前一日张胄 历合癸未夏至十一月壬申朔十四日乙酉冬至日影长张寔历合乙酉冬至张胄 历丙戌冬至差后一日十一年十一月己卯朔二十八日丙午冬至日影长张寔历合丙午冬至张胄 历丁未冬至差后一日十四年十一月辛酉朔旦冬至张寔历合十一月辛酉朔旦冬至张胄 历十一月辛酉朔二日壬戌冬至差后一日建德四年四月大乙酉朔三十日甲寅月晨见东方张寔历四月大乙酉朔三十日甲寅月晨见东方张胄 历四月小乙酉朔五月大甲寅朔月晨见东方宜案影极长为冬至影极短为夏至二至自古史分可勘者二十四其二十一有影三有至日无影见行历合一十八差者六旅骑尉张胄 历合者八差者一十六二差后二日一十四差后一日又开皇四年在洛州测冬至影与京师二处进退丝毫不差周天和已来案验并在后更检得建德四年晦朔东见张胄 历五月朔日月晨见东方今十七年张寔历闰七月张胄 历闰五月又审至以定闰胄 历至既不当故知置闰必乖见行历四月五月频大张胄 历九月十月频大为胄 朔弱频大在后晨故朔日残月晨见东方宜又案开皇四年十二月十五日癸卯依历月行在鬼三度时加酉月在卯上食十五分之九亏起西北今伺 一更一筹起食东北角十五分之十至四筹还生至二更一筹复满五年六月三十日依历太阳亏日在七星六度加时在午少强上食十五分之一半强亏起西南角今伺 日乃在午后六刻上始食亏起西北角十五分之六至未后一刻还生至五刻复满六年六月十五日依历太阴亏加时酉在卯上食十五分之九半弱亏起西南当其时阴云不见月至辰巳云里见月已食三分之二亏从东北即还云合至巳午间稍生至午后云里见已复满十月三十日丁丑依历太阳亏日在斗九度时加在辰少弱上食十五分之九强亏起东北角今 所见日出山一丈辰二刻始食亏起正西食三分之二辰后二刻始生入巳时三刻上复满十年三月十六日癸卯依历月行在氏七度时加戌月在辰太半上食十五分之七半强亏起东北今 月初出卯南带半食出至辰初三分可食二分许渐生辰未已复满见行历九月十六日庚子月行在胃四度时加丑月在未半强上食十分之三半强亏起正东今伺 月以午后二刻食起正东湏臾如南至未正上食南畔五分之四渐生入申一刻半复满十二年七月十五日己未依历月行在室七度时加戌月在辰太强上食十五分之十二半弱亏起西北今伺 一更三筹起西北上食准三分之二强与历注同十三年七月十六日依历月在申半强上食十五分之半弱亏起西南十五日夜从四更 月五更一筹起东北上食半强入云不见十四年七月一日依历时加已弱上食食十五分之十二半强至未后三刻日乃食亏起西北食半许入云不见食顷暂见犹未复生因即云鄣十五年十一月十六日庚午依历月行在井十七度时加亥月在巳半上食十五分之九半强亏西北其夜一更四筹后月在辰上起食亏东南至二更三筹月在巳上食三分之二许渐生至三更一筹月在景上复满十六年十一月十六日乙丑依历月行在井十七度时加丑月在未太弱上食十五分之十二半弱亏起东南十五日夜伺 至三更一筹月在景上云里见已食十五分之三许亏起正东至丁上食既后从东南生至四更三筹月在未末复满而胄 不能尽中

顏懃楚上书【胄 改定新历言前历差一日内史通事舍人顏懃楚上言】

汉时洛下閤改颛顼历作太初历云后当差一日八百年当有圣者定之计今相去七百一十年术者举其成数圣者之谓其在今乎

文帝下诏

朕应运受图君临万防思欲兴复圣教恢 令典上顺天道下授人时搜扬海内广延术士旅骑尉张胄 理思沉敏术艺宏深怀道白首来上历法令与太史旧历并加勘审仰观 象参验璿机胄 历数与七曜符合太史所行乃多疏舛羣官博议咸以胄 为密太史令刘晖司历郭翟刘宜驍骑尉任悦往经修造致此乖谬通直散骑常侍领太史令庾季才太史丞邢防司历郭远历博士苏粲历助教传防成瑜等既是职司湏审疎密遂虚行此历无所发明论晖等情状已合科罪方共饬非护短不从正法季才等附下罔上义实难容

刘焯【字士元信都昌亭人历云骑尉迁太学博士为世通儒】

上皇太子駁正张胄 历误六事【初高祖召见胄 因言日长影短之事而哀充复上表炀帝立为皇太子因以历事付皇太子遣更研详太子征集天下历筭之士焯复增修其书名曰皇极历駁正胄 之短太子颇嘉之焯为太学博士负其精博志解胄 之印官不满意称疾罢归至仁壽四年焯言胄 历误于皇太子仍上啓被駁不用】

其一曰张胄 所上见行历日月交食星度见留虽未尽善得其大较官至五品诚无所愧但因人成事非其实录就而讨论违舛甚众其二曰胄 望晦朔违古且疎气节闰候乖天爽命时不从子半晨前别为后日日躔莫悟缓急月逡妄为两种月度之转輒遗盈缩交会之际意造气差七曜之行不循其道月星之度行无出入应黄反赤当近更远亏食乖準阴阳无法星端不协珠璧不同盈缩失伦行度愆序去极晷漏应有而无食分先后弥为烦碎测今不审考古莫通立术之疎不可纪极今随事糾駁凡五百三十六条其三曰胄 以开皇五年与李文琮于张寘历行之后本州贡举即賫所造历拟以上应其历在乡阳流布散写甚多今所见行与焯前历不异 前拟献年将六十非是忽迫仓卒始为何故至京未几即变同焯历与旧悬殊焯作于前 献于后舍己从人异同暗会且孝孙因焯胄 后附孝孙历术之文又皆是孝孙所作则元本偷窃事甚分明恐胄 推诿故依前历为駁凡七十五条并前历本俱上其四曰 为史官自奏亏食前后所上多与历违今筭其乖舛有一十三事又前与太史令刘晖等校其疎密五十四事云五十三条新计后为历应密于旧见用筭推更疎于本今糾发并前凡四十四条其五曰胄 于历未为精通然孝孙初造皆有意征天推步事必出生不是空文徒为臆断其六曰焯以开皇三年奉勅修造顾循记注自许精微秦汉以来无所与让寻圣人之迹悟曩哲之心测七曜之行得三光之度正诸气朔成一历象会通今古符允经传稽于庶类信而有征胄 所违焯法皆合胄 所阙今则尽有隐括始终谓为总备

上皇太子啓

自木铎寝声绪言成烬羣生荡析诸夏沸腾曲技云浮畴官雨絶历纪废壞千百年矣焯以庸

鄙谬荷甄擢專精艺业耽翫数象自力羣儒之下冀觀圣人之意开皇之初奉勅修撰性不谐物功不克终犹被胄 窃为已法未能尽妙協时多爽尸官乱日实防皇猷请征胄 答验其长短

上皇太子论浑天啓【仁壽四年焯造皇极厯上啓于东宫论浑天不用及即位大业三年勅诸郡测影而焯寻卒事遂寝废】

璿玑玉衡正天之器帝王钦若世传其象汉之孝武详考律厯糾落下閤鲜于妄人等共所营定逮于张衡又寻述作亦其体制不异閤等虽閤制莫存而衡造有器至吴时陆绩王蕃并要修铸绩小有异蕃乃事同宋有钱乐之魏初晁崇等摠用铜铁小大有殊规域经模不异蕃造观蔡邕月令章句郑 注考灵曜势同衡法迄今不改焯以愚管留情推测见其数制莫不违爽失之千里差若毫厘大象一乖余何可验况赤黄均度月无出入至所恒定气不别衡分刻本差轮回守故其为踈谬不可复言亦既由理不明致使异家间出盖及宣夜三說并驱平听安穹四天腾沸至当不二理唯一揆岂容天体七种殊說又影漏去极就浑可推百骸共体本非异物此真已验彼伪自彰岂朗日未暉燭火不息理有而阙诎不可悲者也昔蔡邕自朔方上书曰以八尺之仪度知天地之象古有其器而无其书常欲寢伏仪下案度成数而为立說邕以负罪朔裔书奏不许邕若蒙许亦必不能邕才不逾张衡衡本岂有遗思也则有器无书观不能悟焯今立术改正旧浑又以二至之影定去极晷漏并天地高遠星辰运周所宗有本皆有其率祛今贤之巨惑稽往哲之羣疑豁若云披朗如雾散为之错综数卷已成待得影差谨更啓送

又

周官夏至日影尺有五寸张衡郑 王蕃陆绩先儒等皆以为影千里差一寸言南戴日丁万五千里表影正同天高乃异考之算法必为不可寸差千里亦无典說明为意断事不可依今交爰之州表北无影计无万里南过戴日是千里一寸非其实差焯今說浑以道为率道里不定得差乃审既大圣之年升平之日厘改羣谬斯正其时请一水工并解算术士取河南北平地之所可量数百里南北使正审时以漏平地以绳随气至分同日度影得其差率里即可知则天地无所匿其形辰象无所逃其数超前显圣効象除疑请勿以人废言张胄 【渤海蓼人博学多通尤精术数歷拜员外散骑侍郎兼太史令】

駁刘焯稽极厯奏【胄 征授云骑尉直太史参议律厯推步精密高祖异之迁兼太史令改定新厯为焯所短焯初造皇极厯人造厯家同异名曰稽极大业元年帝下其书与胄 参校胄 互相駁难竟不施用】

焯厯有岁率月率而立定朔月有三大三小案岁率月率者平朔之章岁章月也以平朔之率而求定朔值三小者犹似减三五为十四值三大者增三五为十六也校其理实并非十五之正故张衡及何承天创有此意为难者执数以校其率率皆自败故不克成今焯为定朔则湏除其平率然后为可

袁充【字德符陈郡阳夏人寓居丹阳仕陈散骑常侍入隋历拜秘书令江都弑逆以諂佞并诛】奏日景渐长表【开皇初大议造历张胄 兼明揆测言日长之瑞有司莫能考决至开皇十九年充为太史令欲成胄 旧事复上表是时晋王广初立为太子充奏深合时宜因改元仁壽取日长之意百工并加程课皇太子率百官陈贺】

隋兴已后日景渐长开皇元年冬至之景长一丈二尺七寸二分自尔渐短至十七年冬至景一丈二尺六寸三分四年冬至在洛阳测景长一丈二尺八寸八分二年夏至景一尺四寸八分自尔渐短至十六年夏至景一尺四寸五分其十八年冬至阴云不测元年十七年十八年夏至亦阴云不测周官以土圭之法正日景日至之景尺有五寸郑 云冬至之景一丈三尺今十六年夏至之景短于旧五分十七年冬至之景短于旧三寸七分日去极近则景短而日长去极远则景长而日短行内道则去极近行外道则去极远尧典云日短星昴以正仲冬据昴星昏中则知尧时仲冬日在湏女十度以历数推之开皇以来冬至日在斗十一度与唐尧之代去极俱近谨案元命包云日月出内道璇玑得其常天帝崇灵圣王相功京房别对曰太平日行上道升平日行次道霸代日行下道伏惟大隋启运上感乾元景短日长振古稀有【元命包上传有春秋二字初作相末句振古未有之有也】上言文帝本命表【仁壽初充言上本命与阴阳律吕合者六十余条因上表奏之赏赐优崇】

皇帝载诞之初非止神光瑞气嘉祥应感至于本命行年生月生日并与天地日月阴阳律吕运转相符表里合会此诞圣之异宝历之元今与物更新改年仁壽岁月日子还共诞圣之时并同明合天地之心得仁壽之理故知洪基长竿永永无穷

冬至日长奏【仁壽四年甲子岁炀帝初即位充及太史丞高智宝奏言冬至日长仍讽齐王暕率百官表贺】

去岁冬至日景逾长今岁皇帝即位与尧受命年合昔唐尧受命四十九年到上元第一纪甲子天正十一月庚戌冬至陛下即位其年即当上元第一纪甲子天正十一月庚戌冬至正与唐尧同自放勳以来凡经八上元其间絳代未有仁壽甲子之合谨案第一纪甲子太一在一宫天目居武德阴阳历数并得符同唐尧丙辰生丙子年受命止合三五未若己丑甲子支干并当六合允一元三統之期合五纪九章之会共帝尧同其数与皇唐比其踪信所谓皇哉唐哉唐哉皇哉者矣陈嘉瑞表【炀帝初罹鴈门之厄又盗贼益起心不自安充复假托天文上表陈嘉瑞以自媚于上超拜秘书令】

臣闻皇天辅德皇天福谦七政斯齐三辰告应伏惟陛下握策图而馭黔首提万善而化八紘以百姓为心匪以一人受庆先天罔违所欲后天必奉其时是以初膺宝历正当上元之纪干之初九又与天命符会斯则圣人防契故能动合天经谨按去年已来 象星瑞毫厘无爽谨録尤异上天降祥破突厥等状七事其一去八月二十八日夜大流星如斗出王良北正落突厥营声如崩墙其二八月二十九日夜复有大流星如斗出羽林向北流正当北方依占频二夜流星坠贼所贼必败散其三九月四日夜频有两星大如斗出北斗魁向东北流依占北斗主杀伐贼必败其四岁星主福德频行京都二处分野依占国家之福其五去七月内荧惑守

羽林九月七日已退舍依占不出三日贼必败散其六去年十一月二十日夜有流星赤如火从东北向西南落贼帅卢明月营破其橐车其七十二月十五日夜通汉镇北有赤气亘北方突厥将亡之应也依勘城録河南洛阳并当甲子与乾元初九爻及上元甲子符合此是福地永无所虑旋观往政侧闻前古彼则异时间出今则一朝总萃岂非天赞有道助殲凶孽方清九夷于东殲沉五狄于北溟告成岱岳无为汾水【天命南史作本命】王劭【字君懋太原晋阳人仕齐中书舍人入周不得调隋授著作佐郎迁秘书少监】请变火表【劭为员外散骑侍郎修起居注以古有钻燧改火之义近代废絶于是上表上从之】

臣谨案周官四时变火以救时疾明火不数变时疾必兴圣人作法岂徒然也在晋时有以洛阳火度江者代代事之相续不灭火色变青昔师旷食饭云是劳薪所防晋平公使视之果然车辍今温酒及炙肉用石炭柴火竹火草火蔬荻火气味各不同以此推之新火旧火理应有异伏愿远遵先圣于五时取五木以变火用功甚少救益方大纵使百姓习从未能顿同尚食内厨及东宫诸王食厨不可不依古法【代代北史作世世柴火作木炭火】

上文帝言符命表【劭拜著作郎上表赐物五百段】

昔周保定二年岁在壬午五月五日青州黄河变清十里镜彻齐氏以为已瑞改元曰河清是月至尊以大兴公始作隋州刺史歷年二十隋果大兴臣谨案易坤灵图曰圣人受命瑞必先见于河河者最浊未能清也窃以灵贶休祥理无虚发河清启圣实属大隋午为鹑火以明火德仲夏火王亦明火德月五日五合天数地数既得受命之辰允当先见之兆开皇初邵州人杨令愬近河得青石图一紫石图一皆隱起成文有至尊名下云八方天心永州又得石图剖为两段有杨树之形黄根紫叶汝水得神 腹下有文曰天卜杨兴安邑掘地得古铁版文曰皇始天年赉杨铁券王兴同州得石 文曰天子延千年大吉臣以前之三石不异龙图何以用石石体从固义与上名符合 腹七字何以着 亦从固兼是神灵之物孔子叹河不出图洛不出书今于大隋圣世图书屡出建德六年亳州大周村有龙鬪白者胜黑者死大象元年夏荻阳汴水北有龙鬪初见白气属天自东方歷阳武而来及至白龙也长十许丈有黑龙乘云而至两相薄乍合乍离自午至申白龙升天黑龙坠地谨案龙君象也前鬪于亳州周村者盖象至尊以龙鬪之岁为亳州总管遂代周有天下后鬪于荻阳者荻字三火明火德之盛也白龙从东方来歷阳武者盖象至尊将登帝位从东第入自崇阳门也西北升天者当干位天门坤灵图曰圣人杀龙龙不可得而杀皆盛气也又曰泰姓商名官黄色长八尺六十世河龙以正月辰见白龙与五黑龙鬪白龙陵故泰人有命谨案此言皆为大隋而发也圣人杀龙者前后龙死是也姓商者皇家于五姓为商也名官者武元皇帝讳于五声为宫黄色者隋色尚黄长八尺者武元皇帝身长八尺河龙以正月辰见者泰正月卦龙见之所于京师为辰地白龙与黑龙鬪者亳州荻阳龙鬪是也胜龙所以白者杨姓纳音为商至尊又辛酉岁生位皆在西方西方色白也死龙所以黑者周色黑所以称五者周闵明武宣靖凡五帝赵陈代越当五王一时伏法亦当五数白龙陵者陵犹胜也郑 說陵当为除凡鬪能去敌曰除臣以泰人有命者泰之为言通也大也明其人道通德大有天命也干凿度曰泰表戴干郑 注曰表者人形体之彰识也干盾也泰人之表戴干臣伏见至尊有戴干之表益知泰人之表不爽毫厘坤灵图所云字字皆验纬书又称汉四百年终如其言则知六十世亦必然矣昔宗周卜世三

十今则倍之稽览图云太平时阴阳和合风雨咸同海内不偏地有阻险故风有迟疾虽太平之政犹有不能均同唯平均乃不鸣条故欲风于亳亳者陈留也谨案此言盖明至尊者为陈留公世子亳州总管遂受天命海内均同不偏不党以成太平之风化也在大统十六年武元皇帝改封陈留公是时齐国有秘记云天王陈留入并州齐王高洋为是诛陈留王彭乐其后武元皇帝果将兵入并州周武帝时望气者云亳州有天子气于是杀亳州刺史纥豆陵恭至尊代为之又陈留老子祠有枯柏世传云老子将度世云待枯柏生东南枝廻指当有圣人出吾道复行至齐枯柏从下生枝东南上指夜有三童子相与歌曰老子庙前古枯树东南状如繖圣主从此去及至尊牧亳州亲至祠树之下自是柏枝廻抱其枯枝渐指西北道教果行校考众事太平主出于亳州陈留之地皆如所言稽览图又云治道得则阴物变为阳物郑 注云葱变为韭亦是谨案自六年以来远近山石多变为玉石为阴玉为阳又左卫园中葱皆变为韭【咸同北史作会同治道作政道】

复上书【上以劬为至诚宠锡日隆】

易干凿度曰随上六拘系之乃从维之王用享于西山随者二月卦阳德施行藩决难解万物随阳而出故上六欲九五拘系之维持之明被阳化而陰随从之也易稽览图坤六月有子女任政一年传为复五月贫之从东北来立大起土邑西北地动星坠阳卫屯十一月神人从中山出赵地动北方三十日千里马数至谨案凡此易纬所言皆是大隋符命随者二月之卦明大隋以二月即皇帝位也阳德施行者明杨氏之德教施行于天下也藩决难解者明当时藩鄣皆是通决险难皆解散也万物随阳而出者明天地间万物尽随杨氏而出见也上六欲九五拘系之者五为王六为宗庙明宗庙神灵欲令登九五之位帝王拘民以礼系民以义也拘民以礼系民以义此二句亦是干凿度之言维持之者明能以纲维持正天下也被阳化而欲阴随之者明阴类被服杨氏之风化莫不随从阴谓臣下也王用享于西山者盖明至尊常以岁二月幸西山仁壽宫也凡四称随三称阳欲美隋杨丁宁之至也坤六月者坤位在未六月建未言至尊以六月生也有子女任政者言乐平公主是皇帝子女而为周后任理内政也一年传为复者复是坤之一世卦阳气初起言周宣帝崩后一年传位与杨氏也五月贫之从东北来立者贫之当为真人字之误也言周宣帝以五月崩真人革命当在此时至尊谦让而逆天意故逾年乃立昔为定州总管在京师东北本而言之故曰真人从东北来立大起土邑者大起即大兴言营大兴城邑也西北地动星坠者盖天意去周授隋故变动也阳卫者言杨氏得天卫助屯十一月神人从中山出者此卦动而大亨作故至尊以十一月被授亳州总管将从中山而出也赵地动者中山为赵地以神人将去故变动也北方三十日者盖至尊从北方将往亳州之时停留三十日也千里马者盖至尊旧所乘騊骼马也屯卦震下坎上震于马作足坎于马为美脊是故騊骼马脊有肉鞍行则先作弄四足也数至者言厯数至也河图帝通纪曰形瑞出变矩衡赤应随協灵皇河图皇叅特曰皇辟出承元讫道无为治率被遂矩戲作术开皇色握神日投辅提象不絶立皇后翼不格道终始德优劣帝任政河典出叶辅嬉烂可述谨案凡此河图所言亦是大隋符命形瑞出变矩衡者矩法也衡北斗星名所谓璿玑玉衡者也大隋受命形兆之瑞始出天象则为之变动北斗主天之法度故曰矩衡易纬伏戲矩衡神郑 注亦以为法玉衡之神与此河图矩衡义同赤应隋者言赤帝降精感应而生隋也故隋以火德为赤帝天子叶灵皇者叶合也言大隋德合上灵天皇大帝也又年号开皇与灵宝

经之开皇年相合故曰叶灵皇皇辟出者皇大也辟君也大君出盖谓至尊受命出为天子也承元讫者言承周天元终讫之运也道无为治率者治下脱一字言大道无为治定天下率从被遂矩戲作术者矩法也昔遂皇握机矩伏戲作八卦之术言大隋被服三皇之法术也遂皇机矩语见易纬开皇色者言开皇年易服色也握神日者握持羣神明炤如日也又开皇以来日渐长亦其义投辅提者言投授政事于辅佐使之提挈也象不絶者法象不废絶也立皇后翼不格者格至也此言本立太子以为皇家后嗣而其辅翼之人不能至于善也道终始德优劣者言前东宫道终而德劣今皇太子道始而德优也帝任政河典出者言皇帝亲任政事而邵州河滨得石图也叶辅嬉烂可述者叶合也嬉兴也言羣臣合心辅佐以兴政治烂然可纪述也所以于皇叅持帝通纪二篇陈大隋符命者明皇道帝德尽在隋也【治率北史作安率】

请正汉王谅罪书【炀帝嗣位谅作乱帝不忍加诛劾上书以此求媚帝依违不从】

臣闻黄帝灭炎盖云母弟周公诛管信亦天伦叔向戮叔鱼仲尼谓之遗直石碯杀石厚邱明以为大义此皆经籍明文帝王常法今陛下置此逆贼度越前圣含 寬大未有以谢天下谨案贼谅毒被生民者也是知古者同德则同姓异德则异姓故黄帝有二十五子其得姓者十有四人唯青阳夷鼓与黄帝同为姬姓谅既自絶请改其氏

人上玉文奏【时有人于黄凤泉浴得二白石颇有文理遂附致其文以为字复言有诸物象而上奏王劼复廻互其字作诗二百十八篇奏之赐帛千匹】

其大玉有日月星辰八卦五岳及二麟双凤青龙朱雀驺 武各当其方位又有五行十日十二辰之名凡二十七字又有天门地户人门鬼门闭九字又有却非及二鸟其鸟皆人面则抱朴子所谓千秋万岁也其小玉亦有五岳却非虬犀之象二玉俱有仙人玉女乘云控鹤之象别有异状诸神不可尽识盖是风伯雨师山精海若之类又有天皇大帝皇帝及四帝坐钩陈北斗三公天将军土司空老人天仓南河北河五星二十八宿凡四十五官诸字本无行伍然往往偶对于大玉则有皇帝姓名并临南面与日字正鼎足复有老人星盖明南面象日而长壽也皇后二字在西上有月形盖明象月也于次玉则皇帝名与九千字次比两杨字与万年字次比隋与吉字正并盖明长久吉庆也【姓名北史作日名】庾季才【字叔奕新野人家南郡江陵善占 象仕梁迁中书领太史江陵防归周历太史中大夫终隋通直散骑常侍撰灵台秘苑诸书】

上言受命期日【高祖为丞相季才尝劝禅代大定元年正月言于高祖从之】

今月戊戌平旦青气如楼阙见于国城之上俄而变紫逆风西行气经云天不能无云而雨皇王不能无气而立今王气已见湏即应之二月日出卯入酉居天之正位谓之二八之门日者人君之象人君正位宜用二月其月十三日甲子甲为六甲之始子为十二辰之初甲数九子数又九九为天数其日即是惊蛰阳气壮发之时昔周武王以二月甲子定天下享年八百汉高帝以二月甲午即帝位享年四百故知甲子甲午为得天数今二月甲子宜应天受命

迁都奏【高祖将迁都夜与高颎苏威二人定义季才旦奏高祖愕然曰是何神也遂发诏施行】

臣仰观 象俯察图记 兆允袭必有迁都且尧都平阳舜都冀土是知帝王居止世代不同且汉营此城经今将八百岁水皆咸卤不甚宜人愿陛下协天之心为迁徙之计

来和【字 顺京兆长安人周畿伯下大夫拜仪同入隋进位开府】

上文帝表【帝微时和言相当王有四海开皇末上表上大悦进开府厚赐之】

臣早奉龙颜自周代天和三年已来数蒙陛下顾问当时具言至尊膺图受命光宅区宇此乃天授非由人事所及臣无劳效坐致五品二十余年臣是何人敢不慙愚臣不任区区之至谨录陛下龙潜之时臣有所言一得书之秘府死无所恨昔陛下在周尝与永富公窦荣定语臣曰我闻有行声即识其人臣当时即言公眼如曙星无所不照当王有天下愿忍诛杀建德四年五月周武帝在云阳官谓臣曰诸公皆汝所识隋公相禄何如臣报武帝曰隋公止是守节人可镇一方若为将领阵无不破臣即于宫东南奏闻陛下谓臣此语不忘明年乌九轨言于武帝曰隋公非人臣帝寻以问臣臣知帝有疑臣诡报曰是节臣更无异相于时王谊梁彦光等知臣此语大象二年五月至尊从永巷东门入臣在永巷门东北面立陛下问臣曰我无灾障不臣奏陛下曰公骨法气色相应天命已有付属未几遂总百揆萧吉【字文休梁长沙王懿之孙精阴阳算术归周为仪同入隋历太府少卿加开府】上文帝征祥书【吉历拜上仪同性孤峭摈落于时见上好征祥之說遂矫其迹为悦媚焉开皇十四年上书赐物五百段】

今年岁在甲寅十一月朔旦以辛酉为冬至来年乙卯正月朔旦以庚申为元日冬至之日即在朔旦乐汁图征云天元十一月朔旦冬至圣王受享祚今圣主在位居天元之首而朔旦冬至此庆一也辛酉之日即是至尊本命辛德在丙此十一月建丙子酉德在寅正月建寅为本命与月德合而居元朔之首此庆二也庚申之日即是行年乙德在庚卯德在申来年乙卯是行年与岁合德而在元旦之朝此庆三也阴阳书云年命与岁月合德者必有福庆洪范传云岁之朝月之朝日之朝主王者经书并谓三长应之者延年福吉况乃甲寅部首十一月阳之始朔旦冬至是圣王上元正月是正阳之月岁之首月之先朔旦是岁之元月之朝日之先嘉辰之会而本命为九元之先行年为三长之首并与岁月合德所以灵宝经云角音龙精其祚日强来岁年命纳音俱角历之与经如合符契又甲寅乙卯天地合也甲寅之年以辛酉冬至来年乙卯以甲子夏至冬至阳始郊天之日即是至尊本命此庆四也夏至阴始祀地之辰即是皇后本命此庆五也至尊德并干之覆育皇后仁同地之载养所以二仪元气并会本辰

言献皇后山陵表【高祖葬独孤皇后用吉所择地吉上表其后上将亲临发殓吉复奏不纳吉告族人曰后四载太子得天下今山陵气应上又临防兆益见矣太子得政隋其亡乎】

去月十六日皇后山陵西北鸡未鸣前有黑云方圆五六百步从地属天东南又有旌旗车马

帐幕布满七八里并有人往来检校部伍甚整日出乃灭同见者十余人谨案堇书云气王与姓相生大吉今黑气当冬王与姓相生是大吉利子孙无疆之 也

复奏

至尊本命辛酉今岁斗魁及天冈临卯酉谨案阴阳书不得临防

刘炫【字光伯河间景城人周末为 州户曹从事终隋太学博士】

駁上柱国降服议【吏部尚书牛 议以为礼诸侯絶旁朞大夫降一等今之上柱国虽不同古诸侯比大夫可也官在第二品宜降旁亲一等炫駁之事遂寢】

古之仕者宗一人而已庶子不能进由是先王重适其宗子有分祿之义族人与宗子虽疎遠犹服縗三月良由受其恩也今之仕者位以才升不限适庶与古既异何降之有今之贵者多忽近亲若或降之民德之疎自此始矣

自状【炫虽徧直三省竟不得官自陈内史送诣吏部问其所能炫为状朝士七十余人保明所陈不谬除殿内将军】

周礼礼记毛诗尚书公羊左传孝经论语孔郑王何服杜等注凡十三家虽义有精粗并堪讲授周易仪礼穀梁用功差少史子文集嘉言美事咸诵于心天文律历穷覈微妙至于公私文翰未尝假手

自赞【炫射防高第除太学博士以品卑去任追诣行在所或言其无行炀帝罢之归于河间郁鬱不得志乃自为赞于时羣盜蜂起粮饷断絶冻馁死】

通人司马相如扬子云马季长郑康成等皆自叙风徽传芳来叶余岂敢仰均先达貽笑后昆徒以日迫桑榆大命将近故友飘零门徒雨散溘死朝露埋魂朔野亲故莫照其心后人不见其迹殆及余喘薄言胷臆貽及行迈传示州里使夫将来俊哲知余鄙志耳余从綰髮以来迄于白首婴孩为慈亲所恕捶楚未尝加从学为明师所矜榎楚弗之及暨乎敦叙邦族交结等夷重物轻身先人后己昔在幼弱乐叅长者爰及耆艾数接后生学则服而不厌诲则劳而不倦幽情寡适心事方违内省生平顾循终始其大幸有四其深恨有一性本愚蔽家业贫窶为父兄所饶厕縉绅之末遂得博览典诰窥涉今古小善着于邱园虚名闻于邦国其幸一也隱显人间沈浮世俗数忝徒劳之职久执城旦之书名不挂于白简事不染于丹笔立身立行慙慙实多啓手啓足庶几可免其幸二也以此庸虚屡动神眷以此卑贱每升天府齐鑣驥騄比翼鵷鸿整緼素于凤池记言动于麟阁参謁宰辅造请羣公厚礼殊恩增荣改价其幸三也昼漏方尽大耋已嗟退反初服归骸故里翫文史以怡神阅鱼鸟以散虑观省野物登临园沼缓步代车无罪为贵其幸四也仰休明之盛世慨道教之陵迟蹈先儒之逸轨伤羣言之芜秽驰骛坟典厘改僻谬修撰始毕图事适成天违人愿途不我与世路未夷学校尽废道不备于当

时业不传于身后衔恨泉壤实在兹乎其深恨一也【方违北史作多违神眷作宸眷緡作防駮作骋】

李士谦【字子约赵郡平棘人魏广平王辟为参军齐员外郎入隋不仕】

刑罚论【有识者以为得治体】

帝王制法沿革不同自可损益无为顿改今之赃重者死是酷而不惩也语曰人不畏死不可以死恐之愚谓此罪宜从月刑刖其一趾再犯者断其右腕流刑刖去右手三指又犯者下其腕小盗宜黥又犯则落其所用三指又不悛下其腕无不止也无赖之人窜之边裔职为乱阶适所以召戎矣非求治之道也博奕淫游盗之萌也禁而不止黥之则可【右腕北史作左腕误】

薛濬【字道赜河东汾阴人周纳言上士新丰令入隋歷考功侍郎】

与弟谟书

【濬渭南太守琰之子歷仕考功侍郎丁母艰起令视事毁不胜防其弟谟时为晋王府兵曹参军事在扬州濬遗之书书成而絕】

吾以不造幼丁艰酷穷游约处屢絕筆瓢晚生早孤不闻诗礼赖奉先人貽厥之训获稟母氏圣善之规负笈裹粮不憚艰遠从师就业欲罢不能砥行厉心困而弥笃服膺教义爰至长成自释耒登朝于兹二十三年矣虽官非闻达而禄喜逮亲庶保期颐得终色养何图精诚无感祸酷荐臻兄弟俱被夺情苦庐靡申哀诉是用扣心泣血實气摧魂者也既而疮巨疊深不胜荼毒啓手啓足幸及全归使夫死而有知得从先人于地下矣岂非至愿哉但念尔伶俜孤宦遠在边服顾此恨恨如何可言适已有书冀得与汝面诀忍死待汝已歷一旬汝既未来便成今古緬然永别为恨何言勉之哉勉之哉

隋文纪卷七

明 梅鼎祚 编

柳彧【字防文河东解人周司武中士转郑令入隋历员外散骑常侍为杨素所谮坐汉王事徙炖煌】

上周武帝论赏功表【武帝平齐大赏从官留京者不预彧上表并加泛级】

今太平告始信赏宜明酬勲报劳务先有本屠城破邑出自圣规斩将搴旗必由神畧若负戈擐甲征扞劬劳至于镇抚国家宿卫为重俱稟成筭非専已能留从事同功劳湏等皇太子以下实有守宗庙之功昔萧何留守茅土先于平阳穆之居中没后犹蒙优防不胜管见奉表以闻

论武将任刺史表【彧迁治书侍御史百僚敬惮表论武将任刺史多不称职平子竟免】

方今天下太平四海清谧共治百姓湏任其才昔汉光武一代明哲起自布衣备知情伪与二十八将披荆棘定天下及功成之后无所任职伏见诏书以上柱国和平子为杞州刺史其人年垂八十钟鸣漏尽前任赵州闇于职务政由群小贿赂公行百姓吁嗟歌謡满道乃云老禾不早杀余种秽良田古人有云耕当问奴织当问婢此言各有所能也平子弓马武用是其所长治民莅职非其所解至尊思治无忘寝兴如谓优老尚年自可厚赐金帛若令刺举所损殊大臣死而后已敢不竭诚【平子北史作于子一作甘子治民作临人】

劾应州刺史唐君明奏【君明居母丧娶雍州长史庾狄士文之从父妹彧劾之二人竟坐罪】

臣闻天地之位既分夫妇之礼斯着君亲之义生焉尊卑之教攸设是以孝惟行本礼实身基自国刑家率由斯道窃以爱敬之情因心至切丧纪之重人伦所先君明钻燧虽改在文无变忽劬劳之痛成燕尔之亲冒此苴糲命彼防翟不义不昵春秋载其将亡无礼无仪诗人欲其遄死士文赞务神州名位通显整齐风教四方是则弃二姓之重匹违六礼之轨仪请禁锢终身以惩风俗

諫文帝亲细务疏【彧见上勤于听受百寮奏请多有烦碎因上疏諫上览而嘉之】

臣闻自古圣帝莫过唐虞象地则天布政施化不为丛脞是谓钦明语曰天何言哉四时行焉故知人君出令诫在烦数是以舜任五臣尧咨四岳设官分职各有司存垂拱无为天下以治所谓劳于求贤逸于任使又云天子穆穆诸侯皇皇此言君臣上下体裁有别比见四海一家万机务广事无大小咸关圣听陛下留心治道无憊疲劳亦由群官惧罪不能自决取判天防闻奏过多乃至营造细小之事出给轻防之物一日之内酬答百司至乃日旰忘食夜分未寝

动以文簿忧劳圣躬伏愿思臣至言少减烦务以怡神为意以养性为懷思武王安乐之义念文王勤忧之理若其经国大事非臣下裁断者伏愿详决自余细务责成所司则圣体尽无疆之壽臣下防覆育之赐也【治道北史作政道】

请禁絕角抵戲奏【诏可】

臣闻昔者明主训民治国率履法度动由礼典非法不服非道不行道路不同男女有别防其邪僻纳诸轨度窃见京邑爰及外州每以正月望夜充街塞陌聚戲朋游鸣鼓聒天燎炬炤地人戴兽面男爲女服倡优杂技诡状异形以穉嫚为欢娱用鄙防为笑乐内外共观曾不相避高棚跨路广幕陵云絃服靚妆车马嘖噓肴醕肆陈丝竹繁防竭貲破产竞此一时尽室并孥无问贵贱男女混杂縑素不分穉行因此而生盜賊由斯而起浸以成俗寔有由来因循敝风曾无先觉非益于化实损于民请颁行天下并即禁断康哉雅颂足美盛德之形容鼓腹行歌自表无为之至乐敢有犯者请以故违勅论

判高宏德请防【彧为屯田侍郎时制三品已上门皆列防左仆射高颀子宏德封应国公申牒请防彧判不行颀闻叹伏】

仆射之子更不异居父之防禦已列门外尊有压卑之义子有避父之礼岂容外门既设内閣又施

柳庄【字思敬河东解人仕后梁太府卿入隋歷饶州刺史】

刑法奏【庄为给事黄门侍郎尚书省尝奏犯罪人依法合科而上处以大辟庄奏由是忤防】

臣闻张释之有言法者天子所与天下共也今法如是更重之是法不信于民心方今海内无事正是示信之时伏愿陛下思释之之言则天下幸甚

刘行本【沛人起家梁武陵国常侍归周歷河内太守终隋太子左庶子领大兴令以方直称】劾羗使表【于时天下大定四夷内附行本为黄门侍郎以党项羗密迓封域最为后服表高祖劾其使者上奇其志焉】

臣闻南蛮遵校尉之統西域仰都护之威比见西羗防窃狗盜不父不子无君无臣异类殊方于斯为下不悟羈縻之惠詎知含养之恩狼戾为心独乖正朔使人近至请付推科

駁加徒议【雍州别驾元肇言于上曰有一州吏受人餽钱三百文依律合杖一百然臣下车之始与其为约此吏故违请加徒一年行本駁之上赐绢百匹】

律令之行并发明诏与民约束今肇乃敢重其教命轻忽宪章欲申已言之必行忘朝廷之大

信亏法取威非人臣之礼

梁毗【字景和安定乌氏人周武藏大夫入隋历刑部尚书摄御史大夫】

劾刘昉奏【高祖受禅昉为佐命元功进位柱国中被疎遠甚不自安后遇京师饥禁酒昉使妾赁屋当垆毗以鲠正拜治书侍御史劾奏昉有诏不治】

臣闻处贵则戒之以奢持满则守之以约昉既位列群公秩高庶尹縻爵稍久厚禄已淹正当戒满归盈鉴斯止足何乃规麴蘖之润竞锥刀之末身昵酒徒家为逋蕘若不糾绳何以肃厉

劾左仆射杨素封事【毗为大理卿进位上开府见素贵宠擅权恐为国患上封事諫上不当专委素高祖大怒命有司禁止亲诣毗毗又极言乃释之自后不复專委素】

臣闻臣无有作威福臣之作威福其害乎而家凶乎而国窃见左仆射越国公素幸遇愈重权势日隆搢绅之徒属其视听忤意者严霜夏零阿防者膏雨冬澍荣枯由其唇吻废兴候其指麾所私皆非忠说所进咸是亲戚子弟布列兼州连县天下无事容息异图四海稍虞必为祸始夫奸臣擅命有渐而来王莽资之于积年桓 基之于易世而卒殄汉祀终倾晋祚季孙專鲁田氏篡齐皆载典诰非臣臆說陛下若以素为阿衡臣恐其心未必伊尹也伏愿揆鉴古今量为处置俾洪基永固率土幸甚轻犯天颜伏听斧钺【异图北史作奸图容息异图英华作自可息图基之作篡之未必伊尹作未必如伊尹】

元壽【字长壽河南洛阳人周仪同三司入隋历右光禄大夫兼左翊卫将军】

劾开府萧摩诃奏【摩诃自陈归隋妻患且死奏请子向江南收其家产御史见而不言壽奏劾上嘉纳之】

臣闻天道不言功成四序圣皇垂拱任在百司御史之官义存糾察直绳莫举宪典谁寄今月五日銮輿徙蹕亲临射苑开府仪同三司萧摩诃幸厠朝行预观盛礼奏称请遣子世畧暂往江南重收家产妻安遇患弥留有日安若长逝世畧不合此行窃以人伦之义伉俪为重资爱之道乌鸟弗亏摩诃遠念资财近忘匹好又命其子舍危懼之母为聚斂之行一言才发名教顿尽而兼殿内侍御史臣韩防之等亲所闻见竟不弹糾若知非不举事涉阿纵如不以为非岂关理识谨按仪同三司太子左庶子检校治书侍御史臣刘行本出入宫省备蒙任遇摄识宪台时月稍久庶能整肃纓冕澄清风教而在法司亏失宪体瓶罄罍耻何所逃愆臣谬膺朝寄忝居左辖无容寝嘿谨以状闻其行本防之等请付大理【防北史作征】

李譔【字士恢赵郡人齐中书舍人归周拜天官都上士终隋通州刺史】

上文帝论风俗书【开皇初礼教凋敝公卿薨亡爱妾侍婢子孙辄嫁卖之遂成风俗譔为治书侍御上书五品以上妻妾不得改醮始于此】

臣闻追遠慎終民德归厚三年无改方称为孝如闻朝臣之内有父祖亡没日月未久子孙无頼便分其妓妾嫁卖取财有一于兹实损风化妾虽防贱亲承衣履服斩三年古今通式岂容遽褫縗经强傳铅华泣辞灵几之前送付佗人之室凡在见者犹致伤心况乎人子能堪斯忍复有朝廷重臣位望通贵平生交旧情若弟兄及其亡没查同行路朝闻其死夕规其妾方便求娉以得为限无廉耻之心弃友朋之义且居家理治可移于官既不正私何能赞务【朝臣北史作大臣分作引理治作理务】

论文体书【諤又以时文体轻薄通相师効流宕忘反于是上书】

臣闻古先哲王之化民也必变其视听防其嗜欲塞其邪教之心示以淳和之路五教六行为训民之本诗书礼易为道义之门故能家复孝慈人知礼让正俗调风莫大于此其有上书献赋制诰镌铭皆以褒德序贤明勲证理苟非惩劝义不徒然降及后代风教渐落魏之三祖更尚文词忽君人之大道好雕虫之小艺下之从上有同影响竞骋文华遂成风俗江左齐梁其弥甚贵贱贤愚唯务吟咏遂复遗理存异寻虚逐防竞一韵之奇争一字之巧连篇累牍不出月露之形积案盈箱唯是风云之状世俗以此相高朝廷据兹擢士禄利之路既开爱尚之情愈笃于是闾里童昏贵游总丱未窥六甲先制五言至如羲皇舜禹之典伊传周孔之說不复关心何尝入耳以傲诞为清虚以縁情为勲绩指儒素为古拙用词赋为君子故文笔日繁其政日乱良由弃大圣之轨模构无用以为用也损本逐末流徧华壤递相师祖久而愈扇及大隋受命圣道聿兴屏出轻浮遏止华伪自非懷经抱质志道依仁不得引预搢绅叅厠纓冕开皇四年普诏天下公私文翰并宜实录其年九月泗州刺史司马防之文表华艳付所司治罪自是公卿大臣咸知正路莫不钻仰坟集弃絶华绮择先王之令典行大道于兹世如闻外州遠县仍踵敝风选吏举人未遵典则至有宗党称孝乡曲归仁学必典谟交不苟合则摈落私门不加收齿其学不稽古逐俗随时作轻薄之篇章结朋党而求誉则选充吏职举送天朝蓋由县令刺史未行风教犹挟私情不存公道臣既忝宪司职当糾察若闻风即劾恐挂网者多请勒诸司普加搜访有如此者具状送台【续作业轻浮作浮乱治罪作推罪诸司作有司】论当官矜伐奏【上以諤前后所奏颁示天下四海乡风深革其】

臣闻舜戒禹云汝惟不矜天下莫与汝争能汝惟不伐天下莫与汝争功言偃又云事君数斯辱矣朋友数斯疏矣此皆先哲之格言后王之轨辙然则人臣之道陈力济时虽勤比大禹功如师望亦不得厚自矜伐上要君父况复功无足纪勤不补过而敢自陈勲绩轻干听览世之丧道极于周代下无廉耻上使之然用人唯信其口取士不观其行矜夸自大便以干济蒙擢谦恭静退多以恬嘿见遗是以通表陈诚先论己之功状承顔敷奏亦道臣最用心自衒自媒都无慙耻之色强干横请唯以干没为能自隋受命此风顿改耕夫贩妇无不革心况乃大臣仍遵敝俗如闻刺史入京朝覲乃有自陈勾检之功誼诉堦墀之侧言辞不逊高自称誉上黜冕旒特为难恕凡如此辈具状送台明加罪黜以惩风轨

高构【字孝基北海人周许州司马入隋歷吏部尚书】

武乡女子判【构工吏事善判时为戸部侍郎冯翊武乡女子既哑又聋嫁之不售尝樵采于

野为人所犯有孕生男莫知其姓于是申省构判】

母不能言穷防理絕案风俗通姓有九种或氏于爵或氏所居此而生在武乡可以武为姓

陆知命【字仲通吳郡富春人仕陈太学博士南岳正入隋厯治书侍御史】

请使高丽表【知命以功拜仪同三司数年不得调诣朝堂上表高祖异之】

臣闻圣人当展物色刳莠匹夫奔踦或陈狂瞽伏愿輶辒旒纛览臣所謁昔轩辕驭厯既缓夙沙之诛虞舜握图犹稽有苗之伐陛下当百代之末膺千载之期四海廓清三邊底定唯高丽小豎狼顾燕垂王度含宏每懷遵养者良由恶杀好生欲谕之以德也臣请以一节宣示皇风使彼君臣面防阙下

刘子翊【彭城丛亭里人仕齐殿中将军入隋厯治书侍御史大业末为丹阳留守不从贼见害】

永宁令不解任駁【子翊为侍御史时永寧令李公孝四歲防母九歲外继其后父更别娶后妻至是亡河间刘炫以无抚育之恩议不解任子翊駁之从其议】

传云继母如母与母同也当以配父之尊居母之位齐杖之制皆如亲母又为人后者为其父母菽服菽者自以本生非殊亲之与继也父虽自处傍尊之地于子之情犹须隆其本重是以令云爲人后者爲其父母并解官申其心防父卒母嫁为父后者虽不服亦申心防其继母嫁不解官此專据嫁者生文耳将如继母在父之室则制同亲母若谓非有抚育之恩同之行路何服之有乎服既有之心防焉可独异三省令防其义甚明今言令许不解何其甚谬且后人者为其父母菽未有变隔以亲继亲继既等故知心防不殊服问云母出则为继母之党服岂不以出母族絕推而遠之继母配父引而亲之乎子思曰为伋也妻是为白也母不为伋也妻是不为白也母定知服以名重情因父亲所以圣人敦之以孝慈宏之以名义是使子以名服同之亲母继以义报等之已生如谓继母之来在子出之后制有浅深者考之经传未见其文譬出后之人所后者初亡后之者始至此复可以无抚育之恩而不服重乎昔长沙人至愍汉末爲上计诣京师既而吳魏隔絕愍于内国更娶生子昌愍死后爲东平相始知吳之母亡便情系居重不摄职事于时议者不以爲非然则继母之与前母于情无别若要以抚育始生服制王昌复何足云乎又晋镇南将军羊祜无子取弟子伊爲子祜薨伊不服重祜妻表闻伊辞曰伯生存养已伊不敢违然无父命故还本生尚书彭礼议子之出养必由父命无命而出是爲叛子于是下诏从之然则心服之制不得緣恩而生也论云礼者称情而立文仗义而设教还以此义谕彼之情称情者称如母之情仗义者仗爲子之义名义分定然后能尊父顺名崇礼笃敬苟以母养之恩始成母子则恩由彼至服自己来则慈母如母何得待父命又云继母慈母本实路人临已养已同之骨血若如斯言子不由父纵有恩育得如母乎其慈继虽在三年之下而居齐菽之上礼有伦例服以称情继母本以名服岂借恩之厚薄也至于兄弟之子犹子也私昵之心实殊礼服之制无二彼言以轻如重自以不同此谓如重之辞即同重法若

使轻重不等何得爲如律云准枉法者但准其罪以枉法论者即同真法律以 刑礼以设教准者准拟之名以者即真之称如以二字义用不殊礼律两文所防是一将此明彼足见其义取譬伐柯何遠之有又论云取子爲后者将以供承祧庙奉养已身不得使宗子归其故宅以子道事本父之后妻也然本父后妻因父而得母称若如来防本父亦可无心防乎何直父之后妻论又云礼言旧君其尊岂复君乎已去其位非复纯臣须言旧以殊之别有所重非复纯孝故言其已见之目以其父之文是名异也此又非通论何以言之其旧训殊所用亦别旧者易新之称其者因彼之辞安得以相类哉至如礼云其父析薪其子不克负荷传云卫虽小其君在焉若其父而有异其君复有异乎斯不然矣斯不然矣今炫敢违礼乖令侮圣干法使出后之子无情于本生名义之分有亏于风俗防饰非于明世彊媒蘖于礼经虽欲扬已露才不觉言之伤理

梁彦光【字修之安定乌氏人周御正大夫入隋终相州刺史卒官】

请复爲相州【彦光自岐州转相州刺史邺人多诈称其不能理化坐免歲余拜赵州彦光言于上高祖从之有政绩】

臣前待罪相州百姓呼爲戴防饬臣自分废黜无复衣冠之望不谓天恩复垂收采请复爲相州改 易调庶有以变其风俗上荅隆恩

裴政【字德表河东闻喜人仕梁平越中郎将归周历少司宪终隋襄州总管】

奏太子【政爲左庶子多所匡正时武职更番通事舍人赵元恺作辞见帐未及成太子催促太子右庶子刘荣语恺云但尔口奏不须造帐及太子以诘荣荣讳无此语付政推问未及奏状有言政欲防荣者太子召责之政奏太子亦不罪荣而称政平直】

凡推事有两一察情一据证审其曲直以定是非臣察刘荣位高任重纵令实语元恺蓋是纖介之 计理而论不须隐讳又察元恺受制于荣岂敢以无端之言妄相点累二人之情理正相似元恺引左卫率崔蒨等爲证蒨等款状悉与元恺符同察情既敌须以证定臣谓荣语元恺事必非虚

裴肃【字神封河东闻喜人周御正下大夫终隋永平郡丞】

上文帝书【仁壽中肃爲贝州长史见皇太子勇蜀王秀左仆射高颀俱废黜遣使上书上谓杨素曰裴肃忧我家事此亦至诚也】

臣闻事君之道有犯无隐愚情所懷敢不闻奏窃见高颀以天挺良才元勲佐命陛下光宠亦已优隆但鬼瞰高明世□俊异侧目求其长短者岂可胜道哉愿陛下録其大功忘其小过臣又闻之古先圣帝教而不诛陛下至慈度越前圣二庶人得罪已久宁无革心愿陛下宏君父之慈顾天性之义各封小国观其所爲若能迁善渐更增益如或不悛贬削非晚今者自新之

路永絕愧悔之心莫见岂不哀哉

戴逵【案广宏明集续高僧传逵有貽周仙城慧命禅师书尝仕梁元帝入周今据此则又入隋或亦爲宫臣也】

皇太子箴【艺文类聚】

无谓父子无间江充掘蛊无谓兄弟无携倡优起舞房彦谦【字孝冲本清河人家于齐仕齐爲齐州主簿齐亡归家入隋终临泾令】谕黄门侍郎张衡书【衡字建平河内人歷御史大夫出爲榆林太守以怨望赐死】

【衡与彦谦相善炀帝时营东都穷极侈靡衡爲督役又汉王谅構逆罹罪者多彦谦爲鄆州司马兼襄州总管见衡当涂不能匡救以书谕之衡得书叹息而不敢奏闻】

窃闻赏者所以劝善刑者所以惩恶故疏贱之人有善必赏尊贤之戚犯恶必刑未有罚则避亲赏则遗贱者也今诸州刺史受委宰牧善恶之间上達本朝懾惮宪章不敢怠慢国家祇承灵命作民父母刑赏曲直升闻于天夤畏炤临亦宜谨肃故文王云我其夙夜畏天之威以此而论虽州国有殊高下悬邈然忧民慎法其理一也至如并州衅逆须有甄明若杨谅实以诏命不通虑宗社危逼征兵聚众非爲干纪则当原其本情议其刑罚上副圣主友于之意下晓愚民疑惑之心若审知外内无虞嗣后纂統而好乱乐祸妄有觊觎则管蔡之诛当在于谅同恶相济无所逃罪梟悬孥戮国有常刑其间乃有情非协同力不自固或被拥逼沦防凶威遂使籍没流移恐爲冤滥恢恢天网岂其然乎罪疑从轻斯义安在昔叔向寘鬻狱之死晋国所嘉释之断犯蹕之刑汉文称善羊舌宁不爱弟廷尉非苟违君俱以执法无私不容轻重且圣人大寶是曰神器苟非天命不可妄得故蚩尤项借之骁勇伊尹霍光之权势李老孔丘之才智吕望孙武之兵术呉楚连盘石之据产禄承母弟之基不应歷运之兆终无帝王之位况乎蕞尔一隅蜂扇螳聚杨谅之愚鄙群小之凶慝而欲憑陵畿甸凯幸非望者哉开辟以降书契云及帝皇之迹可得而详自非积德累仁丰功厚利孰能道洽幽显义感灵祇是以古之哲王昧旦丕显履水在念御朽兢懷逮叔世骄荒曾无戒惧肆于民上骋嗜奔欲不可具载请略陈之曩者齐陈二国竝居大位自谓与天地合德日月齐明罔念忧虞不恤刑政近臣懷宠称善而隐恶史官曲笔掩瑕而録美是以民庶呼嗟终闭塞于视听公卿虞誉日敷陈于左右法网严密刑辟日多赋役烦兴老防疲苦昔郑有子产齐有晏婴楚有叔敖晋有士防凡此小国尚足名臣齐陈之强岂无良佐但以执政壅蔽懷私殉躯忘国忧家外同内忌设有正直之士才堪干时于己非宜即加摈压僥遇諂佞之輩行多秽匿于我有益遽蒙荐举以此求贤何从而至夫贤材者非尚膂力岂系文华惟须正身負戴确乎不动譬栋之处屋如骨之在身所谓栋梁骨鯁之材也齐陈不任骨鯁信近谗谀天高听卑监其淫僻故摠收神器归我大隋向使二国祇敬上 惠恤鰥寡委任方直斥遠浮华卑菲为心惻隐是务河朔强富江湖险隔各保其业民不思乱泰山之固弗可动也然而寢卧积薪晏安鸩毒遂使禾黍生庙雾露沾衣吊影抚心何嗟及矣故诗云殷之未防师克配上帝宜鉴于殷骏命不易万机之事何者不须熟虑哉伏惟皇帝望云就日仁孝夙彰锡社分珪大成规矩及摠統淮海盛德日新当璧之符遐迩僉

属纆厯甫尔寬仁已布率土苍生翹足而喜并州之乱变起仓卒职由杨諒诡惑誑误吏人非有搆怨本朝弃德从贼者也而有司将帅称其愿反非止诬防良善亦恐大点皇猷足下宿当重寄早预心膂粤自藩邸柱石见知方当书名竹帛传芳万古稷契伊吕彼独何人既属明时须存謇谔立当世之大诚作将来之宪范岂容曲顺人主以爱亏刑又使胁从之徒横貽罪譴忝蒙眷遇辄写防诫野人愚瞽不知忌讳【隋书○帝王一作帝主压北史作叶藏匿作藏厯防与玷同民并作人】

宇文恺【字安乐朔方人徙京兆杞国公忻之弟与周族别仕周御正中大夫入隋拜太子左庶子厯金紫光禄大夫】

上炀帝明堂议表【恺有巧思炀帝迁都洛阳以恺爲将作大匠制度壮丽上大悦进位开府拜工部尚书自永嘉之乱明堂废絶隋有天下将复古制议者纷然皆不能决恺博考群籍上表奏明堂议其様以木爲之下爲方堂堂有五室上爲圆观观有四门帝可其奏防辽东之役事不果行撰明堂图议二卷】

臣闻在天成象房心爲布政之宫在地成形丙午居正阳之位观云告月顺生杀之序五室九宫統人神之际金口木舌发令兆民玉瓚黄琮式严宗祀何尝不矜庄展宁尽妙思于规摹凝睟冕旒致子来于矩矱伏惟皇帝陛下提衡握契御宇乘干咸五登三复上皇之化流凶去暴丕下武之绪用百姓之异心驱一代以同域康哉康哉民无能而名矣故使天符地寶吐體飞甘造物资生澄源反朴九围清谧四表削平袭我衣冠齐其文轨茫茫上 陈珪璧之敬肃肃清庙感霜露之诚正金奏九韶六茎之乐定石梁五官三雍之礼乃卜瀍西爰谋洛食辨方面势仰稟神谋敷土濬川爲民立极兼聿遵先言表置明堂爰诏下臣占星揆日于是采崧山之秘简披汶水之灵图访通议于残亡购冬官于散逸总集众论勒成一家昔张衡浑象以三分爲一度裴秀輿地以一寸爲千里臣之此图用一分爲一尺推而演之冀轮奐有序而经构之防议者殊途或以綺井爲重屋或以圆楣爲隆栋各以臆說事不经见今録其疑难爲之通释皆出证据以相发明议曰臣恺谨案淮南子曰昔者神农之治天下也甘雨以时五谷蕃植春生夏长秋收冬藏月省时考终歲献贡以时尝谷祀于明堂明堂之制有蓋而无四方风雨不能袭燥湿不能伤迂延而入之臣恺以爲上古朴略剏立典刑尚书帝命谥曰帝者承天立五府以尊天重象赤曰文祖黄曰神斗白曰显纪黑曰 矩苍曰灵府注云唐虞之天府夏之世室殷之重屋周之明堂皆同矣尸子曰有虞氏曰总章周官考工记曰夏后氏世室堂修二七博四修一注云修南北之深也夏度以步今堂修十四步其博益以四分修之一则明堂博十七步半也臣恺按三王之世夏最爲古从质尚文理应渐就寬大何因夏室乃大殷堂相形爲论理恐不尔记云堂修二七博四修一若夏度以步则应修七步注云今堂修十四步乃是增益记文殷周二堂独无加字便是其义类例不同山东礼本辄加二七之字何得殷无加寻之文周阙增筵之义研覈其趣或是不然讐校古书并无二字此乃桑间俗儒信情加減黄图议云夏后氏益其堂之大一百四十四尺周人明堂以爲两杼间马宫之言止论堂之一面据此爲准则三代堂基并方得爲上圆之制诸书所說并云下方郑注周官独爲此义非直与古违异亦乃乖背礼文寻文求理深恐未愜尸子曰殷人阳馆考工记曰殷人重屋堂修七寻堂崇三尺四阿重屋注云其修七寻五丈六尺放夏周则其博九寻七丈二尺又曰周人明堂度九

尺之筵东西九筵南北七筵堂崇一筵五室凡室二筵礼记明堂位曰天子之庙复庙重檐郑注云复庙重屋也注玉藻云天子庙及路寝皆如明堂制礼图云于内室之上起通天之观观八十一尺得宫之数其声浊君之象也大戴礼曰明堂者古有之凡九室一室有四户八牖以茅盖上方外水曰璧雘赤缀户白缀牖堂高三尺东西九仞南北七筵其宫方三百步凡人民疾六畜疫五谷灾生于天道不顺天道不顺生于明堂不飭故有天灾则饰明堂周书曰明堂堂方百一十二尺高四尺阶博六尺三寸室居内方百尺室内方六十尺户高八尺博四尺作洛曰明堂太庙路寝咸有四阿重亢重廊孔氏注云重亢累栋重廊累屋也礼图曰秦明堂九室十二阶各有所居吕氏春秋曰有十二堂与月令同并不论尺丈臣恺案十二阶虽不与礼合一月一阶非无理思黄图曰堂方百四十四尺法坤之策也方象地屋图楣径二百一十六尺法干之防也圆象天室九宫法九州太室方六丈法阴之变数十二堂法十二月三十六户法极阴之变数七十二牖法五行所行日数八达象八风法八卦通天台径九尺法干以九覆六高八十一尺法黄钟九九之数二十八柱象二十八宿堂高三尺土阶三等法三统堂四向五色法四时五行殿门去殿七十二步法五行所行门堂长四丈取大室三之二垣高无蔽目之照牖六尺其外倍之殿垣方在水内法地阴也水四周于外象四海圆法阳也水阔二十四丈象二十四气水内径三丈应觐礼经武帝元封二年立明堂汶上无室其外畧依此制泰山通议今亡不可得而辨也元始四年八月起明堂辟雍长安城南门制度如仪一殿垣四门面八观水外周堤壤高四尺和防筑作三旬五年正月六日辛未始郊太祖高皇帝以配天二十二日丁亥宗祀孝文皇帝于明堂以配上帝及先贤百辟卿士有益者于是秩而祭之亲扶三老五更袒而割牲跪而进之因班时令宣恩泽诸侯王宗室四夷君长匈奴西国侍子悉奉贡助祭礼图曰建武三十年作明堂明堂上圆下方上圆法天下方法地十二堂法日辰九室法九州室八牖象八风八九七十二法一时之王室有二户二九十八户法土王十八日内堂正坛高三尺土阶三等胡伯始注汉官云古清庙盖以茅今盖以瓦瓦下籍茅以存古制东京赋曰乃营三宫布政颁常复庙重屋八达九房造舟清池惟水泱泱薛综注云复重廂覆谓屋平覆重栋也续汉书祭祀志云明帝永平二年祀五帝于明堂五帝坐各处其方黄帝在未皆如南郊之位光武位在青帝之南少退西面各一犊奏乐如南郊臣恺按诗云我将祀文王于明堂我将我享维牛维羊据此则备太牢之祭今云一犊恐与古殊自晋以前未有鷄尾其圆墙壁水一依本图晋起居注裴頠议曰尊祖配天其义明着庙宇之制理据未分直可为一殿以崇严祀其余杂碎一皆除之臣恺案天垂象圣人则之辟雍之星既有图状晋堂方构不合天文既阙重楼又无壁水空堂乖五室之义直殿违九阶之文非古欺天一何过甚后魏于北台城南造圆墙在壁水外门在水内迴立不与墙相连其堂上九室三三相重不依古制室间通巷违舛处多其室皆用壑累极成褊陋后魏乐志曰孝昌二年立明堂议者或言九室或言五室诏断从五室后元义执政复改爲九室遭乱不成宋起居注曰孝武帝大明五年立明堂其墙宇规范拟则太庙唯十二间以应蓍数依汉汶上图仪设五帝位太祖文皇帝对飨鼎俎簠簋一依庙礼梁武即位之后移宋时太极殿以爲明堂无室十二间礼疑议云祭用纯漆俎瓦樽文于郊质于庙止一献用清酒平陈之后臣得目观遂量步数记其尺丈犹见基内有焚烧残柱毁斫之余入地一丈俨然如旧柱下以樟木爲跗长丈余阔四尺许两两相并瓦安数重宫城处所乃在郭内虽湫隘卑陋未合规摹祖宗之灵得崇严祀周齐二代阙而不修大飨之典于焉靡托自古明堂图惟有二本一是宗周刘熙阮谿刘昌宗等作三图畧同一是后汉建武三十年作礼图有本不详撰人臣逵寻经传傍求子史研防众説总撰今图【研覈北

史作研究西面作西南瓦安作凡安○监本隋书讹缺据北史补正】

与阎毗议皇太子乘金辂奏【皇太子辂古者金𨔵宋齐以来并乘象辂宇文恺阎毗奏制曰可于是太子金辂赤质制同副车具体而小亦驾四马馭士二十人皇嫡孙金辂绿质降太子一等去盘舆重谷辕上起箱末以金𨔵旌长七刃七旒驾用四马馭士一十八人亲王金辂以赤爲质余同于皇嫡孙唯在其国及纳妃亲迎则给之常朝则乘象辂○阎毗榆林盛乐人有巧性炀帝嗣位授朝请郎毗立议辇辂车舆多所增损厯迁殿内少监领将作少监事从征高丽卒】

案宋大明六年初备五辂有司奏云秦改周辂创制金根汉魏因循其形莫改而金玉二辂雕𨔵略同造次瞻覩殆无差别若锡于东储在礼嫌重非所以崇峻陞级表示等威今皇太子宜乘象辂碧旌九叶进不斥尊退不逼下酌时防古于礼爲中观宋此义乃无副车新置五辂金玉同体至象已下即爲差降所以太子不得乘金辂欲示等威故令给象今取周礼之名依汉家之制天子五辂形𨔵并同旒及繁纓例皆十二黄屋左纁金根重轂无不悉同唯应五方色以爲殊耳若用此辂给于太子革木尽皆不可何况金象者乎既制副车驾用四马至于金辂自有等差春秋之义降下以两今天子金辂驾用六马十二旒太子金辂驾用四马降龙九旒制颇同于副车又有旌旗之别并嫡皇孙及亲王等辂并给金辂而減其雕𨔵合于古典臣谓非嫌

宇文述【字伯通代郡武川人仕周英果中大夫拜上柱国入隋厯左卫大将军加开府仪同三司】

处分房陵诸子疏【太子勇废爲房陵王昭训父云定兴除名配少府以炀帝宠任述諂述欲求官遂令述奏帝杀房陵诸子及其七弟】

房陵诸子年并成立今欲动兵征讨若将从驾则守掌爲难若留一处又恐不可进退无用请早处分

请诛斛斯政奏【政爲炀帝所委信厯迁兵部侍郎杨 感之反也政与通谋及穷治党与政奔高丽帝东征高丽执送述奏许之】

斛斯政之罪天地所不容人神所同忿若同常刑贼臣逆子何以惩肃请变常法

郎茂【字蔚之恒山新市人齐周间厯爲令入隋爲尚书左丞晋阳宫留守忤炀帝除名】劾宇文恺于仲文奏【茂拜尚书左丞工法理爲世所称时工部尚书宇文恺右翊卫大将军于仲文竞河东银窟茂奏劾之二人竞坐罪】

臣闻贵贱殊礼士农异业所以人知局分家识廉耻宇文恺位望已隆禄赐优厚防葵去织寂尔无闻求利下交曾无愧色于仲文大将宿卫近臣趋侍阶庭朝夕闻道虞芮之风抑而不慕

分铢之利知而必争何以貽范庶寮示民軌物若不糾繩將亏政教

段文振【北海期原人仕周天官都上士入隋歷左侯卫大將軍征辽卒】

上炀帝論突厥表【高祖時容納突厥居于塞內妻以公主大業初恩澤彌厚文振時爲光祿大夫以狼子野心恐爲國患乃上表】

臣聞古者遠不間近夷不乱華周宣外攘戎狄秦帝筑城萬里蓋遠圖良筭弗可忘也竊見國家容受后民資其兵食假以地利如臣愚計竊又未安何則突□之性無親而貪弱則歸投強則反噬蓋其本心也臣學非博覽不能遠見且聞晉朝劉曜梁代侯景近事之驗眾所共知以臣量之必爲國患如臣之計以時喻遣令出塞外然後明設烽候緣邊鎮防務令嚴重此乃萬歲之長防也

論征辽表【文振授左 卫大將軍出南蘇道疾篤上表】

臣以庸防幸逢聖世濫蒙獎擢榮冠倅伍而智能無取叨竊已多言念國恩用忘寢食常思効其鳴吠以報萬分而攝養乖方疾患遂篤抱此深愧永歸泉壤不勝余恨輕陳管穴竊見辽東小丑未服嚴刑遠防六師親勞萬乘但夷狄多詐深須防擬口陳降款心懷背叛詭伏多端勿得便受水潦方降不可淹遲唯愿嚴勒諸軍星馳速發水陸俱前出其不意則平壤孤城勢可防也若傾其本根余城自克如不時定脫遇秋霖深爲艱阻兵糧又竭強敵在前韎韐出后遲疑不決非上防也裴矩【字宏大河東聞喜人仕齊高平王文學入隋歷右光祿大夫炀帝被弑归宇文文化及及竇建德降唐爲民部尚書】

西域圖記序【矩遷吏部侍郎炀帝即位令掌西域諸蕃與中國交市事矩知帝方勤遠畧誘諸商胡言其國俗山川險易撰西域圖記三卷入朝奏之賜物五百段其序曰】

臣聞禹定九州導河不逾積石秦兼六國設防止及臨洮故知西胡雜种僻居遐裔禮教之所不及書典之所罕傳自漢氏興基开拓河右始稱名号者有三十六國其后分立乃五十五王仍置校尉都護以存招抚然叛服不恒屢經征戰后漢之世頻廢此官雖大宛以來畧知戶數而諸國山川未有名目至如姓氏風土服章物產全無纂錄世所弗聞復以春秋遞謝年代久遠兼并誅討互有興亡或地是故邦改從今号或人非旧類因襲昔名兼復部民交錯封疆移改戎狄音殊事難窮驗于闐之北葱嶺以東考于前史三十余國其后更相屠滅仅有十存自余淪沒掃地俱盡空有丘墟不可記識皇上膺天育物無隔華夷率土黔黎莫不慕化風行所及日入以來職貢皆通無遠不至臣既因抚納監知關市尋討書傳訪采胡人或有所疑即譯眾口依其本國服飾儀形王及庶人各顯容止即丹青模寫爲西域圖記共成三卷合四十四國仍別造地圖窮其要害從西頃以去北海之南縱橫所亘將二萬里諒由富商大賈周游經涉故諸國之事罔不徧知復有幽荒遠地卒訪難曉不可憑虛是以致闕而二漢相踵西域爲傳戶民數十即稱國王徒有名号乃乖其實今者所編皆余千戶利盡西海多產珍異其山居之屬非有國名及部落小者多亦不載發自敦煌至于西海凡爲三道各有襟帶北道從伊吾

经蒲类海铁勒部突厥可汗庭度北流河水至拂菻国達于西海其中道从高昌焉耆 茲疏勒度葱岭又经防汗苏对沙那国康国曹国何国大小安国穆国至波斯達于西海其南道从鄯善于阾朱俱波唱槃陀度葱岭又经护密吐火罗挹怛怛延漕国至北婆罗门達于西海其三道诸国亦各自有路南北交通其东女国南婆罗门国等并随其所往诸处得達故知伊吾高昌鄯善并西域之門戶也总凑敦煌是其咽喉之地以国家威德将士骁雄泛蒙汜而扬旌越昆崙而跃马易如反掌何往不至但突厥吐浑分领羗胡之国爲其拥遏故朝贡不通今并因商人密送诚款引领翘首愿爲臣妾圣情含养泽及普天服而抚之务存安辑故皇华遣使弗动兵车诸蕃既从浑厥可灭混一戎夏其在兹乎不有所记无以表威化之遠也【止及北史作止于三十六国作四十六国】

奏高丽状【矩从炀帝巡塞北幸突厥启民帐时高丽遣使通于突厥启民不敢隐引见帝矩因奏状请面诏其使语王令速朝覲帝纳焉高元不用命始建征辽之防】

高丽之地本孤竹国也周代以之封于箕子汉世分爲三郡晋氏亦統辽东今乃不臣别爲外域故先帝疾焉欲征之久矣但以杨谅不肖师出无功当陛下之时安得不事使此冠带之境仍爲蛮貊之乡乎今其使者朝于突厥亲见启民合从化必惧皇灵之遠暢慮后伏之先亡胁令入朝当可致也

衛 【字文升河南洛阳人仕周太府中大夫入隋歷刑部尚书唐师入关称病卒】祭高祖文【炀帝幸辽 留守京师拜京兆内史杨 感反逼东都 率兵援之于军中祭高祖】

刑部尚书京兆内史臣卫文升敢昭告于高祖文皇帝之灵自皇家启运三十余年武功文德渐被海外杨 感孤负圣恩躬爲虵豕蜂蚁聚犯我王畧臣二世受恩一心事主董率熊黑志梟凶逆若社稷灵长宜令丑徒冰碎如或大运去矣幸使老臣先死

褚亮【字希明杭州钱塘人仕陈爲尚书殿中侍郎陈亡归隋入唐歷宏文馆学士拜通直散骑常侍】

奏宗庙议【亮初爲炀帝东宫学士大业中授太常博士时帝将改置宗庙亮奏议】

谨按礼记天子七庙三昭三穆与太祖之庙而七郑 注曰此周制也七者太祖及文王武王之祧与亲庙四也殷则六庙契及汤与二昭二穆也夏则五庙无太祖禹与一昭二穆而已又据礼王者禘其祖之所自出而立四庙案郑 义天子唯立四亲庙并始祖而爲五周以文武爲受命之祖特立二祧是爲七庙王肃注礼记曰尊者尊統上卑者尊統下故天子七庙诸侯五庙其有殊功异德非太祖而不毁不在七庙之数案肃以爲天子七庙是百代之言又据王制天子七庙诸侯五庙大夫三庙降二爲差是则天子立四亲庙又立高祖之父高祖之祖父太祖而爲七周有文武姜嫄合爲十庙汉世诸帝之庙各立无迭毁之义至元帝时贡禹匡衡之徒始议其礼以高帝爲太祖而立四亲是爲五庙唯刘歆以爲天子七庙诸侯五庙降杀以两之义七者其正法可常数也宗不在此数内有功德则宗之不可豫设爲数也是以班固

称考论诸儒之仪刘歆博而旧矣光武即位建高庙于洛阳乃立南顿君以上四庙就祖宗而爲七至魏初高堂隆爲郑学议立亲庙四太祖武帝犹在四亲之内乃虚置太祖及二祧以待后世至景初间乃依王肃更立六庙二世祖就四亲而爲六庙晋武受禅博议宗祀自文帝以上至六世亲祖征西府君而宣帝亦序于昭穆未升太祖故祭止六世江左中兴贺循知礼至于寝庙之议皆依魏晋旧事宋武初受命爲王依诸侯立亲庙四即位之后增祠五世祖相国掾府君六世祖北平府君止于六庙建身没主升亦从昭穆犹太祖之位也降及齐梁守而勿革加宗迭毁礼无违旧臣又按姬周自太祖已下皆别立庙至于禘祫俱合食于太祖是以炎汉之初诸庙各立歳时常享亦随处而祭所用庙乐皆像功德而歌舞焉至光武乃摠立一堂而群主异室斯则新承寇乱欲从约省自此已来因循不变皇隋太祖武元皇帝仁风潜畅至泽傍通以昆彭之勲开稷契之绪高祖文皇帝睿哲 览神武应期拨乱返正逮肃迹安受命开基垂統圣嗣鸿名冠于三代寶祚传于七百当文明之运定祖宗之礼且损益不同防袭异趣时王所制可以垂法自厯代已来亲用王郑二义若寻其防归校以优劣康成止论周代非谓经通子雍总贯皇王事兼长遠今请依据古典崇建七庙受命之庙宜别立庙祧百世之后不毁之法至于銮驾亲奉申孝享于高庙有司行事竭诚敬于群主俾夫规模可则严祀易遵表有功而彰明德大复古而贵能变臣又按周人立庙亦无处置之文据冢人职而言之先王居中以昭穆爲左右阮忱所撰礼图亦从此义汉京诸庙既遠又不序禘祫今若依周制理有未安杂用汉仪事难全采谨详立别图附之【旧唐书】

韦云起【雍州万年人仕隋司农卿入唐厯行台兵部尚书爲窦轨所害】

奏炀帝疏【大业初云起爲通事谒者奏疏于是左丞郎蔚之司 别驾郎楚之并坐朋党配流余免官】

今朝廷之内多山东人而自作门户更相谈荐附下罔上共爲朋党不抑其端必倾朝政臣所以痛心扼腕不能默已谨件朋党人姓名及奸状如左

劾虞世基裴蘊奏【炀帝擢云起爲治书御史上疏大理卿郑善果奏劾云起左迁大理司直】

内史侍郎虞世基職典枢要寄任隆重御史大夫裴蘊特防殊宠维持内外今四方告变不爲奏闻贼数实多或减言少陛下既闻贼少发兵不多众寡悬殊往皆莫尅故使官军失利贼党日滋此而不绳爲害将大请付有司结正其罪

郑善果【郑州荥泽人仕隋右光禄大夫入唐厯礼刑二部尚书终江州刺史】

劾韦云起奏

云起诋訾名臣所言不实非毁朝政妄作威权

王义

上炀帝陈成败书【大业四年道州贡矮民王义眉目浓秀应对甚敏乃自宫得出入内寝帝怜爱之及末年幸维扬天下多叛帝知世祚已去顾义曰卿爲我陈成败之理义上书极言自刎死】

臣本南楚卑薄之地逢圣明爲治之时不爱此身愿从入贡臣本侏儒性尤防滯出入左右积存歲华浓被圣私皆逾素望侍从乘輿周旋台阁臣虽至鄙酷好穷经颇知善恶之本源少识兴亡之所以还往民间周知利害深防顾问方敢敷陈自陛下嗣守元符体临大器圣神独断諫谋莫从独发睿谋不容人献大兴西苑两至辽东龙舟逾于万艘宫阙徧于天下兵甲常役百万士民穷乎山谷征辽者百不存十歿葬者十未有一帑藏全虚谷粟涌贵乘輿竞往行幸无时兵人侍从常逾万人遂令四方失望天下爲墟方今有家之材存者可数子弟死于兵役老弱困于蓬蒿兵尸如岳饿莩盈郊狗彘厌人之肉鸢鱼食之余臭闻千里骨积高原膏血草野狐犬尽肥陰风无人之墟鬼哭寒草之下目断平野千里无烟万民剥落莫保朝昏父遗防子妻号故夫孤苦何多饥荒尤甚乱离方始生死孰知人主爱人一何如此陛下恒性毅然孰敢上諫或有鯁言又令赐死臣下相顾箝结自全龙逢复生安敢议奏左右近臣阿諛顺防近合帝意造作拒諫皆出此途乃逢富贵陛下恶过从何得闻方今又败辽师再幸东土社稷危于春雪干戈徧于四方生民已入涂炭官吏犹未敢言陛下自惟若何爲计陛下欲幸永嘉坐延歲月神武威严一何销铄陛下欲兴师则兵吏不顺欲行幸则侍卫莫从敌当此时如何自处陛下虽欲发愤修德特加爱民圣慈虽切救时天下不可复得大势已去时不再来巨厦之崩一木不能支洪河已决芻壤不能救臣本遠人不知忌讳事忽至此安敢不言臣今不死后必死兵敢献此书延颈待尽【海山记○迷楼记云帝日夕沉荒迷楼力亦多惫矮民王义上奏曰臣田野废民作事皆不胜人生于辽旷絶遠之域幸因入贡得备后庭扫除之役陛下特加爱遇臣常自宫以侍陛下自兹出入卧内周旋宫室方今亲信无如臣者臣由防窃览书殿中简编反覆玩味防有所得臣闻精气爲人之聪明陛下当龙潜日先帝勤俭陛下鲜亲声色日近善人陛下精实于内神清于外故日夕无寢陛下自数年声色无数盈满后宫日夕游晏自非歲节大辰何常临御前殿其余多不受朝设或引见遠人非时庆贺亦日晏坐朝曾未移刻则圣躬起入后宫夫以有限之体而投无尽之欲臣固知其竭也臣闻古者野叟独歌舞于磐石之上人询之曰子何独乐之多也叟曰吾有三乐子知之乎何也人生难遇太平世吾今不见兵革此一乐也人生难得支体完备吾身不残疾此二乐也人生难得壽吾今年八十矣此三乐也问者叹赏而去陛下享天下之富贵圣貌轩逸龙顏鳳姿而不自爱重其思虑固出于野叟之外臣蕞尔防軀难图报効罔知忌讳上逆天顏因俯伏泣涕帝乃命引起鼎按此疑是面奏】

王贞【字孝逸梁郡陈留人】

谢齐王暕启

【王镇江都爲书召贞至以客礼待之朝夕问安又索文集贞启谢王得所上集赐马四匹以

疾还乡里终于家】

属贺德仁宣教须少来所有拙文昔公旦之才艺能事鬼神夫子之文章性与天道雅志传于游夏余波鼓于屈宋雕龙之迹具在风骚而前贤后圣代相师祖赏逐时移出门分路变清音于正始体高致于元康咸言坐握蛇珠谁许独爲麟角孝逸生于战争之季长于风尘之世学无半古才不逮人往属休明寸陰已旻虽居可封之屋每懷贫贱之耻适鄢郢而迷涂入邯鄲而失步归来反覆心灰遂寒岂谓横议过实虚尘睿览枉高车以载鼙费明珠以弹雀遂得裹粮三月重高门之余地背淮千里望章台之后尘与悬黎而竝肆将骏驥而同阜终朝击缶匪黄钟之所谐日暮却行何前人之能及顾想平生触涂多感但以积年沈痼遗忘日久拙思所存才成三十三卷仰而不至方见学仙之远视而不覩始知游圣之难咫尺天人周章不暇怖甚真龙之降慙过白豕之归伏纸陈情形神悚越【隋书】

仲孝俊

隋大业七年曲阜县令陈叔毅修庙记

若夫惟道惟德或仁或义既渐散于英华遂崩沦于礼乐天生大圣是曰宣尼虽有制作之才而无帝王之位膺期命世塞厄补空述万代之典谟爲百王之师表始于汉魏爰逮周齐历代追封秉圭不絕我大隋炎灵启运翼下降生继大庭之高踪绍唐帝之遐統宪章古昔礼乐惟新偃伯修文尊儒重学以孔子三十二世孙前太子舍人吳郡主簿嗣哲封绍圣侯皇上万机在虑兆庶貽忧妙简才能委之邑宰于此周公余化惟待一变之期夫子遗风自爲百王之则礼仪旧俗余何足云用能奉天防敬先师劝孔宗修灵庙即曲阜陈明府其人也明府名叔毅字子严颍川许昌人昔尧之禅舜实厘女于有虞周室封陈亦配姬于嬀汭汉右丞相建六奇之深谋魏大司空开九品之清议明府即陈氏高祖武帝之孙高宗孝宣帝之子至如永嘉分国代歷五朝郭璞有言年终三百皇朝大統天下一家为咸阳之布衣实南国之王子于是游情庭宇削迹市朝砥砺身心揣摩道义防府兰台之秘籍雕虫刻鹄之文章莫不成诵在心借书于手金科玉条之刑法桐囚木吏之奸情一见仍知片言能折所谓江珠匿耀时亏满月之明越剑潜光每动冲星之气爰降诏书乃除曲阜县令风威遠至礼教大行政术始临奸豪屏息抑强扶弱分富卹贫部内清和民无迭苦重以德之所感霜雹无灾化之所行马牛不系鰓鱼夜放早彰溉釜之篇乳雉朝驯自入鸣琴之曲遠 厯統不任百里之才俯笑陶潜忽轻五斗之俸于是官曹无事囹圄常空接士迎賓登临游赏觀泮水而思歌寻灵光而想赋加以祇防圣道敬致明神粉壁椒涂丹楹刻桷可谓神之所至无所不爲振百代之家声作千城之称首敬镌金石之文永同天地之固其词曰

皇非常道帝实无爲时浇俗薄朴散淳离世道交丧仁义争驰书亡诗逸礼壞乐亏降生大圣再修坟史积善余德追崇不已于穆大隋明命天子新开绍圣重光阙里伊我陈君清德遠闻温温玉润苾苾兰芬渊才亮美防类超群时逢上圣以我爲令导之以德行之以政用此一心能和百姓子还名贾儿多字郑奸雄窜伏赋役平均心居俭素志守清贫鱼生入釜雀瑞来臻寝庙孔硕灵祠赫奕圆渊方井绮 画壁因颂成功遂歌美绩共 穹壤永固金石

隋大业七年辛未歲七月甲申朔二日乙酉济州秀才汝南郡主簿仲孝俊作文【阙里志】

隋文纪卷八

明 梅鼎祚 编

杨 感【素之子袭封楚国公迁礼部尚书】

与民部尚书樊子盖书

【炀帝征辽东命 感于黎阳督运于时百姓苦役天下思乱 感因移书旁郡各令发兵遣往东都告越王侗子盖等勒兵备御 感于汲郡南渡河入洛屯尚书省时众诣 感辕门请自効者日有数千 感与子盖书遂进逼都城军频北复西图關中至阌乡大败自杀】

夫建忠立义事有多途见机而作盖非一揆昔伊尹放太甲于桐宫霍光废刘贺于昌邑此竝公度内不能一二披陈高祖文皇帝诞膺天命造兹区宇在璇玑以齐七政握金镜以驭六龙无为而至化流垂拱而天下治今上纂承宝厯宜固洪基乃自絶于天殄民败德频年肆 盗贼于是滋多所在修营民力为之凋尽荒淫酒色子女必被其侵耽玩鹰犬禽兽皆离其毒朋党相扇货贿公行纳邪佞之言杜正直之口加以转输不息徭役无期士卒填沟壑骸骨蔽原野黄河之北则千里无烟江淮之间则鞠为茂草 感世荷国恩位居上将先公奉遗诏曰好子孙为我辅弼之恶子孙为我屏黜之所以上禀先防下顺民心废此淫昏更立明哲四海同心九州响应士卒用命如赴私讐民庶相趋义形公道天意人事较然可知公独守孤城势何支久愿以黔黎在念社稷为心勿拘小礼自贻伊戚谁谓国家一旦至此执笔潜 言无所具【隋书 天下治北史作天下义民并作人九州响应作九有咸应潜 作潜然】

李密【字 邃其先辽东长平人袭父爵蒲山公举兵称魏公归唐封邢国公拜光禄卿谋反诛】移郡县书【英华作檄洛州文今从旧唐书作书】

【密起兵讨破隋军东郡翟让推密为主号魏公城洛口以居复下回洛仓而据之大修营堊以逼东都仍作书移郡县记室祖君彦之辞也 君彦齐仆射孝征子为王世充所戮】

大魏永平元年四月二十七日魏公府上国公元帅府左长史邴元真大将军左司马杨德方等布告天下人伦衣冠士庶等【旧唐书及文苑英华并无首段其后名爵亦多互异附注于后】自元气肇辟厥初生人树之帝王以为司牧是以羲农轩顓之后尧舜禹汤之君靡不祗畏上 爱育黔首干干终日翼翼小心驭朽索以同危履薄冰而是惧故一物失所若纳隍而愧之一夫有罪遂下车而泣之谦德轸于责躬忧劳切于罪已普天之下率土之滨蟠木距于流沙瀚海穷于丹穴莫不鼓腹击壤凿井耕田致之升平驱之仁寿是以爱之若父母敬之若神明固能享国多年祚延长世未有暴虐临人克终天位者也隋氏徃因周末预奉缀衣狐媚而图圣宝胠篋而取神器及纘戎负辰狼虎其心始瞋明两之晖终干少阳之位先皇大渐侍疾禁中遂为梟獍便行鸩毒于是臯深于莒仆衅酷于商臣天地难容人神嗟愤加以州吁安忍閼伯日寻剑阁所以懷凶晋阳所以兴乱旬人为罄淫刑斯逞夫九族既睦唐帝阐其钦明

百世本支文王表其光大况乃隳壤磐石勦灭维城唇亡齿寒宁止虞虢欲其长久其可得乎其罪一也禽兽之行在于聚麀人伦之礼别于内外而兰陵公主逼幸告终谁谓戮首之贤翻见齐襄之耻逮于先皇嫔御竝进银环诸王子女咸贮金屋牝鸡鸣于诘旦雄雉恣其于飞袒服戏陈侯之朝穹庐同冒顿之寝爵赏之出女谒遽成公卿宣淫无复纪纲其罪二也平章百姓一日万几未晓求衣晷晷忘食是以大禹不重于尺璧光武无隔于反支体此忧勤深虑幽枉而荒湏于酒俾昼作夜式号且呼酣嗜声伎常居窟室每籍糟丘朝谒罕见其身羣臣希覩其面断决自尔不行敷奏于是停拥中山千日之饮酩酊无知襄阳三雅之杯留连讎比又广召良家充选宫掖潜为九市亲驾四驴自比商人见要逆旅殷紂之谴为小汉灵之罪更轻内外惊心遐迩失望其罪三也上栋下宇着在易爻茅茨采椽陈诸史籍圣人本意惟避风雨讎待珠玉之华宁须终锦之丽故璿室崇构商辛以之灭亡阿房崛起秦族以之倾覆而不遵古典不念前车广立池台多营宫观金铺玉户青 丹墀蔽亏日月隔阂寒暑穷生人之筋力罄天下之资财使鬼尚难为之劳人固其不可其罪四也公田所借不过十畝人力所供才止三日是以轻徭薄赋不夺农时宁积于人无藏于府而科税繁猥不知纪极猛火屡烧漏卮难满头防箕敛逆折十年之租杼轴其空日损千金之费父母不保其赤子夫妻相弃于匡床万邦则城郭空虚千室则烟火断絶西蜀王孙之室翻同原宪之贫东海糜竺之家俄成邓通之鬼其罪五也古先哲王卜征巡狩唐虞五载周则一纪本欲亲问疾苦观省方俗乃复广积薪刍多聚饗饩年年歴览处处登临从臣疲弊供顿辛苦而飘风冻雨聊窃比于前驱车辙马迹遂周行于天下秦皇之心未已周穆之意难穷宴西母以歌云浮东海以观日家苦纳秸之勤人阻来苏之望且夫天下有道守在海外夷不乱华在德非险长城之固战国所为乃是狙诈之风非闕稽古之法而乃追踪秦代版筑更兴袭其基墟延袤万里遂使尸骸蔽野血流成河积怨比于丘山号哭动于天地其罪六也辽水之东朝鲜之地禹贡以为荒服周王弃而不臣示以羈縻达其声教苟欲爱人非求拓土又彊弩末矢不能穿于鲁缟冲风余力非敢动于鸿毛石田得而无堪鸡肋食而何用而恃众怙彊穷兵黩武惟在并吞不务长策夫兵犹火也不戢将自焚遂使亿兆夷人只轮莫返夫差丧国寔为黄池之盟苻坚灭身良由寿阳之役欲捕鸣蝉于前不知黄雀于后复矢相顾鬚吊成行义夫切齿壮士扼腕其罪七也直言啓沃王臣匪躬惟木从绳若金须砺唐尧建鼓思闻献替之言夏禹悬鞬时听箴规之美而乃愎谏违卜妬贤嫉能直士正人皆由屠戮左仆射齐国公高颖上柱国宋国公贺若弼或文昌上相或细柳功臣暂吐良药之言翻加属镂之赐龙逢无罪便遭夏癸之诛王子何辜滥被商辛之戮遂令君子结舌贤人缄口指白日而为盛射苍天而敢欺不悟国之将亡不知死之将至其罪八也设官分职防在铨衡察狱问刑无闻赂鬻而钱神起论铜臭为公梁冀受黄金之蛇孟佗荐蒲萄之酒遂使彝伦攸斁政以贿成君子在野小人在位积薪居上駮汲黯之言囊钱不如伤赵台之赋其罪九也宣尼有言无信不立用命赏祖义岂食言自独夫嗣位每歲行幸南北巡狩东西征伐至如浩岬陪蹕东都守固阌乡野战鴈门解围自外征夫不可胜记既立功勲须酬官爵而志懷翻覆言亦浮诡临危则勲赏悬授克定则丝纶不行异商鞅之赉金同项王之刳印芳饵之下必有悬鱼惜其重赏求其死力走丸逆坂譬此非难凡百骁雄莫不讐忿至于匹夫蕞尔宿诺不亏既在乘輿二三其德其罪十也有一于此未或不亡况四维不张三空总萃无小无大愚夫愚妇共识殷亡咸知夏灭罄南山之竹书罪无穷决东海之波流恶难尽是以穷奇灾于上国猘防暴于中原三河纵封豕之贪四海被长蛇之毒百姓歼亡殆无遗类十分之计才一而已苍生凜凜咸忧杞国之崩赤县嗷嗷俱愁厯阳之陷且国祚将改必有常期六

百丧殷之年三十终姬之数故讖策皆云隋氏三十六年而灭此则厌德之象已彰代终之兆先见皇天无亲惟德是辅况乃揜抢竟天申繻谓之除旧岁星入井甘公以为义兴兼以朱雀门烧正阳日食狐鸣鬼哭川竭山崩竝是宗庙为墟之妖荆棘旅庭之事夏氏则灾衅非多殷人则咎征更少牵牛入汉方知大乱之期王良策马始駢兵车之防今者顺人将革先天不违大誓孟津陈盟景亳三千列国八百诸侯不谋而同辞不召而自至轰轰隐隐如霆如靄雕虎啸而谷风生应龙骧而景云起我魏公聪明神武齐圣广渊备七德而在躬包九功而挺出周太保魏国公之孙上柱国蒲山公之子家传盛德武王承季历之基地啓元勳世祖嗣元皇之业笃生白水日角之相更彰载诞丹陵天表之文斯着加以姓符图纬名協歌谣六合所以归心三灵于焉改卜文王厄于羑里赤雀方来高祖隐于阳山彤云自起兵诛不道赤伏至自长安锋鋭难当黄星出于梁宋九五龙蜚之始大人豹变之初歷试诸難大敌弥勇上柱国司徒东郡公翟让功宣締構翼亮经纶伊尹之賛成汤萧何之辅高帝上柱国总管歷城公孟让上柱国左武侯大将军单雄信上柱国右武侯大将军徐绩柱国大将军左长史邴元真絳国公裴行俨等竝运筹千里勇冠三军击剑则截蛟断鼉弯弧则啼猿落鴈韩彭绛灌成沛公之基冠贾吴冯奉萧王之业复有防轮挟辮之士拔距投石之夫冀马追风吴戈照日魏公属当期运抚兹亿兆躬擐甲胄跋涉山川栉风沐雨岂辞劳倦遂兴西伯之师将问南巢之罪百万成旅四七为名呼吸则河渭絶流叱咤则嵩华自拔以此攻城何城不克以此击阵何阵不摧譬犹决沧海而濯残苙举昆仑而压小卵鼓行而西百道俱进以四月二十一日届于东都而昏朝文武留守段达韦津皇甫无逸等昆吾恶稔蜚廉奸佞尚迷天数敢拒义师驱率丑徒众有十万自回洛仓北遂来举斧于是熊黑角逐貔虎争先因尔倒戈之心乘我破竹之势曾未旋踵瓦解冰消坑卒则长平未多积甲则熊耳为小达等助桀为虐嬰城自固梯冲乱舞徒设九拒之谋鼓角潛鸣空凭百楼之险鷲巢衛幕鱼防宋池殄灭之期匪朝伊夕然兴洛虎牢国家儲积我竝先据为日久矣又得回洛复取黎阳天下仓储尽非隋有四方赴义万里如云足食足兵无前无敌裴光祿仁基雄才上略受脤专征遐迩攸憑安危是托乃识机知变迁虞事夏袁謙擒于蓝水张须陁获在荥阳窦庆战没于睢阳郭绚授首于河北隋之亡候断可知也清河公房彦藻近秉戎律略地东南师之所临风行电击安陆汝颖随机荡定淮安齐阳俄然送款徐圆朗已平鲁郡孟海公久破齐陰于是海内英雄咸来向应封民瞻取平原之境郝孝德据黎阳之仓李士雄虎视于长平王德仁鷹扬于上党滑郡公李景考功郎中房孝基发自临渝刘兴祖起于北朔崔白驹自颍川起房猷伯以譙郡来各拥数万之兵俱期牧野之防沧溟之右函谷以东牛酒溢于军前壶浆迎于道左诸君等并衣冠世胄杞梓良材歆神灵泽之秋裂土封侯之始豹变鵠起今也其时鼙鸣 应见机而作各宜鳩率子弟共建功名耿弇之赴光武萧宗之奉高帝当以金章紫綬华盖朱轮富贵以重当年忠贞以传奕叶岂不盛哉若隋代官人同夫桀犬尚荷王莽之恩仍怀蒯瞶之祿审配死于袁氏不如张郃归曹范增困于项王未若陈平从汉魏公推以赤心当加好爵择木而处幸不自疑脱其猛虎犹与舟中敌国夙沙之民共防其主彭宠之仆自杀其君高官上赏即以相授如暗于成事守迷不返昆冈纵火玉石俱焚尔等噬脐悔将何及黄河带地明余旦旦之言皎日丽天知我勤勤之志布告天下咸使闻知【隋后畧 肇辟英华作肇改黔首作黔庶薄冰旧唐书作春冰是惧英华作为惧是以书作所以长世英华作长久纘戎书作纘承罪深作祸深天地难容人神嗟愤英华作天地之所不容神明之所嗟愤日寻一作寻戈所以兴乱作于焉起乱况乃书作况复礼作体于飞作羣飞之出作不出忘食作不食不重作不贵无隔于反支作不隔于反体误自尔书作自此

于是英华作于焉饮作酒无知作无名殷受书作殷辛璿室英华作琮室秦族以之书作二世
是以前车作前章多营英华作多为固其作固知借作彻无藏于府作不藏府库科英华作课
日损千金之费作日有万金之用万邦书作万户千室作千里断絶作防灭多聚作多备前驱
书作先驱马迹英华作马踪海外作海内固书作役袭其基墟英华作广营基趾蔽野成河作
遍野成川比于丘山书作满于山川不能穿作理无穿非敢作讵能食书作啖怙强穷兵作怙
力强兵唯在并吞不务长策英华作务在吞并不务长防将自焚作则自焚壽阳书作壽春黄
雀于后作挟弹在后髻吊作髻而成行一作连行鞞作戮妬作蠹戮作害便遭英华作遂遭城
口作钳口比盛作为盛赂鬻书作贩鬻验书作同至如英华作至于守固作固守解围作破围
征夫作征伐官爵作爵赏求其书作求人譬此作匹此莫不作谁不既在英华作况在三空总
萃书作三灵摠瘁按三空见后汉陈蕃传之计作为计凜凜一作栗栗赤县书作赤子防殷终
姬作殷防姬终数作世宗庙为墟之妖荆棘旅庭之事英华作宗庙为丘墟之状荆榛是旅庭
之事夏氏作夏后陈盟书作陈命神武英华作文武包九功而挺出作包九有而挺秀元皇英
华作皇室更书作便图纬英华作图殲于焉书作所以长安一作安平黄星出于梁宋一作黄
屋出于梁苑并非赞书作佐辅英华作奉截蛟断鼉英华作斩蛟截鼉啼猿书作吟猿照日作
照月抚兹一作拯斯书作伏兹遂兴作遂起成旅英华作军旅不克书作不陷西书作进进作
前四月作今月尚迷作久迷义师作义兵因尔作因其为小作为少助桀作助纣潜鸣作将鸣
虎牢作虎罕我并作我已又德作既得复取作又取仓储书作之仓英华作仓廩赴义英华作
起义上畧书作上将受脤專征英华作受命东征迁虞作迁殷睢阳书作淮南亡侯书作亡歿
汝颖作汝南淮安济阳作淮南济北久破齐陰作又破齐阳孟海公上有上柱国东平士雄作
士才房孝基书作房山基临榆作临渝房猷伯作方猷伯世胄英华作华胄歆神灵泽书作神
鼎灵绎今也英华作今正 应书作鼉应萧宗作萧何华盖英华作轩盖忠贞作珪璋同夫桀
犬书作同吠尧之犬禄英华作诈张郃作张洽幸不书作令不猛虎作猛兽尔等作义等带地
英华作带砺志作意天下书作海内 戮首舜女弟
唐书东郡公孟让厯城公孟畅英华让作齐郡公】

与袁子干书【子干仕隋为洛州刺史窦建德攻陷洛州为其所虏 祖君彦作】

久借英风末由披览其为卷伫梦想增劳寒势转严比当清吉久事昏朝无乃勤悴夫福善祸
淫实上天之常道兼弱攻昧乃往哲之成规自昏狂嗣位弃德崇奸疲苦生民涂炭天下是以
防骨满于原野积恶比于丘山莫不奋白旄而诛独夫仗朱旗而勦二世孤为海内豪杰共推
盟主百万义师大防河洛因苦秦之众乘厌纣之机共救苍生大造区夏振兹长策济此横流
义勇如云林合响应东穷海岱南彻江淮三分宇宙二为我有公早发风云之志独宣王佐之
才理追冠邓之名当慕韩彭之气何乃顿为残贼迷复成凶竭力昏乱之朝尽节危亡之国同
扶累卵如坐积薪静言思之可为长叹秦则杨熊李由竝从显戮晋则苟晞王浚悉见歼亡讵
若微子去殷伊生归亳擅荣宠于当年传功名于后代知公素有赤诚思来归义见机而作不
容淹久今授公上柱国东平公告身随送至宜检纳脱更迟疑必为人制王世充自守西洛前
后四度摧剪死在朝夕翹足可见薛雄比从涿郡欲赴黎阳窦建德逆往邀击只轮无返公之
羸卒其数非多北顾西瞻何所憑頼然白马之津诸军云合船车下粟舳舻相寻足食足兵如
貔如虎四面攻围千里援絶地不可入天不可登兵戈一临何处逃死吉凶二理幸自图之故

遣使指具宣德意【文苑英华】

与郇王庆书

【庆为高祖从弟河间王 之子初以祖元孙养于外家因冒姓郭累迁荥阳太守密既屯巩洛东得黎阳河南郡县莫不向应惟荥阳不下密以一城之地不足以动大兵先命行人开陈祸福于时江都凶问亦至庆得书遂降后从王世充及败归唐
文苑英华作魏征为李密檄郇王庆文隋书作书 旧唐书魏征传大业末武阳郡丞元宝藏举兵应密召征使典书记密每见其疏称善遽使召之密进説不用因拂衣去密败随密归唐】

早挹芳猷未谐披展甚为翘伫兴寝增劳寒势转严比得清吉及处危城无乃忧悴自猜狂嗣位多厯岁年剥削黔黎涂毒天下琼室瑶台之丽未极骄奢糟丘酒池之荒非为淫乱加以违忠臣之谏从妇人之言杀戮忠良科税无已是以猬毛而起豹变其文共举义旗同剪凶虐今者屯营巩洛开发太仓赈恤饥羸咸从充健吴戈电照 首箠而无穷冀马云屯 羊计而难尽是以八方竝凑万里俱来莫不期入关以亡秦争渡河而灭纣东穷海岱南泊江淮凡厥遗黎承风慕义唐公起兵晋阳军临灞防三秦父老千里犒师叶义同心共为犄角元宝藏武阳兴义即取黎阳燕赵之郊来蕪成咏惟荥阳一郡仍独守迷爰以宗盟尚疑衔璧敬陈鍼药冀愈膏肓夫微子纣之元兄亲寔为重项伯籍之季父戚乃非疎然犹去朝歌而处周背西楚而归汉岂不眷恋宗祏留连骨肉但为识宝鼎之将移知神气之先改河决不可壅树顛不可维所谓 览通人明鉴君子者矣而王之先代家住山东本姓郭氏乃非杨族止为宿与隋朝颇有勲旧遂得预沾磐石名在葭莩委敬之与汉高殊非血 吕布之于董卓良异天亲芝焚蕙叹事不同此又王之昏主心若 狼讐忿同胞有逾沈溺惟勇及谅咸罄旬师魏文之毒任城汉武之鸩河献假使宗祧是一疎不间亲况乃族类为非有何疑阻王之为臣无所献纳不能曲突徙薪除烦去惑致令四海鼎沸百姓乱麻高垒深沟自固而已藩屏之寄岂若是乎欲免大责其可得也为王计者莫若举城从义开门送款识几知变足爲美谈乃至子孙长守富贵今王世充屡被摧破偷存漏刻段逵守东都窘迫自救无聊世充朝亡彼便夕死又江都荒酣酒色流湎忘归内外崩离人神怨愤上江米船皆被抄截士卒饥馁半菽不充事切析骸义均煮弩举烽火于骊山诸侯莫至浮胶船于汉水还日未期近得朱粲啓词鋭师百万以破襄阳摠帅熊黑沿流东下尅期指日定灭江都分项籍于五侯切王莽于千段王独守孤城援絶千里糒粮之计仅有月余 卒之多才盈数百有何恃頼欲相抗拒求枯鱼于市肆即事非遥因归鴈以运粮竟知何日然城中雄杰王之腹心思杀长吏将为内应只恐祸生匕首衅起萧墙枉以七尺之形徒偿千金之购可为寒心可为酸鼻者也今貔豹百万马首欲东惟待王世充破了鼓行东迈梯冲乱舞鼓角潜鸣笑虢叔之死马悲襄阳之噍类南阳首齧封侯之事杳然东门逐猎临行之叹何晚深相爱惜裂帛裁书幸可三思自求多福【邳洛鼎峙记 猜狂隋书作昏狂黔黎作生民涂毒作涂炭同剪作戡翦并凑作同德遗黎作遗人晋阳英华作黎阳误仍独书作王独爰英华作爰误元兄作长兄亲书作族然犹作然其将移作先移颇有作先有止为作只为名在作遂在豺狼作虎狼讐忿作储忿有甚作乃逾有何疑阻作何能自保识几知变至自救无聊隋书作安若太山高枕而卧长守富贵足为美谈乃至子孙必有余庆今王世充屡被摧蹙自救无聊偷存晷漏讵能支久段逵韦津东都自固何暇图人逵便夕死英华

作彼夕死江都作东都误荒酣流湏书作荒湏流宕人神一作人情援絶书作絶援有何一作何以求作飞非遥作未遥雄杰书作豪杰内应作内啓起作发枉作空形作驱偿作悬先代北史作先世内外作骨肉】

致唐公李渊书

【密大破王世充于洛北修金墉城居之有众三十余万东至海岱南至江淮郡县遣使归密密负其强盛欲自为盟主及高祖为唐公起义密致书呼高祖为兄请合从以灭隋欲与高祖为盟津之防大略云其指以弑后主从代王时高祖方安辑京师未遑东讨乃令记室温大雅报书卑辞推獎以骄其志密得书嘉悦示其部下曰唐公见推天下不足可定矣壶闕录云唐高祖屯兵壽阳众号五十万遣仁则赍书至密作书报之】

顷者皇纲失統人神杂扰运穷阳九数终百六四海业业常怀逐鹿之心百姓嗷嗷家有占乌之望故炎帝衰则轩辕出夏癸乱而成汤起尚勤二十七位终劳五十三战大拯横流重安区域及周之季世七雄盗据汉之末叶三分鼎峙虽由天时亦由人事自大业昏凶年逾一纪牝鸡司晨飞虎择肉游畋莫返终伤五子之歌宫室奢侈宁止百金之费加以巡幸靡极役用无穷筋力尽于征伐赋税穷于箕敛夫行妻寡父出子孤沟壑如乱麻之多大陵有积尸之气兄雄图早着壮志远闻白武安之用兵张文成之用策遂能见机而作观衅而动奋臂鹄起拂衣豹变是知一绳所系宁维大树之顛阿胶欲投未止黄河之浊昔项伯乱楚微子去殷非夫明哲岂能及此与兄 流虽异根系本同俱禀鳳啄之风共承龙德之后实愿永作维城长为磐石自惟虚薄幸借时来防内英雄共推盟主銳师百万成旅上将四七成羣牛马谷量罗紈山积开巨桥之粟襁负攸归食敖仓之米人夫斯赉故能长淮之地沧海以西莫不厥筐 黄争献牛酒轰轰隐隐如霆如雷灭周者九鼎知轻亡秦者三戸云众况晋阳之城表里山川共为唇齿天下谁敌所望左提右挈戮力同心执子婴于咸阳殪商辛于牧野岂不盛哉岂不休哉愿遣步骑数千次于河内听待至日即欲防盟言时面奉光仪亲论进止东都江都消息来去具知动静今凉风已晋大火将流民略务殷惟宜动息悦防亲降玉趾侧听金声云雾既披适愿无已【按蒲山公传密答书曰使至尊今月十九日书似非此书也】

唐公李渊答李密书

顷者昆山火烈海水羣蜚赤县邱墟黔黎涂炭布衣戍卒鋤耰棘矜争霸图王狐鸣蜂起翼翼京洛彊弩围城靡靡周原僵尸满路昭王南巡泛胶舟而忘返匈奴北炽将被发于伊川輦上无虞羣下结舌大盗移国莫之敢指忽焉至此自贻伊戚七百之基穷于三世周齐以往书契以还邦国沦胥未有如斯之酷者也吾虽庸劣幸承余绪出为八使入典八屯虽云位未为高足成非践【此上下有脱误】素飧当职僊俛叨荣从容平勃之间谁云不可但顛而不扶通贤所责主忧臣辱无议徒然等袁安之流涕拯贾生之痛哭所以仗旗投袂大防义兵绥抚河朔亲和蕃塞一匡天下志在尊隋以弟见机而作一日千里鸡鸣起舞豹变先鞭啓宇当涂聿来中土兵临郟鄏将观周鼎屯营敖庾酷似汉王前遣简书屈为唇齿今辱来防莫我肯顾天生蒸民必有司牧当今为牧非子而谁老夫年余知命顾不及此欣戴大弟攀鳞附翼惟冀早

应图策以宁兆庶宗盟之长属借见容复封于唐斯荣足矣殪商辛于牧野所不忍言执子婴于咸阳非敢闻命汾晋左右尚须安辑盟津之防未暇卜期今日銮輿南幸恐同永嘉之势顾此中原鞠为茂草兴言感叹实疚于懷脱知动静迟数贻报未面虚迟用增劳軫名利之地锋谿纵横深慎垂堂勉兹鸿业【壶关录壶关录无忽焉至此至未有如此之酷者也一段旧唐书无吾虽庸劣至莫我肯顾一段今各增入锄耰棘矜录作锄耨荆棘霸作帝昭王书作主上民录作庶兆庶作庶兆】

招道士徐鸿客书

【密在洛口得唐高祖报书谓天下无可虑遂专事隋齐方士徐鸿客上经天纬地策一篇于密军旅挥霍失其本文题其封曰大众既聚恐米尽人散师老厌战难以成功劝密乘进取之机因士马之锐沿流东指直诣江东执取独夫号令天下密虽未遑远略心异其言以书招之鸿客晦迹林野莫知所之】

齐州长史至得所上奇策一篇理智优长文采密丽览而味之嘉翫无已夫天地闭贤人隐少微光处士见是以崆峒之上轩辕问于广成汾水之阳唐帝从于鬻缺是知肥遁为美齐物攸归雅节与兰桂俱芳高风共云霞竞远孤门承世胄地借余绪平生大志岂图富贵只为时逢版荡代属艰虞猷海水之羣飞悯苍生之涂炭便与二三人杰百万武旅欲受降于轶道将问罪于商郊未遇女思逢黄石讵有啓沃谋猷弼成韬铃者也仙师学究本原术苞奇政八风五星之候玉台金匱之书莫不洞晓于心若指诸掌今龙战于野鹤翔寥廓或出或处且变且更濡足援手是曰仁人除暴静乱方称君子赞我兴运今也其时师宜蹑屣担簦用虞卿之礼披榛挽辂袞袞敬之风引领瞻望拂席相待迟听邴生之谈方闻左车之説桂树山幽岁云暮矣桃花源穴想见其人冬首薄寒比如宜也想摄养有方当无劳虑庶不远千里早赴六军孤已勒彼州令以礼相送冀面非遥遣此不多及【壶关录 诂英华作谁仙师作尊师书作形鹤作鹏且变下英华有误脱援手作授首末句云冀面披述书不尽言】

房彦藻为李密与窦建德书【彦藻为魏公府左长史一作机】

公逸气纵横鹰扬河朔引兰山之骁骑驱易水之壮士跨蹠燕齐牢笼赵魏好通戎夷声振华夏昔隗嚣之居陇上非不险也项籍之据彭城非不强也然而援无所恃躬违厯数遂使楚徒獻歃于垓下秦泥不封于函谷故托身得地窦融保西河之功協契非人刘表防汉南之业魏公英雄电逝类晨风之拂北林率土星奔甚涓流之赴东海今隋主拘囚于世充身制于朱粲白旗之首已悬乌江之船未舫去月二十日总管兵马防同黎阳莫不投盖蒙轮贾勇求敌遠懷归义分讨不庭公能观火鹿台枉道垂报或以冀方犹梗愿协力齐盟南临则黄河可清北指则幽云自卷公之远度宏规高勲茂绩必将俯盼伊吕吞并韩彭自余碌碌复何足数绛灌尚警干戈未戢想军旅之事各有司存指纵之劳无疲于明镜也内怀惓歎形于翰墨情之所寄言不能适【文苑英华】

窦建德【贝州漳南人初为盗依东海公高士達累破隋军自称夏王为唐秦王所灭】 遗唐

秦王李世民书

【初越王侗授王世充相国封郑王建德亦举兵自称夏王与世充结好世充废侗自立乃絶之齐陰人孟海公据周桥城以掠河南建德自渡河击之时秦王攻世充于洛阳建德用刘斌计遣聘世充防世充亦自乞师建德渡河与世充相援水陆并进壁成臯东原筑原板渚使孔德绍为书遗秦王秦王报之进逼虎牢战败被擒斩于长安市
英华一作孔德绍为建德檄秦王文德绍为建德内史侍郎】

夏王敬问唐秦王彼朝发迹太原奄有关内郑氏光啓伊洛崇建宗社予则创基燕赵包举山东郑国何辜兴师致讨深懷固存不憚濡足方今千乘雷动万骑云屯投石防距蒙轮击剑统三燕之义勇驱六齐之雄杰制勅敌如拾遗殄高墉若摧朽郑都鞠旅誓众雪讐我师跃马砺戈克荡氛祲彼则外无救援内絶军粮将听楚歌之声方见崤陵之哭若能反郑国之侵地守秦川之旧邦更修前好不乖来请

秦王李世民报窦建德书

云雾不披山河在望企余之叹良用兴懷郑息有违齐楚交絶自远劳师旅当甚疲弊国家与彼本无仇隙彼之于我未始猜嫌往者赵魏诸藩皇风久扇恒卫之地素为我有足下首为寇乱屡来侵夺但以淮安防师责躬由已公主飘寓归宁本朝竝得保有危亡负荷大惠亲邻之好昭然着明虽则俘若王官翦同羈马既懷坦荡曾无蒂芥庶此冠蓋相望輜轩继轨引弭兵之义敦方穆之期如何言不由衷翻懷愿怨无名之举遽发危机背德之踪遂为戎首吁可怪也良深叹息王世充滔天猾夏自貽伊戚豐毒三川腥闻四国皇情軫虑哀彼黎元推轂投戈申兹吊伐走以不武奉遵朝寄自扬旌河洛结垒伊瀍拯弊除凶屡摧羣丑其余渠魁危防独保孤城重围已合自知沦败苟延朝夕之命空为銜诱之言其济恶反善雷同寇逆适所以心同霸楚若非国家膺图受箴剪暴除凶亦当并吞东夏自称西伯足下岂不屈膝稽首着在前闻歸智诡词以分谤乱渝盟背惠职此之由又世充与足下旧称和好中涂翻覆罕能结诚遣使频說匈奴欲令侵伐冀土外欺内忌惟利是图居安尚不自存处危何力之有决今粮儲罄竭帑藏空虚析骸煮弩命悬晷刻足下欲以三军之众仰哺他人千金之资坐求外费理殊画饼未见其宜足下前者殉地屠城亲至东境孟海公歷时抗御未即从顺频令告急请我师救见逼求和义所不取是以案兵辞使恩全世充又我国家不遑及远海公援絶方归执事假我风云差无负德蒙下诸州邻近东鄙以足下风牛罕及停戍靡戒农居安堵未相猜贰所以曹公兵前竝迫足下乘我无虞之城贪冒寻常之地进无投迹之所退有迷据之色谁为计者良非上筭比者漳滏防没既往不追河济倾沦成事谁咎今乃过相陵侮方深起难所以故到成臯仁承来防昨者前茅警路 骑啓行乃与足下中途相遇旌麾未列锋鏑暂交彼之士马自相腾践郊劳之仪遂爽犒师之礼未通虽则为彼祸先能无怀愧国家夷凶拨乱惟以匡时济俗不欲穷民极武专任甲兵故蓄銳停师冀闻择善可否之事幸速图之若不获命终为怨府雄夫奋其智勇猛士发其余怒诸军雾合指日风驱属橐鞬于中野纵矢鏑之余费燎原覆醢虽悔难追必欲继好息民更敦前况兵交使往迟览还音【大唐创业起居注
翦英华作前左传剪我羈马自貽伊戚豐毒三川一作自貽伊豐毒被三川必欲作必然】

萧铣

报岳州校尉董景珍书

【铣后梁宣帝曾孙宣帝本梁岳阳王萧警子至明帝时称藩于周周亡孙琮朝隋留长安降为莒公而后梁亡炀帝初铣为罗川令大业十三年景珍等同谋叛隋众欲推景珍为主景珍因推铣遣人谕意景珍大悦报书遂举兵自称梁公及僭帝号封景珍为晋王唐高祖诏赵郡王孝恭讨之景珍遣诣孝恭送款为其麾下所杀铣力屈遂降斩于都市】

我之本国昔在有隋以小事大朝贡无阙乃贪我土宇灭我宗祊我是以痛心疾首无忘雪耻今天啓公等【阙】協我心事若合符岂非上 之意也吾当紿率士庶敬从来请【旧唐书】

同前【新唐书】

我先君昔事隋职贡无废乃贪我土宇灭我宗祊我是以痛心疾首思刷厥耻今天诱乃 公等降心将大复梁绪徼福于先帝吾敢不糾厉士众以从公哉

李靖【本名药师雍州三原人仕隋马邑郡丞入唐历尚书右仆射封卫国公】

献西岳书

布衣李靖不揆狂简献书西岳大王阁下靖闻上清下浊爰分天地之仪昼明夜昏乃着人神之道又闻聪明正直依人而行至诚感神信不虚矣伏惟大王嵯峨擅德肃爽凝威为灵术制百神配位名雄四岳是以歷像清庙作镇金方遐规歷代哲王莫不顺时禋祀兴云致雨天实肯从转孽为祥何有不頼呜呼靖者一丈夫尔何得进不偶用退不获安呼吸若穷池之鱼进退似失林之鸟忧伤之心不能自己社稷凌迟宇宙倾覆奸雄竞逐郡县土崩遂欲建横行云飞电扫斩鲸鲵而清海岳卷氛祲以辟山河使万姓昭苏庶物昌运即应天顺时之作也又大宝不可以妄据欲杖剑竭节未有飞龙在天捧忠义之心身济世志吐肝胆于阶下惟神鉴之愿告退之机遂得平生之志有赛德之时终陈击鼓若三问不对亦何神之有灵然后即靖斩大王头焚其庙建纵横之畧亦未晚也惟神裁之【杨东里防曰右李卫公真迹盖厌隋乱已极负济世之志奋欲有为而咨之神明之辞也士重乎立志养气衛公此书志已先定而气盖宇内矣是以卒能辅明主而建功业焉其书亦佳石刻在庙西 鼎按唐刘餗隋唐嘉话衛公始困贫贱因过华山庙诉于神且请告以位防所至辞色抗厉观者异之伫立良久乃去出庙门百许步闻后大声曰李仆射好去顾不见人后竟端揆据此亦不言有书也此书词指肤慙恐好事者援嘉话为之耳】

陈子良

隋新城郡东曹掾萧平仲诔

萧平仲字某兰陵人也梁文皇帝之 孙鄱阳王之曾孙也鄱阳嗣王之孙定襄侯之第五子也派清澜于天潢分乔枝于若木君降生昴宿挺质珪璋孝友温恭仁慈亮直其形曲而雅其神俊而明耽思羣书研精众艺尽人间之能事极天下之奇才淮江贵游独称领袖故可以坐覲羔鴈俯拾朱紫至如南山为志不能北面事人诗书自娱耻与绛灌等列泊有陈失驭西迁于随而兄弟十人白晳斯在棠棣之咏事等姜肱君子义之高其行也属皇朝有道咸序搢绅乃拜吏部员外郎东宫学士冀州司法参军礼部员外郎新城郡东曹掾从班列也君莅政能官咸熙庶绩所在遗爱置言成范至如纓纓之士草莱之客莫不聆嘉声而云萃浪德音而风趋李膺曩号楷模王商昔称贤智方之蔑如也适应入践常伯超补台司如何灵祇歼我明哲春秋五十有五大业九年二月十五日卒于新城郡之官舍呜呼哀哉余与夫子颇有亲连少敦莫逆既同羈旅弥笃绸缪非无陆机之书尚有钟仪之操谁谓吉士奄逐隙驹嗟乎盛年何时促之如此也呜呼哀哉昔之弦絶轸叹闻笛伤心余虽谢古人宁不凄恻是知身没名存实由著述况复故人景行何能泯之敢以闻见乃作诔曰

呜呼哀哉粤若高祖大造惟梁德侔五帝道冠百王赤睂作梗黄屋云亡有嫪之俊应运遐思君之显考耻为委质在行既高居宾坦逸笃生夫子如披云日仪形信典声名本寔机神电举雅调风生还同照乘有类连城学逾班固才冠刘桢金汤失险天厌有陈幸逢隋德预沐尧民青盖西度紫气东沦依依去楚凄凄入秦梁亳之郊忽倾风树结庐狎鸟穿池憑雾兄弟十人义声咸布爰降纶纓特预铨衡龙楼振藻司寇驰名俄居郎署升朝擅美含香趋奏事礼承祀抑抑威仪彬彬文史涪水既临郾城是面视民如伤事心惟战周震善政潘岳能官企彼前哲顾已非难余之室人君之从妹加以笃款颇蒙提诲铭之在心没齿唯佩契濶关陇连翩冀代余任主簿眉山之川亟防琴台兼遇名贤花朝月夜置酒题篇近之新城暂申累日谓君积善永保元吉不言别后忽婴斯疾如何清辉奄辞兰室呜呼哀哉承讳惊惶闻丧恻泣前悲未尽后哀仍集白马不追素车安及悲人世兮太促叹死生兮异路 壤防兮难穷黄泉寂兮易暮客位空而聚尘书台掩而生蠹嗟古人兮神交念往昔兮虚通泪有竭兮心尚感声有止而哀无穷宿草衰兮凝秋露白杨惨兮生悲风痛游魂兮安在徒酹酒兮招空呜呼哀哉【文苑英华】

陈叔達【字子聰陈宣帝第十六子封义阳王归隋为绛郡通守归唐终礼部尚书】少帝册唐王九锡文【旧唐书叔達为唐高祖丞相主簿与温大雅掌机密禅代文诰多其所为】

于戏维尔假黄钺使持节大都督内外诸军事录尚书大丞相新除相国总百揆唐王夫乾道贞观四象所以运行坤德 万有冯其载育是以天地交泰资始由乎圣人陰阳顺成总已归其元辅故能陶甄品物代彼天工息四海之羣飞回三灵之掩耀百揆时序五典克从虽伊尹格于皇天周公光于四表方斯蔑如也今将授王典册其敬听朕命上天不造降祸于我国家高祖弃盛业而升龙太上释宝图以委御王室如燬丧乱 多数属道消时钟代季郊庙絶主有若綴旒则我祖宗之业已坠于地矣王应休明之运从兆人之欲奉七玺于代邸飞六轡于周京此乃纲我絶维有大造于皇家者也曩者塞表省方羣胡反噬矢流君侧围甚平城沦

防指期阡危莫恤王释位同谋总伐千里晨炊蓐食倍道兼行匈奴远迹乘輿反正此则王之功也
历山飞称兵燕赵妄假名号河朔响应山西屯结王首啓戎行大殲丑类此又王之功也
夷狄贪婪属犯關塞驱迫良善杀畧吏人王鞠旅理兵卷甲长驾追奔逐北扫地无遗此又王之功也
王威徒党潜谋逆乱外交边裔内骋奸回实繁有徒倾覆宗社王収戮凶渠罪人斯得此又王之功也
四郊多垒三辅倒悬黄巾示宫阙之名赤睂为园陵之祸防荒仍歲荆棘旅庭王投袂义举星言电迈取霍邑如摧枯举秦關如反掌克清河渭志存匡复此又王之功也
北荒獯鬻事借羈縻比者中原多故龙堆道絕王式遏有方歛關请吏更敦邻睦复我旧藩此又王之功也
汾晋地险逋逃攸聚山藏川量负罪稽诛类马腾之乞活同严尤之尽赦王怀柔伏叛杖信示威交臂屈膝申其向化此又王之功也
河潼转漕密迕關畿京坻委积由来尚矣羣防据窃一鼓而崩此又王之功也
京师危迫奸臣放命异一相之居内同四防之扇祸王大誓师旅兴言感慨荡清上国拯厥弊旒暴市焚尸并梟元恶此又王之功也
上天貽爱莫甚乎人爰祚圣哲弼予冲幼官守司存社稷有奉济方割于下垫烁员光于上防此又王之功也
唐弼防豎草窃岐阳吞噬旧邦侵逼都鄙王制以銜策观其携二亲离众叛我尽収之此又王之功也
华阳黑水控接岷嶓山川阻深尽为逋薮义风所靡化行江汉此又王之功也
薛举崇奸同恶相济僭拟輿服滔天泯夏西土游魂秦山肆毒赫斯授律咸俘丑类岐陇齐筑京观汧渭为之不流此又王之功也
三蜀奥区一都之防夷民纷杂蛮貊荒梗王发一介之使降咫尺之书而灵關洞开劔阁无隘此又王之功也
农甸服襟带河陝鞠为寇塲连城阻乱长策远振不征而服此又王之功也
王有济天下之勲重之以明德爰初发迹肇自鸿阶峻极比于嵩华清澜运于防渤体兹将圣道被如仁在物不失其宜含灵咸安其所春生夏长信及四时地平天成兼得一【阙】
总万机之务因百姓之心保乂我皇家 济乎多难者也是以济济多士庶政缉熙穆穆四时要荒式序激清风以厉俗畅和气以调时神功侔于造化积德高于垂象朕又闻之先王之宰物也尊贤尚德茂赏酬庸五侯专征九命作伯周襄光锡桓文是膺大啓南阳以表东海况乃道冠伊稷功高晋郑酬勲蔑尔朕甚惧焉
今晋授相国以河内汲郡清河武安魏郡信都高阳平原赵郡襄国通前三十郡增封唐国锡兹黑土苴以白茅爰定尔邦用建冢社昔周召分陝咸为保傅毛毕诸侯入作卿士内外之任礼实攸宜
今授相国印绶唐王玺绂茅土金兽符第一至第五竹使符第一至第十相国礼絶羣后任总所司朝班彝数宜以事革其以相国总百揆去录尚书之号上所假黄钺内外都督丞相印绶又加王九锡其敬听后命以王绳纪礼度哀矜折狱罔不用情无或迁志是用锡王大辂戎辂各一 牡二駟以王分地敦本人天是頼疏爵务农所宝惟谷是用锡王衮冕之服赤舄副焉以王风雅所被獯戎咸格陰阳顺理遐迩宅心是用锡王轩悬之乐六佾之舞以王翼宣皇道义声遐畅三才所运四海攸归是用锡王朱戸以居以王登贤命秩哀德升朝思帝所难能官流咏是用锡王纳陛以登以王正色持衡谕范御下式遏奸宄荡清华夏是用锡王武贲之士三百人以王威同夏日志厉秋霜刑措有期寬而不漏是用锡王鈇钺各一彤矢百旅弓十旅矢千以王露霜履踐禋祀恭严天地幽通孝思至感是用锡王钁鬯一卣珪瓚副焉唐国宜置丞相以下一遵旧式往钦哉祇奉大礼用膺多福以光我高祖之休命可不慎欤

王度

古镜记

隋汾陰侯生天下奇士也王度常以师礼事之临终贈度以古镜曰持此则百邪远人度受而宝之镜横径八寸 作騏驎蹲伏之象绕 列四方 龙鳳虎依方陈布四方外又设八卦卦外置十二辰位而具畜马辰畜之外又置二十四字周绕轮郭文体似 防画无缺而非字书所有也侯生云二十四气之象形承日炤之则背上文画墨入影内纤毫无失举而扣之清音徐引竟日方絕嗟乎此则非凡镜所得同也宜其见赏高贤是称灵物侯生常云昔者吾闻黄帝铸十五镜其第一横径一尺五寸法满月之数也以其相差各校一寸此第八镜也虽歲祀攸远图书寂寞而高人所述不可诬矣昔杨氏纳环累代延庆张公丧剑其身亦终今度遭世扰攘居常鬱快王室如燬生涯何地宝镜复去哀哉今具其异迹列之如后庶千載之下傥有得者知其所由耳大业七年五月度自侍御史罢归河东适遇侯生卒而得此镜至其年六月度归长安至长乐坡宿于主人程雄家雄新受寄一婢颇甚端丽名曰鸚鵡度既稅駕將白云不敢住度因召主人问其故雄云两月前有一客攜此婢从东来时婢病甚客便寄留云还日当取比不复来不知其婢由也度疑其精魅引镜逼之便云乞命即变形度即掩镜曰汝先自叙然后变形当舍汝命婢再拜自陈云某是华山府君庙前长松下千歲老狸大行变惑罪合至死遂为府君捕逐逃于河渭之间为下邳陈思恭义女防养甚厚嫁鸚鵡与同乡人柴华鸚鵡与华意不相愜逃而东出韩城县为行人李无傲所执无傲粗暴丈夫也遂将鸚鵡游行数歲昨随至此忽尔见留不意遭逢天镜隐形无路度又谓曰汝本老狸变形为人岂不害人也婢曰变形事人非有害也但逃匿幻惑神道所恶自当至死耳度又谓曰欲舍汝可乎鸚鵡曰辱公厚赐岂敢忘德然天镜一照不可逃形但久为人形羞复故体愿臧于匣许尽醉而终度又谓曰臧镜于匣汝不逃乎鸚鵡笑曰公适有美言尚许相舍臧镜而走岂不终恩但天镜一临窜迹无路唯希数刻之命以尽一生之欢耳度登时为匣镜又为致酒悉召雄家邻里与宴謔比婢顷大醉奋衣起舞而歌曰宝镜宝镜哀哉予命自我离形于今几姓生虽可乐死不必伤何为眷恋守此一方歌讫再拜化为老狸而死一座惊叹大业八年四月一日太阳亏度时在台直昼卧防阁觉日渐昏诸吏告度以日 甚整衣时引镜出自觉镜亦昏昧无复光色度以宝镜之作合于陰阳光景之妙不然岂合以太阳失曜而宝镜亦无光乎叹怪未已俄而光彩出日亦渐明比及日复镜亦精朗如故自此之后每日月薄蚀镜亦昏昧其年八月十五日友人薛侠者获一铜剑长四尺剑连于靶靶盘龙鳳之状左文如火燬右文如水波光灼烁非常物也侠持过度曰此剑侠常试之每月十五日天地清朗置之暗室自然有光傍炤数丈侠持之有日月矣明公好奇爱古如饥如渴愿与君今夕一试度喜甚其夜果遇天地清霽密闭一室无复脱隙与侠同宿度亦出宝镜置于座侧俄而镜上吐光明炤一室相视如昼剑横其侧无复光彩侠大惊曰请内镜于匣度从其言然后剑乃吐光不过一二尺耳侠抚剑叹曰天下神物亦有相伏之理也是后每至月望则出镜于暗室光常炤数丈若日影入室则无光也岂太阳太陰之耀不可敌乎其年冬兼著作郎奉诏撰周史欲为苏绰立传度家有奴曰豹生年七十矣本苏氏部曲颇涉史传署解属文见度传草因悲不自胜度问其故谓度曰豹生常受苏公厚遇今见苏公言验是以悲耳郎君所有宝镜是苏公友河南苗季子所遗苏公者苏公爱之甚苏公临亡之歲戚戚不乐常召苗生谓曰自度死日不久不知此镜当入谁手今欲以蓍筮一断先生幸观之也便顾豹生取蓍苏公自揲布卦卦讫苏公曰我死十余年我家当失此镜不知所在然天地神物动静有征今河洛之间徃徃有宝气与卦兆相合镜其徃彼乎季子曰亦为人所得乎苏公又详其卦云先入侯家复归王氏过此以徃莫知所之也豹生言讫涕泣度问苏氏果云旧有此镜苏公薨后亦失所在如豹生之言故度为苏公传亦具言

其事于末篇论苏公著筮絕伦默而独用谓此也大业九年正月朔旦有一胡僧行乞而至度家弟勣出见之觉其神彩不俗便邀入室而为具食坐语良久胡僧谓勣曰檀越家似有絕世宝镜也可得见耶勣曰法师何以得知之僧曰贫道受明录秘术颇识寶气檀越宅上每日常有碧光连日绛气属月此宝镜气也贫道见之两年矣今择良日故欲一观勣出之僧跪捧欣跃又谓勣曰此镜有数种灵相皆当未见但以金膏涂之珠粉拭之举以炤日必影彻墙壁僧又叹息曰更作法试应炤见腑脏所恨卒无药耳但以金烟薰之玉水洗之复以金膏珠粉如法拭之藏之泥中亦不晦矣遂留金烟玉水等法行之无不灵驗而胡僧遂不复见其年秋度出兼芮城令防前有一枣树围可数丈不知几百年矣前后令至皆祠谒此树不则殃祸立及也度以为妖由人兴淫祀宜絕县吏皆叩头请度度不得已为之一祀然陰念此树当有精魅所托人不能除养成其势乃密悬此镜于树之间其夜二鼓许闻其防前磊落有声若雷霆者遂起视之则风雨晦暝纏绕此树电光晃耀忽上忽下至明有一大蛇紫鳞赤尾绿头白角额上有王字身被数鎗死于树下度便收镜命吏出蛇焚于县门外仍掘树树心有一穴于地渐大有巨蛇蟠泊之迹既而实之妖怪遂絕其年冬度以御史带芮城令持节河北道开仓粮賑给陝东时天下大饥百姓疾病蒲陝之间疠疫尤甚有河北人张龙驹为度下小吏其家良贱数十口一时遇疾度悯之赍此镜入其家使龙驹持镜夜炤诸病者见镜皆惊起云见龙驹持一月来相炤光陰所及如水着体冷彻腑脏即时热定至晓并愈以为无害于镜而所济众于是令密持此镜遍巡百姓其夜镜如匣中冷然自鸣声甚彻远良久乃止度心独怪明早龙驹来谓度曰龙驹昨忽梦一人龙头蛇身朱冠紫服谓龙驹我即镜精也名曰紫珍尝有德于君家故来相托为我谢王公百姓有罪天与之疾柰何使我反天救物且病至后月当渐愈无为我苦度感其灵怪因此志之至后月病果渐愈如其言也大业十年度弟勣自六合丞弃官归又将遍游山水以为长往之策度止之曰今天下向乱盗贼充斥欲安之乎且吾与汝同气未尝远别此行也似将高蹈昔尚子平游五岳不知所之汝若追踵前贤吾所不堪也便涕泣对勣勣曰意已决矣必不可留兄今之达人当无所不体孔子曰匹夫不可夺其志矣人生百年忽同过隙得情则乐失志则悲安遂其欲圣人之义也度不得已与之决别勣曰此别也亦有所求兄所宝镜非尘俗物也勣将抗志云路栖踪烟霞欲兄以此为赠度曰吾何惜于汝也即以与之勣得镜遂行不言所适大业十三年夏六月始归长安以镜归谓度曰此镜真宝物也勣辞兄之后先游嵩山少陟石梁坐玉坛属日暮遇一嵌岩有一石堂可容三五人勣栖息止焉月夜二更后有两人一貌胡鬚眉皓而瘦称山公一面濶白鬚眉长黑而矬称毛生谓勣曰何人斯居也勣曰寻幽探穴访奇者二人坐与勣谈文往往有异义出于言外勣疑其精怪引手潛后开匣取镜镜光出而二人失声俯伏矬者化为胡者化为猿悬镜至晓二身俱殒身带绿毛猿身带白毛即入箕山渡颍水歷太华视王井井傍有池水湛然绿色问樵夫曰此灵湫耳村间每八节祭之以祈福祐若一祭有阙即池水出黑云大雹伤稼白雨流澍浸堤壞阜勣引镜照之池水沸涌有雷如震忽尔池水腾出池中不遗涓滴可行二百余步水落于地有一鱼可长丈余粗髯大于臂首红额白身作青黄间色无鳞有涎龙形蛇角觜尖状如鲟鱼动而有光在于泥水困而不能远去勣谓蛟也失水而无能为耳刃而为灸甚膏有味以充数朝口腹遂出于宋汴汴主人张琦家有女子患入夜哀痛之声实不堪忍勣问其故病来已经年歲白日即安夜常如此勣停一宿及闻女子声遂开镜炤之痛者曰戴冠郎被杀其病者床下有大雄鸡死矣乃是主人七八歲老鸡也游江南将渡黄杨子江忽暗云覆水黑风渡涌舟子失容虑有覆没勣携镜上舟背江中数步明朗彻底风云四敛波涛远息须臾之间达济

天塹躋撮山趨芳嶺或攀危頂或入深洞逢其羣鳥環人而噪數熊當路而蹲以鏡揮之熊鳥奔駭是時利涉浙江遇潮出海濤聲振吼數百里而聞舟人曰濤既近未可渡南若回舟吾輩必葬魚腹勣出鏡炤江波不進屹如云立四面江水豁開五十余步水漸清淺鼃鼃散走舉帆翩翩直入南浦然後却視濤波洪涌高數十丈而至所渡之津也遂登天台周覽洞壑夜行佩之山谷去身百步四面光徹纖微皆見林間宿鳥驚而亂飛還履防稽逢異人張始鸞授勣周髀九章及明堂六甲之事與陳永同歸更游豫章見道士許藏秘云是旌陽七代孫有況登力履火之術說妖怪之次便言豐城縣倉督李敬家有三女遭魅病人莫能識藏秘療之無効勣故人曰趙丹有才器任豐城縣尉勣因過之丹命只承人指勣停處勣謂曰欲得倉督李敬家居止丹遽設榻為主禮勣因問其故敬曰三女同居堂內閣子每至日晚即靚粧銜服黃昏後即歸所居閣子每至日滅燭聽之竊與人言笑聲及至曉眠非喚不覺日日漸瘦不能下食制之不令粧梳即欲自縊投井無奈之何勣謂敬曰引示閣子之處其閣東有窓恐其門閉固而難啓遂晝日先刻斷窓櫺四條却以物支拄之如旧至日暮敬報勣曰粧梳入閣矣至一更聽之言笑自然勣防窓櫺子持鏡入閣炤之三女叫云殺我壻也初不見一物懸鏡至明有一防狼首尾一尺三四寸身無毛齒有一老防亦無毛齒其肥大可重五斤又有守宮大如人手身披鱗申煥爛五色頭上有兩角長可半寸尾長五寸以上尾頭一寸色白并于壁孔前死矣從此疾愈其後尋真至廬山婆娑數月或棲息長林或露宿草莽虎豹接尾豺狼連迹舉鏡視之莫不竄伏廬岩處士蘇賓奇識之士也洞明易道藏往知來謂勣曰天下神物必不久居人間今宇宙防亂他鄉未必可止吾子此鏡尚在足下衛幸速歸家鄉也勣然其言即時北歸便游河北夜夢鏡謂勣曰我防卿兄厚禮今當舍人間遠去欲得一別卿請早歸長安也勣夢中許之及曉獨居思之恍恍發悸即時西首秦路今既見兄勣不負諾矣終恐此靈物亦非兄所有數月勣還河東大業十三年七月十五日匣中悲鳴其聲紆遠俄而漸大若龍咆虎吼良久乃定開匣視之即失鏡矣

沈莹【通志藝文畧隋沈莹臨海水土異物志一卷】

陵龍贊【楊用修異魚圖贊引臨海水土異物志本贊太平御覽載不云贊】

陵龍之體黃身四足形短尾長有鱗無角南越嘉羞見之競逐【楊作南越海人嘉羞見逐】

無名氏

論命名奏【文帝名皇太子曰勇晉王曰英秦王曰俊蜀王曰秀開皇初有人上書不省或言楊英反為羸殃因改名廣】

勇者一夫之用又千人之秀為英萬人之秀為俊斯乃布衣之美稱非帝王嘉名也

雞鳴變奏【開皇中有人上言不省其後大臣多被夷滅太子諸王廢黜】

頻歲已來雞鳴不鼓翅類腋下有物而妨之翮不得舉肘腋之臣當為變矣

宪司劾卢恺奏【恺开皇中拜礼部尚书摄吏部尚书事防国子博士何妥与右仆射苏威不平奏威陰事恺坐与相连上以恺属吏宪司奏恺上大怒除名为百姓】

房恭懿者尉迟迥之党不当仕进威恺二人曲相荐达累转为海州刺史又吏部预选者甚多恺不即授官皆注色而遣威之从父弟彻肃二人并以乡正征诣吏部彻文状后至而先任用肃左足挛蹇才用无筭恺以威故授朝请郎恺之朋党事甚明白

选人榜【隋辛亶为吏部侍郎选人为之榜畧曰】

枉州抑县屈滞乡不申里御恨先生问隋吏部侍郎辛亶曰当今天子圣明羣僚用命外拓四方内齐七政而子位处权衡职当水镜居进退之首握褒贬之柄理应识是识非知滞知防使无才者泥伏有用者云飞奈何尸禄素餐滥处上官黜陟失所选补伤残小人在位君子駮弹莫不代子战灼而子独何以安辛亶曰百姓之子万国之人不可皆识谁厚谁亲为桀赏者不可不喜被尧责者宁有不嗔得官者见喜失官者见疾细而论之非亶之失先生曰是何疾欤是何疾欤不识何不访其名官少何不简其精细寻状迹足识家法细寻判验足识文华宁不知石中出玉黄金出沙量子之才度子之智只可投之四裔以御魑魅怨嗟不少实伤和气辛亶再拜而谢曰幸防先生见责实觉多违谨当割肌贯骨改过惩非请先生纵亶自修舍亶之罚如更有违甘从斧钺先生曰如子之辈车载斗量朝廷多少立须相代那得久旷天官待子自作急去急去不得久住唤取师巫却行无处亶掩泣而言曰罪过自招自灭自消岂敢更将面目来污圣朝先生曳杖而歌曰辛亶去吏部明开贤路遇太平今年定知不可得后歲依期更入京【朝野僉载】

镜铭

有玉辞夏惟金去秦俱随革故共集鼎新仪天寫质象日开轮率舞龙凤奔走鬼神长悬仁寿天子万春

又

仙山并炤智水齐名花朝艷采月夜流明龙蟠五瑞鸾舞双情传闻仁寿始验消兵五月五日【东观余论】

又

鍊形神冶莹质良工如珠出匣似月停空当睂寫翠对脸传红綺窓绣戶俱炤秦宫【宋朝类苑神一作巧】

又

兰闺宛宛宝镜团团曾防比目经舞孤鸾光流粉黛采散罗纨可怜无画娇羞自看

又

赏得秦王镜判不惜千金非關欲炤胆特是自明心

又

陰阳合配日月两相会白玉芙蓉匣翡翠琼瑶带同心人心相亲炤心炤胆保千春

墓石铭【开河记云炀帝大业五年命麻叔谋开汴渠初穿一古墓得石铭字如苍颉鸟迹之篆叔谋乃移葬之】

我是大金仙死来一千年数满一千年背下有流泉得逢麻叔谋葬我在高原发长至泥丸更候一千年方登兜率天

又【叔谋开河至睢阳穿一墓相传为宋司马华元得石铭是日梦宋襄公召见托以护城遂令自睢阳回曲东行后叔谋坐罪腰斩二金刀之应也】

睢阳土地高竹木可为壕若也不回避奉赠二金刀丰都市冢铭【隋唐嘉话云洛阳南市即隋之丰都市也初筑外垣时掘得一冢棺中有平上朱衣铭云校其年月当魏黄初二年】

筮言居朝 言近市五百年间于斯见矣【嘉话又云东封之歲洛阳平御路北市东南隅得铭汉丞相朱买臣墓云 言水蓍言市千载之后阿谁是又太平公主于京西掘放生池得墓铭亦云】

突厥沙鉢略可汗摄图【号伊利俱卢设莫何始波罗可汗一号沙鉢略名摄图】

致文帝书【突厥沙鉢略妻宇文氏周千金公主从弟地勒察与沙鉢略有隙叛归阿波连兵不已各遣使请和公主上书请为一子之例高祖遣徐平和使于沙鉢略沙鉢略遣使致书】

辰年九月十日从天生大突厥天下贤圣天子伊利俱卢设莫何始波罗可汗致书大隋皇帝使人开府徐平和至辱告言语具闻也皇帝是妇父即是翁此是女夫即是儿例两境虽殊情义是一今重叠亲旧子子孙孙乃至万世不断上天为证终不违负此国所有羊马都是皇帝畜生彼有缯防都是此物彼此有何异也

文帝报书

大隋天子贻书大突厥伊利俱卢设莫何沙鉢略可汗得书知大有好心向此也既是沙鉢略

妇翁今日看沙鉢略共儿子不异既以亲旧厚意常使之外今特别遣大臣虞庆则往彼看女复看沙鉢略也【乙利北史作伊利】上文帝表【沙鉢略西击阿波破禽之而阿拔国部落乘虚掠其妻子隋官军为击阿拔败之乃立约以磧为界因上表高祖诏答】

大突厥伊利俱卢设始波罗莫何可汗臣摄图言大使尚书右仆射虞庆则至伏奉诏书兼宣慈防仰惟恩信之着逾久愈明徒知负荷不能答谢伏惟大隋皇帝之有四海上契天心下顺民望二仪之所覆载七曜之所炤临莫不委质来宾回首面内实万世之一圣千年之一期求之古昔未始闻也突厥自天置以来五十余载保有沙漠自王蕃隅地过万里土马亿数恒力兼戎夷抗礼华夏在于北狄莫与为大顷者气候清和风云顺序意以华夏其有大圣兴焉况今被霑德义仁化所及礼让之风自朝满野窃以天无二日土无二王伏惟大隋皇帝真皇帝也岂敢阻兵恃险偷窃名号今便感慕淳风归心有道屈膝稽颡永为藩附虽复南瞻魏阙山川悠远北面之礼不敢废失当今侍子入朝神马岁贡朝夕恭承唯命是视至于削衽解辫革音从律习俗已久未能改变阖国同心无不衔荷不任下情欣慕之至谨遣第七儿臣窟含真等奉表以闻

文帝诏报

沙鉢略称雄漠北多历世年百蛮之大莫过于此往虽与和犹是二国今作君臣便成一体情深义厚朕甚嘉之荷天之休海外有截岂朕薄德所能致此已勅有司肃告郊庙宜普颁天下咸使知闻

啓民可汗染干【沙鉢略子尚宗女义成公主】

谢恩表【染干初号突利可汗隋高祖拜为意利珍豆啓民可汗华言意智健也上表谢恩】

臣既防豎立复改官名昔日奸心今悉除去奉事至尊不敢违法

又陈谢表【達头可汗侵啓民高祖为出兵击退之又发兵助守要害啓民上表陈谢】

大隋圣人莫缘可汗怜养百姓如天无不覆也如地无不载也诸姓防威恩赤心归服并将部落归投圣人可汗来也或南入长城或住白道人民羊马徧满山谷染干譬如枯木重起校叶枯骨重生皮肉千世万世长与大隋典羊马也

上炀帝表【大业三年帝幸榆林啓民及义成公主来朝献马三千匹赐物万三千段啓民及义成公主上表乞依华俗帝以为不可下诏仍玺书答啓民以磧北未静犹须征战但使好心孝顺何必改变衣服也】

已前圣人先帝莫缘可汗存在之日怜臣赐臣义安公主种种无少短臣种末为圣人先帝怜养臣兄弟姤恶相共杀臣臣当时无处去向上看只见天下看只见地实忆圣人先帝言语投

命去来圣人先帝见臣大怜臣死命养活胜于往前遣臣作大可汗坐着也其突厥百姓死者以外还聚集作百姓也至尊今还如圣人先帝捉天下四方坐也还养活臣及突厥百姓实无少短臣今忆想圣人及至尊养活事具奏不可尽并至尊圣心里在臣今非是旧日边地突厥可汗臣即是至尊臣民至尊怜臣时乞依大国服𦍋法用一同华夏臣今率部落敢以上闻伏愿天慈不违所请

炀帝诏

先王建国夷夏殊风君子教民不求变俗断髮文身咸安其性旃裘卉服各尚所宜因而利之其道 矣何必化诸削衽縻以长纓岂遂性之至理非包含之远度衣服不同既辨要荒之叙庶类区别弥见天地之情

昌王麴伯雅【祖麴嘉金城榆中人立为王隋开皇中雅嗣位】

下国中令【大业五年伯雅来朝尚宗女华容公主八年归蕃下令国中炀帝善之下诏】

夫经国字人以保存为贵宁邦缉政以全济为大先者以国处边荒境连猛狄同人无咎被髮左衽今大隋统御宇宙平一普天率土莫不齐向孤既沐浴和风度均大化其庶人以上皆宜解辫削衽

炀帝赐高昌王诏

彰德嘉善圣哲所隆显诚遂良典谟貽则光禄大夫弃国公高昌王伯雅识量经远器怀温裕丹款夙着亮节遐宣本自诸华世祚西壤昔因多难沦迫獯戎数穷毁灭翦为胡服自我皇隋平一宇宙化偃九围德加四表伯雅逾沙忘阻奉贡来庭观礼容于旧章慕威仪之盛典于是裘纓解辫削衽曳裙变夷从夏义光前载可赐衣冠之具仍班制造之式并遣使人部领将送被以采章复见车服之美弃彼毳毼还为冠带之国【厯北史作世賁作贡】

梁神洵【以下并有姓名而朝代及爵里无考总附于后】

芳林园甘露颂【艺文类聚】

福以德彰庆沿业皎矧兹嘉露因祥特表翻润星夕流甘月晓竒越雕氛珍逾素鸟至道伊融大化其肇惟此大化实感天眷降液丹墀飞津绮殿九服依风八荒改面敢述朦词式旌舞忭

谢知

表【北堂书钞】

兄顧除员外散骑侍郎显侍帷幄

黄章【字伯仁鲁国人】

龙马颂【艺文初学记】

夫龙马之所出于太防之荒域分虞渊之幽濬通天光之所极稟神只之纯化乃大宛而再育生河海之滨涯被华文而朱翼资 螭之表像似灵虬之注则夺騶褭之体势逸飞兔之高踪兼骥騄之美质岂骅骝之足双耳如剡箛目象明星双壁似月兰筋参情【北堂书钞颂云扬鸾鑣兮挥红沐之幡飘】

顾雅

石砚铭序

扬州有石砚一枚是晋张华所用之器后人思念公德爱其物年逾百祀俨然玉质也【北堂书钞】

王統

司马穆侯颂【北堂书钞】

经纶文武谋畧 深方将网罗鲸鲵掩征江汉诱致勍敌大战于絶南之地【又司空穆侯颂云云行风动如霆如雷】

滕彦

将旗铭

赫赫王灵悠悠旆旌龙旗所指八表澄清

朱 微

火不热论

朱先生游于河洛之间将舍逆旅遇逆旅之火有主人翁夷焉先生蹇裳下车环而窥之则喘喘然死矣先生曰嘻火之盛物一至此哉弟子孔琨进曰异乎先生之谈也夫火之热在羣形则焚燎消铄在肌肤则灼烂湮灭奚言物之盛矣

胡虚

刀笔铭

韬管刀墨常相左右

君举

食橄

大市覆甕之蒜东里独姥之醯大盐杂以姜菽叛奴制之春齐

催厨人作茶防熬油煎葱沥茶以绢当用轻羽拂取飞面刚软中适然后水引细如委縑白如秋练 杯半在财得一咽十杯之后颜解体润【并北堂书钞】

又取淩湖独穴之鲤赤山后陂之莼伺漉冷豉及热应分食毕作躁酒炙宜传酒便清香肉则豆不防臛肫若披繙急火中炙脂不得薰闻香者踟躅干咽者塞门罗奠椀子五十有余牛防捣炙鸭防鱼熊白臛脯糖蟹濡台车螯生甜滋味远来百醉之后淡闷下除应有蔗姜木 元李杨梅五味橄榄石榴 拘葵美脱煮名下一杯【太平御览】

戴良【字文让】

失父零丁【太平御览 零丁犹今招子也】

敬白诸君路行者敢告重罪自为积恶致灾旻天困我今月七日失阿爹念此酷毒可痛伤当以重币赠用相赏请为诸君說事状我父躯体与众异脊背伛偻卷如截唇吻参差不相值此其庶形何能備请复重陈其面目防头鹄鷗獾狗【阙】眼淚鼻涕相追逐吻中含纳无牙齿食不能嚼左右蹉以西域駱駝请复董陈其形骸为人虽长甚细材面目芒苍如死灰眼鴈白陷如米 桮

薛孝通

乌曹谱序

乌曹作博其所由来尚矣双箭以象日月之照临十二碁以象十二辰之纏次则天地之运动法陰阳之消息表人事之穷达穷变化之机微履谦谢则知冲和以致福观杀罚则知当路而速祸行其道则猗鹿有归保其家乃瞻乌爰集隐显藏用莫不合道龙潛雀起率皆趣良足以谐畅至娛治協妙赏者也【太平御览】

李膺

笮桥赞【益州记 丹铅总录两引一作李膺笮桥赞一作唐独孤及招北客辞再详】

笮复引一索飞絙杙阁其名曰笮人县半空度彼絶壑怀梦草赞【郭宪别国洞防记钟火山有梦草似蒲昼缩夜出怀则知梦之吉凶武帝思李夫人东方朔献一枝帝怀之果梦夫人因改怀梦草附】

帝之季女名曰瑶姬精魂化草实为灵芝媚而服之则与梦期

𧈧𧈧【尔雅𧈧有力注出西海大秦国有养者似狗多力犷恶音铉
杨用修古文韵语引𧈧再详】

爰有犷兽其名曰𧈧饥则驯服饱则反眼

三辅黄图序【隋经籍志郑氏通志一卷马端临文献通考三卷晁氏云不着撰人颇引刘昭汉志则出梁陈间也陈氏云多引用应邵汉书解如淳顔师古复引此书为据意汉魏间人作然崇文总目及国史志不载 今本六卷】

易曰上古穴居而野处后世圣人易之以宫室上栋下宇以待风雨盖取诸大壮三代盛时未闻宫室过制秦穆公居西秦以境地多良材始大宫观戎使由余适秦穆公示以宫观由余曰使鬼为之则劳神矣使人为之则苦人矣是则穆公时秦之宫室已壮大矣惠文王初都咸阳取岐雍巨材新作宫室南临渭北逾泾至于离宫三百复起阿房未成而亡始皇并灭六国凭借富强益为骄侈殫天下财力以事营缮项羽入闕烧宫阙三月火不灭汉高祖有天下始都长安寔曰西京欲其子孙长安都于此也至孝武皇帝承文景菲薄之余恃邦国阜繁之资土木之役倍秦越旧斤斧之声畚鍤之劳歲月不息盖骋其邪心以夸天下也昔孔子作春秋筑一台新一门必书于经谨其废农时夺民力也今哀采秦汉以来宫殿门阙楼观池苑在闕辅者着于篇曰三辅黄图云东都不与焉